





47795/B/2



Digitized by the Internet Archive
in 2019 with funding from
Wellcome Library

https://archive.org/details/b30506207_0002

A. de Gratloup

A. de Gratloup

DE
RECONDITA
FEBRIUM
INTERMITTENTIUM,
TUM REMITTENTIUM NATURA,
ET DE EARUM CURATIONE;

variis experimentis & observationibus illustratâ:

Editio secunda, auctior & emendatior.
auctore Senac.

Rerum eventa magis arbitror, quam causas quæri oportere;
& hoc sum contentus quod etiam si quomodo quidque fiat igno-
rem, quod fiat intelligo.

Tullius Cicero.



GENEVE,
Apud FRATRES DE TOURNES.

MDCCLXIX.

1851

1852

1853

1854

1855

1856

1857

1858

1859

1860

1861

1862

1863

1864

1865

1866

1867

1868

1869

1870





EDITORIS

PRÆFATIO.

AD promovendam Medicinam nil ferme usquam ab eam profitentibus prætermissum; in eâ statim illustrandâ desudârunt viri inter antiquos insignes, tum multi subsequenter sæculis ingenii famâ conspicui; apud recentiores deinde accuratiori studio agitari cœpit hæc disciplina; de eâ denique ingentem librorum copiam nostra profudit ætas; sed parem doctrinæ ubertatem ex tot laboribus non profluxisse meritò queri

possumus; an id autem naturæ, an artis, aut artificum vitiotribuendum?

Naturalis equidem Philosophia ita exculta est, ut recentiores longo intervallo sequantur antiqui; in intimos naturæ recessus penetravit quorundam industria; imò & humani ingenii limites transcendisse aliquando videtur felix curiositas; si causas primas non attigerit, effectus tamen & phænomena assequi potuit; luculenta eorum saltem prostat historia, omniaque veluti ad lancem expensa ostentantur.

Longè dispar profectò est Philosophorum & Medicorum ratio; illi umbratiles, experimentis dediti, iisque solummodo incumbentes plura observare & invenire potuerunt; Medici verò multis impliciti continuo hanc & illam vagari coguntur; assidue

me-

meditari , veterum & recentiorum
 versare monumenta , nova semper ex-
 periri & ægris adesse , æquè necesse
 & difficile est ; tempus ergo vel expe-
 rientia sæpe felicissimis defuit ingeniis ;
 quorum ferax ubique fuit Medicina ;
 tanta est ejus artis moles , ut eâ veluti
 obruatur mens ; hùc accedit , ut vix non
 nisi extremâ ætate , quam pauci attin-
 gunt , sufficienti supellectile instructi
 esse possint , vel ii ipsi qui summis labo-
 ribus eam sibi comparare conati sunt.

Artis incremento imprimis officit
 mos ille , seu cæca ambitio de omni-
 bus agendi morbis ; divinî ferme opus
 esset ingénii universam amplecti Me-
 dicinam ; fatius ad eam promoven-
 dam esset , quibusdam tantùm affec-
 tibus observandis incumbere , omnia
 quæ de iis occurrunt colligere , & tan-

dem post feram ætatem ea conferre , componere , ad causas revocare , & inde curationis principia deducere.

His ductus rationibus operis hujus Author magnam collegisse videtur observationum vim , & imprimis expendendis febrium phænomenis non infelicem navasse operam ; cùm casu in ejus quædam incidissem collectanea , id imprimis in iis mihi arrisit , quod ab omni hypothese alienus , & experientiæ addictus esset ; ea sola artem fecit , ipsâque tantummodo , præeunte tamen rationis face , duci tutò possumus.

Quod statim negotium faceffit , est rerum ordinanda series ; nexu quodam cohæreant oportet innumera , quæ omnino dissident , & quæ in diversas veluti vias mentem abducunt ; has quidem ambages effugisse videntur qui
nudam

nudam febrium intermittentium diagnosim, prognosim & curam tradiderunt, numerisque distincta aut minutim secta exhibuerunt phænomena & præcepta; sed ita rerum conspectus potius, quàm ipsa natura mentis oculis objicitur; disjuncta & in indices quodammodo redacta perlustrando, quasi per salebras fertur ingenium, nec eorum rationem ei licet perspicere.

Non eâ methodo ductus incessit Author, quicumque ille sit; de omnibus seorsim agit, ea suo loco collocat, & quæcunque ad ea attinent; experientiâ nixus prosequitur; statim quidem varias febrium species attingit, deinde verò ad causas accedens iis inquirendis incumbit, seu potius quæcunque finxerunt alii veluti commenta respuit, iisque tandem explosis,

sis, verosimilia tradit; eâ tamen brevitate & sapientiâ quæ Medicum decent & Philosophum.

His præmissis ad febrium varia phænomena progreditur; de frigore nimirum prævio, de insequenti calore, de sudoribus eum excipientibus fusè & seorsim differit, & symptomatum eorum luculentam tradit historiam; quàm vario deinde more incedant variamque præ se ferant speciem ostendit, & eorum causas, si quæ se prodant, non prætermittit; at quæcunque de iis adducit, observationibus, tanquam firmissimo Medicinæ fundamento, subjicit.

Sed cùm eæ causæ quibus statim temporibus reduces suscitantur paroxysmi tenebris obvolutæ sint, anxie inquit Author, quæ nam aliis in morbis pe-
rio-

riodorum febrilium fequantur morem, ad easque referri possint, vel lucem aliquam iis affundere; deinde verò quæ consequi soleant fusè ostendit, iisque immoratur imprimis quæ ad illustrandam curam inservire possunt.

Hâc strata viâ veneni febrilis vim prosequi necesse erat, easque perlustrare febres, quæ sub falsâ intermittentium specie decurrunt; sed non minùs necesse erat eas quæ à proprio desciscunt ingenio, & quæ aliquando veluti sub larvâ latere solent, detegere; tales sunt remittentes aut compositæ febres, quæ continuarum mentiuntur indolem; eorum autem omnium principia è naturæ gremio eruere conatur Author, & ubique experientia prætendit facem.

Quæ sequuntur verò propiùs ad

CU-

curationem spectant; veneni scilicet febrilis effectus, partium læsiones quas inferre solet, indeque impendens discrimen; ea, inquam, omnia sigillatim & summâ curâ in hoc traduntur opere; deerat profectò eorum omnium quæ post febres intermittentes occurrunt accurata historia; licet autem pleraque hæc ignota non sint, quisnam eorum congeriem mente aut scriptis complexus est?

Hinc ad multa alia progressus; ad intermittentes & ad remittentes, quæ mali moris sunt, aditum sibi paravit; quod verò magni momenti est, earum signa diligentissimè tradit; ne autem ulli relinquatur errori locus, iique morbi in se ipsis veluti in speculo spectari possint, variam epidemicarum febrium adornat historiam, variosque ægro-

ægrorum effingit casus, & veluti oculis subjicit.

His denique veluti fastigium imponitur, accuratâ vitiorum quæ in cadaveribus occurrunt exaratâ historiâ; quanti momenti hæc sint cuique patet œconomia animalis non ignaro; his superstructa sit oportet universa Medicina; non equidem corporum sectione ad primarias causas licet semper accedere; eæ enim sæpe abditæ sunt; sed earum effectus clariori in luce reponuntur; quænam sint partium læsiones v. g. in febre intermittenti, sola nos potest docere anatomia.

Quæ ad causas earumque effectus, tum ad febris decursum spectant, libris duobus traduntur; totidem verò circa curam versantur; quod autem in plerisque non occurrit scriptis, non minus

minus fusè & luculenter instituitur medendi methodus quàm morbi ipsius historia; statim de remediis generalibus, de eorum viribus, de tempore quo in usum vocari debent, inquiritur; dein verò expenduntur ea quæ specificorum nomine venditantur; propria denique febribus intermittentibus medendi methodus ex variis experimentis deducitur.

Ea autem triplex occurrit, & alia alteri mutuam præstare potest operam: *primâ* est ea quam usurpârunt Antiquiores, & quam adhibere quandoque cogimur, generalis nimirum, quæ remediis uti docet aliorum morborum curationi dicatis; in variis regionibus viget ea methodus & hoc inest ei commodi quod nusquam noxia esse possit, & quod naturæ ductum motusque sequatur. *Se-*

Secunda est illa quæ sudoriferis & aperientibus febrile venenum aggreditur, frigus præcavet & febrem simul avertit: quæ autem hîc traduntur, observatione solâ variisque prodeunt innixa experimentis; magni momenti est methodus hæc, non quidem incognita, sed non satis exculta; variis in febribus aliquando veluti sacra anchora est, & eâ sublata summum vitæ imminet discrimen.

Tertia vulgarisque methodus circa propria versatur remedia; statim autem corticis peruviani, divino veluti afflatu inventi, expenduntur vires; sed præjudicatæ opinioni, quæ apud multos variis in regionibus invaluit, occurrendum erat: ideo remedio huic exprobratæ noxæ in medium afferuntur; non quidem eas immeritò ubique

que

que incusari credit Author; sed perperam institutæ curandi methodo eas tribuendas asserit; postea verò caute-
las adhibendas diligenter expendit, & quæcunque profert tum ratione tum observationibus comprobari videntur.

Postquam cortex peruvianus ab omni suscipicione vindicatus est, ejus exhibendi rationem definire Author aggreditur, variisque simul legibus & præceptis eam subjicit: deinde verò, quod plerisque scriptoribus ferme intactum inaratumque dici potest solum, impedimenta omnia huic remedio adversantia accuratè prosecutus est; oriuntur ea vel ex corporum temperie, vel ex morbis prægressis, aut denique ex ipsâ febre, sive ex perversâ medendi methodo; sunt sæ-

pe hæc impedimenta veluti totidem morbi, quibus accommodandus corticis usus, aut quibus ab eo abstinere cogimur.

Quod verò ægros & Medicos summo opere vexat, est febrium diuturnitas & pertinacia; multæ occurrunt quæ vix curari possunt; & quandoque, cum restituti per certum tempus videntur ægri, in pristinum relabuntur statum: causas autem ejusmodi contumaciæ accuratè profequitur Author, variamque ei medendi inquirat methodum; abusum imprimis corticis peruviani in his febribus toties incusandum notat; eo exasperari sæpe solent omnia; oriuntur inde obstructions viscerum, aliaque eorum vitia, quæ per totam sæpe protrahuntur vitam; præceptis ergo ex certâ
ex-

perientiâ haustis ad ea avertenda opus erat.

Ad febres compositas, remittentes, & malignas tandem delabitur curatio: occurrunt eæ frequenter; &, si inexpertus sit Medicus, easve non dignoscat, ultimum sæpe instat discrimen: quod verò vix credi posse videtur, morbus adeo feбри intermittenti primâ fronte absimilis, pulveris peruviani operâ compressus, statim sæpe quiescit; certo tamen modo exhibendus est, & alia nonnunquam cum eo usurpanda sunt remedia; ô nimium felix humanum genus, si talia adversus alios morbos specifica è sinu suo protulisset natura! manet fortè nepotes hæc felicitas.

Optandum sanè fuisset ut in lucem editum esset opus hoc ab ipso Authore,

thore, & ex ipsius autographo typis
mandatum; amanuensium enim incu-
riâ varii irrepperunt errores; sed tan-
dem in exemplar incidi mendis ex-
purgatum, &, quod majoris momen-
ti est, plurimis illustratum observa-
tionibus & præceptis auctum.





INDEX LIBRORUM ET CAPITUM.

LIBER PRIMUS.

De febrium intermittantium simplicium
natura & de ipsarum symptomatis
& decursu.

CAPUT I. **D**E *Varia febrium intermitten-*
tium specie. pag. 1

CAP. II. *De variis temporibus in quæ inci-*
dunt ejusmodi febres. 8

CAP. III. *De variis eorum placitis qui fe-*
brium intermittantium causam in primis viis,
aut in pancreate, aut in mesenterio, aut in
liene, vel denique in organis transpirationi
dicatis esse contendunt. 15

CAP. IV. *De eorum opinione qui è nervis*
febrem

- febrem deducunt intermittentem.* pag. 19
- CAP. V. *De eorum sententiâ, qui bilem aut materiam quandam putridam, ut veram febris intermittentis causam incusarunt.* 24
- CAP. VI. *In quo probatur argumentis febrili causa per totum corpus diffusâ hepar imprimis affici.* 28
- CAP. VII. *De causis remotis.* 33
- CAP. VIII. *De Frigore febrili.* 39
- CAP. IX. *Quinam sint frigoris febrilis effectus.* 47
- CAP. X. *De calore & sudore febrili.* 57
- CAP. XI. *De apurexia quæ paroxysmos sequitur.* 66
- CAP. XII. *De variâ ratione qua febris evanescit & exsuscitatur, vel mutatur ejus incessus.* 71
- CAP. XIII. *An in aliis affectibus insit aliquid quo duci possimus ad periodorum febrilium causam.* 77
- CAP. XIV. *De diversâ causæ febrilis actione in variis febribus, in vernalibus v. g. & autumnalibus.* 84
- CAP. XV. *De iis febribus quæ ab intermittentibus alienæ earum speciem præ se ferunt.* 91
- CAP. XVI. *Quid ex præcipuis febrium symptomatis sequatur aut metuendum sit.* 98

XX INDEX LIBRORUM

- CAP. XVII. *De variis affectibus qui febres intermittentes comitantur.* pag. 106
- CAP. XVIII. *De affectibus qui post curatas febres supersunt.* 112
- CAP. XIX. *De vario relapsu in febres intermittentes.* 119
- CAP. XX. *An salutare esse possint febres intermittentes, cum symptomatis jam memoratis stipentur, & in tot abeant periculosos affectus.* 125
-

LIBER SECUNDUS.

De Febribus quæ ab intermittentium more degeneres alienam induunt faciem.

- CAPUT I. **D**E febribus compositis & larvatis in genere. 130
- CAP. II. *Ut variè latere possit febrile venenum, & in aliena à febre intermittenti erumpere symptomata.* 133
- CAP. III. *Ut in febrem mali moris abeat febris intermittens simplex.* 141
- CAP. IV. *Ut commutentur febres intermittentes in alias, sive remittentes, sive continuas.* 150
- CAP. V. *Ostenditur variis observationibus, quàm variæ sint febrium continuarum species.* 2

ET CAPITUM. XXI

cies, in quas abeunt febres intermittentes.
pag. 160

CAP. VI. *De febribus continuis & mali moris in quas mutantur febres remittentes.*
164

CAP. VII. *Ut per se ipsas dignosci possint febres remittentes, sub aliâ specie latentes, aut larvatae.*
174

CAP. VIII. *Ut per propria aliis febribus symptomata innotescant certiùs quæ ad febres remittentes pertinent.*
180

CAP. IX. *Ut tandem quæ intermittentibus seu remittentibus ob alias causas & ob certarum partium affectus intermiscantur detegi possint.*
186

CAP. X. *De partium vitiis quæ in cadaveribus post febres intermittentes reperiuntur.*
193

LIBER TERTIUS.

De remediis generalibus tum peculiaribus aut specificis & de eorum viribus.

CAPUT I. **Q**Uam difficilis sit febrium intermittentium curatio. 200

CAP. II. *Ut natura febres intermittentes, curet.*
205

CAP.

XXII INDEX LIBRORUM

CAP. III. <i>Ut ad eos naturæ motus referri possint curationes singulares, quæ casu fieri, aut remediis quæ nullam cum febre rationem habere videntur.</i>	pag. 212
CAP. IV. <i>An diætâ, ut fundamento, niti debeat omnium febrium intermittentium curationio.</i>	222
CAP. V. <i>De Venæ sectione.</i>	228
CAP. VI. <i>De evacuatione primarum viarum.</i>	235
CAP. VII. <i>De purgantium usu.</i>	243
CAP. VIII. <i>De aperientium usu.</i>	251
CAP. IX. <i>Quonam tempore exhibenda sint modò dicta remedia.</i>	256
CAP. X. <i>De remediis peculiaribus seu febrifugis propriè dictis, quæ emetica, vel purgantia, vel sudorifera sunt.</i>	265
CAP. XI. <i>De aliis remediis vi quâdam arcanâ vel specificâ agentibus.</i>	275

LIBER QUARTUS.

De methodo in remediorum antifebrilium usu adhibendâ.

CAPUT I. P <i>Ræmittuntur quædam ad instituendam curationem pertinentia,</i>	289
---	-----

CAP.

CAP. II. *De methodo quæ remediis generalibus aut soli feбри intermittenti non dicatis eam curat.* pag. 296

CAP. III. *De methodo quâ per sudores curantur febres intermittentes.* 305

CAP. IV. *Quomodo exhibenda sint sudorifera adversus febres.* 312

CAP. V. *De methodo curandi febres per corticem peruvianum.* 317

CAP. VI. *De corticis peruviani non innoxiiis effectibus.* 324

CAP. VII. *Quanam cautelæ adversus noxios corticis peruviani effectus adhibendæ sint.* 334

CAP. VIII. *De Methodo observandâ in corticis peruviani usu.* 343

CAP. IX. *An quartana febris peculiarem sibi vindicet curationem.* 354

CAP. X. *De impedimentis quæ in antecedentibus certarum partium affectibus, aut in variis temperamentis occurrunt.* 363

CAP. XI. *De impedimentis ex ipsâ febre, ex vitiis quæ in varias partes inferre solet & ex perversâ methodo ortum trahentibus.* 372

CAP. XII. *De curatione febrium quæ cùm desierunt iterum exsurgunt, tum quorundam symptomatum quibus stipari solent.* 380

XXIV INDEX LIBRORUM

CAP. XIII. *De curatione februm intermittentium malignarum.* pag. 394

CAP. XIV. *De curatione februm remittentium vulgarium.* 401

CAP. XV. *De februm continuarum remittentium quæ mali moris sunt curandi methodo.* 409



LIBER



LIBER PRIMUS
DE
FEBRIUM INTERMITTENTIUM
SIMPLICIUM NATURA,
ET DE IPSARUM
SYMPTOMATIS ET DECURSU:

CAPUT I.

De variâ febrium intermittantium specie.

FEBRIS intermittens ea est quæ certis periodis distincta alternè insurgit, & definit ad certum tempus; statis scilicet horis & diebus, præmisso frigore incandescit, & deinde sensim remittit, donec ad veram deveniat apurexiam: prout autem variis intervallis distant à se invicem ejus recursus, varia sortitur nomina;

A

na;

na ; quæ quotidie invadit , & evanescit , *quotidiana* nominatur ; quæ alternis diebus recurrit , *tertiana* ; quæ verò quartâ quâque die , *quartana* ; ea denique cujus accessiones inæquali incedunt gressu , & incertis variisque redeunt temporibus , *vaga* & *erratica* dicta est.

Alias quidem vetustior commemoravit ætas , cæque recentiori ævo feruntur observatæ , ut *quintanæ* , *sextanæ* , *septanæ* & *nonanæ* ; quintanas profectò quandoque occurrere nemo inficiari potest ; sed aliarum obscura est , imò planè incerta periodus ; si illas negare non sinat præstantissimorum Medicorum fides , fateamur oportet eas rarò fuisse observatas ; imò & in ipsis quæ talem præ se ferunt speciem , subest ut plurimum quidam dubitandi locus ; possunt nimirum fortuitò incidere quidam paroxysmi in sextum septimumve diem ; an verò constanter , aut per certum tempus , eodem processerint gressu , vix licet asserere.

His tamen , utcumque rationi consentaneis , nimium tribui nolim ; obscurior est naturæ incessus ; quæ ab ipsius more aliena putamus , cum ipsâ sæpè consentiunt ; possunt paroxysmi insolitis prodire temporibus ; non mirum esset si sextâ quâque die insurgeret febrilis vis , cum tertiâ & quartâ possit incandescere ; imò deficere posset

unus aut alter tertianæ paroxysmus, & inde quintana aut septana videretur febris; idem defectus in quartanâ varios poterit inducere typos.

Mihi aliquando occurrit quid ejusmodi, varium tamen & mutabile; ideoque nil inde deduci potest; quidam nimirum tertianâ laborabat nothâ; cùm verò eâ per octo dies omnino defunctus videretur; ecce diversas accessiones, quæ modò quintâ, modò sextâ, aliàs septimâ insurgebant die; certum autem est quod ii paroxysmi ejusdem essent naturæ ac illi quos antea expertus fuerat æger; cortice enim peruviano tandem sublatis sunt.

Similia fortasse potuerunt quibusdam occurrere exempla, infrequentia tamen, atque incerta ut plurimum; magis autem dubiæ quoad naturam & fomitem mihi videntur illæ febres quarum paroxysmi longiori distant intervallo; eas imprimis quæ singulis quindecim diebus aut singulis mensibus recurrere memorantur, vix adduci possum ut credam de genere fuisse intermittentium; pendere possunt adeo dissiti insultus à causis peculiaribus, ab hæmorrhoidibus, v. g., aut à menstruis, sive à quodam alio affectu statis temporibus resurgente.

De iis igitur solis agemus febribus quæ non ita insolitum sequuntur typum; quo-

tidianam tamen inter veras intermittentes non numerabimus ; earum enim natura omninò diversa est, ut aliàs ostendemus ; huic quidem sententiæ adversantur multi qui de quotidianâ intermittenti non minùs confiderent quàm de tertianâ egerunt ; sed si, eorum pace, quid sentiam proferre liceat, iis multùm à vero, etiam cùm observationibus duci viderentur, aberrare contigit.

Quæ intermittentium nomine præ aliis insigniri debent febres, tertianæ sunt & quartanæ ; ex his constant aliæ omnes ferme quæ periodis distinctæ incedunt, ut tertiana, & quartana duplex : ita ordinatè procedunt earum paroxysmi, ut facilè dignosci possit ipsarum natura & compositio.

Cùm v. g. occurrunt quæ singulis diebus exsurgant & desinant, si unâ die levior, alterâ verò gravior sit paroxysmus, illico patet duplicem adesse febrim, aliam nimirum levioribus paroxysmis, alteram verò gravioribus constantem ; leviores levioribus, & graves gravioribus tertiâ quâque die respondent ; quæ igitur febris primâ fronte quotidiana videbatur, ea ex duplici componitur tertianâ.

Faciliùs dignoscitur quartanæ duplicis ratio & incessus ; exoritur scilicet febris hæc, & desinit certâ horâ, duobus successivè diebus, & tertio solet quiescere ; at
quar-

quarto iterum, & quinto se prodit; hinc paroxysmus primus & tertius, secundus & quartus duobus diebus intermediis à se invicem distant; rarior quidem est hæc compositio, sed tamen in quartanarum frequentia solet occurrere, nec ullus est Medicus in praxi versatus qui eam sæpius non observârit.

Si quibusdam habenda fides, occurrunt tertianæ & quartanæ triplices; triplex dicitur tertiana, cum duorum dierum spatio tres insurgunt paroxysmi, unus v. g. singulis sexdecim horis; observatus est ejusmodi typus *Galeno & Riverio*, sed quomodo tertianæ speciem referre credi potest? an quia intra horas 48 tres successivè insurgunt paroxysmi? an quia *tertiâ* quâque die post eos incidit intercalaris quies sive apurexia aut remissio? num autem inter insolentia febrium phænomena id reponi debet? in ejusmodi typo, semper incerto, nil nisi *ternarium* quorundam phænomenon numerum licet animadvertere; abest omnino veræ tertianæ ritus & incessus.

Aliquando equidem in diem eandem incidunt duo paroxysmi eosque insequitur intercalaris quies; potest tunc quæ ita incidit febris, tertiana duplex appellari, cum sint reverâ duæ quæ *tertiâ* quâque die redeunt; sed hujusmodi typus infrequens om-

nino est, nec peculiare meretur nomen; nosse sufficit abnormes esse posse paroxysmos; modò scilicet plures unâ die, modò unum aut nullum alterâ occurrere; mira profectò exorta est in Medicinâ confusio ex eo quod eadem diversis rebus, aut iisdem diversa indita sunt nomina.

Quod verò ad triplicem attinet quartanam, ea, si spectentur tantummodo paroxysmi, à quotidianâ vel tertianâ duplici distingui non potest; nec profecto aliud quidpiam in eâ observârunt Medici, nisi paroxysmum, qui in quartanæ duplicis intercalarem diem incidit; talis v. g. fuit *Celsi* sententia, qui de eâ febre in quotidianam mutatâ egit; eum secutus est *Hoffmannus*, qui quotidianum ex quartanâ ortum insultum memorat, ita tamen, ut paroxysmi non eâdem horâ quotidie suboriantur, sed quartâ quâvis die accessionis terminum conspirent.

Tertianas & quartanas quadruplices tum sextuplices quidam memorant, sed opinione potiùs quàm observatione ducti multiplicem hanc febrium genesim in medium adduxerunt; plures atque inordinatos viderunt paroxysmos, in eorumque incertâ successionem vel reditu quosdam finxerunt typos; sed primò quidem, verè intermittentes non sunt ejusmodi febres; fieri enim nequit

quit ut inter earum accessiones sit apurexia, aut ut eæ tertianarum vel quartanarum more sibi respondeant; certum enim nequaquam fervant ordinem, vel si eum fervare videantur, brevi diverso, ab eo cœperunt, feruntur gressu, eoque semper turbato; quod verò rem totam conficit, Medicis longâ experientiâ exercitatis vix quidquam simile occurrisse memoratur.

Si quæ tamen incidant ejusmodi febres, eas ad incertas seu erraticas referre oportet; earum naturam & ingenium graphicè descripsit *Celsus*; » accessiones, inquit ille, » modò singulæ singulis diebus fiunt, modò » binæ pluresve concurrunt; ex quo sæpe » evenit ut quotidie plures accessiones remissionesque sint; sic tamen ut una quæque alicui priori respondeat: « hæc quidem ab eo Authore de quotidianâ dici videntur; sed capite de febrium speciebus, expressè vagas indicat; » si plures, inquit, » accessiones veniunt... si impares sunt... » si altera gravior, altera levior, si altera » longior vel brevior &c.

In alias febres compositas abeunt simplices intermittentes; in continuas scilicet, ut videbimus, possunt commutari, servato tamen, partim saltem, quo à cæteris distinguuntur, typo; potest fieri præterea ut cum aliis incedant morbis; sed de fe-

bribus simpliciter intermittentibus agemus; ut melius deinde compositarum innotescat natura.

CAPUT II.

De variis temporibus in quæ incidunt ejusmodi febres.

QUACUNQUE equidem tempestate & ubique prodire possunt febres intermittentes; sed certa eis à naturâ præfixa sunt & quasi dicata tempora, ver scilicet & autumnus; earum exortum, progressum, finem & reditum summâ cum diligentia profectus est Sydenhamus; nosse interim satis est ipsas modò citius modò ferius exoriri & evanescere; Januario mense aliquando, quod rarum est, Februario verò ut plurimum se exerere, Junio & Julio vix quoddam sui vestigium relinquere; mense Augusto, citius tamen nonnunquam, caput attollere; ut plurimum verò non nisi versus Septembris initium apparere, eas accedente hiemali frigore comprimi ocyùs vel tardiùs; hæc denique omnia pendere ex regionum diversitate, ex corporum constitutione, ex tempestatum vi, ex primaria morbi causâ, &c.

Hæ

Hæ autem febres, vel sporadicè id est sparsim hæc & illac disseminatæ, vel epidemicè id est certis incumbentes regionibus & in plerosque aut plurimos saltem sævientes, grassantur; quò autem graviores futuræ sunt eò citiùs incipiunt; at licet nil insit corporibus quod ipsas possit accerere; & licet ea adeo diversa sint, tamen æquè ferme morbo adventanti patere videntur; imò, ut experienciâ constat certissimâ, quæ firmiori pollent virium robore, ea magis epidemiæ grassantis experiuntur vim: ipsâ quidem *Sydenhamus* cachecticos minùs attingi existimavit; mihi verò secus non rarò visum est; si qui à latè serpenti labe immunes occurrerint, maxime pueri, vel quibusdam affectibus nerveis tentati; nil tamen quod perpetuum sit hæc de re licet statuere.

At sive sporadicè seu epidemicè insurgant febres intermittentes, non simul aut quovis tempore prodeunt omnes earum species; modò scilicet tertianæ, modò quartanæ, aliàs tertianæ duplices, sive continuæ vel mali moris, aut denique inconstantes & anomalæ grassari possunt; una ergo eademque causa diversa sit, seu acriùs urgeat oportet per certas tempestates, quædam scilicet febris peculiaris veluti dominio potiri solet; sed temporis lapsu quæ à vul-

vulgari aberrant typo, vel quæ compositæ sunt, ad simplices sæpe, id est ad insitum ipsis ingenium redire observantur.

His præmissis inquirendum superest quare vere & autumnò oriantur febres intermittentes potius quàm aliis temporibus? quod ver quidem spectat, nonne eâ tempestate, veluti novo igne admoto, aut terræ fœcundo halitu exfuscitatur vitæ fomes? nonne cùm aperiantur universi corporis spiracula, iis exhalant quæ constrictis per hiemem partibus coërcebantur? atqui inde, si nil aliud intercederet, ægritudinum potius curationem quàm febris intermittens exortum ominari liceret; confirmatur id æstivo calore, qui universa ejusmodi febris semina difflare solet.

Contraria equidem præstat autumnus; incidit enim ea tempestas in corpora quæ æstate deflagrârunt; per eam validiori impetu caloris rarefacientis vi fertur circuitus; in alkalescentiam & putredinem inclinant humores; inde bilis acrioris auctus urget proventus; atqui autumnali tempore, constrictis partibus, retinentur ea quæ eliminari necesse erat; hinc ergo repeti posse febres intermittentes verosimile admodum videtur; sed quomodo ex ejusmodi corporum *diathesi* ad eas potius quàm ad alios morbos fiet aditus? nonne sapienter Hip-
pocra-

pocrates effatus est in universum acutissimos esse per autumnum morbos, ver autem minimè esse exitiale, imò & esse saluberrimum.

Ne profectò in temporis solius mutationem rejiciantur febres intermittentes vetat ipsa experientia; nonne incidunt sæpissime anni quibus vere & autumno eæ vix aut nequaquam solent apparere; imò si hiems acerrima, ver inconstans & varium, æstasque retorrída fuerit, tum si autumnus frigora & pluvias adduxerit, si, inquam, hæc ita se habuerint, non idcirco semper exoriuntur eæ febres; è contra verò prorumpunt & grassantur aliquando cùm gratæ tempestatum vices salubritatem spondere videntur; aliæ ergo sint causæ necesse est quæ ejusmodi morbis progignendis aptæ sint.

Quod autumnum spectat horæi quidem fructus solent incusari; nec profectò quin ad febres conferre aliquando possint negari potest; si maturi tamen sint, ut remedia potius quàm ut morbi causæ haberi debent; si verò iis inesset aliquid quod suspicari liceret, non in eo præcipuum esset tempestatis vitium; cùm apud Tungros duobus annis successivè castra posuisset Gallorum exercitus, fructuum omnium etiam apud ditiores successit inopia; atqui nihilominus
epi-

epidemicè grassatæ sunt intermittentes; dein verò atrox sæviit dysenteria, & tunc insolitum ingenisque muscarum agmen agros & domos urbanas, hominibus æquè & animalibus infestum, pervasit & obsessit.

Alia potiori jure, quamvis sensibus minus obvia, incusari possunt; ejusmodi sunt exhalationes quæ aërem inficiunt & partium functionibus adversantur; constricto nimirum per hiemem terræ sinu, retinentur in eo multa quæ peiores deinde sibi adsciscunt dotes; vere autem laxatis veluti repagulis per patentia spiracula in aërem exhalant; æstu interim succedente exhauriuntur aut immutantur, & tandem quæ reliqua sunt exsiccatâ coërcentur terræ superficie; at adventante autumno, iterum prodit exhalationum proventus; nec in aërem ut antea altiùs dispergi possunt & à corporibus amoveri; hæc quidem omnia per se patent; non desunt tamen argumenta, ex variis petita observationibus & experimentis; excipiantur v. g. intra receptaculum vapores è terrâ exhalantes, magna ascendet in illud eorum vis verno tempore; at deficiet æstate omnis affluxus, dum accedente autumno restituatur: en ergo causam hieme præparatam, vere prodeuntem, calore repressam, autumno deinde se efferentem, variam tamen pro variâ temporum ratione.

Iis procul dubio plura edocemur, quam metereologicis quibuscunque observationibus; ex his ferme nihil deducere potui quod lucis aliquid febrium intermittentium genesi affunderet; nullæ sunt temporum peculiare mutationes, quibus non exoriantur ejusmodi febres; multa ex hieme in ver, ex vere in æstatem, ex æstate in autumnum variè redundant quæ sensibus percipi nequeunt; venti quibus perflantur regiones in eas multa conferunt & inconstanter mutant; ex innumeris denique simul concurrentibus & quæ in varias tempestates latenter incidunt pendent iidem morbi; atquæ nusquam similiter concurrunt eadem, & conjunctâ operâ, eodem modo corpora non afficiunt.

Ideo citiùs aut tardiùs incipiunt aut desinunt febres; ideo cùm præcox est earum adventus, graviolem fore epidemiam ominari licet; ideo denique in hiemem processisse magnam earum stragem aliquando observavi; minùs interea eos qui antea intacti aut ipsarum immunes fuerant attingebant; in illos præcipuè qui hæc jam experti erant solebant recidere.

Quæcunque autem hæc de re statui possunt, videre est apud *Hippocratem*, tertiâ imprimis Aphorismorum sectione; an his quidquam addiderit recentiorum sedulitas
sanè

facile incertum existimo: hoc tantummodo videntur affecuti, ut simili studio tempestatum morborumque in variis regionibus successiones observarent; sed utrum, juxta summi hujus Viri præceptum, divinatione quâdam eas prævidere fas sit, non immerito dubitare licet; multa profectò prostant indefesso labore observata de ejusmodi successione; quis tamen iis instructus, febres pestilentes, anginas gangrænosas, atroces dysenterias, pleuritides exitiales, sudorem Anglicum, exanthematum deleterium adventum ausit ominari; vereor ne inanis potius librorum inde prodeat seges quam doctrinæ incrementum.

Non possumus saltem assiduâ licet & accuratâ barometri observatione ad morborum impendentium præcognitionem duci; non dubium equidem quin ad multos affectus silentes exsuscitandos plurimum valeat aëris gravitas; certis id liquet experimentis; sed eo sive graviori seu leviori exortas aut excurrentes vel evanescentes æquè observavi febres; perinde de iis se res habet ac de aliis morbis; quis autem tussim illam epidemicam, quæ versùs annum 1734 totam pervasit Europam, cum aëris gravitate quandam habere rationem credere possit? sed de his satis superque; jam ad febrium immediatas causas propriis accedendum.

CA-

CAPUT III.

De variis eorum placitis qui febrium intermittentium causam in primis viis, aut in pancreate, aut in mesenterio, aut in liene, vel denique in organis transpirationi dicatis esse contendunt.

QUOD dignoscere in ejusmodi febribus maximè arduum occurrit, est causa per vices exurgens & delitescens; torfit ea ab omni ævo Medicorum ingenia; pauci fuerunt, qui ejus ortum, naturam & vim attingere ausi non sint; pituitam & melancholiam incusârunt veteres; spissiore verò sanguinem, solidorum laxitatem, fermentationem, miras explosiones commenti sunt recentiores; ex his denique nonnulli animam seu nervei systematis præsidem in medium adducere non dubitârunt; atqui hæc omnia, quæ fingendi libido protulit, sponte corruunt; alia minùs à naturæ ductu primâ fronte aberrantia non firmiori stant fundamento; statim autem ubinam sint, juxta multorum consensum, febrium intermittentium scaturigines breviter ostendemus.

Variis in partibus hæere febrilis causa visa est; & primò quidem eam in primis late-

latere viis multi existimârunt; argumentum autem præcipuum quo id probari videtur, ex symptomate in febribus intermittentibus ferme assiduo deducitur; vomitus scilicet paroxysmos antecedit: prima ergo febrilis causæ vis in stomachum agens, videtur in eo hospitari; sed cujuscunque generis acutos morbos præcedere solet nausea & vomitus; variolæ, v. g. & pleuritides, aliique morbi à primis viis nequaquam ortum trahunt; atqui tamen prænuntio vomitu invadere solent.

Non minùs absonum est quod nonnulli ab aquæ frigidæ potu repetunt argumentum; eâ scilicet haustâ intensior visa est febris; at si calida hauriatur aqua, leviores admodum fient vomendi conatus; præterea in algore febrili contrahitur omnium partium textus; an ergo ex eo quòd nova vis contrahens, aqua scilicet frigidior, ventriculum subvertat, latere in primis viis primam mali labem statui potest?

Inania esse ejusmodi argumenta patet imprimis ex incertis evacuantium remedium viribus; si enim ex primâ digestionis officinâ penderent intermittentes febres, emeticis solis aut purgantibus abigi possent; quis autem nescit eas ejusmodi remediis non ita obsequi, ipsisque non rarò exasperari? præterea membris admota to-
pica;

pica ; cortex ipse peruvianus in intestina per clysterem injectus, febres intermittentes sæpissimè sustulerunt ; atqui tamen in primas digestionis vias non agunt ejusmodi medicamenta.

Intestinalem tubum, aut fæces in eum confluentes, in eoque à naturâ suâ degeneres, non magis incusare licet ; nullo potest probari argumento, in ejus tubi recessibus latere intermittentium febrium fomitem ; equidem excutitur aliquando è sua sede purgantium vi, ut diximus ; at idem præstant innumera alia remedia alvum non moventia ; præterea ejus expurgatione liberantur sæpe aliæ partes, in quibus hærent morborum causæ : quæ hydropem inducunt v. g. quàm longè aliquando absunt ab intestinorum ambage ; atqui tamen, si acriori sollicitentur stimulo, colluviei fontem exhaurire solent.

Aliam partem non minùs insontem incusârunt Medici : in pancreate scilicet latere visa est causæ febrilis sedes, eamque observationibus anatomicis indicari creditum est ; inventa est enim pars hæc scirrhusa aut apostemate laborans ; at num morbi potius progenies quàm causa fuit hæc labes ; Quot sunt ægri qui pancreatis obstructionem passi sunt, nec tamen ullum experti fuerunt febris intermittentis insul-

B

tum ;

tum; eam igitur opinionem ut verum commentum prætermitemus.

Nec pluris quidem facienda eorum sententia, qui in mesenterii latebris hæere mali fomitem existimârunt; hoc nec ratione nec experienciâ comprobari potest: Variè quidem affecta reperta est pars hæc, tot glandulis obsita, & in quâ tantæ vasorum ambages; at sæpius nil in eâ observare est quod ut prima febrium intermittantium causa incusari possit, vel quod sine ipsis non soleat occurrere.

Non magis audiendi sunt ii qui ex causâ in lienis vasculis aut loculis hospitante quartanas febres deducere conati sunt; quanta sit sæpe hujus visceris moles aut labes absque ullo hujusce febris vestigio cuivis notum est; vertentur profectò in ægrorum perniciem ejusmodi opiniones, si inde solum petantur curationis leges; quàm multi olim, imò & præcedenti sæculo, exhausti aut sublati sunt Medicis melancholiæ expurgandæ nimium intentis.

Non potiori denique jure incusatus videtur transpirationis defectus; sunt equidem exempla quædam ex quibus deduci posse videtur talis febrium intermittantium causa; observatum est, v. g., pueros qui fructuum horæorum copiam ingesserunt, febre intermittenti corripi, si in aquam fluviatilem se

con-

conjiciant; constat etiam post balneum frigidum excitari paroxysmi febrilis speciem; sed non minus certum est inhiberi posse perspirationem absque ullo febris insultu; liquet id ex hiemali frigore, quod transpirationi adeo adversum est; cum obijciuntur corpora tepida aëri frigidiori, non inde exsurgit ut plurimum febris intermittens.

CAPUT IV.

De eorum opinione qui è nervis febrem deducunt intermittentem.

AB his causis, utpote incertis, ad alias minus sensibus obvias confugerunt Medici; multis persuasum videtur è nervorum actione cuivis ignotâ repetendam esse febrium intermittentium originem; alii nimirum succi nervei inertiam, alii verò ejusdem perturbatum comminiscuntur influxum; subitam imprimis paroxysmorum invasionem, non aliunde nisi è nervis deduci posse existimant; in medium afferunt exempla, quibus probatur successisse intermittentem febrem animi pathematis; imò in eâ prodesse corticem peruvianum contendunt, non aliâ de causâ atque in affectibus hys-

tericis; quibus aliquando aliquid opis attulisse videtur remedium ejusmodi.

Mirum fanè est finxisse Medicos ejusmodi causas, quæ à sensibus ita remotæ sunt; non est merus affectus nerveus febris intermittens; nullo id saltem argumento probari potest; invasio v. g. subita illum non innuit; si eam explicare arduum sit, non idcirco quid æquè difficile licet fingere; in nervorum origine unicè hærens, modò defervens & modò incandescens seu ad explosionem veluti præsto adstans causa, nec sensibus nec rationi faciliùs patet.

Non requiritur tantus & adeo mirabilis in nervis apparatus ut derepente prodeat febris intermittens; sunt alii morbi à variis omnino causis repetendi, qui, ut omnibus notum est, repentino exsurgunt insultu; mitto apoplexias & paralyfes, de quibus fortasse dici posset quod ad nervos pertineant, cum ex iis compressis oriantur; sed dolores acerrimi, colici vel rheumatici, vomitus enormes, vel ii etiam qui morbos acutos antecedunt, corpora sana derepente aggrediuntur; similiter ergo quædam potest esse causa, à nervorum affectu non minùs aliena, quæ febrem intermittentem subito exsuscitet.

In motum quidem aguntur nervi in febrili frigore; nam id, ut dicemus, merè
spas-

spasmodicum est; sed nonne in aliis morbis à nerveo affectu non pendentibus idem solet occurrere? in pleuritide v. g. incipiente, imò in febribus continuis, insurgente frigore eoque intenso, earum sæpe prænuntiatur invasio? atqui tamen, non à nervorum origine, sed ab inflammatione vel obstructione, aut variorum miasmatum arcanâ vi, ortuum ducunt aut ducere possunt ejusmodi morbi.

Non minùs leve est argumentum quod ex terrore aliisve animi pathematis, febrem intermittentem aliquando exsuscitantibus, deducitur; & primò quidem inter millenos qui terrore aliove motu interno exagitantur vix unum reperias qui in ejusmodi febrim incidat; quod autem tam rarò occurrit, aliosque diversos morbos inferre solet, causa febrilis vera & unica dici nequit; deinde verò asseri non potest in iis ipsis, qui post affectum nerveum feбри corripuntur intermittenti, non latuisse antea ejus fomitem, qui mentis & nervorum vi excitari potuit.

Multò minùs à nervis repetendus videtur ejusmodi morbus, ex eo quod eorum motu aliquando sublatus sit; nonne profluentibus affatim humoribus tollitur sæpe febris intermittens? eam tamen ex eorum colluvie ortum ducere ideo censerì non potest; idem dicendum de aliis quibuscum-

bet, quorum operâ decessit aliquando morbus hic; ad ejus detegendam causam, nil fermè ex singulis remediis quæ profuerunt deduci potest.

Confirmantur hæ rationes gravissimo argumento, ex affectibus ipsis nerveis desumpto; quàm multi & quàm varii sunt ii in mulieribus hystericis v. g.? atqui tamen non sunt eæ febribus intermittentibus magis obnoxia; imò mihi observatione compertum est easdem minùs veneno febrili attingi; & si eo fortè attingantur compesci solent nervei motus; unde in eis quædam à febre diversa inesse verosimile est.

Imò non aliqua solummodo, sed omnia aut præcipua saltem, ab affectibus nerveis in febre intermittenti aliena sunt; in eâ pulsus validus, magnus, æqualis viget; solvitur eadem sudore quò perfunditur corpus quolibet paroxysmo; judicari similiter solet evacuationibus, pustulis labia obsidentibus, urinâ crassius sedimentum dejicienti, ut aliàs dicemus; at ècontra, in nerveis affectibus pulsus est parvus & inæqualis, non profluit sudor, non fit judicium eruptionibus, evacuationibus, urinarum sedimento &c.

In pueris systema nerveum admodum mobile est; illi tamen febrilium insultuum magis quàm adulti immunes sunt; unde patet quàm

quàm incongruè in exemplum adducantur ad febrilem vim in spiritu nerveo stabilien-
dam; tentantur quidem aliquando convul-
sionibus tenerrima eorum corpora cùm fe-
bre laborant intermittenti; sed plerique,
& ipsi etiam qui eâ vexati & confecti sunt,
convulsivos non experiuntur motus.

Quod vires spectat corticis peruviani;
cas quidem in variis morbis proficuas esse
negari nequit; imò in ipsis affectibus hyf-
tericis ipsum prodesse certum est; an ergo
ex eo quod feбри medeatur asseri potest eam
ex eodem fomite, ex quo insurgunt affectus
illi, esse deducendam? eodem profectò jure
dici posset vitia stomachi quæ emendat re-
medium hoc, suppressionem menstruorum
quæ promovet, gangrænâ denique cui
tollendæ ita aptum est, ex nervis similiter
ortum ducere.

Sed quàm leve sit petatum ex corticis in
hystericos affectus viribus argumentum, pa-
tebit meliùs si quàm rarò succedat præ-
oculis habeatur; vera Medicorum crux est
ejusmodi morbi genus; vix ullis obsequi-
tur remediis; testes sunt innumeræ mulie-
res quæ incassum adhibitis quibuscunque
remediis, iisdem semper conflictantur affec-
tibus; si quando ergo quodam sublevantur
remedio, quod fortasse certarum partium
functiones restituendo opem attulit, an ideo

aliorum morborum, quibus similiter proderit remedium hoc, natura & causa erit omnino eadem?

Piget profectò hæc opinionum commenta impugnare; nullius ea possunt esse usûs in febrium curatione, & Medicinam infamare potius quàm illustrare possunt; dolendum fanè quidlibet fingendi licentiam quemvis in sanctissimâ arte sibi impunè arrogare; nec quosdam pudere, aut ipsis religioni non esse, incerta pro certis venditare: ne quid tamen prætermisisse videar, quædam quæ majorem veri speciem præ se ferunt quàm brevissimè fieri poterit attingam.

C A P U T V.

De eorum sententiâ qui bilem, aut materiam quandam putridam, ut veram febris intermittentis causam, incusârunt.

MHI propius à vero aut verosimili aberrâsse videntur, qui ad certa liquida febrium intermittentium causam retulerunt; inter eos primò numerandi sunt antiquiores, qui bilem præcipuè incusârunt, ejus scilicet redundantem copiam aut acrimoniam, autumno imprimis, aut
variis

variis de causis aliàs se exerentem.

Equidem si quod liquidum acrius fieri possit, maximè bilis; liquet id ex ejus genesi, quæ quidem subobscura visa est, sed ex variis phænomenis potest, innotescere; sit mihi ergo ad eam digredienti venià, quæ eò faciliùs concedenda quòd maximi sit momenti in febribus recrementum ejusmodi; videndum autem statim num id ante ipsius secretionem in toto corpore lateat? ex quibus conficiatur liquidis? & quid ad illius dotes conferant vasorum actio & certa colatoria?

In sanguine per universum corpus elaborari flavum hoc magma, & ab aliis tandem liquidis, quibus mixtum est, in certis colatoriis secedere dici nequit; nec enim corporis superficies, nec internæ partes eotinguntur in statu naturali; imò & in cute nullum sæpe flavedinis observatur vestigium, cùm omninò indurescit hepar; in hujus igitur visceris penetralibus sit necesse est bilis officina.

Atqui nec ex adipe, neque ex lymphâ, vel ex sero bilem confici probari potest; saponacea non est adeps, cùm merum oleum sit; alba est lymp̃ha, statim per se ipsam concrevit, nec spiritu vini ex eâ quidquam extrahitur; serum denique, in quod omnes resolvuntur humores, nil habet quod merè bilio-

biliosum fit, nec quid tale referunt sanorum urinæ, licet flavedine imbuantur; pendet color hic ex oleorum solutione, ex calore, & vasorum motu.

In rubrâ igitur sanguinis parte proximam esse bilis materiam verosimilius est; sanguis enim, ut bilis, saponaceus est, cum eo detergantur manus; resinofus similiter est, cum exsiccatus flammam concipiat, & tincturam in spiritu vini præbeat; in putredinem denique valde pronus est, & cum solvitur aut putrescit, colorem flavum induit; patet id in ecchymosi, & in sanguine ad ignem leniorem putrescenti.

Jam verò sanguis ex intestinis redux, liquidiore parte in colatoriis relictâ, in dissolutionem propendit, ut in alcalescentiam, & putredinem; stagnat enim in meseraicis vasis, leni fovetur calore, & intestinorum putrido inficitur halitu; solvitur ergo, aut ejus saltem pars quædam, magis ad solutionem prædisposita; flavescit aut flavescere incipit in ipso hepate, in quo lentiori procedit gressu; deinde verò in bilem mutata tubos subit biliares; atqui jam ad acredinem vergens, acrior facilius fieri potest, immixto febrili miasmate.

Sed si febris intermittens causa sit bilis, vim quandam peculiarem, eamque insolitam sibi ipsa adsciscat necesse est; nam

exundat sæpissime *ano* & *cato* absque ullo febris intermittentis insultu; nec verò in eam magis proni sunt qui ictero laborant; atqui tamen tunc, si uspiam, debet esse noxia; nam in hepate stagnat, sanguinem aliosque humores inficit, partium functiones perturbat, nec usui solito inservit in stomacho & intestinis.

His permoti haud dubiè nonnulli materiam quandam putridam, humores omnes insufficientem, incusandam esse censuerunt: inde ortum imprimis duxit eorum opinio, quòd in febrifugis antisepticam vim eamque insignem observârint; talis est, v. g. corticis peruviani vis, quæ putredini valde adversa est; fatendum tamen quòd qui solam aut quamcunque incusârint putredinem, longiùs omnino quàm par est processerint; febrem intermittentem non accendunt in genere putrida ingesta, uti nec ea quæ in tubo gignuntur intestinali; atqui tamen aliquando ita fœtent alvinæ fæces ut tetro earum odore exanimes aliquando ceciderint ægris adstantes.

Alia sunt quæ idem confirmare possunt; ii v. g. qui expurgandis latrinis inserviunt febrium intermittentium immunes degunt, aut iis saltem non magis quàm alii obnoxii sunt; at si sola vel quæcunque non possit incusari putredo, non idcirco existimandum,

dum; eam ad ejusmodi febres nihil conferre; ejus vim probant evidenter exhalationes de quibus mox agemus; sunt loca nimirum, ut dicetur aliàs, ex quibus exsurgunt putridi halitus, qui per aërem diffusi febrilia sunt semina, & ex iis epidemiarum ortus ut plurimum repetendus.

CAPUT VI.

In quo variis probatur argumentis, febrili causâ per totum corpus diffusâ, hepar imprimis affici.

QUÆCUNQUE autem sit febrium intermittentium causa, inquirendum superest, num in aliquâ parte lateat, an verò per totum corpus diffusa sit; probare quidem videntur nonnulla febrilem causam per omnes partes veluti sparsam in eas desævire; nam in labia aut circa os, cùm se proripit, videtur erumpere; in iis enim pustulas excitat, & sui discessûs, cùm diffatur, relinquit vestigia; id confirmant multa quæ in certis ægris veluti ex toxico totum corpus inficiente se exerere solent.

Sed non leviora prostant argumenta quibus probatur in aliquo recessu latere imprimis febrilem causam, aut saltem aliquam esse

esse partem quæ eâ causâ præcipuè afficiatur; liquet id, ut modò dicemus, ex variis febrium intermittentium phænomenis.

Eam partem, in quam recidit præcipuè veneni febrilis vis, hepar esse, omnia suadere videntur; non equidem de eo dici potest quod de aliis partibus innuimus; vitia nimirum quæ in iis per febris decursum aut post mortem observantur, morbi diutius exantlati effectus sunt; at ipso initio, in frigoris ipsius primo insultu, aut antequam prodeant ulla febrilia symptomata, hepatis sæpissime laborant functiones, læduntur eæ imprimis in febre ipsâ, idque certissimis probatur argumentis.

Primum idemque gravissimum ex urinis desumetur; eæ enim in febribus intermittentibus croceo & lateritio imbuuntur colore, ut in hepaticis affectibus; tanta insuper bilis copia aliquando in ejusmodi febribus gignitur, ut emetico exhibito exundare videatur; eo educitur non rarò quasi oleosum & lentum magma; tantus est ejus proventus, ut in plurimis ad vomitoria sæpius confugere opus sit; omnia videlicet in bilem varii generis abire videntur, nec nisi eâeductâ potest curari febris.

Quod autem inde consequi necesse est; vultus plerumque flavedine quâdam suffunditur; intensior fit flavedo hæc in eis qui
malè

malè curantur, ita ut tandem vero laborarent ictero; nisi autem sublatum fuerit id vitium, ut quis febre defungatur expectandum non est; certum est saltem, eam, si fortè desierit, in limine esse: in iis denique qui ejusmodi febre sublatis sunt, inest semper aliqua hepatis labes; non potest ergo dubitari, quin præcipuè in hoc morbo afficiatur pars hæc, in eâque lateat mali fomes.

Ego quidem hæc jamdiu suspicatus eorum rationem cœpi inquirere, diffidens tamen propriis opinionibus, uti & alienis; existimabam scilicet ad febrim inducendam nihil aliud requiri quàm sanguinis in quandam partem affluentis stagnationem; maxime autem ad eam opportunum videbatur venæ portæ systema; si enim ea ejusque rami turgeant, hinc necessario stimulus in hepatis textum se excrens; insurget ergo nervorum & arteriarum vis, id est febrilis motus; atqui eo insurgente progredietur sanguis antea stagnans; inde autem mitior fiet aut tolletur quæ febrem inducebat irritatio.

En ergo causas quibus accenditur febris & postea subigitur, ita ut tandem evanescat; nihil proinde reliquum erat nisi ut inquirerem quare statim reverteretur horis; atqui ad eam iterum exfuscitandam necesse
vide-

videbatur tantummodo ut sanguinis nimia adhuc & turgens copia, tanquam morbi seminium, remaneret, atque ut sensim ea deinde increfceret, & ita paroxysmis reducendis apta esset.

Favere videbantur huic opinioni exempla quædam quæ mihi magni videbantur momenti; unum tantummodo feligam quod omnium instar esse poterit; erat Vir celeberrimus qui, quoties balneo immergebatur, frigore, eoque fatis intenso, corripì solebat, succedebat deinde calor, qui tandem absque magnâ sudoris vi evanescebat; quod quidem magis erat mirum, postridie eâdem præcisè horâ invadebat frigus & insurgibat calor; pergebant hæc simili ratione per aliquot dies, & tandem temporis lapsu sensim se subducebant: atqui inde sequi videtur, solâ circuitûs mutatione excuscitari posse febris intermittentis speciem; nulla erat causa morbifica quæ incusari posset; bene antea se habebant omnia; si autem solummodo mutatus sit circuitus, id est si congestio quædam exorta sit, quænam pars magis huic apta est quàm vena porta & hepar in cujus textu disseminantur hujus venæ rami.

At hæc omnia nihilominus *hypothesim* redolent; dubium profectò non est quin stagnet sanguis in venâ portâ ejusque propaginibus;

ginibus ; sed unde hæc stagnatio ? quomodo ex eâ deduci poterit tam peculiaris morbus , febris nimirum intermittens ? quare ii qui in hepatitidem incidunt ejusmodi non experiuntur febrim ? quâ fieri potest ut hypochondriaci non magis quàm alii huic morbo obnoxii sint ? quid denique ictericos aut hepatis obstructionibus laborantes ab eâ immunes præstabit ? requiritur ergo alia causa huic parti imprimis adversa , quæ frigus , calorem , & apurexiam efficiat , & per circuitus periodicos possit reducere.

In re autem tam intricatâ vix dicere licet quid ut vera causa adduci possit ; certum tantummodo videtur , in corpore gigni aut aliunde advehi materiem quandam quæ febres intermittentes exsuscitet ; patet id ex miasmatibus , ex quibus sæpissime , ut postea dicemus , pendet earum exortus ; liquet idem ex eo quod hæc & illâc in diversas partes dejiciatur sæpius ipsarum vis , nec congestioni vel obstructioni , solummodo , aut alii cuicunque & soli partium vitio tribui possit.

At quomodo venenata hæc materies , per totum corpus diffusa & hepati æquè infesta colligatur , aut vires acquirat ? quomodo velut impetu factò insurgat ejus vis , & paulatim defervens diffletur , & evanescat ? quomodo denique remaneat fomes , qui fermenti

fermenti instar, humores inficiat, atque iterum iterumque alternis easdem cieat turbas? id profectò statuere non licet, nisi cùm omnia febris symptomata, ejusque effectus lustraverimus: parum interim curandum de theoreticis disquisitionibus, quæ mentem à verâ praxis viâ avertunt, & in errorem solent inducere.

CAPUT VII.

De causis remotis.

REMOTAS causas enumerare facilius est, quàm quid efficiant dignoscere; & primò quidem, ut jam diximus, quæ intermittunt febres variarum tempestatum fœtus sunt; nec tamen dici potest quid temporum mutationes ad eas potiùs quàm ad alios morbos conferant; observatione tantùm didicimus, quòd ex tali aut aliâ aëris temperie, certi in corporibus excitentur motus, certi, inquam, non perpetui, nec iidem in omni animantium genere; canes, v. g. equi, & boves intermittentibus febribus non ita obnoxii sunt, aut saltem non nisi rarò admodum ejusmodi laborant morbis.

Humana è contra corpora in eos valde
C
sunt

sunt prona ; vix quenquam in certis regionibus reperire est , qui febre intermittenti non laboraverit ; incidit hæc in puerilem , in adultam , & senilem ætatem ; vere imprimis , & gravius autumnò grassatur ; non quòd nulli sint qui per summum frigus , aut per summum calorem ejusmodi corripiantur febri , sed tunc rariùs omnino solent occurrere ; in univèrsum frigoris & caloris continua & summa vis diversos omninò & pauciores gignit morbos.

Ut certis temporibus , ita certis locis grassantur febres intermittentes : qui paludum viciniam incolunt , his febribus imprimis obnoxii sunt ; sæviunt eæ v. g. in Septentrionalibus Galliæ plagis , miserandam earum stragem experti sunt aliquando Galli , dùm ad Batavorum littora , admoveretur exercitus ; ea erat illarum febrium natura ut , cùm per certum tempus excurrissent , vix curationem reciperent ; corpora etiam validissima , morbi vi labefactata , ipsius reliquias per varias traxerunt regiones.

Ex fælo exhalantibus corpusculis oritur morbus hic , unde in iis quid videtur inesse quod ex muriaticâ aquâ prodeat ; sed alterius generis exhalationes non minùs noxiæ sunt ; erat ad magnæ Urbis mœnia stagnum latissimum , profundumque ; in illud à quadraginta annis omnia domorum & vicorum

corum confluebant purgamenta ; quandiu verò putridæ hæ fæces aquâ immersæ latuerunt , nil mali inde prodiit : sed cùm in molem auctæ ad aquæ superficiem se extulissent , sæviit horrenda febris per vicina urbis loca , & deinde latius se diffudit ; tanta fuit ejus vis , ut cùm quadringenti tantummodo aliis temporibus quolibet anno efferrentur , duo hominum millia tunc interciderent.

Erat hoc peculiare his exhalationibus ; quòd qui prope lacum degerent , ne per tres horas quidem , carnes poterant asseruare ; eæ , ut sæpius vidi , statim ferme putrescere solebant , omnisque culinaria suppellex crustâ quâdam brevì obducebatur ; ideo fortasse alterius generis erat febris hæc ; erat scilicet mali moris , capitisque varios inducebat affectus ; quod quidem in febribus ad maritimas Galliæ oras grassantibus non ita observavi ; in graviores enim ut plurimum abire solebant viscerum obstructions.

Variam omninò esse posse in corpus humanum miasmatum aut exhalationum vim ex multis liquet observationibus ; cùm grassaretur pestilens boum lues , hæc & illæc sparsa jacebant eorum cadavera , aut vix superinjectâ obtegebantur terrâ ; inde putris halitus vicina infecit loca ; & gangræ-

nodes febris , quæ intermittentem referebat typum , exorta est ; statim autem pulsus erat magnus & validus ; brevi tamen , idque imprimis si tentaretur venæ sectio , concidere solebat ; frigidæ tandem rigeabant extremæ partes ; os vultumque obsidebat gangræna ; nec alio remedio nisi cortice peruviano hæc præcaveri vel averti poterant.

Non æquè deleterias quidem nec ejusdem profapiæ esse observavi eas febres , quæ ex ingestâ & putrescenti piscium carne ortum trahunt ; his obnoxii sunt rustici & piscatores paludosa loca incolentes , qui eâ carne vesci solent ; eæ autem non intermittunt ut plurimum , sed continuo incedunt gressu , seu potius veræ sunt continuæ ; ejusmodi etiam videntur esse quæ Anatomicos , putridis cadaveribus secandis incumbentes , corripunt & summum quandoque vitæ inducunt discrimen. At putredo , imprimis quæ ex aquis stagnantibus & uliginosis oritur , febribus intermittentibus progignendis aptior est ; sunt eæ endemiæ in quibusdam regionibus Occitaniæ ; ex viginti incolis vix duos reperias , qui eas non experiantur ; frequentiores tamen sunt illæ & graviores per autumnum ; vultus inducunt flavedinem , tumores œdematosos , & viscerum obstructions.

Si moveantur paludosæ aquæ graviùs inficiuntur hâc putredine vicina loca ; est pagus in quo sæviunt febres ex ejusmodi causâ oriundæ ; grassantur eæ imprimis cùm quibusdam ventis perflantur stagna ; quæ tunc deferuntur miasmata in eum locum ita noxia sunt ut post duos tresve dies, aut aliquando citiùs, recidant in febrem qui eâ defuncti fuerant ; multi præterea, antea intacti, eâ corripuntur.

Putredo interim ejusmodi, aëre devec̃ta, certis annis deleterior observatur ; est enim ubi mali moris symptomata inde exoriantur, eaque magnam stragem inferre soleant ; Alga v. g., quæ in Mediterranei maris litus certis locis dejicitur, in ejusmodi deleteriam putredinem prona est ; ibi veluti pestilenti afflatu inficiuntur corpora ; insurgunt continuæ & malignæ febres, quæ brevi ægros in ultimum adducunt discrimen.

Indè profectò elucet, esse in epidemiis quid per aëra vagans, & è sinu terræ prodiens, quod febres intermittentes potius quàm alios morbos inferat : hoc autem miasma, quod corporis intima subingreditur, causa fit proxima ; at cujus generis sit aut naturæ, dijudicare arduum est : hoc tantùm ex observatis liquet, gigni posse similem causam in corporibus, ipsam-

que ex ingestis aliquando ortum trahere ; ea tamen ut certam febrium intermittentium causam incusare non licet ; nam cum quis v. g. post errata in victu febris laborat ejusmodi, potuit in eam pronus esse ; potuit & ante latere miasma quoddam ex constitutione temporis prodiens ; rem ita se habere in castris v. g. dubium non est ; si enim victus sit pravus , glutinosus v. g. ut ex fabis , austerus ut ex fructibus nondum maturitatem adeptis , tunc facilis omnino , autumnali imprimis tempore , in febrim intermittentem prolapsus.

De his perinde se res habet , ac de aliis causis occasionalibus , de decubitu v. g. in loca humidiora , de aëre frigidiori , de exercitio nimio ac labore , de animi pathematis , ut irâ & tristitiâ , de vigiliis protractis , de excalescentium medicamentorum usu ; his omnibus , ut cuique notum , succedunt sæpissime febres , non ut ex veris propriisque causis , sed causas proximas excitantibus : corpus nempe jam prædispositum in febrilem propendebat motum ; tunc levi de causâ , veluti ignem concipiunt solida & liquida ; de hoc extinguendo igne sollicita est Medicina ; at non inutile fortasse esset arcanum , quod ejusmodi excandescentiam concitare , seu febrim intermittentem inferre posset.

CAPUT VIII.

De frigore febrili.

FEBRILI causâ insurgente oritur statim frigoris sensus, qui triplici modo se exerit, refrigeratione nimirum, horrore & rigore; refrigeratio simplex ab ægris nonnunquam percipitur; sed aliàs levis subitusque fit fremitus qui horror dicitur; si verò acrius urgeat, concitatur rigor, concussio scilicet quâ subsultim rigescunt & contremiscunt membra; unde patet quod tria hæc nonnisi intensione distent & remissione.

Frigus morbis acutis, & feбри intermittenti commune est: sed in febribus continuis, longè alius est ipsius incessus, aliaque vis: sunt equidem nonnullæ quæ mali sunt moris, & quæ intensum inducunt frigus, illudque omnino infestum; at in genere nec tandiu nec tam graviter aut eodem modo urgere solet; unde statim occurrit signum quo futura prævidere, febris nimirum impendentis naturam definire, eamque ab aliis, antequam calor insurgat, distinguere liceat: præterquam etenim in febribus continuis, frigus nusquam tam acriter aut tandiu urgere solet, statui in universum potest,

eas quæ summo cum rigore incipiunt, ex earum esse numero, quæ certos habeant alternosque circuitus.

Vel ipsum primum febris intermittentis paroxysmum ab ephemerâ licet eodem signo distinguere: in eâ enim non est rigor & horror ut plurimum; præterea longior esse solet decursus ipsius, ita ut si absit capitis dolor, aut non urgeat; si non vigeant per totum corpus dolores, si illæsa omnino procedat respiratio, si denique præter febrim nullum patiatur æger incommodum, simulque duodecimam horam prætergrediatur paroxysmus, tunc profectò, quin adsit ephemerâ vix dubitari potest; id verò magis certò asserere licebit, si defervescente æstu seu vi febrili sedimentum dejiciant urinæ.

Sed sunt alia quibus ejusmodi febris ingenium dignosci possit; & primò quidem, ut ex antedictis sequitur, & inquit *Galenus*, ephemeram facilè ferunt ægri, quod juxta eum mitioris omnino morbi signum est; deinde verò desinente eâ, arteriarum motus statim sanorum æmulatur pulsum, cùm in aliâ quâcunque à naturali recedat incessu: licet v. g. in tertianis & quartanis longè distent paroxysmi, remanet inter eos pristini tumultûs quoddam indicium; superstes est præterea lassitudo & debilitas, tum quandoque

doque capitis dolor; cùm post ephemeram vegeta sint omnino corpora, nullumque dolorem experiantur; fatendum tamen, licet hæc vera sint, posse nonnunquam errori esse locum; sed de his satis superque; videndum jam unde deduci possit febrile frigus?

Non alii profectò causæ immediatæ quam nervis quâdam occultâ causâ in motum actis tribui potest ejusmodi affectus: objiciet equidem fortasse aliquis hîc nos ex iis repetere quæ jamjam eisdem deneganda censuimus; videtur nimirum iis quæ modò diximus incusari febrium intermittentium causam aliquam, in ejusmodi organis latentem; at longè omnino abest à sententiâ nostrâ incusatio hæc; causa febrilis, primogenia, propria, seu essentialis, est miasma quoddam peculiare; ejus verò se exerente vi stimulari nervos, & in eis varios cieri motus, non immeritò statuimus; in febre intermittenti nimirum, perinde atque in aliis morbis, se res habet; insurgunt eorum causæ in spiritum nerveum, ita ut ex irritatione ab iis inductâ solummodo deduci possint universa symptomata; ipsa febris in genere, quam definire tam arduum videtur, nil aliud est nisi irritatio universalis, irritatio, inquam, quæ ut plurimum sensu non percipitur; atqui talem esse causam quæ febrilem effi-

efficit algorem, & jure quidem, statui potest; is omnino spasmodicus est, nec verè friget, saltem aliquando, exhorrescens corpus, ut thermometer admovendo, exploranti mihi comprobatum est; quod non minus certum est, idem ori immissum nil de calore interno detractum esse ostendit.

Quod ad spasmus referri possit hæc frigoris species patet ex variis exemplis in praxi occurrentibus; sola v. g. calculi biliaris in canalem choledochum actio, solusve irritans motus, intensissimum frigus per omnes partes solet diffundere; idem concitatum vidi solo cathetere vesicam attingenti, imò & clystere in intestinum hæmorrhoidibus excruciatum injecto; similis exsurgit perfrigeratio ex viscere quodam subitò affecto, ex intestinorum v. g. strangulatione solâ; suppuratio idem præstare solet, ut cuique notum est; vidi militem, qui ex hepatis abscessu, ad mortem usque per duos dies obriguit: non est ergo dubium, quin ex stimulo parti cuidam infixio & spasmus ciente, concitari possit frigus in febribus intermittentibus.

Hujus frigoris invasionem præcedere solent varia aut quædam ex sequentibus phænomena, & primò quidem cephalalgia, aliqua totius corporis lassitudo & gravitas, oculorum coruscatio, anxietatis sensus, oscitatio,

tatio, & pandiculatio, pallor, & in somnum aliquando proclivitas; deinde autem variè præludit aut incipit frigus, modò scilicet è pedibus, modò ex scapulis, modò ex dorso videtur insurgere, per totum corpus vagari, & variis quasi rivulis hàc & illàc inordinate excurrentibus se se diffundere; hinc horripilationes, horrores, rigores varii, veluti aquâ frigidâ perfunderentur membra.

Interea sæpissime tanti sunt horrores & rigores, ut in tremorem faceffant continuum; contremiscunt manus, brachia & cætera membra; tremula est imprimis maxilla inferior, quæ aliquando celerrimo alternoque rapitur motu, idque tantâ vi, ut collidantur dentes magno cum strepitu, fractique in nonnullis commemorentur; videtur omnino convulsivus motus hic; tantus est saltem ejusmodi repetitus conatus, ut nullo modo cohiberi queat, licet summâ vi in eum nitantur ægri; ita verò exagitati his concussionibus sedili nequaquam stare possunt; coguntur necessariò decumbere, & membra veluti glomerare, atque alia aliis admoveere & comprimere.

At sæpe non omnes partes æqui aggreditur frigus; vidi aliquando partes infernas frigentes, supernis calore exustis; memoratur æger, cui unum frigeret latus, dum
aliud

aliud caleret; occurrit mihi quidam febris laborans, cui brachium tantummodo esset algidum; sunt alia non minùs rara ex quibus liquet arcanas esse causas quæ variè frigus infringant, aut promoveant, variamque ipsi faciem inducant: sed cùm hæc infrequentia sint, his non immorari licet; artis non sunt quæ à communi recedunt naturæ ductu; hæc præterea in nothis potiùs aut larvatis febribus, quàm in veris intermittentium insultibus observari solent.

Variè excurrit frigus hoc, intermittentes antecedens febres; varius scilicet est ejus gradus, nunc enim leves, aliàs verò summum, partes extremas imprimis obsidet, & rarò internas attingit, aut in iis percipitur; diversum scilicet esse solet pro febris naturâ & pro infestis ejus viribus; variè etiam ægros afficit, pro ipsorum ætate aut temperie; longè major & periculosior est ejus vis in senes & cacochymos, quàm in juvenes aut virium robore præstantes; interea longior aut brevior est ejus decursus, modò per duas aut per tres sævit horas, aliquando verò ad quatuor, imò quinque protractum vidi.

Cùm autem longiùs protrahitur, non existimandum semper graviolem portendi paroxysmum; in genere quidem quò gravius invasit frigus, cò acrior insurgit febrilis æstus

æstus & vis; at sæpiissime observavi, quòd cùm brevi temporis spatio exhorruissent ægri, in plures horas excurreret paroxysmus, isque intensissimus; è contra verò post longum frigus, brevem febris accessionem, eamque leviolem miratus sum.

Nec in omnibus quidem ejusdem febris paroxysmis æquè infestum est frigus; hujus aliquando ægri nullum ferme percipiunt sensum, quando in diuturnitatem abeunt febres; non minùs abest, aut minùs leve est in quibusdam ex iis recens exortis; sunt scilicet nonnullæ quæ primâ tantum vice, aut duobus tribusve insequentibus paroxysmis à frigore incipiunt; nullâ dein aut levî tantum refrigeratione eorum prænunciatur adventus; at in genuinis intermittentibus, nisi fortè lapsu temporis aliquanto degeneres fuerint, id ita non se habet, nec tantopere à solitâ recedunt normâ.

Cùm ita protrahuntur paroxysmi, ut inter ab invicem parum distent, minùs conspicuum ut plurimum frigus est; in ipsis tertianis nothis, sive *extensis*, ut verbis *Galenî* utar, qualis in exquisitis non observatur rigor; ab horrore potius fit initium, vel solummodo algent ægri; at non solum in iis febribus occurrit ejusmodi varietas, prodire sæpius & in aliis solet; earum enim initio in pedibus solis nonnunquam se exerit

rit frigoris vis; sed est ubi nequaquam ab ægris advertatur; nihil scilicet in febribus, uti & in reliquis naturæ motibus perpetuum est; aliæ quo inceperunt gressu non incidunt, aliæ verò ab aliarum licet similium more aberrant: si quædam sint quæ ab algore incipientes eo deinde careant, evenit aliquando, ut à calore intensiori fieret initium, dein verò post quinque aut sex paroxysmos algor statim, postea verò rigor sequentibus præmitteretur.

Hæc quidem de intermittenti simplici, de tertianâ scilicet & quartanâ, dicta sunt; in istâ interim, non omnino eadem est frigoris ratio; levius quidem in nonnullis ægris, in plerisque tamen gravius, & longius protractum, imò in multis gravissimum senioribusque formidandum observatur; initio imprimis ei major inest vis, deinde, saltem per certum tempus, solet mitescere & breviori circumscribitur temporis spatio.

Quod verò duplicem tertianam spectat, frigent quidem ægri paroxysmorum initio; sed id perpetuum non est; nam est ubi absit quæcumque refrigeratio, aut levissimus saltem est ejus sensus, ita ut ab ægris vix percipi possit; quod verò magis insolens est, alternis diebus aliquando se exerit hæc febrilis refrigeratio, ita ut antecedens & subsequens paroxysmus ejus omnino exper-

tes

tes sint; occurrit idem in tertianâ continuâ & remittente, sed rarò admodum.

Quoties scilicet exoriuntur ejusmodi febres continuo gressu progredientes, levisque tantum breviorque intercedit remissio, eâ nullo præeunte frigore solent exacerbari; id tantum se prodit, cum mitior fit febrilis vis; negari tamen nequit, quin aliter quandoque res procedat, insurgit scilicet in continuo ejus decursu veluti frigidior aura, paroxysmos denunciâns. Sed de his satis superque; videndum superest quid variam hancce comitetur aut sequatur refrigerationem.

CAPUT IX.

Quinam sint frigoris febrilis effectus.

EX frigore intermittentis febris aliarumque prænuncio, multa, in œconomiam animalem, huic plus minusve adversa, recidunt; & primò quidem constringitur universa corporis superficies, cutis plus minusve rugosa fit & tuberculis hispida, ut in gallinis & anseribus; non exhalant ergo ex eâ, quibus ante madebat, liquida; venæ per ipsam reptantes & turgidæ jam inanitæ evanescunt, aut vix oculis patent.

Per-

Perinde se res habet in internis partibus; constringuntur nimirum earum flamina & breviora fiunt, nec id alii causæ quam spasmodicis ipsorum motibus, siue nervis in ea agentibus tribui potest; conspicua est præcipuè eorum actio, cùm urgente febrili frigore tetra exsurgunt symptomata, spasmi scilicet & convulsivi motus; non minus ea se prodit cùm arteriæ latiùs antea se diffundentes & expansæ jam undequaque contrahuntur, & in arctius coguntur spatium.

Indè autem pulsus parvus & frequens; incipit scilicet deprimi ante ipsum frigus, tardiùsque incedere; postea autem celeriori & inconstanti gressu ferri solet, idque imprimis in senioribus; in iis enim sæpe tremulus & inæqualis occurrit; in junioribus autem ut plurimum nec ita depressus, aut incertus esse solet; sed de his aliàs agemus.

Ex hâc arteriarum contractione sequitur pallor, qui in ipsis unguibus, in labiis, in vultu, & reliquis se prodit corporis partibus; livor etiam ad hæc sæpe accedit; imò vidi mulierem cui in febrili frigore, nasus cæruleo suffunderetur colore; aliquando etiam maculis fusco-cæruleis interstincta apparet cutis; sanguis enim ex arteriis egressus, in primis venarum reticulis colligitur; patet id ex injectionibus, quæ punctacula, & veluti petechias aliquando efficiunt.

Sed

Sed si in ejusmodi reticulis hæreat sanguis, non mirum si in majoribus venis colligatur; eo imprimis obruitur vena cava; auricula dextra, ventriculusque ejus simul turgent; inde verò minima cordis contractio, & minimus tantum ejus parietum à se invicem recessus; hinc etiam eorundem veluti convulsivus motus, & aliquando palpitatio in febrili frigore; eam acriter urgentem experiuntur nonnulli; hinc denique anxietas summa, & nonnunquam syncope, quæ in certis ægris febrim solet antecedere.

Quin autem colligatur sanguis in cavis cardiacis, in iisque veluti in prælo hæreat, ex observatis dubium esse nequit; quod verò causam spectat, videtur statim quòd frigoris vi depulsus ab externis partibus sanguis in interna retroagatur; deinde verò variis partium succussionibus versùs majores venas agitur; progredi denique omnino nequit per textum pulmonum; unde necessariò, & in arteriâ pulmonali, & in ventriculo dextro, ejusque auriculâ, coarcevatur magna liquidi hujus copia.

Quæ autem sanguinis in pulmone inducunt stagnationem, ex multis pendent; & primò quidem, quia ejus ut & cæterarum partium contrahitur textus, objicitur ergo continuus obex appellenti ex corde sanguini,

ni, unde in vasis pneumonicis colligatur necesse est; patebit id evidentissimè, si respirationis per frigus febrile spectetur incessus; repetitis enim succussionibus fiunt inspirationes; quoties autem non possunt ritè expandi vesiculæ pulmonales, difficilius inter eas progrediuntur liquida, & necessariò in vasis suis coacervantur; hinc veluti suffocationem & anxietatem intolerabilem experiuntur nonnulli; ideoque de præcordiorum distensione querelas apud nonnullos audire est; non mirum ergo, si post mortem sanguine nigro & polyposo turgentes inveniantur pulmones, & si in frigore febrili moriantur ægri.

Inde pendere variorum ægrorum fatum ex observatione & ex corporum sectionibus, ut postea dicam, didici; idemque magni *Harvei* confirmatur auctoritate; » in » tertianæ febris, inquit, principio, mor- » bifica causa cor petens, circa cor & pul- » mones quando immoratur, anhelosos, » suspiriosos, & ignavos facit; quia prin- » cipium aggravatur vitale, & sanguis in » pulmones impingitur, incrassatur, non » transit (hoc ego ex dissectione illorum » qui in principio accessionis mortui sunt » expertus loquor.) tunc semper pulsus fre- » quentes, parvi & quandoque inordinati » sunt &c.

Non

Non magis mirum videri debet, si visceribus sanguine turgidis exsuscitetur calor interna urens, & si eum in visceribus accendi querantur ægri, dum externæ frigescent partes; rigentibus brachiis aut pedibus per hiemem, idem viget ut plurimum caloris gradus sub axillis & in inguinibus; perinde autem se res habet in febrili frigore; imò perfrigeratâ sub febris adventum corporis superficie, intensior fit motus in visceribus, unde fit in iis æstus major necesse est.

Dignosci posse videtur ex siti intensâ, quantus sit ejusmodi calor; sævit ea imprimis cum æstate exæstuant viscera; tunc autem, ut sicciore sunt fauces, ita sicciorum esse œsophagi & ventriculi ipsius superficiem conjicere licet; sed non minus certum est, absque intensiori caloris gradu, sæpe urgere sitim; hanc concitat acriorum ingestorum vis, eaque saburra, quæ in primis stabulatur viis; potest v. g. in iis hærere bilis, cujus natura in febribus omninò depravari & acrior fieri solet. Memini me observasse in foeminâ ob hepatis vitium decumbenti, quòd præter modum sitibunda esset, cum in stomachum influeret biliosi magmatis copia.

Sed ea est animantium natura, ut multiplices sint ægritudinum fontes, dum pau-

ca aliquando aut nulla occurrunt remedia ; non ex iis solum quæ jam innuimus pendet sitis , potest & ipsâ spasmorum vi aut irritatione concitari ; patet id evidenter in operationibus chirurgicis ; succedit iis ut plurimum oris ficcitas , & sitibundi sunt ægri ; atqui in frigore febrili , quod imprimis ex spasmodico oritur motu , simile quid contingat necesse est.

Subest haud dubiè quædam ejusmodi causa in sitibundis & alioquin bene se habentibus ; urget nonnunquam potûs inextingibile desiderium ; id verò nonnisi bilis aut liquidorum ex stomachi parietibus exstillantium acrimoniæ tribui potest ; inde aut aliis ex causis digestionis vitia ; alimenterum succi rancidi & urentes fiunt ; quod quidem non tam refrigerantia indicari medicamenta quam alterantia aut immutantia evidenter patet.

Confirmantur hæc omnia vomitu & nausea , quibus vexantur ægri in frigore febrili ; si in iis valde commoveatur stomachus , ejiciunt quidem , initio febrium imprimis , aut saltem in multis , magnam bilis , aliàs tenacioris , aliàs liquidioris , copiam ; imò foetidum esse id magma aliquando observavi ; at licet multum possit causa hæc , subest alia non minoris momenti ; vexatur nimirum variis motibus hepar , uti innuimus ;

mus; exsurgunt in præcordiis spasmi qui ex sanguinis stagnatione & irritatione inde ortâ deduci debent; nec quidem ad subvertendum stomachum huic proxima sit februm causa necesse est; morbi ab eo dissi, uteri affectus v. g., vomitum concitant aliquando pertinacem eumque acerrimum; pendet is ex nervis seu ex arcano partium consensu.

Varius quidem est febrilis vomitus aut vomendi conatus; primis in insultibus ut plurimum se exerit, & in graviore febrè gravior est; ideoque in vernali parcius sævit atque in autumnali; at eâ ipsâ tempestate, aut non prodit in multis, vel post certum tempus mitescit, imò & ut plurimum planè definit, ita ut solum frigus experiantur ægri; nec profectò quidquam levaminis ab hac stomachi quâcunque subversione expectare licet; morbosa planè est; & licet copiosa, amurcosa & putrida rejiciantur, remanent semper fæces emetico medicamento expurgandæ.

Ut autem sitis non statim cum frigore præsto adest, ita nec vomendi conatus; non nisi post certum tempus in genere laborare incipit stomachus; hunc tamen in nonnullis eversum observavi ante ullum algoris vestigium; interea in ejusmodi labore non eodem modo afficitur; est ubi nau-

feet tantummodo, nec contenta nisi injecto potu rejiciat; sed aliàs ita impeti solet, ut sive turgeat, sive summa sit bilis acrimonia, validus excitetur spasmus; tunc autem subvertitur universæ œconomiae animalis officina; quin etiam quandoque demittitur alvus; idque præcipuè versùs illud tempus quo desinit constrictio frigore inducta & se exerit calor; tunc etiam in quibusdam subvertitur ventriculus & ejicitur *κακoσoμαχov*, unde non parum levaminis; sunt ergo, ut diximus, hæc admodum varia, & modò leviùs, modò graviùs insurgunt; aliquando tantà fuit veneni febrilis vis, ut veluti choleram morbum in rigentibus ægris exortum viderim.

Cùm autem frigoris vi exfuscitetur nervorum actio in stomachum, & constringantur intestina, non mirum si vellicentur & distrahantur omnium partium fibræ; ideò scilicet, accedente aut vigente frigore febrili, toties disseminantur dolores varii per universum corpus; aliàs dolent articuli, ipsorumque membrorum tractus, ita ut rheumatismo laborare videantur; aliàs intolerabiles exfurgunt cruciatus in cruribus & lumbis, veluti ferro lacerarentur; in genere tamen dolores vagi frequentiores sunt, & ut plurimum veluti aciculis sibi pungi videntur ægri per universam cutim aut per
certa

certa ejus loca ; hinc non mirum si quandoque multa patiantur internæ partes , & viscera imprimis abdominis ; nonnulli tanquam de terebrâ stomachum erodente aut cultro acutè pungente conquesti sunt ; sed id magis familiare in iis febribus quæ inordinatè procedunt , à solitâ normâ degeneres.

Licet interea per frigus febrile excitentur dolores , id cùm valde sævit , sensum obtundit ; si infligatur leve vulnus , aliquando nullus percipitur dolor ; imò fuere , qui admotis igni pedibus , exuri se non animadverterint ; ob eandem causam purgantium vis irrita est , si per tempus quo rigent ægri , aut non multò ante , exhibita fuerint ; constringuntur enim partium stamina urgente frigore ; sanguis & ipse vitalis spiritus per vias solitas excurrere nequeunt ; deest ergo motus , qui sensûs principium est , aut conditio sine quâ cadunt aut languent omnia.

Ita autem aliquando afficiuntur sensûs organa , ut in quâdam parte extinguatur vitalis spiritus ; laborabat feбри intermittenti vir nobilis ; cùm verò instarent paroxysmi acerrimum experiebatur frigus ; unde in horrore & rigore summum portendi videbatur periculum ; non pulmōni tamen aut regioni cardiacæ , ut solet , impende-

D 4

bat ;

bat ; in nates solas recidit tota algoris mortifera vis ; eò enim sublata omnis sentiendi facultas , etsi profundè ad ossa usque adigeretur cultrum , de nullo dolore querebatur æger ; en ergo gangrænæ speciem , ab aliis omnino diversam ; subitò scilicet invasit , nec caloris mutationem ullam in carnes intulit.

Inde patet quænam exoriantur turbæ in omnium partium functionibus ; sed quædam tantùm hîc attingemus earum læsiones ; cerebrum ipsum v. g. aliquando impetitur ; sunt scilicet qui adventante frigore somno urgentur ; imò tantus est sopor ut verum videatur coma ; vix poterat excitari ægra quædam , & si excitaretur , statim in ejusmodi somnum delapsa veluti absque sensu jacebat ; in homine triginta annorum gravior prodibat affectus , vera nimirum anæsthesia ; mortuum primo aspectu dixisses hunc ægrum , & tamen insurgente caloris vi sui juris fiebat , & vitæ restitui videbatur.

Inde autem patet quam facilè mens possit affici ; sunt nonnunquam qui cùm algere incipiunt delirio corripiantur ; occurrit mihi fœmina quæ sub paroxysmi adventum loquax omnino fiebat , nec alio signo de imminente febris monebantur adstantes ; levis dein se exerebat refrigeratio. Vidi Medicum

dicum ingenio præstantem & verborum parcissimum, qui ante frigoris febrilis insultum garrere similiter incipiebat, & in eos qui cum ipso contenderent acriter invehi solebat, irascenti omnino similis.

Ad hæc omnia accedit deinde secretionum perturbatio; transpirationi objiciuntur undequaque impedimenta; urinæ colorem exuunt, tenuiores sunt parcæ & aqueæ; constrictis namque nervorum actione tubis renalibus, effluunt tantummodo quæ liquidiora sunt; cum præterea necessario immi- nuatur vasculorum vis, crassiora sanguine rubro disjungi nequeunt, nec per angustiores vias secedere; unde remaneant in suis colatoriis, aut aliò deferantur necesse est.

CAPUT X.

De calore & sudore febrili.

POSTQUAM per certum tempus decurrit frigus, incipit mitescere, illudque excipit calor, qui per extremas sensim diffunditur partes, & varius omnino esse solet; intensior est nimirum si impensè in- horruerint ægri; cum autem ad certum ascendit gradum, fauces exurit sitis, adest
oris

oris & cutis ficcitas , urget cephalalgia ; graviores insurgunt per artus dolores , sævit lumbago , oritur lassitudo ulcerosa , succedit non rarò inquietudo , tum jactatio & anxietas ; interea rubet totum corpus , & vultus imprimis ; color flammæus urinis inducitur &c.

Ut autem ejus caloris , qui in animalium viget corporibus , & variorum morborum aliquando magna pars est , naturam assequamur , de causâ primâ quâ excitatur non agemus ; nosse sufficit eam quæ à Chemicis ita confidenter prolata est & juxta eos in sanguine latet merum esse figmentum ; sed quod magis mirum videbitur , caloris vim non potiori jure ad arteriarum motum referri posse ausim asserere ; languet pulsus sæpissime aut vix explorari potest in summo partium æstu ; observatur nonnunquam quod una intensè frigescat , dum in ipsâ non concidit vasorum vis ; eorum actio necessaria est solummodo ut conditio sine quâ nequit accendi vitalis ignis , non verò ut causa *efficiens* ; quânam autem ratione post febrile frigus incandescat quibusdam exemplis doceri possumus.

Et primò quidem , cùm quis balneo frigido immersus est , quâdam dein febris specie laborare solet ; cùm manus frigore rigentes nive fricantur , excitatur calor , rubor-

ruborque inducitur, & exhalat dein vapor seu fumus; si quis diu vento frigidissimo, aut glaciali aëri se objecerit, & in tepidum locum se receperit, incalescit tandem quæ jam rubebat facies; contingit idem, imò & cum dolore, in quâcumque parte, quæ intensum frigus experta est.

Haberi ergo debet frigus tanquàm causa irritans; nam in refrigeratis partibus remanet acrior stimulus; stamina nimirum contrahuntur; coacervantur in iis, & stagnant liquida; unde se proripiente frigoris vi, aut sensim auctâ per irritationem nervorum actione, insurgit vitalis motus; inde coryzæ & catarrhi, cùm ex loco calidiori in frigidiorum quis transit; ex eâdem etiam mutatione aut periculosâ vice ortum trahunt sæpissime hiemales pleuritides; pleniora scilicet vasa, seu caloris vi turgentia, suscepto frigore constringuntur; retardatur ergo in iis aut impeditur circuitus; sanguis interea continuo appellens, validius in ea incidit quæ ipsi obicem ponunt; continuo autem motu, & fibrarum distractione non mirum si vitalis ignis excalescat.

Similem quandam feбри intermittenti inesse causam, suspicari licet; frigoris vi collectus hæret sanguis in cavis cardiacis, in pulmone & in vasis mesentericis: hæc
au-

autem sanguinis moles, veluti continuo stimulo, nervorum concitat actionem, inde necessariò insurgit arteriarum motus, & innatus exfuscitur calor; interea prout partium contractio, & liquidorum stagnatio major fuerit, eò major in genere erit æstus; aliquandò tamen ita contrahuntur omnia, ut vitalis oppressa vis nequaquam revocari possit, & omninò restinguatur.

Non tamen huic causæ ita insistendum ut ex eâ tantummodo exoriri calorem credamus; dubium enim esse nequit, quin adsit alia à frigore omninò diversa, ea nimirum quæ febrim infert, & quæ pendet ex veneno seu miasmate fibras vellicante; atqui & hoc stimulo augetur circuitûs vis & accenditur calor.

Patet id ex ipsis febribus quæ intermittunt, aut remittunt; nam hæ absque prævio frigore, aut saltem absque intenso ejus gradu nonnunquam invadunt, & aliquando graviùs urgent, præterea, in febribus continuis & in pleuritide, aliisve affectibus antecedere solet refrigeratio; remanet interim causa irritans, vel inflammatio, ex quâ pendet succedens calor. atque omnis febris decursus; frigus tamen acerrimum, & per certum tempus protractum, imò & aliquando periodicum observavi, nullo omnino insequente æstu; instare tamen quisque credidisset febrem.

Quod

Quod innuere visum est, calorem prægresso frigori tribuendum esse, est certorum remediorum effectus; iis scilicet tolli frigus nec calorem aut febrim inde insequi observatum est; at si successerint remedia hæc ante frigoris invasionem ingesta, quis ausit asserere ea in causam ipsam frigoris & febris simul vim suam non exerere? id profectò ita se habere innumera probant, ut in febrium curatione demonstrabimus.

Intensior est quàm fortasse statim videatur in febre intermittenti caloris vis; superat enim calorem qui in variis febribus acutissimis urgere solet; ascendit scilicet ad 39^{um} gradum aliquandò; hinc autem patet quantùm esse oporteat in febribus ardentibus incendium, cùm sæpius ex intermittentibus sint compositæ; eò nimirum intensius erit, quò plus sanguinis in venâ portâ, in cordis atriis, & in pulmone coæcervatum fuerit; ideò circa eas partes tantum ægri experiuntur æstus.

Congruit id cum œconomix animalis legibus quæ per reliquum vigent corpus: caput v. g. in phrenitide, fauces in anginâ, acriori exuruntur calore; congestus in his partibus sanguis majori in eas propellitur impetu; unde incalescant oportet; non interea tantam esse semper caloris vim, quanta ab ægris percipi videtur, existi-

man-

mandum est; non melius de eâ sensu judicant quam de frigore; notum est autem quod nonnunquam, cùm sentienti videatur acerrimum, leve admodum, & aliquando nullum, reperiatur admoto thermometro.

Febrilis æstûs phænomenon est sudor; uti copiosè manare solet, cùm valido exercitio commovetur corpus, ita & affatim profluit, si causæ alicujus internæ stimulo auctus sit arteriarum motus; at si intensius urgeant febris & calor, non ita aperiuntur cutis spiracula, constringitur è contra ejus textus, unde ardor & siccitas in universâ corporis peripheriâ; expectandum ergo donec deferbuerit febris ut exhalare possint qui eâ subacti sunt humores; tunc autem relaxatis fibrillis & colatoriis cutaneis, prorumpit undequaque serofus latex; superstes febrilis motus, relaxatio partibus inducta, vasorum externorum repletio, sudorem plus minusvè promovent.

Perpicuæ sunt & certissimæ hæ sudoris causæ; inducta quidem laxitas dubia non est; cùm vigente paroxysmo distrahantur fibræ, eo concidente debiliores esse debent; teneriores enim & molliores fieri solent carnes, caloris & motûs vi; poterunt ergo per poros facilius effluere liquida, idque eò magis, quòd cùm validior fuerit

fuerit ipsorum circuitus, his turgeant necesse est vasa cutanea; ad eam etiam exundationem per sudoris vias multum confert mutata sanguinis crasis: solvitur, ut liquet, in iis qui febrim passi sunt; pallidi namque & exsangues fiunt; interea hæmorrhagiis aliquando obnoxii sunt; imò ob degeneris sanguinis vitia in scorbutum solent incidere.

Inde patet quanta hîc varietas possit occurrere; in certis ægris incipit quandoque sudor cum calore; in aliis tardiùs aut non multò post cùm incanduit corpus; in nonnullis verò seriùs erumpit; diutius præterea aut per breve temporis spatium solet promanare, sed aliàs profusus & aliàs parrior; hæc autem variè se habeant necesse est pro morbi causâ, pro viscerum affectibus, pro vario frigoris aut caloris gradu, vel pro ægri temperie; inde aliquando insolita erumpit sudorum vis; febre intermittenti laborantem vidi, qui sexies quâlibet die cutaneam experiretur illuviem; bis terve intra horam indusia exuere cogebatur.

Ut in sudoris organa, ita in alia colatoria diversa est admodum caloris vis, urinæ v. g. tenuiores fiunt vigente frigore; nam constrictis partium omnium staminibus & liquidorum languente motu, elabi solummodo

modo possunt quæ tenuiora sunt per renum fecernentia organa ; remanent interim crassiora , aliis immixta humoribus ; at aucto febrili motu flammeæ fiunt ; à bile & oleosis partibus immixtis & subactis pendet hic color , variusque esse solet , modo nimirum intensior , modò tenuior.

Intenditur etiam rubor profusâ sudorum copiâ ; nam per poros cutaneos secedunt subtiliora liquida , unde ex urinoso latice detrahantur oportet in eoque relinquuntur quæ rubra sunt , & febrili igne veluti adusta ; ita cùm quis validè commovit corpus & impensè sudavit , ardent urinæ & parrior est earum copia ; sed fiunt simul spumæ , & in pelliculam concrescit earum superficies ; quod & in febribus observare est.

In iis denique post exantlatam paroxysmi vim duplex deijcitur sedimentum , lateritium scilicet , aut album & læve ; primum quidem , de quo aliàs agemus , symptoma morbi est , aliud verò solutionis signum ; de eo multa apud Veteres ; an verò æquè certa sint ac ipsis creditum , non facile dixerim ; sed à Recentioribus nimium videntur neglecta.

Galenus ipse initio tertianarum febrium , earum solutionem ex urinis ominari solebat ; expectanda est juxta eum post quartum
tum

tum circuitum, si rubræ sint aut flavescentes, & adsit enæorema; post septimum prodit si rubræ tantummodo sint; & post tertium si primâ die dejiciatur sedimentum læve & æquale; hæc quidem subsidencia magni momenti est in febribus quartanis præcipuè, sed, ut aliàs ostendemus, varia omnino esse solet.

Uti autem, cùm concidit febris continua, oriuntur varii motus in visceribus, ita & mitescente intermittentium paroxysmorum vi, prodeunte nimirum sudore aut eo desinente, demittitur alvus aliquando, aut concitatur vomitus; aliquando inquam, cùm id in quibusdam tantummodo ægris observaverim; inductâ nempe laxitate confluit bilis in intestina, & fæces alvinæ progrediuntur, idque eò faciliùs quòd motu febrili aucta fuerit earum acrimonia; non latuerunt *Galenum* naturæ conatus ejusmodi; multus, inquit, vapor calidus per cutim exhalat, bilisque vomitu rejicitur, vel alvus deorsum fertur.

CAPUT XI.

De apurexiâ quæ paroxysmos sequitur.

POST sudorem succedit apurexia, & omnia in naturalem statum videntur restitui; sed ejus temporis quo filet febris varius est decursus, multaque in ipso notanda occurrunt; intervalla quidem ad sensum lucida esse omnino videntur, nam vix occurrit quod morbi speciem præ se ferat: vix tamen fieri potest ut ab integrâ valetudine in morbum, & à morbo in valetudinem fiat statim transitus; unde *Galeno* injecta suspicio de perfectâ apurexiâ; non potuit is adduci ut crederet diebus intermediis omnino quiescere febrilem vim.

Noctes paroxysmum antecedentes multis inquietæ observatæ sunt, certumque est, si attentè res inspiciatur, remanere per intercalares dies aliquod morbi vestigium; remanet enim morbi fomes qui ab uno ad alium paroxysmum stimuli instar urgere debet; præterea non possunt interna se optimè habere, cum quid semper præ se ferat vultus, quod morbum redolet, cum urinæ & fæces à naturali statu recedere soleant, cum denique non ita vigeat ut plurimum
appe-

appetitus, nec æquè perfectà sit digestio aut ciborum concoctio.

Prout igitur febris statà hora propiùs ingruit, debent tacitæ, aut aliquatenus sensibus obviæ excitari turbæ; cùm enim proximè instat insultus seu febrilis ignis eruptio, necesse est ut fomitis ipsius vis exfuscitari ante incipiat, idque eò magis si perturbetur paroxysmorum ordo; antecedunt scilicet non rarò solitum invasionis tempus, illudque modò sensim, modò longiori varioque interjecto transiliunt spatio; quo autem citiùs exfuscitantur, aut brevius inter eos sit intervallum, eò majores feberi accedere vires signum est, eamque celeriori gressu ad continuam properare; contra verò cùm seriùs invasit febris, de eà aliquid demptum esse statui potest; mitior certè est sæpissime ejus vis, & brevior retardati cujusque paroxysmi decursus; unde spes esse potest ad finem inclinare morbum.

Haud equidem me latet *Galeno* secus visum esse; anticipatione, inquit, solâ non significatur incrementum.... quandoquidem quartani, tertiani & quotidiani paroxysmi, usque ad perfectam solutionem, tempus quo primùm ingruebant prævertere observatum est; hæc quidem quin vera sint negari nequit, si leviores sint anticipationes; non sunt eæ infrequentes, imò in plerisque oc-

currunt febribus; nullius tamen sunt momenti, initio imprimis, cum febrilis causa, veluti incerta, non ita fixum sequi potest typum; difficile admodum est ut ea quocumque tempore statis præcisè exfufcitetur horis; innumera enim intercedunt quibus ejus turbari debet incessus.

At certâ constat experienciâ eas febres, quarum accessiones aliæ alias multum quâlibet invasione antecedunt, vires novas eundo sæpiissime acquirere & difficilius omnino ad exitum deduci; tertianæ v. g. in duplices tertianas, imò in continuas commutantur; quin etiam in certis epidemiis ita progrediendo mali moris adducunt symptomata; ideo per initia remediis diligentius incumbendum; cum nuper horarum quatuor aut quinque anticipatio mihi bis terve in quodam ægro occurrisset, venam eâdem die bis secandam jussi, & ita à more solito aberrantis morbi fracta est vis.

Confirmantur ea iis febribus quæ nuper in castris grassatæ sunt; erant eæ duplices tertianæ, quæ quotidie duabus tribusve horis ante prægressum paroxysmum exoriri solebant; illæ brevi in verè continuas mutabantur, aut saltem graviora omnino adducebant symptomata.

Interea ut ultra citraque incidunt invasionis tempora, ita paroxysmi in variis febribus

bribus variè excurrunt; longiora nimirum aut breviora sunt eorum intervalla; inde autem deducta est tertianæ in duas species divisio; alia scilicet tertiana est legitima seu exquisita, alia verò notha seu spuria; exquisitæ paroxysmi ad horas duodecim, spuria verò ad horas octodecim plus minusve excurrere dicuntur; at quod exquisitam seu vulgarem spectat, eam ad horas duodecim protrahi vix unquam observatur, nec uspiam *Mercuriali* in quadraginta annorum praxi occurrit; experientiâ autem quotidianâ docemur paroxysmos intra quinque, sex, septem vel octo horas consistere; excipiendi sunt tamen aliquando primi insultus, qui in nonnullis ægris longiùs solent procedere.

Mirari interim subiit multorum opinionem qui tertianas exquisitas nothis graviores esse asseruerunt; in istis, inquiunt, remissiora sunt omnia, non incipiunt cum rigore aut tantâ frigoris vi, minùs est pungens calor, pulsus non adeo velox aut inæqualis, sudor parciùs profluit; ego verò ejusmodi febres, quarum longiores sunt paroxysmi, summo impetu decurrere sæpissime observavi; necesse est ergo, ut viri clarissimi contra sentientes de iis egerint febribus nothis quæ degeneres in vetustatem abierunt; id ita se habere dubitari nequit, cùm earum longissimum esse stadium

afferant; aliæ-juxta eos ad 14^{um}, aliæ ad 20^{um}, paroxysmum, nonnullæ verò ad sex menses producuntur; non negaverim tamen quin aliquæ occurrant quæ ipso initio longiores habeant accessiones levioribus stipatas symptomatis.

Intermittentium decursum multa cum febribus continuis habere communia creditum est; autumant scilicet nonnulli, ut intra septem dies certæ febres continuæ desinunt, ita septem circuitibus judicari tertianam febrem; at notari velim febrem continuam septem dierum nocte ac die vigere, intermittentem verò ex viginti quatuor horis, per quinque aut octo tantum excurrere; aliæ verò continuæ, quæ die undecimâ, quatuordecimâ, vigesimâ primâ desinunt, quânam ratione ad aliquam febrem intermittentem referri poterunt? an ad quartanam v.g. quæ tertianâ diuturnior est; supponamus ejus terminum esse sexagesimum diem, quod fanè multum à vero aberrat; erunt per id tempus accessiones viginti, æque sex aut octo horarum; è contra verò per totos quatuordecim aut viginti dies excurrent continuæ absque ullâ intermissione.

Si quid tertianæ aut quartanæ eum continuis commune videri possit, id positum est in solâ earum remissione; solent nimirum

rum exacerbari & mitescere certis temporibus; sed perseverat febrilis motus, & brevissima est remissio aut vix aliquando exploranti patet; è contra verò per unum duosve dies definit aut omnino desinere videtur febris intermittens; atqui nil affine esse potest inter morbos qui continuo procedunt gressu per longum temporis spatium, & eos qui statis temporibus alternè redeunt & evanescunt.

CAPUT XII.

De variâ ratione quâ febris evanescit, aut exsuscitatur, vel mutatur ejus incessus.

SED quare ita evanescit febris? & unde ipsius alternus statisque temporibus præfixus reditus? id profectò si assequi liceat, non quærendus quæstionis nodus nisi in causæ febrilis phænomenis, aut in similibus, si qui sint, alternisque variarum partium variorumque affectuum motibus; statim igitur inquirendum quomodo incedant varièque resurgant aut delitescant paroxysmi, quorum tam intricata & obscura ratio.

Febrilis causæ natura nobis omnino incognita est, hoc tantùm liquet esse in eâ stimulantem vim & excandescentem, eâ

spiritum vitalem statim attingi, & veluti obrui, ipsamque tandem motu aucto & calore subigi, ita ut iisdem viribus concitari & concidere videatur; perinde quodammodo in ejus agendi ratione se res habet ac in crapulâ; opprimitur statim ejus ventriculus; insurgit deinde febrilis motus, qui omnia sanguini admixta subigit, veluti coquit & eliminat; at in eo differt à febre intermittente febris hæc, quod ut plurimum per se ipsam curetur, nec nisi novo in victu errore concitata resurgat.

Superfunt ergo febris semina post paroxysmos; ideoque statis temporibus in eam erumpant necesse est, & quasi fermentum se undequaque diffundant; vel enim colligantur oportet antea per corpus sparsa, & quendam in locum confluant; vel eadem novis augeri debent viribus, quæ tandem se exerunt febrimque accendunt.

Sed quâ fieri potest ut dum colliguntur, aut intensiores fiunt veneni febrilis vires, iners id omnino sit aut esse videatur? an cum veluti mortua per intercalares dies si-
leant ejus semina, causâ aliquâ indigent quâ exsuscitetur ipsorum vis? num v. g. perinde se habet excandescencia febrilis, ac in pulvere pyrio qui per se nil præstare potest, & qui, si admoveatur ignis, explodi solet?

Id quidem exemplum aliaque ejusmodi
addu-

adduxerunt multi, licet ab œconomiâ animalis aliena sint; quid autem ex iis deduci potest quod cum febre congruat? si quædam ei concitandæ videantur apta, eorum vires tales non sunt, ut alternis concidant & insurgant, atque certo subjiciantur typo; necesse est ergo ut propriâ vi seu per se ipsam statò tempore erumpat febrilis causa; citiùs tantummodo aut tardiùs se exercere poterit si quædam occurrant quæ ipsi obicem ponere aut vires possint addere.

Sed satis superque in hac enodandâ quæstione immorati sumus; inanis enim est ac otiosa; eadem causa quæ primum invexit paroxysmum, sequentes exsuscitat, eodemque procedit gressu; atqui cùm primò corpus subiit, aut ex ejus latebris sponte exorta est, non integris haud dubiè pollebat viribus, iis nimirum quibus ad ultimum gradum evecta prodiit; febrim enim statim concitasset; sed paulatim humores infecit, aut increvit, deinde verò cum impetu erupit ejus vis; sicut autem initio alienis aut adventitiis causis non opus fuit, ut tandem post certum tempus posset insurgere, ita & quod ex ipsâ post primum remansit insultum, nil aliunde requirit adjumenti, ut iterum possit incandescere.

Quod profectò mirum est, ita frænari potest ejusmodi causâ, ut in corpore latens febrim

febrim non concitet & alios affectus inferat; post certa adhibita remedia v. g. silent repressi paroxyismi & interea ægrum fieri potest totum corpus; sunt nimirum multi in quibus feбри ita compressæ succedit gravitas corporis, ventris tumor, appetitus dejectus; quod verò non expectandum videretur, si redeat febris, aliquando his omnibus levatur æger; absimitur causa reintegratis paroxyismis, ita ut ejus remedium videatur ipse febrilis motus.

Aliàs, quod magis mirabile, sublati quibuscunque symptomatis remanet febrilis formes innoxius; incedit ejus vis tacitè, aut potius latet veluti ignis cineri suppositus; tunc sæpe, si quod incidat erratum in victu, si frigore aut aëre humido tentetur corpus, aut quâdam aliâ ratione partium perturbentur functiones, tunc, inquam, quæ siluit v. g. per mensem aut diutiùs febris resurgit sævitque veluti ipso initio.

Nec quidem dici potest eam ex illis causis ortum trahere; his enim nil inest quod ad febrim intermittentem potius quàm ad alios morbos plus conferat; pristinam tantummodo exsuscitari labem probatur, ex eo quod non quæcunque tunc resurgat febris; imò è contra si tertiana aut quartana primùm prodierit, eundem ut plurimum typum præcisè refert quæ iterum exoritur;

rema-

remanet ergo eadem causa, nec ipsius ulla-
tenus immutatur natura.

Observatur & hæc constantia sive immu-
tabilitas in ipsis reduplicationibus; nam si
contingant in tertianâ, hæc in tertianam
duplicem faceffit; si verò in quartanâ, exo-
ritur quartana duplex; eundem nimirum
servant ordinem paroxyfmi, sibi que tertiâ
aut quartâ quâque die respondent; vel in
ipsis anticipationibus se prodit ordo quidam
non rarò; singulis enim diebus aliquando
& æquali temporis spatio statam antecedunt
paroxyfmi horam; in recessu denique ab
ordine hoc seu eâ lege non deflectunt ejus-
modi febres; in duplici tertianâ v. g. desi-
nit una aliquando, alterâ remanente cum
omnibus suis dotibus; idem observatur in
duplici quartanâ, imò & in eâdem tripli-
catâ.

Non tamen ita semper sibi constare fe-
brium naturam existimandum est, ut ter-
tiana in quartanam non mutetur, aut quar-
tana, quod tamen rarius est, in tertianam
non faceffit, vel quotidianæ speciem præ
se non ferat; inde autem efficitur ejusdem
fermè causæ sobolem esse utramque febrem,
aut saltem alteram alteri esse multum affi-
nem; tertiana interim magis abnormis esse
solet; ita sæpe mutatur ut nil de prima-
rio typo retinere videatur, & vix dignosci
possit;

possit; patebit illud ex certis febribus, quæ ex aliis compositæ variè omnino incedunt; sed liquet idem imprimis ex febribus tertianis quæ in hecticarum speciem diu excurrunt, diversisque adscitis symptomatibus faciem omnino diversam induere solent.

Cùm faceffit aut evanescit hæc constans febris causa, aliquando equidem veluti uno ictu tollitur, nec dignosci potest quomodo eam attingant causæ ipsam tollentes; eam aliquando abigunt subitæ mentis & corporis commotiones; terror v. g. aliquando febrim quartanam curavit; idem præstitit ira, tum calor intensus, tum motus, & summa partium internarum perturbatio; at quod minus mirum, eandem jam sopitam causam & latentem concitare possunt eadem causæ; solus rei insolitæ aspectus eam sæpius revocavit; ad gliris conspectum v. g. nonnunquam summâ vi resurgere visa est.

In curatione occurrunt alia quæ non minus secum aut cum ratione ipsâ pugnare videntur; subdita est febrilis causa variis remediis, imò quod iterum mirum, sibi aliquando adversis; quæcunque autem ea sint, ipsis curatur febris eadem prorsus ratione quâ antidotis fugantur venena: tacitè tamen absque ullâ perturbatione se aliquando veluti sponte proripit febrile venenum; quod verò propius ad rem, de quâ agitur, spectat, ita

ita sublatâ febrî, remanent nonnunquam ejus quædam vestigia; sunt enim affectus qui eodem tempore, quo paroxysmus se exerere solebat, prodeant; vel adest tunc capitis aut corporis gravitas vel dolor aliquis, aut quidam quasi ingratae rei sensus totum corpus afficit: imò, ut diximus, si quibusdam credendum, febriles insultus eodem tempore sive versùs eandem horam, cum ii post diuturnum discessum iterùm exoriuntur, prodire solent.

CAPUT XIII.

An in aliis affectibus insit aliquid quo duci possimus ad periodorum febrilium causam.

SED ut ad quæstionem propositam redeamus, an in iis omnibus elucescit aliquid quo explicari possit, ut alternis moveatur & quiescat febrilis causa? Fatendum profecto ex tam accuratâ phænomenon historiâ, leges quibus hæc causa subjecta est magis adhuc incertas videri & intricatas; inquirendum ergo est num ex aliis affectibus aliquid deduci possit, quod tam obscuræ rei lucem aliquam affundat.

Multa quidem in iis occurrunt quæ ad febrem intermittentem referri posse visum est;

est; vel in iis ipsis quæ maximè dissimilia sunt quædam se produnt, in quibus alter-norum motuum causas perspicere aut suspi-cari licet; at varia omnino esse possunt; unde iis cognitis superest dubium num aliud sit aut omnino diversum circuitûs febrilis principium; cùm tamen in eo aliquid plus minusve ejusmodi causis affine esse possit, eas diligenter prosequemur.

Ad periodorum rationem assequendam, voluerunt quidam ita partes comparatas esse in animantium corporibus ut certis possent subjici legibus; potest v. g. quivis certum tempus evacuationibus alvinis præfigere; potest & appetitus ciborum ita regi ut cer-tis horis exsuscitetur, potest denique som-nus certis circumscribi temporibus, assue-tudine enim eâdem horâ expergiscimur; sed quid inde licet concludere? dici profectò nequit in febre intermittenti assuescere par-tes quieti & alterno motui; earum enim affectus febriles, vel ipso initio, quam inire debent, ineunt viam.

Sunt motus quidam naturales & præter-naturales, qui magis ad febris intermitten-tis accedunt motus: menstrua v. g. statò tempore solent erumpere; idem contingit non rarò in hæmorrhoidum fluxui obno-xiis; in utroque autem casu non alia vide-tur incusari posse causa, nisi sanguinis per-
cer-

certum tempus aucta copia, quæ dein per uteri collicias, & per hiantia hæmorrhoidaliū vasorum ora sibi viam aperit; similem causam incusare licet in bilis, salivæ, transpirabilis materiæ, sudorisque effluxu, qui aliquando certas servat periodos; idem dici potest de urinâ, quæ quandoque statis temporibus copiosius profluit.

Non absimilis est ratio tumorum quorundam, ex quibus periodicè effluere solet sanguis; hi sedulò in examen vocati exhibuerunt venas summâ dilatatione in amplissimos canales mutatas; in has è minimis arteriis immixtus sanguis in molem assurgebat, & statis temporibus sibi objecta infrungebat repagula; aliud exemplum aliquoties vidi in variis tumoribus per medium sectis; ex eis periodica oriebatur hæmorrhagia ob collectum sensim in quodam cavo sanguinem.

Alii sunt affectus periodici, quorum exortus & causa obscurior est; tales sunt hemi-cranîæ, vel dolores aliquando acutissimi & veluti per quemdam circuitum alternis insurgentes & evanescentes; occurrunt & multi alii machinæ humanæ motus, qui instar maris æstus incedunt; ipsæ febres continuæ remittunt & exacerbantur; nocte imprimis ingravescere solent, & matutinis horis aliquatenus concidunt.

Sed

Sed quâ ex causâ verosimiliùs hæc deduci possunt quàm ex materiâ quâdam cujus augetur aut imminuitur quantitas, vel quæ acrior mitiorve fieri solet? Nonne prostat v. g. hujus rei argumentum in febribus continuis imperfectâ crisi judicatis? ejus vi scilicet expellitur materiæ morbificæ magna copia, ideoque conceditur quies per aliquod tempus; quæ autem relicta, colligi potest iterum, viresque recipere, & inde in febrim relapsus.

Simile quid proflare videtur in podagrâ & in epilepsiâ; in podagrâ quidem dubium non est quin sit materia quædam ipsam efficiens; hæc autem per corpus circuit diutacitè & innocuè; colligitur tandem in certis partibus ipsi excipiendæ aptioribus: cùm autem collecta est & movetur, statim exoritur insultus.

Quod verò epilepsiam spectat, videtur saltem aliquando ex collectâ etiam materiâ ortum trahere; cùm v. g. ex quodam loco affecto, contuso, aut vulnerato insurgit, nonne in eo fit collectio quædam quæ tandem stimulantur nervi? nonne id multò magis evidens est cùm in miasmate retro-actò ejus latet causa? nam si fonticulis apertis elabi possit miasma ejusmodi, solvitur morbus, ita scilicet impeditur ejus miasmatis collectio.

Hæc

Hæc ad febrim intermittentem partim saltem referri posse multis aliis probatur, quæ in ejusmodi morbis non ita videntur absimilia; & primò quidem podagræ causa latere potest per certum temporis spatium; exsuscitatur ea nonnunquam fermè subitò, sive sponte, sive animi pathematibus, sive erratis in victu; febrem aliquando infert à feбри intermittenti non valde diversam; in varias partes detrudi potest, in iisque varias concitare turbas; subigitur tandem dolore & tractu temporis; præterea collectâ materiâ evanescente, aut mutatâ remanet fomes, ex quo vere sæpius & versùs autumnum imprimis prodire solet.

Quædam denique insunt, licet adeo diversi sint morbi, epilepsiæ & feбри intermittenti communia; invasio in epilepsiâ est subita, & inexpectata; nervos irritat affectus hic & in consensum trahit; periodicus est aliquando, & pathematis aut erratis in victu excitatur; subigitur tandem causa vel expellitur motibus internis & externis; superest tamen fomes ex quo similes erumpant insultus.

Videtur & ab invasione febris intermittētis aliquid non planè alienum præ se ferre hysterici affectus invasio; turgente utero v. g. concitatus aliquando subitò infurgit,

furgit, uti & epilepsia à quâ non multum distat; stomachum subvertit, frigus infert, aliasque ciet turbas; irritantur scilicet nervi donec evacuatio succedat menstrua, & tollatur sanguinis collectio.

Si igitur conjecturæ tot & tantis tamen argumentis innixæ indulgere liceret, statui posse videretur: 1°. dari in febribus intermittentibus quandam materiam in corpore genitam vel aliunde advectam, quæ per universas, ut diximus, diffundatur partes: 2°. eam tamen præcipuè hepati esse infectam, in ipso eam colligi, in illudque vires suas exerere: 3°. postquam ad certum gradum devenit, & certa vis ei est addita, ipsam veluti admoto stimulo visceris illius textum nervosque vellicare, sanguinis cursum retardare, acrimoniam pravasque dotes illi conciliare: 4°. eam veluti facto impetu in nervos agere totumque commovere corpus, & tandem ex loco primùm affecto & ex omnibus aliis partibus febre insequenti excuti & diffari. 5°. denique remanere fomitem qui sensim iterum auctus easdem concitet turbas.

Ulteriùs sapienti Medico progredi non licet; commodè quidem his suppositis explicatur febrium intermittentium circuitus; at quid ferat natura, non quid ingenio commodum sit & nodum solvere videatur, spe-

ctan-

standum est; sunt equidem in iis quæ jam diximus nonnulla, quæ certa omnino sunt, alia verò magnam solummodo veri speciem præ se ferunt; illis standum, & de istis inquirendum superest.

De causâ v. g. seu de materiâ febrili nullatenus dubitari potest; patet id, ut diximus, ex paludosis locis, quorum exhalationes, corporis intimos recessus subeuntes, febrim concitant.

Venenum hoc hepati esse adversum; idque imprimis aggredi, certissimis probavimus argumentis; idem verò diffusum iterum colligi & vires recipere non minùs certum ratumque est; liquet id, ut jam innuimus, ex febribus continuis malè judicatis.

Earum autem virium, quæ augentur & silent ad paroxysmum usque, in eoque incandescunt, ratio non ita perspicua est; at in aliis morbis similia proflare exempla monuimus; vomicæ v. g. innocuè in pulmone latere videntur donec erumpant; in ipso hepate quandoque adsunt abscessus nullo eorum prodeunte signo vel symptomate; ob congestionem sanguinis sæpe exoriuntur hæmorrhoidum dolores, absque ullo hujus congestionis præeunte sensu; idem dici potest de sanguine menstruo, de podagræ & epilepsiæ causâ, ut jam innuimus &c.

Quod verò spectat causæ seu veneni febrilis in nervos actionem, ea & in aliis affectibus observatur; suppressis v. g. menstruis deferuntur in alias partes spasmī; affecto hepate subvertitur stomachus, uti & cū in choledochō ductu hæret calculus; quidni autem idem efficeret febris causa in hepatico textu se exerens, vel in primas vias delatus ejus stimulus?

C A P U T XIV.

De diversâ causæ febrilis actione in variis febribus, in vernalibus v. g. & autumnalibus.

U T ut hæc se habeant, patet saltem quænam possit in febribus occurrere varietas, aut quam variam faciem præ se ferre possint; venenum enim febrile diversas omnino potest induere formas; ita discrepare videntur aliquando, quas inducit febres, ut alienæ eas esse profapiæ quibusdam visum sit; non tamen inter eas tantum inest discrimen; quæ ex eodem fonte procedunt, absimili possunt viâ progredi, aut variis stipari symptomatis.

Febres vernaes v. g. & autumnales non ejus-

eiusdem esse naturæ quibusdam visæ sunt ; idque multis argumentis probari posse contendunt ; & primò quidem , inquiunt , vernaes salutare sunt , nullâ fermè medellâ indigent , septimo sæpe desinunt circuitu , gravioribus non stipantur symptomatis , non adeo urgent nausea , vomitus , & calor , urinæ tanto non suffunduntur rubore nec ita lateritiæ sunt , sudores cum sint minùs profusi , non exhauriuntur ægrorum vires , verno denique tempore absunt quartanæ , nec in eas ut plurimum abeunt tertianæ ; autumnales denique vernalibus fungantur , & vernaes autumnalibus.

Sed invalida sunt omninò ejusmodi argumenta , in iisque falsa veris intermixta ; non ita salubres semper sunt quæ verno tempore prodeunt febres ; certis temporibus graviores sunt ; anno proximè elapso v. g. ut plurimum duplices erant tertianæ ; in aliis verò epidemiis eandem omnino præse ferebant speciem ac autumnales , non multum saltem inter ipsas erat discriminis ; epidemicè quidem grassantes citius accedente æstate mitescent aut evanescent ; sed iterum eadem prodeunt sæpissime accedente autumno , iisdem scilicet stipatæ symptomatis ; eundemque omnino referentes morem.

Si verò epidemica non sit febris verna-

lis, non magis ab autumnali absimilis esse potest; eadem omninò sunt prævia & subsequenta earum symptomata, idem est ipsarum typus; hoc tantummodo intercedit discriminis, quod vernaes in tempus iis solvendis aptissimum incidant; eo veluti renovantur corpora, viget transpiratio, ideòque ipsæ autumnales quæ ad ver usque excurrerunt se proripere solent: at de iis fusiùs Libri III. capite primo.

Reliquum est igitur ut quædam tantummodo intercedat differentia inter veneni febrilis effectus; præcipua autem est illa quæ tertianas v. g. à quartanis dividit; sunt revera ejusdem naturæ, licet adeo videantur diversæ; nam aliæ in alias commutantur, cùm tertianæ in quartanas & quartanæ in tertianas abire soleant; præterea adsunt eadem in utrisque symptomata; frigus scilicet, calor, & sudor sibi eodem succedunt modo; si quod in causis occurrat discrimen, id in vi intensiori aut remissiori vel potius in quodam eoque peculiari agendi modo positum est; quî autem fiat ut tertiâ vel quartâ quâque die erumpat venenum, id profectò statui nequit.

Sunt tamen quædam quibus si tantummodo spectentur effectus, multum à se invicem discrepare videantur tertianæ & quar-

quartanæ febres ; imò , si quibusdam credatur , ab ipso initio prævideri potest cujus generis futuræ sint ; adest v. g. in tertianis horror & rigor , in quartanis verò simplex sæpissime refrigeratio aut horror ; cum autem incidit rigor , non est pungens instar acûs , sed gravior aut veluti ossa essent contusa ; longius interim excurrit frigus ut plurimum , in senioribus præcipuè , quibus ut diximus , sanè infestum.

Non minùs à se ipso differt pulsus , si observatis habenda sit fides , nam in tertianæ accessione tarditas non multùm quidem à naturali abest , in quartanâ verò multò magis ; est scilicet , veluti in decrepitâ ætate , tardus , rarus & durus ; in multis verò gressu incedit tremulo & obscuro , & valde inæquali ; non rarò post celeres parvasque vibrationes insurgunt validiores , & inter eas longum excurrit intervallum ; videtur denique , teste *Galeno* , ut jam diximus , arteria ossi alligata , ita ut inde se efferre nequeat.

Calor frigori succedens non ita urget in quartanâ , nec mordax est aut lancinans ; sudor hunc insequens quibusdam parcior observatus , aliis magis profusus ; varia similiter in variis est urinarum facies , crudiores juxta *Galenum* initio , procedente verò morbo intensiori tinctæ colore pro-

fluunt ; crassior deinde dejicitur hypostasis , alba quidem , non verò rubra aut lateritia ; nonnulli interea alia omnino observârunt ; ipso ineunte paroxysmo saturatæ illis occurrerunt urinæ , eæque dein cum laudabili sedimento , tenuiores tamen diebus à febre vacuis ; quod verò majoris est momenti , ante morbi solutionem turbidæ & nigræ visæ sunt.

Hæc quidem , quin observata sint nullum superest dubium ; sed non ideo perpetua esse existimandum ; quod mihi frequentius occurrit discrimen non ita latè patet ; appetitus quidem ut plurimum in quartanariis vigere aut saltem non ita dejectus mihi visus est , frigus sæpe experiuntur per longius temporis spatium , sed rigori & membrorum concussioni minùs obnoxii sunt , pulsus habent magis depressum & inæqualem , non ita incalescunt , breviores sunt paroxysmi , sudores diutiùs protrahuntur , minùs tamen profusi erumpunt , & noctibus per tempus intercalare non rarò profluunt , urinæ denique colore minùs saturato rubent , & cum longior sit intermissio , tenuiores in eâ occurrunt ; interea est ubi lateritiæ sint , idque non rarò observatum.

Majus intercedit discrimen in earum febrium decursu , & ipsarum solutione & cura

ratione ; quartanæ nimirum longiores sunt, ad annum imò & diutiùs aliquando excurrunt ; cùm autem longiùs processerunt, difficiliùs curantur ; hæmorrhoidum fluxui eas sæpius cessisse certum est ; sed de his satis superque dictum ; prætermitemus & alia, quæ ut illis febribus peculiaria commemorârunt Veteres ; licèt enim vera esse possint, experientiæ quotidianæ non sunt satis consentanea ; ea autem nosse imprimis interest, quæ ut plurimum occurrunt ; quæ rariùs se produnt, artis non sunt.

His omnibus interea probari nequit diversam esse febrium intermittentium quæ variè incedunt causam ; & primò quidem non eadem sunt quæ in febribus ejusdem generis occurrunt phænomena ; tum in frigore & calore ; tum in decursu & in exitu absimilem omnino speciem præ se ferre possunt ; deinde verò pro temporum ratione, pro temperamentorum differentiâ, pro partium functionibus, mutantur oportet febriles motus, licet ex eodem fonte ortum ducant.

De febre tertianâ aut quartanâ duplici vel triplici vix quidquam occurrit notandum ; nil ab earum abludens origine in ipsarum decursu observare licet ; tertiana duplex v. g. eadem est ac tertiana simplex, aut vi & impetu solummodo diversa est ;
fin-

singulis diebus v. g. prodeunt quæ alternis prodire solebant; at frigus vel leve est vel aliquando abest, horrore & rigore non ita stipatur, calor intensius urget; quæ sequuntur symptomata graviora sunt; sudor parcius effluit; non ita eo levantur ægri, remanet lassitudo & gravitas; non succedit perfecta apurexia, pulsus febrilis est aut ad febrilem accedit, in continuam denique facilius abit ejusmodi febris; periculum hoc ex ipsâ urinâ ominari licet; non de-jicitur sæpe sedimentum ut in tertianâ simplici; motûs vi scilicet constringuntur co-latoria, nec ex iis effluere potest quod crassius est, vel liquidorum natura excretionem minùs propendet.

Quartana duplex minus recedit à simplici; est enim in eâ intercalaris dies, tertius scilicet, à febre immunis; ideo symptomata non ita graviter urgere solent ut plurimum; diversum interea frigus est, calor intensius urget, non eadem est sudorum ratio; urinæ variam speciem præ se ferunt; ea omnia commutantur morbi vi seu impetu: at graviora occurrunt in triplici quartanâ; vix differt ea à tertianâ duplici; nec ab eâ distingui potest nisi prægresso typo; non tamen æquè in continuam abire solet, nec statim triplicatam hanc incessus rationem initio observare li-

cet;

cet; sæpe enim prodeunt duplices tertianæ nullo alio præcedente febrili insultu.

CAPUT XV.

De iis febribus quæ ab intermittentibus alienæ earum speciem præ se ferunt.

FEBRES intermittentes, quarum decursum & naturam definire conati sumus; facile in genere per se patent; sed negotium faceffunt aliquando aliæ, quæ de earum genere esse videntur, cùm tamen omninò ab iis absint & ipsarum falsam speciem præ se ferant: non paucæ profectò, sed multiplices sunt, & à variis procedunt causis ejusmodi febres; eas ergo ab iis quæ veræ sunt intermittentes fecernere operæ pretium est.

Non hîc autem agere mens est de quibusdam febribus quarum singularis est natura; erat v. g. mulier cachectica cui pulmonis textus debilior, sanguinem enim solebat spuerere & tussi quandoque vexabatur acriori; laborabat insuper affectu herpetico qui fortè eorum omnium causa erat; cùm verò is quandoque evanesceret statim exoriebatur tertianæ febris species, quæ
om-

omnino corticem peruvianum respuebat, deinde verò in continuam mutabatur; sed hæc infrequentia sunt; ad alia quæ sæpius occurrunt deveniendum.

In certis catarrhis v. g. flet febris per diem, & nocte accedente excandescit, præviâ etiam refrigeratione; post varias pleuritides, cùm de die bene habuerint ægri, exsurgunt versùs noctem paroxysmi, unde abscessum aut alias morbi reliquias suspicari licet; in febribus ipsis quibus obnoxia sunt quæ parturierunt fœminæ, nonnunquam aliquid quod intermittat observatur; post ipsas febres continuas, matutinæ horæ lucidæ sæpe videntur, nox verò modò levem modò aliquanto gravio-rem adducit paroxysmum, eumque frigoris, ut plurimum, expertem; pedetentim tamen se subripiunt hæ reliquiæ absque ullo sæpissime febrifugorum auxilio: Ipsis denique affectibus hystericis inest aliquando paroxysmorum febrilium species; de nocte non rarò exsurgit pulsus, veramque febrim adesse quis inexpertus crederet; sed brevi desinit aut mitescit hic arteriarum motus nec paroxysmorum febrilium tempora percurrunt ejusmodi excandescentiæ.

Ejusmodi tamen affectus intermittentium febrium typum aliquando magis æmulantur; erat fœmina, quæ per annum inte-
grum,

grum ; statâ quotidie horâ , intensiori frigore corripiebatur ; suberant interim convulsivi motus , & membrorum hâc & illâc jectigationes ; levis deinde exoriebatur calor & pulsus celerius incedebat ; at nil præ se ferebant hæc omnia quod verè febrile esset ; saltem intra horæ unius spatium omnia tam abnormis morbi symptomata ita concidebant , ut nil superesset quod à naturali statu recederet.

Aliæ insuper sunt febres , intermittentibus minùs abfimiles , quotidianæ nimirum , ita à Medicis dictæ , quia singulis diebus recursus aut paroxysmos habent conspicuos ; eæ , juxta quosdam , pomeridianis horis aut versùs noctem imprimis exsurgunt ; antecedit sæpe frigus leve aut levioris quidam horroris sensus ; aliquando verò nullum prostat eorum vestigium ; calor interea nec intensus nec mordax est , sed humidus , tenuis & inæqualiter diffusus ; pulsus parvus est aut saltem parum elatus , plus tamen vel minùs variis in casibus ; paroxysmi aliàs longiores sunt , aliàs breviores , iisque desinentibus non diffluit sudor , nec ut plurimum vera succedit apurexia ; remanet enim semper febriculæ quoddam vestigium ; urinæ lateritiæ non sunt , sed initio tenues ut & per morbi decursum ; eo tamen procedente fiunt aliquando crassæ & turbulentiæ.

Eas

Eas febres aut quæ non multum abfimilem referunt faciem, observare est in iis qui partium quâdam laborant obstructione, in abdomine imprimis; occurrunt in iis v. g. in quibus non rite se habent hepatis munia & ventriculi, tum in iis qui vigiliis, animi pathematis, laboribus mentis aut corporis confecti sunt; non minus ejusmodi febribus obnoxii sunt ii qui crapulæ nimium indulserunt, & qui voluptatum illecebris irretiti marcescunt & quasi exsuccifunt; prodeunt denique eadem in mulieribus, quæ uteri aut ovariorum infarctu laborant, ut & in iis quæ menstruis deficientibus in varias & inde ortum trahentes incidunt ægritudines; nec ætas quidem prima seu juvenilis earum febrium expers est, iis imprimis conflictantur puellæ versus annum duodecimum aut versus illud tempus quo efluxui muliebri sternitur via.

Ejusmodi autem febres licet aliquem intermittentium typum præ se ferant, ab iis tamen omnino diversæ sunt; nequaquam scilicet referri possunt ad duplices tertianas aut quartanas triplices; in istis, uti diximus, sibi accuratè respondent alterni paroxysmi; in quotidianis verò non ita se res habet; non est præterea in illis certa aut notabilis apurexia, nec urinarum in genere lateritius color; absunt & alia quæ me-

memoravimus ut veræ intermittenti propria ; quando denique earum cura febrifugis tentatur specificis , aut ea nil omnino proficiunt , aut noxia sunt ; concitatur scilicet iis nonnunquam hæcticus , acrisve calor , qui fortè naturæ solius , aut leviorum remediorum operâ averti potuisset.

Ut autem quotidianæ febres aliquam febrium intermittentium præbent speciem , ita quæ intermittunt quotidianas nonnunquam referunt ; in his v. g. qui diu tertianâ vexati sunt , aut perversâ curati methodo , remanet quidam fomes ex quo aliquando ferotinis horis paroxysmi instar exsurgit febrilis motus ; at tunc plerumque prostant obstructions quæ varias abdominis partes occupant ; ideò febris hæc , quæ ex relicto intermittentium semine prodit , ad quotidianas propius accedit ; exacerbatur ut plurimum , si febrifugis imprimis calidioribus impugnetur ; nec iis locus esse potest , nisi cùm affectarum partium functiones restitutæ sunt.

His positis , quæ experienciâ certâ innixa sunt , superfluum omnino videtur de iis omnibus agere , quæ quotidianæ febrī à Veteribus tribuuntur ; de eâ nil reperire est in genuinis *Hippocratis* scriptis ; at multus est *Celsus* in ejus febris enarrando decursu , eamque ut certo typo modò subditam ,

ditam, modò ut abnormem descripsit; accuratior eo *Galenus* quædam selegit peculiariora quæ longo usu observavit; eam ad partium obstructions aliquot innixus exemplis retulit: vereor tamen ne in quibusdam ex experientiæ limitibus excesserit; eos profectò prætergressi sunt multi ejus insistentes vestigiis; non occurrit saltem ejusmodi febris ita sæpe ac ex variorum *Scriptorum* libris credi posset.

Non observavit eam *Mercurialis* per quadraginta annorum luculentam praxim; monet *Riverius* ex sexcentis ægris accessiones quotidie patientibus, vix unum quotidianâ laborare febris; interea quædam commemorat huic febris propria; ea scilicet juxta eum præcordia distendit, ad dies quadraginta, imò ad duos tresve menses protrahi potest; variis denique stipatur symptomatis, & in alios morbos ut cachexiam, hydropem, lethargum degener commutatur.

De iis verò ita statuendum existimo; si *Mercurialis* & *Riverius* sæpe duplices tertianas pro quotidianis habitas esse contenderint, id verum esse negari nequit; si autem non nisi rarò occurrere febres crediderint quæ quotidie exsurgant & desinant & desinere videantur, id nec experientiæ nec rationi consentaneum est; imò

& celeberrimis Practicis hanc tribuere opinionem indignum est; censuerunt ii haud dubiè quotidianas febres rarò observari quales ab antiquioribus descriptæ sunt.

Ego quidem ut quotidianam febrim rariùs omnino occurrere quàm vulgò existimatur, ita & ipsam non adeo esse infrequentem ac quibusdam visum est crediderim; in eam me adduxit opinionem experientia quæ ejusmodi febrem mihi sæpius obtulit; at semper ex obstructione, ex cujusdam partis arcanâ læsione, vel ex miasmate quodam hostili humoribus immixto, eam repetendam esse mihi visum est: non idem profectò est ejus incessus nec exitus in singulis ægris; varia est imprimis remissio, cùm modò levior sit, modò ad apurexiam accedere videatur; ideo haud dubiè quin vera quandoque adesset intermissio plerique non dubitârunt; quod verò spectat exitum, is planè diversus est; nunc citiùs, aliàs tardiùs solvitur morbus; est ubi multa relinquat sui vestigia, aliàs verò pauca, imò fermè nulla, supersunt.

CAPUT XVI.

Quid ex præcipuis febrium symptomatis sequatur, aut metuendum sit.

SED jam ut ad veram febrem intermittentem redeamus, ejus inquiremus reliquias; eæ quidem quas recensebimus perpetuæ non sunt; talis enim præest œconomiæ animalis vis, ut causæ febrilis insultus plerumque superet, & omne avertat discrimen; non hîc ergo quæ semper impendeant, at quæ aliquandò occurrunt aut occurrere possint in febrium intermittentium decursu pericula ostendere est animus.

Vidimus quidem quid statim efficeret frigus, at ex eo quid deinde impendeat non minùs patet; dubium sanè non est quin ex constrictione quam inducit, ex sanguinis in pulmone & in hepate stagnatione, prædisponantur partes ad varias obstructions, & inordinatos motus; ideo v. g. hepar toties afficitur; ex eo constricto non exit bilis per colatoria, fiunt lividi ægri, digestionis labefactatur officina; alia viscera non absimili læduntur ratione, nec suo munere fungi possunt. Sed

Sed cordi potest inferri vis summa; ventriculi longè fieri possunt ampliores, ut & venæ cavæ, hinc palpitationes & sanguineæ concretiones, quibus aliquando obnoxii sunt qui febrem intensiorem diuturnamque passi fuerunt; non minùs adversa esse potest sanguinis in pulmone stagnantis moles; ex eâ aliquando prodiit sanguinis sputum, vel asthmatis species; nec profectò hæc frequenter occurrunt; at sufficit ut occurrere possint.

Aliud aliquando, ut innuimus, impendet periculum ex frigoris vi; eo deprimitur vitalis spiritus, nec is aliquando potest resurgere; ita nimirum aliquando obruitur, ut in frigore animam ponant ægri; nequè id profectò mirum, cùm pulsus aut evanescat aut parvus sit & frequens, cùm perturbetur respirationis incessus, cùm stagnent denique liquida in cerebro, ut in aliis partibus; inde autem patet periclitari ægros, si longior sit refrigeratio; vidi multos in tantum adductos discrimen, ut nisi ars occurrisset, è medio sublati essent; id equidem in adultiori ætate infrequens est periculum; sed in senectute non rarò impendere solet.

Non ita inest in calore febrili periculum; cùm quis è frigore emerit, ei in tuto res esse solent; at num inuritur par-

tibus labes, quæ sensim augetur & tandem inexpectata erumpit? ascendit calor in febre intermittenti, in tertianâ v. g., ad gradum 39^{um} circiter, altiùs verò progreditur in febribus compositis; si autem in quodam bene valente eveniat, ut quotidie, aut alternis diebus, per sex aut octo horas eo incandescat calore, qui ne summo quidem labore, motu, aut cœli æstu in corporibus excitari possit; an id tutum erit, licet per reliquum diei & noctis solita restituatur temperies?

De eo iudicium ferri potest, ex iis quæ summum calorem sequi solent; quanta rarefactio in partium molliorum textu? quanta distractio in tenerrimis staminibus? quænam mutatio in liquidis, in quæ tantum potest naturalis calor? mirum profectò, cum hominibus & animalibus per summum æstum incedentibus tantopere noceat calor, ut eis toties mortem intulerit; mirum, inquam, ægros non in majus, quàm solet, adduci discrimen in summo febris intermittentis ardore.

Ut ut tamen periculum effugiant, cum calore torrentur febrili, lædantur eo necesse est partium functiones earumque organa; & quidem in nonnullis ægris quanta jactatio in paroxysmorum æstu? vidi aliquando qui circa regionem cardiacam tan-

tam experirentur anxietatem, ut ei ferendæ omninò essent impares; non minùs anxii erant ob pulmones nimium æstuant-tes; caput ipsum ardere videbatur, nec profectò dubium quin tenerrimam cerebri medullam attingat hujus ardoris vis, licet in ejus medullæ textu tenuissima sint arteriosa vascula.

Quanta autem his partibus aliisque hâc deflagratione veluti exustis potest inuri labe-? gravissimum profectò instansque videretur periculum, si soli crederemus theoriæ; at naturæ vires experientiâ usuque cognitæ nos ab hoc metu ad spem in febribus ipsis quibus torrentur ægri plerumque revocant; vegeti sunt cum deferbuit calor intensissimus; imò in apurexiâ perfectâ levior est sæpiissime quàm in statu naturali; ut certus nihilominus haberi debet *canon*, partes multa necessariò pati à summo paroxysmorum æstu, eoque sæpiùs recurrente ad plurimos morbos viam sterni posse.

Huc accedit vasorum actio quæ calori respondet; ea tanta est per paroxysmorum decursum, ut dupla sit aliquando pulsûs frequentia, & multò major cordis impetus; hinc verò patet in genere quid patiantur ipsa vasa, tum majora, tum quæ tenerrimam in pulpam abeunt; læduntur neces-

fariò partium textus , earum colatoria & functiones ; ex intensiori sanguinis motu pendet dolor capitis acerrimus , spiratio frequentior & difficilior ; quod verò periculosius inevitabilis est stagnatio quædam in venâ portâ , & in hepate ; fieri enim nequit , ut liquida per hujus partis ambages eâ celeritate progrediantur quæ , ut præcaveantur congestiones , necessaria est.

Sudores , licet profusi , non idem minantur periculum ; sed his , licet sublevetur corpus evanescente paroxysmo , non tollitur febris causâ ; quin imò hoc levamine exhauriuntur ægri ; si quis v. g. propter errores in victu aut post crapulam alternis diebus sudoribus diffuat per tres aut quatuor horas , an id salubre tandem esse potest ? num potius cùm per id tempus experientiâ teste quinque aut sex exhalare possint liquidorum libræ , inde quoddam impendet discrimen ? id saltem dubium esse nequit in profuso , diuturnoque & repetito febrili sudore ; eo enim graviores & magis contumaces portendi solent paroxysmi.

Noxius erit imprimis sudor , si nimium urgeatur sub paroxysmorum exitum ; quæ erant intermittentes febres tunc in continuas abeunt ; nec profectò id mirum videri debet ; cùm enim inter sudandum rubeat

cor-

corporis superficies, eodem rubore suffunduntur internæ partes; unde adigitur sanguis in minima earum vascula, atque in iis congestus, irritationem, motum validiorem, ac proinde febrim graviolem potest inducere; hæc quidem, nec immerito, calori potius quàm sudoribus ipsis tribui possunt; ii tamen per se ipsos ad graviora exfuscitanda symptomata multum conferunt; eos insuper alii insequuntur effectus, qui perturbandis œconomix animalis motibus omnino apti sunt.

Non aquea simpliciter, quod & ipsum malum esset, per cutis colatoria amandantur; succi ipsi crassiores, partibusque nutriendis & reparandis dicati elabuntur; unde necessario debiliora fiunt vitæ organa; in ejusmodi cutaneos effluxus ita proni fiunt aliquando ægri, ut nullâ de causâ iis diffluant per noctem imprimis; abactâ febrî sæpe remanet hæc in sudores propensio, vixque coërceri potest; at quod majoris est momenti, superstes est tunc morbi fomes, aut alicujus partis vitium.

His profectò effluviis relinqui in vasis crassiora certum est & inde multa impendere possunt; huic tamen theoriæ non nimium est indulgendum; solvuntur simul crassiores sanguinis partes; id præstat motus & caloris vis; non minùs ad hanc dis-

solutionem confert bilis acrior & alkalescens, quæ in sanguinem reaffusa per omnes diffunditur vasorum ambages; aliis humoribus similis conciliatur acrimonia, ut patet pustulis circa os prodeuntibus: hinc ægri qui diutiùs feбри laborârunt, exsangués luridique videntur.

Quàm immutentur humores patet ex ipsis urinis; dum viget febrilis motus, flammæ sunt, ut innuimus; at evanescente paroxysmo spissiores, spumosæ, rubræ admodum, colorem sibi adsciscunt lateritium; eminet imprimis color hic in sedimento quod copiosum esse solet, & nil continet tamen nisi terram rubore tinctam, ut sæpius expertus sum per filtrum depurato lotio; hoc autem colatorio idem fit, ac in renibus per tempus quo circuitûs intenditur vis; nam filtro transcolatur flammæ coloris liquidum, dum remanet crassior terrestrisque substantia quæ transire nequit.

Ejusmodi verò urinæ ita febribus intermittentibus propriæ sunt, ut, in tertianis saltem, nusquam ferme abesse soleant, si genuinæ sint eæ febres; imò earum evanuisse fomitem nequaquam statui potest, si colorem lateritium retineat lotium, aut rubedine quâdam tinctum sit; fallit hoc aut fallere potest tantummodo, cùm adest mor-

morbis quidam hepaticus ; siquando autem adsit materia alba copiosa ad fundum vasis dejecta, id in bonis numerari debet, & tanquam criseos alicujus signum ; hoc autem in quâcunque febris intermittenti me non observasse fateor ; occurrit mihi tamen in quibusdam ægris, perfectamque solutionem inde ominari non dubitavi.

Deest solummodo signum hoc, id est lateritium sedimentum, in quibusdam febribus intermittentibus ; quæ autem eo sæpius carent sunt vernaes imprimis, & quæ in ipso autumno leviores sunt, tum & aliæ validiores circa ipsarum initia, id est post primos paroxysmos ; sed tunc vel flavescentes sunt vel subrufæ ; accedunt scilicet tantummodo ad eas quæ rubram hypostasin solent deicere ; quædam denique occurrit varietas in quartanarum febrium decursu ; sed de eâ aliàs erit dicendi locus.

Variam etiam faciem præ se ferunt urinæ in iis febribus quæ in continuas aut remittentes abeunt ; est ubi à colore naturali vix desciscant ; aliàs colorem rubrum eumque saturatum præ se ferunt, non rarò denique, certis saltem temporibus, lateritium demittunt sedimentum in remissione : hæc autem varietas ex *stricto* & *laxo* repetenda videtur ; si urgeat febris & magna sit partium constrictio, exeunt tantummodo
per

per renum tubulos quæ liquidiora sunt ; si verò subsit laxitas , elabuntur etiam quæ crassiora sunt & rubent ; unde in ægrorum bonis numerantur ; probatur hoc ipsarum febrium continuarum exacerbationibus ; in iis enim tenuiores solent esse urinæ.

CAPUT XVII.

De variis affectibus quæ febres intermittentes comitantur.

VIDIMUS jam quid ex quolibet febrium intermittentium symptomate ipsis proprio & perpetuo timendum sit ; nunc perlustrandi sunt effectus qui ad nullum ex ipsis symptomatis , sed ad omnia simul sumpta aut potius ad ipsam febrem in genere referri possint ; non sunt equidem perpetui ii effectus , abesse enim aut adesse possunt ; sed quid mali ex iis redundet in quorundam præcipuè organorum functiones inquirendum superest.

Quod maximè in febre intermittenti familiare est , urgent ægros capitis dolores modò leviores modò acerrimi ; statim quidem videtur eorum vim ex sanguinis in cerebrum impetu esse repetendam ; sed eam

cau-

causam incusare non semper licet ; est enim sæpe vehementior circuitus absque ejusmodi capitis affectu ; mentis arcem , ut jam diximus , aliquando aggreditur , convulsiones ciet , lethargum imò & maniam inducit febrile venenum ; idem autem cerebri membranas stimulat ; sævissimus interea inde exortus cruciatus cum febre ipsâ ut plurimum solet decedere , aut multum de suâ acerbitate remittere.

Aliorum ægrorum querelas audire est de ventriculi affectibus ; nauseat scilicet , subvertitur , à cibis abhorret , inest ei gravitatis , ardoris , constrictionis sensus ; simul in quibusdam exsurgunt dolores varii generis ; quod verò non minùs frequenter occurrit , nec minus negotii facessit , est ejus visceris distensio seu tumor ; is vel in ipsis febribus quæ non diu excurrerunt aliquando observatur ; his verò desinentibus , in multis ægris superstes est ; se prodit tamen imprimis in illis quæ diuturnæ fuerunt , sive remediis perperam impugnatæ.

At frequentior in diuturniori febre , variusque omnino solet esse alius affectus , tumor nimirum totius abdominis ; id quidem aliquando mollius est cùm in molem assurgit ; & quod sanè infrequens instar pergameni exsiccati occurrerunt mihi in
qui-

quibusdam ægris ejus integumenta; sed ut plurimum, quod negotii parum non facescit, distentum & quasi conglomeratum reperitur; est ubi tanta sit ejus renitentia atque durities, ut marmoris instar esse videatur; nec tamen, quod omnino mirum, quidquam incusare licet, ut docent cada-verum sectiones; præter aërem vi suâ elasticâ intestina expandentem.

Procedunt hæc omnia, ut plurimum, ex læsis hepatis functionibus; tollitur nimirum aut imminuitur bilis secretio, acrius fit recrementum hoc, & veram refert amurcam; si verò gravior sit febris, queruntur aliquando ægri de gravitatis sensu, de anxietate inde ortâ, de doloribus in hypochondrio dextro sævientibus; levem quidam patiuntur hepatitidis speciem: inde autem patet quare flavus aut lividus inducatur vultus color, & quàm facile sit ut feбри intermittenti succedat icterus, qui in certis epidemiis sæpius occurrit.

Sunt & multa alia quæ ex eodem scaturiunt fonte; quid mirum v. g. si visceris ita ad vitam necessarii tam gravi læsione lædantur cæteræ partes circumpositæ? si irritatione & spasmorum vi intumescat intestinalis tubus? si denique ipsæ partes externæ tumidæ fiant? non longè ab initio febris aliquando eum tumorem observavi
in

in certis epidemiis; post septimum scilicet aut octavum diem; ferius tamen accidit ut plurimum, & pendet semper, ut modò diximus, à viscerum vitio.

Aliorum insuper malorum causa & fons hepar est in intermittentium decursu; colligitur namque in hujus visceris textu, & stagnat sanguis; unde progredi nequit, qui in venam portam appellit; eo igitur turgeant oportet cæteræ abdominis partes, cum in iis simul moram patiatur, & continuò in eas affluat; turgebit ideo imprimis lien, qui toties in molem excrescit, turgidi erunt ventriculi & intestinorum parietes, intumescet similiter affluentibus liquidis mesenterium, in quo tot & tanta disseminantur vasa; inde autem obstructions, diarrhœæ putridæ, dysenteriae, periculosi sanguinis effluxus; solent hæc omnia occurrere in febrium diuturnitate & in certis epidemiis.

Inde patet flatuum vim in febribus non solam esse causam, quæ alvum in tumorem attollat; augetur, ut modò diximus, viscerum moles; colliguntur, & concrefcunt nonnunquam varii humores in certis locis; his fluidis tum intra vasa conclusis, tum [deviis, intumescit variarum partium textus, & substantia præcipuè cellularis, quæ tanquam spongia undique circumducta haberi

haberi debet ; patebit id ex variis observationibus ; tum imprimis ex corporum , de quâ mox agemus , sectione ; non mirum ergo si exploranti occurrat aliquando abdomen inæquale , & si videatur quasi tumoribus confitum , si durum denique reperiatur , aut à naturali recedens mollitie ; fieri enim nequit , quin irritatione fibris concilietur rigiditas.

Magis mirum est profectò , ejusmodi aut flatuoso prodeunte tumore , febrim in multis remittere , imò desinere aut naturam mutare ; videtur febrile venenum cùm in alvum vim suam exerit , reliquum corpus deferere , aut potius aliâ ratione illud vexare ; eodem se res habet modo in partium infernarum , de quo modo agemus , tumore ; cùm scilicet exsurgit ejusmodi tumor , decedit febris , aut spes est fore ut brevi decedat ; non tamen id perpetuum est ; sunt nonnunquam quos urgeat febris , cùm abdomen & infernæ partes , tum aliæ intumescunt ; novus exoritur tunc morbus , febribus , ex queis originem trahit , additus.

Sunt hæc profectò gravissima , sed his non ita nos deterreri oportet , ut illico existimemus vitæ impendere discrimen ; pueri v. g. qui sunt ejusmodi tumoribus maxime obnoxii , eò aliquando videntur esse

re-

reducti; ut nil præter mortem expectare fas sit; ii tamen veluti reviviscentes emergunt non rarò; idque nonnunquam solius naturæ beneficio; in adultis similiter, cum partium omnium abdominalium læduntur functiones, & vix trahi posse videntur vitæ reliquæ; in adultis, inquam, ita febrium vi per plurimos menses imò per annum confectis, omnia nonnunquam in melius abeunt; multos remedia ritè adhibita, multos ipsa cœli mutatio & adventans æstas ita restituit, ut eos ægrotasse non crederes.

Id verò non aliunde deduci potest, quàm ex duplici causâ; & primò quidem in tam misero rerum statu omnia ex solo febrili veneno pendere possunt; potest id & sæpe solet hærere in universis corporis latibulis; ita verò alienâ sub specie latens, viscera stimulat, liquida in ipsis morari cogit, & omnia denique præstat, quæ obstructionibus periculosis solemus tribuere; atqui tamen fieri potest ut ejusmodi causâ, quæ extranea est, irritentur solummodo nervi, vel turgeant vasa & adhuc pervia sint; patet id ex eo quod levi aliquando remediorum auxilio tollantur quæ tantum incutiebant timorem.

Ipsa febris intempestivè suppressa & iterum resurgens abdomen nonnunquam penitus

nitus restituit , licet turgidum & distentum ; inde autem , tum ex iis quæ modò diximus , elici potest *canon* , qui parvi non est momenti , & qui experientiâ confirmatur ; obstructions nimirum quæ à febre intermittenti ortæ , peculiare sunt , nec adeo periculosæ , atque illæ quæ ex aliis causis ortum trahunt ; inde fit ut remediis & spei sæpe locus sit , cùm de ægris actum esse videtur.

CAPUT XVIII.

De affectibus qui post curatas febres supersunt.

HÆC sunt quæ in ipso febrium decursu solent occurrere ; at multa prostant , nec ea parvi momenti , quæ eisdem curatis supersunt ; & primò quidem dolori capitis acerrimo obnoxii sunt multi ægri ; tantâ vi insurgit aliquando hic dolor , ut in eum videatur commutatus morbus , medium videtur discindi caput , nec ullus conceditur quieti locus ; tunc autem penitus excessisse febrile venenum credere non licet ; fuit tamen ubi post tantos cruciatus evanuerit , vel sponte naturæ , vel solâ diluentium operâ.

Aliàs

Aliàs fugatâ febrî diffluit undique totum corpus; nocte imprimis urgent sudores, & aliquando tantâ vi erumpunt, ut his brevî exhauriantur vires; in tantâ autem illuvie, longè similiter à vero aberraret, qui curatam esse febrim crederet; conversum tum videtur febrile venenum in cutis organa; in ejusmodi autem conversione nil mirum esse videbitur, si recordemur occurrere aliquando febres merè sudatorias, si ita loqui liceat: vidi nuper hominem qui sudore diffuebat, tertiâ quâque die recurrente & per sex aut octo horas vigente, absque ullo ferme febris vestigio; hæc autem periodica inundatio non nisi cortice peruviano repressa est.

Potest quidem quandoque sudor in partium refundi debilitatem; at tanto non exundat impetu, nisi adfuerit morbosa causa visceribus infixâ; ex eo fomite prodeunt, ut plurimum, copiosiores cutis effluxus, aut ex aliquo miasmate in eam delato; hinc fit, ut refrænari vix possint; & si coërceantur incongruâ medendi ratione, res in pejus ruere solent, ut mihi multiplici constat observatione.

Ex iis omnibus quæ febrî fugata supersunt aut superesse possunt, multò graviora sunt, quæ in visceribus hærent vitia; & profectò, cum tanta sit aliquando veneni

H

febris

febrilis vis, non mirum si fuî multa relin-
quat, eaque diuturna vestigia; prodeunt au-
tem ea imprimis in hepate, ex eoque ori-
ginem ducunt multi affectus; talis est v.g.
îcterus qui, ut diximus, in certis epidemiis
frequentius occurrit quàm in aliis; aliquân-
do equidem criticus esse observatur, sed si
post certum exoriatur ab initio tempus, lon-
gius nimirum ab eo, si denique ipse gra-
vior & diuturnior fuerit, supersunt tandem
in bilis colatoriis obstructions quibus vix
levari possunt ægri, & quæ lethales non
rarò fiunt; in scirrhosos enim ideoque im-
medicabiles abeunt tumores.

Sunt & aliæ partes, in quibus non le-
viores remanent febris reliquæ; in abdo-
mine fiunt stagnationes seu congestiones; in
molem attollitur lien, modò majorem mo-
dò minorem & quandoque maximam; est
ubi in duritiem scirrhosam abeat pars hæc,
cujus adeo incertus usus; aliàs mollior ipsa
fieri solet, & in merum magma putridum
dissolutum, nigrum atramenti instar, immu-
tari; ejusmodi morbo post febrem inter-
mittentem malè curatam laboravit & obiit
Vir Illustrissimus.

Intestina vix functiones solitas obeunt;
confluit in eorum cavum aliquando sanguis
niger & crassior; nec profectò id mirum
cùm objecta sint ei in hepate repagula, &
proin-

proinde in venâ portâ hæreat; in eâ autem congestus sibi viam facit in tubum intestinale per distenta nimium ideoque tandem hiantia vascula; inde illæ diarrhœæ dysentericæ de quibus egimus.

Pulmones ipsos febrilibus reliquiis affectos observavi; erat quidam qui per septem menses feбри tertianâ decumbebat; eâ tandem cum defunctus videretur, vultu livido & subflavo latentis & corpus totum depascentis morbi præ se ferebat vim; marcore interea ferme confectus, tussi laborabat acriori; unde in phthisim propendere credebatur; sed re propius spectatâ, sub tertiam quamque diem, graviore stimulo urgeri pulmones observatum est, tum febrim nocturnam leviter infurgere. His autem ductus non corticem quidem peruvianum exhibere visum est; nimiam copiam & absque aliis præmissis remediis jam ingestus fuerat; sed jusculis aperientibus & alvum laxantibus incumbere satius existimavi; idque non sine ægri levamine; brevi enim cessit febrilis motus, tussis omnino evanuit, atque partium omnium functiones restitutæ sunt.

Similem in alio ægro affectum magisque periculosum observavi; laborabat quidam febre remittenti mali moris quæ, emeticis & purgantibus exasperata, vim suam tandem

dem in pulmones dejecit; hinc tandem hæmorrhagia, quæ alio ex fonte derivanda videbatur; eâ autem compressâ post aliquot dies remisit febrilis motus, imò evanescere omnino visus est; at cùm omnia salutem restitutam spondere viderentur, ecce spirandi difficultatem quam vel in leviori motu experiebatur æger; magnum vitæ discrimen intentabant omnia; crisi tamen inexpectatâ per urinæ vias defluxit læsæ respirationis causa; non equidem natura sola opem tulit; multum profuere pilulæ ex scillâ, serum lactis & cremor tartari; quin etiam iisdem profligata est febris quartana, quæ in malorum cumulum exorta identidem se efferre solebat.

Patet inde, ex tot partium scilicet obstructione aut læsione, quàm facile sit, ut febribus succedat aqueus in variis partibus tumor; statim atque remittit ipsarum vis, pedes in multis tibiæque œdemate laborant; fit autem hæc illuvies in textu cellulari, tum propter obstructions quæ supersunt, tum propter veneni febrilis vim in partes infernas conversam. Hinc potest haberi ut signum fatiscentis febris ejusmodi tumor, aut potius ejus causæ è fomite suo depulsæ & devixæ; pueri autem minùs huic intumescentiæ sunt obnoxii; incidit etiam potius in tenuioris fortis homines,

mines, five quia minùs accurata fuit mendendi ratio, seu quia nimio fracta labore corpora in obstructions magis prona sunt.

In verum hydropem ascitem abít sæpe hæc pedum tibiærumque intumescencia; non minùs frequens est leucophlegmatia universalis; in certis tamen epidemiis sæpius se prodit; anno elapso v. g. intumescabant pedes, tibiæ, brachia & manus; pulmones ipsi illuviei hujus expertes non erant; maxima aderat aliquando spirandi difficultas; tussis instabat acrior, & tunc imprimis, cùm omnes obsideret partes aqueus tumor; frequentiora autem hæc erant, si febres fuissent abnormes, remittentes continuæ v. g. & dein remittentes.

Non minùs gravia tamen hæc sunt aliquando in simplici febre intermittenti. Vir triginta annorum nuper febre tertianâ laborabat; ea per plures menses neglecta in febrem abiit inordinatam; huic tandem successit leucophlegmatia, quâ omnes intumuerunt partes, & quæ nullo potuit debellari remedio; quod mihi magis mirum visum est, nil ferme in visceribus, quod incusari posset, repertum est; inde autem sequitur solo febrili veneno per universas partes diffuso, oriri posse universalem illuviem, quæ tandem mortem inferat.

Sunt alia quæ non ita frequenter occurrunt à Scriptoribus variis memorata; fateor me tonsillarum inflammationem, de quâ egit *Sydenhamus*, in nullo observasse ægro: scorbutus quidem in regionibus ad boream fitis potius quàm apud nos solet occurrere, in castris tamen febres autumnales sæpius excipit: diabetes verò, qui ex iis febribus in provectiori ætate impendere dicitur, non nisi unâ vice se mihi obtulit; erat vir quadragenarius febre tertianâ laborans eâque pertinaci, is tandem accedente ingenti urinæ profluvio non pejus habuit, sed intra quindecim dies perfectè restitutus est.

Maniæ speciem, febribus quartanis præcipuè supervenientem, adducit *Sydenhamus*, & nullam de eâ miratur ab Authoribus fieri mentionem; mihi quidem in uno tantum ægro occurrit ferox ille affectus; laboraverat horti regii præfectus febre intermittenti; is eâ desinente in furorem, qui vix poterat coërceri, statim incidit; nullo tamen ferme adhibito remedio intra nyctæmeron perfectè quieverunt animi & corporis insolentes motus; nec febrilis morbi ullum est relictum vestigium.

CAPUT XIX.

De vario relapsu in febres intermittentes.

LIQUET ex iis omnibus quæ patiuntur viscera, quàm facile sit ut febrile venenum diu in iis lateat & inexpectatò toties resurgat febris; ita in relapsum prona est, si quibusdam credendum, ut circa diem & horam, quibus invadere solebat, adhibendæ sint cautelæ; observatum scilicet fuit à nonnullis post ejus solutionem, atque etiam post longam paroxysmorum intermissionem, eodem tempore quo primùm prodire solebant eos resurgere; imò impendet periculum, ne si quid eâdem peccetur in quam incidebant horâ, iterum ii exsuscitentur; at sanè mihi dubium est, num accurata fuerit observatio.

Quidquid autem ex iis sit, certâ constat experienciâ, quòd si febris radicitus curata non fuerit, non nisi per certum tempus ad quindecim v. g. aut quatuordecim dies ea inducias soleat concedere; non tamen id perpetuum est, sed ut plurimum tantummodo ita se habet; & primò quidem, intra pauciores dies potest iterum se exerere

mali fomes; deinde verò est ubi longior omninò interjiciatur mora: filet v. g. per mensem, at quod magis mirum non rarò per hiemem se proripit febris, & verno resurgit tempore; desinit iterum eadem per æstatem, autumnò nihilominus quandoque reversura, nisi ei naturæ viribus aut remediis occurratur operâ; sæpius tamén inter hæc stadia exsuscitatur variis de causis.

Per se ipsum equidem latens febrile venenum potest excitari, & ita resurgit sæpiissimè; sive enim acrius evadat, sive antea sparsæ quodam in loco recolligantur ejus vires, erumpit tandem in paroxysmos; sed multùm juvari potest ejus excandescencia; & primò quidem cùm sint causæ non ignotæ quæ febrim simplicem tertianam in duplicem faceffere cogant; cùm similiter quartanam duplicare, imò in continuam, quod tamen rarò occurrit, commutare possint, nonne eædem sopitum & filens febrile venenum exsuscitare aptæ sunt?

Eæ autem causæ, ut cuique notum, multiplices sanè sunt; remedia nimirum calidiora & alvum validiùs stimulantia, vel intempestivè usurpata; deinde verò animi pathemata; inordinata, ut diximus, victûs ratio, alimenta rancida, putrescentia, glutinosa, austerà; ea, inquam, omnia ad sopitam exsuscitandam febrim multùm possunt;

sunt; frigus imprimis, ut meritò jam alibi statuimus, metuendum est; in ipso enim sano corpore, prima secum adducit intermittentium symptomata, horrorem, rigorem, tremorem &c.

Sed sicut variæ sunt eæ causæ, ita varii esse possunt in febrem relapsus; sæpe cum restitutionis illuxit spes, omnia in pristinum relabuntur statum; iterum scilicet prodeunt paroxysmi, variaque est eorum vis, & per varium excurrunt tempus; desinunt deinde iterumque exsuscitantur; ut verò sæpius resurgit alterna paroxysmorum series, ita nonnunquam unus aut alter occurrit; hominem nuper vidi qui cum tertianâ conflictatus esset febre, eâque liberatus videretur, tandem die quindecimâ paroxysmum patiebatur eumque unicum; omnes enim sustulit febriles reliquias. At est ubi veluti sparsim & inordinatè exsurgant paroxysmi, nec quidquam primarii typi retineant; erat quidam qui tertianâ statim laboraverat; siluit hæc per menses duos aut tres; dein ita incessit, ut modò quotidie, modò alterâ quâque die, aliàs quartâ & quintâ resurgeret: sunt interim quæ magis aut aliâ ratione abnormes sint; nam continuarum ritu prodeunt identidem, & postea intermittentium sequuntur morem; ita protrahuntur aliquando per longum

gum tempus, variisque ægri conflabantur symptomatis sibi inordinate succedentibus.

Hæc quovis tempore occurrere possunt, ac frequentius sese in certis produnt epidemiis; alternas ejusmodi facies, sive alternum quietis & motus febrilis reditum observavi, imprimis in iis febribus quæ in paludosis grassabantur locis; cum eæ per certum excurrissent tempus vix curationem recipiebant, quavis datâ occasione solebant resurgere; sæpe cum restituti viderentur ægri, id est paroxysmis liberati, prætervivo fungebantur fato; alii vix ab autumno ad æstatem usque vitam trahebant; nec tunc quidem liberabantur omnes; melius tantum habebant multi; reliquiis interim febrilibus, variisque symptomatis confecti, in primum relabi solebant statum.

In ejusmodi autem relapsu, tum in aliorum temporum & locorum epidemiis, alia mihi occurrerunt; recrudescebant quidem paroxysmi statis horis aut diebus, at perfecta non erat intermissio; vigeat intercalari tempore febrilis motus & calor internas depascens partes; videre erat in tantâ febrium contumaciâ ægros gravius se habentes; vix pedibus stare sustinebant, lurido erant vultu, aut flavescentes; marcore quidam videbantur absumpti, atque in iis stomachus vix ingesta ferre poterat; duplex
autem

autem erat morbi causa, quæ unica tantum primò visa fuerat; alia scilicet in viscerum vitio posita; tacitam & continuo gressu incedentem inducebat febrim, alia verò in miasmate quod febris intermittens fomes est, & periodico circuitu recurrebat.

Est ubi ad hæcticas magis videantur accedere ejusmodi febres; evanescunt quidem paroxysmi statis temporibus incandescentes, at insurgit pulsus nocturnis horis absque frigore aut calore graviter urgenti, & intermedia tempora à febrili motu nunquam sunt immunia; hoc imprimis in iis observavi ægris, in quibus perversâ methodo curatio tentata erat; occurrunt etiam ejusmodi reliquiæ in aliis, in quibus aut viscerum vitio aut veneni morbose vi, sæpius recrudit febris.

Non ultra progrediemur in lustrandâ variâ relapsuum specie; sed si tam diversi generis esse possint, ea est, saltem juxta quosdam, febre intermittenti laborantium conditio, ut cum eos semel invasit & perfectè per crisin & per remedia sublata est, eâ per reliquum vitæ tempus non ita tentari soleant; pauci saltem admodum esse dicuntur, qui quartanâ sæpius correpti fuerint.

Non tamen hoc ita dictum credo, ut
nil

nil postea metuendum sit ex epidemiis ; aut ex iis locis in quibus endemiæ sunt ejusmodi febres ; cum enim febrili miasmati undique circumfuso veluti innatent corpora, fieri nequit, ut ea non tandem afficiat, quæ etiam huic excipiendo minùs sunt idonea ; hoc tantùm innuere haud dubiè voluerunt quidam Medici, ejus veneni viribus minùs in genere patere ægros, qui eas experti sunt : de quartanâ tamen potius quàm de aliis hæc dici possunt ; multi enim sunt v. g. qui feбри tertianæ sæpius obnoxii fuerunt.

Quidquid hac de re statuendum videatur, ex modo dictis sequitur, duo maximè spectanda in febris intermittentis reliquiis ; & primò quidem an solummodo remaneat fomes, qui febrem solito more incedentem reducat ; deinde verò an is in affectus quosdam abierit, & partium principum vitia quædam induxerit ; metuendum sane, nec id immeritò, ne ex iis pendeant relapsus ; tunc autem vix datur curationi locus, aut si abigi febrem intermittentem contigerit, supersunt ægritudines, quibus rota conflictatur vita ; remanent præsertim obstructions, viscerum functionibus omninò adversæ.

CAPUT XX.

*An salutare esse possint febres intermittentes
cùm symptomatis jam memoratis stipentur;
& in tot abeant periculosos affectus.*

HIs autem quæ jam memorata sunt positivè judicari potest an febres intermittentes inter salubres naturæ motus numerari debeant? hoc quidem ita se habere multi variis argumentis & Veterum nixi auctoritate probare conati sunt; sed an certò liquet morbum per se ipsum salutarem esse posse, aut saltem an id ita in genere statui potest, cùm tanta labes partibus variis inuratur, & cùm eâ in tantum præcepsque discrimen toties adducantur ægri?

Theoreticæ rationes inania plerumque sunt figmenta; experientia sola audienda est; ea quidem suasse multis videtur febres, vernaes imprimis, ad valetudinem conducere; iis, inquiunt, referantur vasa per hiemem constricta & obstructa; ex earum vi nil metuendum, cùm benigniores sint, & sponte veluti secedant, aut leviori remedium auxilio; ex iis denique conya

convalescentes febribus alacres omnino degere creduntur.

Quod verò non ita liquet, ex aliis febribus benignioribus quidem & sibi per aliquod tempus permissis, idem beneficium reportare ægros multi contendunt; in exemplum adducuntur pueri qui febrilis veneni operâ variis liberari affectibus, & firmiori deinde virium robore gaudere feruntur; at non eò subsistit febris salubrem vim deprædicantium opinio; ipsam quartanam ad longævitatem multum conferre existimant.

In iis febrium encomiis, si quæ vera sint, multa à vero aliena videntur; experientiâ liquet tantummodo innumeros qui feбри laborârunt nil detrimenti esse expertos, & firmum deinde in iis fuisse virium robur, quod alios post morbos insolens non est: at inter ipsos pueros nonne multi, febrili veneno exhausti & labe visceribus inustâ, miserrimam deinde trahunt vitam? num quidam, ut fenes, periculose aliquando decumbunt? aliis verò quis longam annorum seriem spondere auit? nonne ex iis multi sunt qui brevis omnino sunt ævi? Si quidam extremum attigerint senium, cur feбри potius quàm infitis à naturâ viribus id tribui potest?

Hoc tantum asserere licet inesse febrili motui magnam vim; eo quandoque tolluntur

luntur stagnationes, aperiuntur vasa minima quibus imminebat obstructio; additur robur partibus, & imprimis vitalium functionum organis; eliminantur per sudoris spiracula noxii humores; liquidis remanentibus nova inducitur crasis, seu totus immutatur corporis habitus.

Mirum ergo videri non debet si febres quibusdam mederi possint morbis, ut epilepsiæ v. g. & melancholiæ; fuit hæc Hippocratis doctrina, variis deinde observationibus comprobata; non tamen ita est accipienda ut vera ubique reperiatur; febris quartanâ superveniente ea solummodo tolli potest epilepsia quæ levior est, aut quæ ex quâdam stagnatione vel ex miasmate retro-actio ortum trahit; non magis certa est melancholiæ per febrilem motum curatio; si gravior sit ejus morbi causa, vel altius infixâ, non solum ejusmodi non obsequitur remedio, sed eo solet exasperari.

Magis proficua est febris vis cum laxior est corporis compages, & languet partium vitalium actio, cum insunt œdematosi tumores aut leucophlegmatix ex motus defectu prodeuntes; cum insurgunt convulsivi aut inordinati nervorum motus, ut in mulieribus hystericeis, cum rheumatici vagique imprimis sæviunt cruciatus, cum denique scabie fœdatur corporis superficies; profi-

prostant apud varios Scriptores observationes, quibus ejusmodi morbos, imò & podagricos affectus, feбри intermittenti sublato esse probari potest; cephalæa similiter, cordis palpitatio, dolores certis partibus infixi, per febrilem impetum abcessisse, aut saltem filuisse, certum est; liceret mihi hæc omnia nonnullis confirmare exemplis, è propriâ experientiâ petitis; sed his supersedere satius visum est.

Hoc tantummodo iterum monendum ducimus non perpetuas esse ejusmodi curationes; ex iis ipsis affectibus, de quibus jam egimus & in quos febris multum potest, multi sunt qui ei superstitēs fuerint; imò quidam, ipsâ curati per aliquod tempus, prodierunt deinde, nullatenus immutati; si quando autem penitus tolli possint, maximè in puerili ætate, tunc enim circuitus aucto impetu, & profuso sudore, magna humoribus & partibus solidis induci potest mutatio; vitali insuper spiritui magna potest addi vis; unde necesse est ut multæ tollantur ægritudines.

Quod eos spectat qui non peculiaribus his morbis de quibus egimus laborant, aliquot paroxysmi febriles valetudinem quidem firmare aut leviter labefactatam restituere possunt; si tamen graviores fuerint aut diuturniores, non solum salubres non erunt,

erunt, sed noxam inferent, & eò quidem magis periculofam quò tenerior viscerum textus, maximè autem adverfa erit febrilis vis fi eorum læfæ fint functiones; fint v. g. icterici, aut in tuffim proni, ab iis nil boni ex febribus expectari poterit; hoc faltem ut plurimum verum eft, nec aliter fe habere poteft, nifi fortè fuerint fucci quidam noxii qui hos inferant affectus, & qui febris vi immutari vel expelli poffint.

Eò referri poffunt omnia fermè quæ de febrium falubritate ftatuere licet; imprudenter profectò his multi habenas laxant, diutiusque naturæ committunt; non tamen ita benignè, ac fibi fingunt, decurrere ubique folent ejufmodi morbi: *Foreftus* quidem neminem ex tertianâ feбри occumbentem per quadraginta annorum fpatium vidiffe teftatur; non ergo graffantes & magnam ftragem edentes vidit epidemias; præterea vir ille, veris febrifugis deftitutus, num obftuções hepatis aliorumque viscerum lethales, tandem affectus ipfius febris comites aut reliquias obfervavit? nescio an longius non procefferint alii, qui eam ut verum habuerunt antidotum; pefti adverfam fuiſſe tradit qui *de morbis Bredanis* egit Scriptor; ea enim, inquit, dum vigeret, ægros ab omni contagii afflatu immunes fervavit.



LIBER SECUNDUS DE FEBRIBUS

QUÆ AB INTERMITTENTIUM MORE
DEGENERES ALIENAM INDUCUNT
FACIEM.

CAPUT I.

De febribus compositis & larvatis in genere.

FIJUSMODI est simplicium februm intermittantium incessus, isque facile dignoscendus; at sæpius immutari solet, & cum alieno & devio feruntur gressu, non ita patet, etiam sedulo insipientibus, earum natura & origo; abeunt eæ in compositas, & quamvis ex fomite intermittantium ortum trahant, intermittere desinunt; continuarum enim progre-

grediuntur ritu ; inde autem exsurgit quæstio, num scilicet eadem sint, aut quid ex proprio fervent ingenio? vel potius num veræ sint continuæ, veluti aliæ quæ ex diversis oriuntur causis?

Ut melius hæc pateant, earum febrium, quæ sub alienâ specie prodeunt, tradenda historia; & primò quidem nonnulla præmittemus, quæ antiquis observata innotuerunt; non iis equidem immorari mens est, ad opinionum quæ jam exoleverunt inanem ostentationem; inquirendum tanummodo breviter, quales Veteribus occurrerint febrium commutationes? ita sterneretur via ad eas dignoscendas, quæ experientibus solent occurrere.

Celsus equidem, ab origine omnia repetens, febrium incessum veluti oculis subicit; » aliæ, inquit, sic desinunt, ut ex toto sequatur integritas; aliæ sic, ut aliquantum quidem minuatur ex febre, nihilominus tamen quædam reliquiæ remaneant, donec altera accessio accedat; » aliæ vix quicquam aut nihil remittunt; » interdum accessiones confunduntur, sic » ut notari neque tempora earum, neque » spatia possint; ... accessiones etiam, modo singulæ singulis diebus fiunt, modò » binæ, pluresve concurrunt.

Galenus, *Celso* licet doctior, & uberiori

experientiâ instructus , minus accuratè febrium effinxit commutationes, variumque incessum ; intermittentium tamen ingenium in quibusdam continuis expressè notavit ; *amphimerinas* seu quâque die incandescentes memorat ; *tritaiophyas* , seu quæ tertiâ die acriùs insurgunt , attingit ; quæ denique in quartum diem recidunt exacerbationes rarò occurrere observavit.

Apud insequentium sæculorum Medicos accuratiori studio agitari cœpta sunt hæc omnia ; varias ejusmodi febrium species fusiùs persecuti fuerunt ; sed iis , ut Veteribus , hoc inest vitii quod tantummodo de veris continuis egisse videantur ; non definiunt scilicet num illarum paroxysmis insit quiddam intermittentibus solis proprium, aut num revera ex intermittentium genere sint , & ex earum fomite ortæ , quæ continuo gressu incedentes statim exacerbantur temporibus.

Quod verò de febrium mixtione , confusione aut implexu commenti sunt , à sedulâ observatione multò magis recedit ; nam quotidianas , tertianas & quartanas commisceri , aut in idem tempus , vel in diversas horas incidere existimârunt ; si vera essent ea posset inde quædam *continuitas* exoriri ; at in genere quæ de confusis effatur *Fernelius* , de omnibus quocunque modo con-

concurrentibus dici potest; nulla, inquit, seorsim internosci potest, neque ulla simplex aut pura elucet, sed sunt earum signa confusa.

Quæcunque autem sit febrium intermittentium hæc commutatio, alienam ipsæ non rarò induunt faciem sub quâ earum natura vix dignosci potest; magni igitur momenti est, à fallaci externâque specie ad proprium illarum ingenium propiùs accedere; inquirendum ergo, 1^o ut simplici feбри intermittenti seu ejus causæ inducatur larva sub quâ latere possit; 2^o ut eadem febris in mali moris paroxysmos insurgat; 3^o ut in continuam commutetur, & malignarum apparatus & vim deleteriam æmuletur; 4^o quâ ratione ab aliis continuis secerni possit.

CAPUT II.

Ut variè latere possit febrile venenum & in aliena à febre intermittenti erumpere symptomata.

CUM simplex febris intermittens certum sequitur typum, atque etiam solito incedit gressu, à naturâ suâ sæpe des-

ciscit ; si quædam aliæ sint febres quæ ipsam mentiantur , ipsa alios mentiri solet affectus ; est v. g. ubi in quâdam parte latere aut colligi possit febrile venenum , ita ut hæc pars sola videatur ægra ; deinde verò peculiaria & insolita sibi adsciscere potest symptomata , in quibus totam morbi vim positam credere possent inexperti ; denique ab intermittentium more omnino deflectens alias potest æmulari febres , easque continuas , & quæ alienam à suo fomite præ se ferant speciem ; de iis autem omnibus seorsum agemus , & quæcunque larvam possunt oculis aut menti objicere prosequemur.

Multiplici sanè sub larvâ à suo ingenio recedere possunt febres intermittentes : in genere qui periodici sunt affectus ad ipsas , silentes licet , pertinent ; ipsarum enim sequuntur typum , & eâdem ratione curantur ; tussim convulsivam quintâ horâ matutinâ quotidie insurgentem , singultum & hæmorrhagiam periodicè recurrentes , cortici peruviano cessisse memini ; nauseas , vomitus , anxietatès , colicos dolores , palpitationes non absimili ritu procedere , eisdemque remedio subijci observatum est.

Sed ut quæ magis obvia sunt in exemplum adducam : sæviunt aliquando pulsu vix immutato dolores acerrimi , statis re-

vertentes temporibus ; sæpius v. g. cruciatum ejusmodi observavi supra orbitam exortum , absque ullo febrili symptomate ; solus tamen aliquando non est dolor hic ; fuit enim ubi in ipso ejus exortu palpitationem experti sint ægri circa locum affectum.

Occurrit & mihi in quodam ophthalmiæ species , quæ certâ horâ prodire solebat ; licet autem ejusmodi inflammatio , cùm aliis ex causis oritur , non ita facilè soleat evanescere , brevi periodico illo rubore suffusus in naturalem statum restituebatur oculus. Quod verò gravius est , cæcitas statis horis , paroxyismi instar redeuns , & post certum temporis spatium se subducens , observata memoratur ; nullum aderat febris vestigium , & tamen cortici peruviano cessit affectus adeo insolens.

Quod verò dolorem spectat , nec quidem in oculis aut circa eos solummodo est ejus sedes ; is aliquando aures & ipsos dentes occupat , vel fronti aut occipiti infixus hæret ; at capitis latera ei magis obnoxia sunt ; prostant exempla hemicraniæ terribilis periodicè recurrentis , quæ febris intermittentis soboles est , aut potiùs ipsa febris in hemicraniam commutata.

Exsurgit interdum universi capitis dolor , qui ejusdem prosapiæ est ; hominem vidi.

qui eo ita excruciabatur, ut ferme maniacosimilis esset; itatim quidem incerti moris visus est hic affectus; propius tamen re exploratâ se prodidit illius latens ingenium; nam insurgebat semper versùs meridiem acerrima illa cephalalgia; excurrerebat dein summo cum impetu, at post aliquot remittebat horas.

At ut in externâ capitis superficie defigitur febrilis causa, ita singulas quascunque partes potest aggredi; hominem vidi dolore acerrimo sub scapulis periodicè excruciatum; insurgebant doloris illius paroxysmi quartâ quâque die, & cortice peruviano repressi sunt: eodem remedio sedatum vidi veluti nephriticum cruciatum, stasis diebus imò & horis prodeuntem; affectus denique rheumatismum referentes & per circuitum redeuntes similiter profligatos observavi.

Non mirum ergo si partes quædam visæ sint febre laborare, reliquis bene se habentibus; prostant non pauca hujusce febris exempla apud historiæ medicæ scriptores; in quibusdam ægris medium caput, in aliis brachium, aut crus unum vel alterutrum, feбри laborare observatum est, dum reliquum corpus nil simile experiretur; quod profectò mirum videri debet, fuit ubi omnia febrilia symptomata in his partibus se

exciperent, ut in veris paroxysmis; & primò quidem statim aderat frigus, deinde verò infurgebat calor & subsequēbatur sudor; aliquando interim aliter varièque afficiebantur partes in quibusdam; in his solus frigoris sensus, in aliis verò calor vel motus convulsivus periodicè recurrebat.

Quod verò non minùs mirum est, sæpe sæviunt dolores ex causâ febrili insurgentes absque manifestâ febre, etiam cùm partes internas obsident; à me observatum aliquando memini acerrimum stomachi dolorem, eumque periodicum & febrifugis sublatum, absque eo quòd ullam in pulsu intulisset mutationem; nulla intercefferat incandescētia, & integra omnino videbantur aliarum partium munia.

Nec quidem tantopere, ac primâ fronte videri potest, à febre alieni sunt ejusmodi affectus; sæpe enim, ut cuilibet notum, vigent acerrimi artuum dolores, qui cum ipsâ incedunt; eadem verò evanescente supersunt nonnunquam, & paroxysmorum instar, periodicè redeunt; tunc scilicet causæ febrilis partem in locis affectis remanere certum est, nec nisi adhibitis febrifugis sedari possunt insolentes ii cruciatus; quæ interim in externis partibus se produnt in internis prodire possunt; & si post febrim sola remaneant, absque eâ prægressâ

sâ aut subsequente , eadem se exerere mirum non est.

Ut plurimum tamen res ita non solet procedere ; viget enim febris , cùm per varias partes defertur febrile venenum ; id autem in quibusdam modò defixum hæret , modò plurimas aggreditur ; quin imò est ubi eas successivè peragret ; fuit v. g. quidam qui per paroxysmum dolores acerrimos in cruribus & tibiis expertus est ; ascenderunt ii versùs abdomen , deinde verò ad caput , unde veræ suborta apoplexiæ species.

Sed alii iique insoliti & summum inducentes discrimen occurrunt febrim larvantes affectus ; eos tantummodo in genere hîc indicare mens est , ut deinde faciliùs ad singulos devenire liceat ; à feбри interim ita alieni sunt ut ipsa naturam mutâsse videatur , nec facilè aliquando dignosci possit ; pendere potest mutatio hæc variis ex causis latentibus.

Quæcunque autem eæ sint , veneni febrilis tunc acrior aut magis deleteria est vis , ipsaque è fomite suo depulsa in varias partes convertitur ; patet hæc conversio ex naturâ veneni hujus erraticâ , cùm in variis locis latere aut defigi possit ; liquet & vis acrior ex parotidibus quibus obnoxii sunt quidam ægri febre intermittenti laborantes ;

rantes ; confirmantur hæc omnia obstructionibus quæ ex materiâ febrili circum-eunte ortum trahunt & feбри subactâ super-esse solent.

Cùm verò his de causis febriles insultus insolita , eaque periculosa sibi adsciscunt symptomata , non statim quidem cùm febre exsurgere solent , sed tertio vel quinto ad summum paroxysmo se produnt ; ea prævidere statim quidem in multis ægris non licet , nisi per grassantem epidemiam ; in aliis si quædam per primos insultus se prodant , non ita periculum ostentare videntur.

Quod imprimis notandum , pulsus in universum parvus fit & celer , ita ut vix se prodat : in universum inquam , nam quidam sunt casus , in quibus majori vi incedit ; cùm v. g. impetitur caput , & in lethargum aut comatosum affectum incidunt ægri , validiùs pulsant arteriæ ; non minùs earum insurgunt vires in dolore rheumatismum referente ; nec profectò mira est varietas hæc , cùm variè vim suam exerat febrile venenum ; stimulat v. g. aliquando partes veluti admoto caustico ; eas nimirum abradit & sanguinem mucumque elicit ; aliàs spasmodicis urget motibus , seu convulsiones ciet , imò & hæc frequentissima est ejus agendi ratio.

Sub

Sub hâc tam alienâ facie variè decurrere potest deinde larvata febris, & à paroxysmorum more recedere; est ubi ipsis præfixum terminum prætergrediantur ea quæ tam inopinatò se exeruerunt symptomata; sæpe enim non succedit ut antea intermissio, imò nec remissio; juris sui non fiunt oppressæ partes, nisi post certum temporis spatium; modò scilicet per aliquot dies excurrit morbi vis, modò per hebdomadam aut etiam diutius eadem permanet vel augetur; novum autem tunc prodit febris genus, de quo deinde fusè agemus.

Sed non rarò ingenium typumque suum servat conversa in certas partes febris vis; nam paroxysmorum more in plurimis ægris insurgere solet & intermittere; remittunt saltem maximè tetra hæc symptomata quæ tantum intentant periculum; inde autem patet non solùm validâ arteriarum actione diffilari febrile venenum, ut diximus; levissimo enim ipsarum motu & absque insigni calore, cùm inter ejusmodi symptomata sæpe concidat pulsus, ferme omnino subigitur; ferme inquam, nam remanent vestigia eorum affectuum, qui in varias partes delati sunt, iique sequenti paroxysmo ut plurimum graviores fiunt; quod verò magis insolens est, post veram plurium dierum intermissionem aliquando recrudescent.

Non

Non tamen credendum tantam & æquè
semper infestam esse vim veneni febrilis
aberrantis & in partes quasdam dejecti ;
cùm febrifugorum operâ v. g. repressi sunt
paroxyfmi , fit aliquando ut venenum hoc
aut ejus reliquiæ in partes externas detru-
dantur ; tunc sæviunt in iis dolores , nec
nisi iterum accenso febrili æstu tolluntur ;
sæpius autem & eâdem de causâ afficiun-
tur internæ partes ; tumet nimirum abdo-
men , læduntur certorum viscerum functio-
nes ; quò autem omnia in naturalem re-
ducantur statum , opus est similiter in cer-
tis ægris ut iterum insurgat febris ; saltem
ita iis non rarò medetur natura ; inde ve-
rò patet quàm proficiuus esse possit motus
& calor ad subigendam veneni febrilis cau-
sam.

CAPUT III.

*Ut in febrem mali moris abeat febris inter-
mittens simplex.*

HIS præmissis patet aditus in febrium
malignarum intermittentium histo-
riam ; & quidem ita hæ incedunt ut sæpe
in caput recidat omnis ferme earum vis ;
so-

foporosi fiunt ægri, impetitur mens, inducitur lethargus, imò nonnunquam vera succedit apoplexiæ species & paralyfis; quod verò magis infrequens est, catalepsiæ quid simile observatum traditur; non mirum ergo si adsint aliquando convulsivi motus, tremores & tendinum subsultus, tum visûs, & auditûs, aliorumque sensuum defectus, aut denique vitalis spiritûs omni-modæ prostratio.

Hæc omnia adeo inexpectata variè oriuntur, decurrunt & recedunt; leve habent aliquando initium & aliquando grave; est ubi statim tanta sit eorum vis ut idiopathica videantur, id est, à febre intermittenti omnino aliena; sed suum tandem prodere solent ingenium, in eo quod post certum tempus leventur ut plurimùm, & paroxysmorum more incedant; remanent interea graviores aut leviores reliquiæ in variis ægris; alii stupidi & veluti attoniti, alii rerum omnium immemores sunt.

Quod verò minùs obvium est, cùm periculi omnis sequenti paroxysmo videantur nonnulli immunes ægri, tertio insurgente in pristinum relabuntur statum; imò cùm vera per aliquot dies successerit intermissio, non semper omnis abjiciendus metus; fit relapsus, ut diximus, & universa malorum cohors iterum aliquoties irruit; hæc autem

tem vel sponte naturæ vel remediis possunt superari : diarrhœa & urinarum copiosus effluxus omnia quandoque sustulit ; ut plurimum tamen nonnisi certis impugnata remediis solent evanescere.

Ut in caput, ita in respirationis organa convertitur febrile venenum ; rariùs tamen eas partes obsidere solet, nec quidem quâ de causâ satis perspicuum est ; cùm autem in illas insurgit, non eâdem omnino ratione vim suam exerit ; & primò quidem spasmos concitat, qui & in alias simul deferuntur partes ; ex iis autem sive ex veneni hujus stimulante & causticâ actione exoriuntur dolores varii ; alii diaphragmatis aggrediuntur regionem, in eâque defixi acerrimè sæviunt ; alii lateribus inhærent, & ita miseros excruciant ægros, ut situm mutare nequeant.

Non mirum ergo si inde insignes sequantur respirationis angustiae ; instat tussis, vexat anhelatio, exoritur orthopnoea ; hinc veluti catarrhi suffocativi aut asthmatis species, oppressio scilicet & repletio pulmonis ut à crassiori muco ; at aliam faciem nec minùs formidandam induit aliquando morbus ; mutari scilicet videtur in sævam pleuritidem aut peripneumoniam ; adest sputum sanguinis, dolor pectoris fixus & lancinans ; pulsus depressus solummodo

modo cum his non consentire videtur symptomatis.

Cum cujusque paroxyfmi initio multa patiatur ftomachus, non mirum videri debet, fi in eum acrius defæviat febrile venenum; aliàs eam partem vexat angor intolerabilis, aliàs infurgit morfus aut dolor atrox; veram adefse crederes inflammationem aut erofionem; hinc autem naufæ, aut vomendi enormes conatus iique inanes; animi deliquium, fudor fronte aut vultu diffluens, oculorum caligatio, pulfus exilis, frigiditas, mortem instantem oftentare videntur, nec quidem eam effugient ægri, fi diutius aut gravius iis torqueantur, aut fi fæpius feu pluribus paroxyfmis ea experiantur.

Inter has anguftias urget fæpe immanis vomitus, rejicitur biliofum magma, vitellinum, porraceum, fœtidum; imò aliquoties cruenta & nigra magno impetu furfum feruntur; dejiciuntur eadem per fecellum in quibusdam ægris, licet in folâ epigaftrii regione defæviat dolor; interea non in ftomacho folo aut in alvo fe prodiit tanta morbi vis; adelt linguæ fcabrities, & urinarum paucitas fpafmis indurata; deferuntur & ii in partes externas, in eifque varios cient motus; occurrunt ergo in febre intermittenti quæcunque cholera

leram morbum comitantur symptomata; sed hoc intercedit discrimen, quod in febribus remittant aut desinente paroxysmo desinant; in cholerico autem affectu non tales dare soleant inducias.

At ut in stomachum, ita in alvum vim suam exerit aliquando febrile venenum; tam atroces insurgunt dolores, ut veluti caustico corrodi videantur intestinales fibrillæ; quæ dejiciuntur, copiosa omnino & varia sunt, vel serosa scilicet, vel biliosa & variegata; sed in quibusdam ægris tanta est stimuli urgentis acrimonia, ut mucosæ & subcruentæ sint fæces veluti in dysenteria; modò sanguineoatræ sunt, modò verò loturam carnis referunt; ex his autem magna virium sequitur prostratio; singultuosi, frigidi, & semimortui jacent ægri; emergere eos posse vix nisi expertus crederet; quod tamen omnino mirum, desinente paroxysmo mitescunt, imò evanescunt sæpe terribilia hæc symptomata; in variis intestinorum morbis expulsâ eorum causâ superstes est irritatio, at difflatum febrile venenum secum omnia auferre videtur.

In externas partes sicut in internas irruere potest hujus miasmatis impetus; efflorescunt nonnunquam in totâ corporis superficie varii generis papulæ, quæ febrifugis adhibitis evanescere solent; intenso aliàs rubore suffunditur

funditur cutis, in certis partibus magis, in aliis minùs; at sæpius veluti sudoris Anglici species erumpit, hic quidem ex fronte & pectore affatim emanare in multis incipit, ubique calidus est, & quò magis profusus, eò magis intenditur febris; post certum tamen temporis spatium, aliàs citius, aliàs seriùs, frigidus fit, deprimitur pulsus & veluti formicans in nonnullis incedit; in his interea fit præcordiorum angustia & compressio, in aliis flammeus aut caustici stomachum urentis sensus, in omnibus verò irrequieta jactatio & urinarum suppressio; ipsa corporis facies impendens ostentat discrimen, lividus enim aut cæruleus inducitur color.

Ipso febris initio, argenti nimirum corpore & variâ rigoris aut horroris concussione exagitato, insurgere solent dolores per varias partes; inde autem patet quòd in similem affectum abire possit omnis febrilis veneni impetus: in his ipsis sudoribus, de quibus modò actum est, tantus aliquando exurgit crurum aut tibiaram cruciatus, ut ferro excindi videantur; sed insurgit nonnunquam dolor rheumaticus universalis, aliàs quandam imprimis partem obsidens, aliàs verò hàc & illàc vagans aut errabundus; præcipuum imò & solum primo adspectu hoc videtur symptoma,

ma, nonnulla tamen eaque varia secum adducit; deliquium infert animi in quibusdam ægris, in aliis verò non sine multo discrimine spasmodicis stipatur motibus; non rarò verò inflammatorius videtur ejusmodi dolor, in varias tamen partes nihilominus versatilis.

Sed si partibus quibuscunque infestum esse possit febrile venenum, in iisque defigi, idem in motûs quo vigent & vivunt, principium solummodo insurgere, id est, principium vitale aggredi, totamque perturbare potest partium œconomiam; hoc v. g. accidit in iis qui syncope terribili aut anæsthesiâ per totum paroxysmorum tempus laborant; facies tunc cadaverosa, oculi clausi, spiratio sublimis, vera denique mortis imago.

Est interea ubi non tam vitæ motûsque principium quam caloris nativi fomes impeti videatur; aliquando frigori incipienti nullus succedit calor; aliàs postquàm se exerere incepit, restringitur sensim; superficies corporis externa veluti marmorea, vultus plumbeus, extrema livida, & ut paucis omnia comprehendam, occurrunt quæcunque leipyriam febrim comitantur; adsunt insuper nonnulla quæ perpetua non sunt, mens hebes est v. g., urget sitis intensa, urinæ parcè fluunt &c.

Multa ab iis omnibus diversa possunt in protheiformi febrium intermittentium decursu occurrere; sed hîc ea tantum commemorare quæ mihi experientiâ innotuerunt, visum est; potuissim profectò nonnulla referre quæ ad ejusmodi febres proximè accedunt, & quæ tamen mali omninò non sunt moris; somnum v. g. veluti lethargicum in quibusdam ægris observavi, licet nullum intentaretur discrimen; colici dolores similiter, & in quibusdam mulieribus præcipuè, mihi occurrerunt, uti & dolores per artus sparsi; at leviora novit qui gravissima non ignorat.

Iis interim confirmantur, quæ tanto labore è naturæ latebris à *Mortono* eruta sunt, eoque duce à doctissimo *Torti* observata & accuratiùs descripta; sed antecesserat eos celebris admodum Medicus, qui non minus acutè intermittentium febrium metamorphosim sive abnormem earum vim perspexerat; est scilicet is *Salvus Diversus*, qui eas tantâ diligentia descripsit, ut ejus verba hic referre non pigeat.

» In quarundam, *inquit*, febrium inter-
» mittentium principio, dum leve aliquod
» frigus vel horror adesset, tanta caloris
» eveniebat retrocessio, ut prægelida esset
» caro, facies consimillima morituro, pul-
» susque adeo minimus ut nullus esset; hic
» accenso

» accenso calore magis apparebat, sed par-
» vus, inæqualis, frequens & imbecillis;
» sitis inexhausta erat, anxietas summa,
» timor maximus, inquietudo ingens; sen-
» sus caloris urens, dum ad tactum nul-
» lus, vel parvus esset; animi defectus, su-
» dores frigidi, cordis palpitatio & tremor.
» Hæc omnia declinante febris desinebant;
» incipiente declinatione pulsus elevabatur,
» redibat calor; has febres, id est, earum
» paroxysmos vidi ad horas sexdecim aut
» octodecim protrahi; hîc peculiare obser-
» vavi, quòd nox accessionem præcedens,
» ultra quàm credi potest, esset inquieta,
» licet non febrerent ægri.

Similium febrium deleteriam vim obser-
vavit deinde *Valesius*, easque *malignarum*
nomine insignivit; sed *Ludovicus Mercatus*
ipsarum historiam omnibus numeris abso-
lutam tradidit; diagnosim imprimis & pro-
gnosim accuratè instituit, & ejusmodi fe-
bribus proprium & protheiforme ita effinxit
ingenium, variosque casus, ut pateat nul-
lam esse formam quam non possint induere;
experientiâ assiduâ, non opinione aliorum
edoctus, nil ferme ex omnibus symptoma-
tis prætermisit, quæ & Medicis illudere
solent & ægrorum moliri perniciem.

His & observatione imprimis edoctus
Riverius, earum febrium vim potuisset pro-
sequi;

sequi ; is tamen non nisi in genere illam attigit : » Videmus, *inquit*, singulis ferè annis, hâc saltem regione, febres tertianas intermittentes, quæ summæ malignitatis sunt participes ; tertiâ vel quartâ accessione ægros de medio tollunt ; aliæ eos in gravissimum vitæ discrimen conjiciunt, idque ob maximam symptomatum sævitiam : dantur, *juxta eundem*, tertianæ malignæ pestilentes, quæ, quamvis evidentes habeant intermissiones, *deleteriae* sunt ; præterea multa possunt supervenire quæ vitæ periculum inferre possunt, quamvis febris ex se periculosa non sit.

CAPUT IV.

Ut commutentur febres intermittentes in alias ; sive remittentes, sive continuas.

EJUSMODI sunt sæpè affectus quos mentitur febris intermittens ; sed quod non minùs ab ejus ingenio videtur alienum, ipsa febrium aliarum formam potest induere, & sub eâ quasi superinjectâ larvâ delitescere ; ut autem sub alienâ hâc specie dignosci possit, ejus varias facies variosque incessus attingemus.

Et

Et primò quidem, juxta plerosque, aliis febribus comitem se adungere potest intermittens febris; quotidianæ v. g. conjuncta visa est ferme omnibus; sed rarò admodum, ut diximus, occurrit quotidiana, eamque ab aliis distinguere admodum difficile est; quomodo ergo eam cum tertianâ simplici aut duplici adesse statui potest? nonne occultari ipsam oportet, sociis earum symptomatis? Theoriæ omnino nimium tribuerunt Veteres, tum multi qui ante *Harveum* vixere; pituitæ enim & bilis commixtionem aut pugnam commenti sunt; & prout altera aliam superare videbatur, varii generis exurgere febrim asseruerunt.

Non ita incertum an cum quibusdam aliis conjuncta incedat aliquando febris intermittens; cum pleuritide v. g. commixta in quibusdam ægris remittit alternè & insurgit; cum variolis ipsis eam nonnunquam pari gressu excurrere observavi, sed non ita patet ejus toties memorata cum continuis febribus conjunctio; non solum explorantem fugit, & difficilè dignosci potest, ut jure dixit *Galenus*; sed quod ipse nec alii suspicati sunt, abesse omnino potest, etiam cum adesse videtur; imò ipsam à naturæ institutis esse alienam statui posse crediderim, idque gravissimis innixus argumentis.

Quòd præcipuum mihi videtur ex observatione simul & ratione petitur; & primò quidem in continuam abire posse febrem intermittentem negari nequit; cùm autem alieno à suâ naturâ gressu incedit, per varium excurrit tempus; modò v. g. per sex aut octo dies, modò ad undecimum, aut decimum quartum, imò ad vigesimum progreditur.

Duo autem hîc observanda occurrunt; est nimirum ubi sub initiis nil quod intermittentes referat perspicui possit; nil ejusmodi imprimis se prodit cùm ad quinque tantum aut sex dies insurgit continuus febris impetus; quando verò diutius excurrit, vix etiam aliquando quidpiam à continuarum ductu aut naturâ diversum, febrilibus symptomatis interjicitur.

At ut plurimum mutatâ formâ non mutatur omnino ingenium febris ejusmodi; in paroxysmos enim excandescit plus minùsve conspicuos, & statim redeuntibus horis: deinde verò sæpiissime in veram intermittentem desinere solet, in tertianam nimirum, aut duplicem tertianam ut plurimum; unde, ut patet, non nova inducitur febris, sed prior, quæ continua erat, vel unam amittit suâ partem, vel in duas intermissione distinctas dividitur.

Nec minùs interea cum ratione, quàm
cum

cum experientiâ consentit mutatio hæc ; cum enim febrilis veneni intenditur vis , necesse est ut diutius excurrant paroxysmi ; imò ita protrahi possunt ut unus alterum attingat ; tunc autem veram præ se ferunt continuæ speciem ; sed cum insurgat eorum vis statis horis , & quædam inducant symptomata periodicè recurrentia , intermittentium morem simul retinent ; præterea occurrunt iidem quotidie breviores vel longiores aut etiam longissimi , alii in alios veluti uno tractu abeuntes ; distinguuntur tamen , vel quo erumpunt impetu , vel præviâ remissione aut refrigeratione.

Sed ne ad incerta divertere videamur , ab ulteriori hac de re disquisitione temperabimus ; nosse satis est intermittentem febrem continuarum speciem induere ; eam plus minùsve ad eas accedere , plures aut pauciores paroxysmos in idem tempus incidere , ipsos magis vel minùs posse remittere , quæ ipsos antecedunt , aut quæ subsequuntur , longè esse diversa ; in quibusdam nimirum se prodit frigus ; in aliis verò ne illius quidem occurrit vestigium ; similis est sudorum ratio , nam vel disfluunt aut vix erumpunt , vel paroxysmos nullatenùs excipiunt.

Prout autem varia sunt hæc symptomata aut phænomena , varium etiam febribus nomen

men inditum est ; ne tamen obscuritatem pariat hæc nominum diversitas, ad earum compositionem respiciendum ; non potest ea illos latere, inquit *Galenus*, qui simplices febres noverint ; ex iis exsurgunt aliæ omnes, veluti ex radicibus quæ in varios truncos aut ramos abeunt ; in eo quidem res posita est, ut unius paroxysmi reliquiæ subsequenter attingant, & ut iidem varias fervent periodos, ut jam diximus, & variis denique stipentur affectibus.

Hinc autem statim intelligere est, quid sint febres remittentes, subintrantes tertianæ & duplices tertianæ continuæ ; remittentes illæ sunt in quibus postquam certâ vi decurrit paroxysmus, mitescit idem donec statâ horâ aut circiter insurgat alius ; subintrantes verò dicuntur eæ in quibus primus paroxysmus nondum desit, cum incipit alter, ita ut primus in subsequenter videatur subingredi.

Inde patet subintrantes ex remittentium esse genere, nec nisi gradu alias ab aliis differre ; aut quod verius est, nonnisi nomine diversæ sunt, cum reipsa eadem sint : non magis alienæ sunt ab earum ortu & naturâ tertianæ continuæ ; exacerbantur scilicet tertiâ quâque die, producit in diem intermedium febrilis vis, eaque eodem tenore per hoc incedit intervallum, modò tamen

tamen levior, modò gravior, est ubi pulsus tantummodo frequentior sit; aliàs interim majori fertur impetu; at rarò occurrit typus ejusmodi; quod verò duplices spectat tertianas continuas, eæ sunt, quæ continuo quidem progrediuntur gressu, sed insuper quotidie statis exacerbantur temporibus; hinc ergo iterum videre est, eas ad remittentes & subintrantes pertinere.

Ad easdem referri debent aliæ, quæ nomine potius ex variis symptomatis deducto, quàm ortu & naturâ discrepant; talis est v. g. semi-tertiana Veteribus tantopere formidata; juxta *Hippocratem* horrida est, continua, acuta, & unâ die levius, alterâ verò gravius insurgens; juxta *Celsum* » ex » octo & quadraginta horis, ferè sex & tri- » ginta per accessionem occupat, neque » ex toto in remissione desistit; frequen- » tiores plerumque habet accessiones de- » cessionesque, ut aliud morbi genus videri » possit;“ at *Galenus* de eâ accuratiùs prodidit, quod continua sit, ita interim ut tertiâ quâque die cum horrore exacerbetur; duplex, inquit, in eâ occurrit febris, tertiana nimirum & quotidiana continua, totusque ejus decursus est horarum quadraginta octo; in quibusdam equidem à se dissentire videtur Scriptor hic; at eò recidunt ferme omnia, quæ sparsim de febre hâc tradidit.

Ex

Ex his, aut potius ex latenti febris illius naturâ, multæ sunt ortæ lites apud insequentium sæculorum Scriptores; alii antiquorum mentem assequi conati sunt; multi quædam addiderunt, vel opinione, vel observationibus nixa; quidam nimirum binos eâdem die exfurgere paroxysmos crediderunt; hos observavit *Riverius*, imò quadruplicis tertianæ cum continuâ quotidianâ incedentis meminit; alii subesse continuam ex visceris alicujus inflammatione ortam suspicati sunt, & inde horrores se mutuò excipientes deducendos existimârunt; omnes ergo tertianam simul cum continuâ decurrere consentiunt; utrique tamen vim inæqualem aut intempestivos tribuerunt rigores.

Nos verò de his litibus parùm solliciti, non quid præcisè senserint Scriptores, sed quid ab eorum mente non ita abludens observetur, indicabimus; febrim igitur hemitritæam duplicem esse tertianam continuam statuendum nobis videtur; at ut hemitritææ nomine donari possit, ejusmodi esse debet, ut paroxysmus unus frigus habeat prævium, alter verò nequaquam; incidant insuper in eam oportet horrores vagi & incerti, plus minùsve certis temporibus se exerentes; inde autem patet hemitritæam esse mali moris febrim, ad leipyrias aut epialas accedentem.

Nec

Nec quidem eam ab iis abludere crediderunt Veteres, tum ii qui eos sunt subsecuti; lethalis dicitur *Hippocrati*, & juxta ejusdem observationes, vomitum, horrorem, cardialgiam secum adducit; *Galeno* autem authore periculosa omnino est; pulsus in eâ tardus & rarus, calor recedit ab extremis & ad ventrem & thoracem veluti ascendit, veterinosos sopores, deliria & vigilias inducit; febris syncopalis nomine donatur à *Rondeletio*, ut pestilens describitur à *Schenckio*, cum peste incedere fertur à *Spigelio*; suborta imprimis grassantibus febribus malignis *Foresto* visa est; eâ de causâ haud dubiè ex malignâ ortum trahere eos quibus stipatur rigores à *Walæo* creditum est.

Non mirum ergo videri debet, si hemitritæi descriptiones à Medicis traditæ tantopere discrepantes videantur; non cadunt omnia quæ jam recensuimus in eandem febrim; juxta varios scriptores plura in hac, pauciora aut diversa in aliâ occurrunt; modò rigor, modò refrigeratio aut horror solet præcurrere; est ubi rigor & calor se alternatim excipiant, & multiplices insurgant exacerbationes, seu paroxysmi; ea denique peioris notæ seu mali moris symptomata, quæ in intermittentes incidunt, & quæ, ut diximus, tam varia sunt, in

in semitertianis etiam periculosè se produnt; undè in illis malignum quid latere æquè certum est.

Semitertianæ dictæ sunt ejusmodi febres; quia dimidia tantum earum pars tertianum sequitur typum; nihilominus miratur *Galenus* eas ita esse appellatas, & *tritaiophyas* potius vocandas censet; hoc autem nomine, quo & usus est *Hippocrates*, *tertianarias* simpliciter seu *triduanas* indicare voluit, continuas nimirum quæ tertiâ quâque die exacerbantur; eæ interim semitertianis sunt benigniores, atque magis remittentes; ideoque minùs periculosæ; impendet tamen ex iis aliquando non leve discrimen, cùm graviori decurrunt impetu.

At plus intentant periculi aliæ quæ, ut plurimum, similis profapiæ sunt, febres nimirum ardentes, seu *causi* Veteribus dictæ; occurrunt in iis, ut observavit *Galenus*, omnia tertianæ indicia; eo solo differunt quod neque cum rigore invadant, neque ad integram deveniant apurexiam; hoc ita certum est ut in tertianas seu veras intermittentes desinant, à quibus tamen, si nomen spectes, tantopere videntur recedere.

In eo autem tertianas æmulantur ejusmodi febres, quod tertiâ quâque die insurgat exacerbatio, seu paroxysmus; sed continuæ

tinuæ sunt, & cùm alterâ die levior sit febrilis vis, aliâ verò intensius urgeat, ad duplices tertianas propiùs videntur pertinere; hoc tantùm iis inest peculiare quod calorem urentem concitent; huic, ut pathognomonicum signum, sitim inexplibilem addidit *Galenus*; potest tamen ea abesse, quia, ut inquit *Valesius*, alii sunt graviores, alii verò benigniores causi.

Non equidem cuicunque ardenti febrilis inest ortus, ex fomite nimirum intermittenti; sunt aliæ quæ ab ipso nullatenus deduci possunt; tales sunt continuæ complures, in quibus acerrimus concitatur calor; in constitutione v. g. pestilenti sunt, ut verbis *Cælii Aureliani* utar, veluti *flammeæ* febres; æstum observavi intensissimum in quibusdam febribus exanthematicis, aliisve varii generis; ejusmodi haud dubiè erant illæ quas *causodes* nuncupavit *Hippocrates*; at legitimus *causus* intermittentium febrium est vera progenies; varius autem est ejus terminus, septimum diem ut plurimum non transcendit; & si longiùs protrahatur ad quatuordecimum producit; cùm ulteriùs excurrit in putridam febrem abire solet.

In iis interim febribus se prodit saltem intermittentium ingenium, at in aliis non paucis, licet ex eodem fonte oriundis, ab omni normâ recedit febrile venenum; est,
ut

ut diximus, ubi continuo statim graviterque sæviat; aliàs levissimo & continenti fertur gressu; si insurgat ferotinis horis, nullo subjiciuntur typo exacerbationes; magis minusve conspicuæ sunt simulque plures vel pauciores; modò absque ullo frigore, modò cum pandiculationibus quæ antecedunt prodire solent; nonnunquam denique in incerta variaque incidunt tempora; remissiones iisdem omnino de causis variæ sunt; intermissiones verò, si adsint, non minus incertæ occurrunt; hæc tamen omnia, quæ initio imprimis adeo inæqualia sunt, lapsu temporis in ordinem quandoque redire solent, unde providâ & sapienti expectatione sæpissime opus est.

CAPUT V.

Ostenditur variis observationibus, quàm variæ sint febrium continuarum species, in quas abeunt febres intermittentes.

HINC patet ut per se ipsas larvari possint febres intermittentes cùm continuæ fiunt aut remittunt; sed ut melius sub tam alienâ facie dignoscantur, earumque natura perspicui accuratiùs possit, historiam

riam eorum, quæ in certis mihi occurrerunt epidemiis, summâ cum diligentia tradere conabor.

Per æstatem torridam & per insequentem autumnum grassabantur febres statim continuæ, at per dies tantummodo quinque aut sex; deinde verò intermittentium more cursum absolvebant: at sequenti anno cùm tertianarum duplicium aut simplicium ritu incœpissent, in continuas quindecim aut viginti dierum abire solebant; per hujus autem temporis decursum variè insurgebant paroxysmi; alias statis horis, aliquando nocturnis, nonnunquam matutinis, non rarò pomeridianis; erat ubi dum una dies nonnisi leviolem haberet paroxysmum, altera vehementiorem secum deveheret; non infrequens etiam erat ut eâdem die vel diebus alternis tres exacerbationes paterentur ægri.

Nusquam ferme in his febribus exacerbationes præcedebat frigus; aderat tamen earum initio in nonnullis ægris refrigerationis sensus; sed in iis non æquè sæviebat febrilis vis, ac in aliis, in quibus nullo frigore prævio notabatur paroxysmus; cùm autem desinebant ejusmodi febres, sæpe in intermittentes mutabantur, aut abnormi incedebant gressu; erant qui de die satis bene habere videbantur, nocte verò

ingruente febrilis exoriebatur motus ; varia in multis occurrebant symptomata , quæ recensere omnino superfluum judicamus.

Biennio post aliæ grassabantur febres , quæ more triplicium tertianarum solebant incedere ; in his frigore prævio insurgebant exacerbationes ; unde certum peti poterat intermittentium signum.

Sed in ejusmodi epidemiis non eundem typum sequebantur febres , earumque symptomata ; multas vidi continuarum more procedentes , absque ullo frigoris sensu ; ad undecimum , decimum-quartum , vigesimumque excurrerant diem ; in iis nonnisi versùs finem , citius tamen aliquando , aliquid quod remittentem febrim significaret , occurrebat ; in quibusdam dein certis temporibus mitior videbatur febrilis motus , & lucida erant intervalla ; tantæ autem & tanto impetu exsurgebant exacerbationes , ut summum ægris impenderet periculum.

Verno autem insequentis anni tempore , non eam omnino faciem referebant febres ; pleræque initia habebant leviora , nec ita larvatus videbatur earum incessus ; sed dein per sex vel decem dies continuo gressu decurrebant ; in iis nil intermittens aut remittentis typi conspici poterat , graves erant

erant paroxyfmi, nullo frigore præcedente conspicui, nisi fortè in quibusdam qui levem aliquando refrigerationem cum tussiculâ experiebantur; quod nobis multò certius earum febrium detegebat morem seu naturam, ipsarum tantum initio prodire solebat; eæ nimirum intermittentium decursum, licèt à normâ solitâ devium, æmulari videbantur, eandem piæ se ferebant speciem, cum continuæ esse desinèrent; nam tertianarum duplicium ritu tandem incedebant.

Aliam in eâ epidemiâ rerum faciem observavi; in variis ægris plures eadem die remissiones & exacerbationes se excipiebant; caloris & frigoris sensus alternus in plures excurrebat dies; tandem ejusmodi febris, ut aliæ de quibus egimus, in veram remittentem aut intermittentem abire solebat; sed erat ubi febrilis impetus absque hâc alternâ caloris & frigoris vicissitudine procederet; per tres quatuorve dies aut plures intensissimus erat, subsequenti verò tempore aderat remissio, per unum diem aut per longius temporis spatium; deinde verò recrudescebat omnis morbi vis per dies tres aut quatuor continuos; sæpius autem se excipiebant veluti alternis remissio hæc & vehementia, quæ nullum certum servabant typum.

Hinc patet in his epidemiis omnia in genere reduci posse, 1°. ad febres quæ statim intermittentes videntur; 2°. ad eas quæ in remittentes mutantur; 3°. ad continuas ita incipientes, licet à verâ intermittentium causâ ortum traherent; 4°. ad alias quæ ex verè intermittentibus in continuas abeunt; 5°. ad earum decursum qui in quinque vel sex dies, imò & plures, protrahi potest; 6°. ad multas ejusdem naturæ, quæ ad quindecim aut viginti dies excurrunt; 7°. ad remissiones longiores aut breviores, plus minùsve conspicuas & aliquando ad sensum nullas; 8°. ad frigus quod modò exacerbationes antecedit, modò ab iis abest; 9°. ad variam insultuum & remissionum vicissitudinem.

CAPUT VI.

De febribus continuis & mali moris in quas mutantur febres remittentes.

AT inter epidemias maximè memorandas unam referam, quæ ex stagno latissimo, & putridâ materiâ referto ortum ducebat; sæviebant primis temporibus febres quales modò descripsimus; sed

vagata est alia è genere remittentium, quæ in paroxyfmis caput impetere solebat; incidebat, ut plurimum, pectoris summa oppressio, delirium, convulsio; sæpe veram apoplexiam mentiebatur febris hæc; sæpius lethargi speciem induebat; aliquando immoti ægri, sine sensuum ullo usu aut ullâ vi, quasi vitali aurâ non fruerentur, jacebant; non rarò paroxyfmus cum horrendo capitis dolore & artuum cruciatu non ferendo incedebat; remittente autem eo omnia mitescebant, & aliquandò in tuto versari videbantur ægri.

Prodibat aliàs quadamtenus diversa morbi facies; excandescebat febris cum dolore lateris lancinante; pectus, ut in peripneumoniâ, gravatum & anhelum premebatur; erat ubi continuus, horrendusque vexaret vomitus; infestabant anginosi dolores, intestinorumque cruciatus, aliaque id genus symptomata, quæ per totum paroxyfmi decursum immaniter sæviebant; præter spasmos & motus convulsivos suberant animi deliquia, lethiferæ quietis sæpe prænuntia; in plurimis verò ægris tanta virium imbecillitas, ut jamjam morituri viderentur; quidam, ut jam diximus, mortuorum instar prostrati jacebant; in eâ autem prostratione summam frigiditatem & veluti marmoream observavi.

Interea varia erat in his omnibus pulsûs vis ; aliquando tantus erat symptomatum impetus , ut iis veluti obvolutus paroxysmus oculos fermè explorantium effugeret ; pulsus scilicet contractus , omnino debilis & quasi animam agentis videbatur ; aliàs verò , idque in genere , summa erat febris , pulsus validus isque frequentissimus ; in nonnullis tamen non æquè elatus , aut tantâ vi digitos feriens , sed satis conspicuus , ita ut intensam adesse febrim ex eo solo pateret.

Anno sequenti grassata est febris ejusdem generis ; duplex erat tertiana & continua subintrans ; in eâ vel primo frigoris insultu symptomata insurgebant apoplectica , & lethargica ; eòusque procedebat eorum vis , ut per totum sævirent paroxysmi decursum ; eo autem evanescente ægri , ex miserrimo statu veluti reviviscentes , sensuum mentisque compotes fiebant ; nil mali perpeffos jurâsses ; tanta scilicet erat remissio febris & symptomatum intermissio , ut primo aspectu ægrotare non viderentur , si juniores essent ; at in ætate provectis , nisi ars opem ferret , in pejus ruebant omnia , & imponentem mortem effugere ægri non poterant.

Alia ejusmodi aut saltem non multum absimilis triennio post mihi occurrit epi-
de-

demia ; hæc per æstatem & per autumnum grassata est , innumerosque ægros letho dedit ; sed ut melius innotescant ejus febris symptomata , casus quosdam describam sanè peculiares ; ex his iterum dijudicari poterit , quàm variis esse possint veneni febrilis effectus ; patebit imprimis quantum periculi ex iis impendeat , etiam cum in certam salutis spem adducti videntur ægri , aut cum parum periclitari ex morbi vi credi posset.

Febre remittenti laborabat puella annos nata duodeviginti ; hæc verò tertio insultu sensuum usu caruit ; ita interim oppressus est pulmo , & tantus exortus est stertor , ut intra octo horas fato functa fuerit. Felicior non fuit æger quidam in quem deinde incidi : is duplici tertianâ febre , quæ statim nil mali portendebat , correptus fuerat ; is tamen tertio paroxysmo in mentis alienationem , quæ per triduum excurrit , delapsus est ; non videbatur per diem valida febris , sed ingravescente per noctem morbo sublatus fuit.

Incidit alter in febrim remittentem , & die quinto in comatosum affectum conjectus , accedente pectoris oppressione , fato functus est. Aliâ ratione , seu alio gressu processit febris ejusmodi in quâdam muliere ; ea nimirum statim verâ intermittenti

laborabat; sed quarto aut quinto paroxysmo mente mota est; perstitit hoc in statu absque febre ad sensum validâ per sex dies, & tandem ad se rediit; sed ingravescente iterum morbi vi, primo, seu proximè sequenti paroxysmo, ad plures abiit.

Commissa fuit meæ curæ Monialis febre laborans remittenti; aderat quotidie horror & rigor; tandem quinto die in lethargum incidit ægra per viginti quatuor horas excurrentem; sensim tamen ad se rediit, & mentis compos fuit per unius diei spatium; at recurrente horrore & paroxysmo, pectore quasi suffocato obiit. Non minùs inexpectatum fuit aliorum fatum, qui post leniores febris insultus, frigidi jacuerunt, & deinde accedentibus animi deliquiis, exsolutisque viribus, aut iis oppressis, è vitâ decesserunt.

Ex iis patet mentis arcem imprimis in his impeti febribus, tum summam earum vim in pulmonem sæpius recidere; non minùs præcordia his urgentur, cum cor ipsum impeti & multa pati soleat, ut denique uno verbo rem conficiam, spiritus vitalis veluti veneno quodam inficitur & suffocatur; hinc deducenda sunt in quæ incidunt ægri periculosa symptomata; urgebant ea tanto impetu, imprimis in senibus, ut nisi initio summa adhiberetur di-

li-

ligentia, de iis omninò actum esset; faciliùs evadebant juniores; neglectis tamen remediis, aut morbi acerbitate artem superante, magna succubuit eorum cohors.

Exemplis modò memoratis comprehenduntur ferme omnia quibus stipantur febres ejusmodi; sed peculiarem ecce epidemiam quæ gravior omnino fuit; ita deleterium in eâ erat febrile venenum, ut primo insultu innumeri è medio tollerentur ægri; cujuscumque equidem generis hac & illac insurgebant symptomata; modo nimirum urgebant colici dolores, modò diarrhœæ & dysenteriae se efferebant; trigesses aliquando per diem demittebatur alvus; aliàs instabat suffocatio mortem intentans; erat denique ubi veræ apoplexiæ species incumberet; at quod in genere seu in plerisque occurrebat ægris, erat stomachi acutissimus dolor cum vomitu, & intensum extremorum frigus seu potiùs caloris naturalis retrocessio; tunc in multis viscera depascebat ardor; aderat sitis, nec quocunque potu sedari poterat; interea maculæ nigræ vel rubescences per extremos artus diffundebantur; non absimiles erant eæ maculis scorbuticis; cùm verò è tanto discrimine emergerent ægri, id est concidente febrili impetu, optimè se habere videbantur, morituri tamen sequenti paroxysmo, qui

qui citius vel ferius insurgere solebat.

Cùm in primo insultu tantus erat impetus, & adeo terra incumbebant symptomata, nullus relinquebatur spei locus; non poterat revocari calor, nec stomacho laboranti opem ferre licebat, fati inevitabilis ostentabatur in artubus signum; cutis nempe, in iis frigida & maculosa, sudore, qui adhuc frigidior videbatur, perfundi solebat; aquâ congelatâ conspersam credidisses; qui autem in tantum non adducebantur discrimen, vix ullum ab arte expectare poterant auxilium, nisi succedente remissione; tunc febrifugis adhibitis, in plerisque avertebatur terribilium symptomatum impendens vis; si verò Medici incuriâ prætermitteretur opportunum tempus, de ægris sequenti paroxysmo seu exacerbatione actum erat.

Non æquè formidanda videbatur, nec tam latè patebat Epidemia quædam autumnalis, quæ tamen multos letho dedit; non magni momenti statim videbatur febris; ea tertianarum typum referebat; at quartâ vel quintâ accessione in continuam abire solebat; duo insurgebant intra horas viginti quatuor paroxysmi, matutinus levior, nocturnus gravissimus; eorum initio aberat frigus; sed profusi sudores alterum excipiebant per certum tempus; deinde verò
suc-

succedebat cutis ficcitas; tunc caput plus minusve impetebatur, alvus in molem assurgebat; quod verò ab aliis febribus modò memoratis alienum erat, excurrebat febrilis vis ad quinquagesimum & ad sexagesimum diem.

Siluerunt hæ febres per hiemem repressæ; at earum remanente in terræ sinu fomite, iterum se exeruerunt verno tepore excitatæ; nam tertianarum duplicium cohors ubique incubuit; hinc autem ominari licebat eas accedente autumno multò graviores futuras; nec profectò fefellit omen; Augusto enim mense insurgere cœperunt, quæ tertianæ statim simplices videbantur, & quæ brevi in continuas faceffebant; non aderat in quibusdam ægris capitis dolor, nonnulli tamen, mente moti, in phrenitidis speciem incurrerunt; tumida omnibus inerat alvus, in diarrhœam tamen prona, si levissimo laxaretur cathartico; interim paroxysmi magno decurrebant impetù; nec nisi post 15, 20, 25 aut 30 desinebant dies.

Si quid autem veneni febrilis vim & naturam comprobat, maximè jam memoratus tot ægrorum casus; non alia quandoque insurgunt symptomata, cùm lethifero quodam veneno inficiuntur internæ partes; impetitur eo vitalis spiritus, frigusque indu-

ducitur marmoreum ; atqui idem præstat febris arcana vis ; an autem congestione illâ , inflammatione vel obstructione potest ita perturbari aut subverti œconomia animalis ? frustra profectò ex ejusmodi causis febris tam deleteriam vim deduci posse quis existimaret ; ad miasma confugiendum , si tam periculosi & singularis morbi fontem velimus attingere.

Ostendunt , ut diximus , ejus miasmatis per corpus aberrantis vim metastases quædam & certi motus critici ; occurrunt sæpe exempla quæ id comprobant , & similia prostant apud varios scriptores. Anno v. g. 1652 , inquit *Bartholinus* , æstate præter morem & cœli constitutionem siccissimâ , grassata est gravis epidemia ; varii erant in eâ febris typi ; nam ea modò singulis recurrebat diebus , modò verò alternis , aliàs verò erraticè incedebat ; sæviebant insuper , calore urgente , capitis imprimis , colli & lumborum dolores ; insurgebat vomitus biliosus in multis post solutum morbum superstes ; aderat interea sitis ; impetebatur mens ; prodibant petechiæ ; at hæc omnia remissionis tempore evanescebant , reversura tamen ni solutio integra succederet ; solebat autem hæc fieri post quartum paroxysmum ; vel nimirum diffleuebant sudore ægri , vel materia venenata in abscessus colli ,

li, in tumores pedum, in hydropem, in diarrhœam vel dysenteriam abibat; malignitatem præcipuè arguebat in ejusmodi febre subita virium prostratio.

Hoc profectò admirari licet in ejusmodi febribus, primo insultu tantum vel intra paucos dies impendere periculum; sed non minùs arduum videtur detegere quomodo causa, tanto impetu cerebrum perturbans, & pulmoni aliisque partibus adeo infesta, certas possit dare inducias; ita nimirum sæpe progreditur, ut post triduum, quadriduumque remittat, & per unum diem aut ampliùs bene se habere videantur ægri; non eo more procedunt alii morbi, nam iis affectæ sensim liberantur partes; postquam autem functionibus suis redditæ sunt, aut redditæ videntur per unum duosve dies, non impendere solet vitæ discrimen ex subito resurgente morbi insultu; saltem id ita in genere non se habet, ut in malignis remittentibus.

Inde verò deduci potest *canon*, qui levis non est in acutis morbis momenti; liquet nimirum non semper inflammationes aut certum partium solidarum vitium, in summa functionum perturbatione, incusari posse; nam in larvatis his febribus, de quibus hîc agitur, mente excedunt, furibundi sunt, peripneumonici videntur ægri multi;
alii

alii doloribus acerrimis conflictantur; subvertitur in nonnullis stomachi & intestinorum actio; non urgentius videretur periculum in summâ inflammatione, aut in vulnere graviori, vel in quarundam partium irritatione spiritum vitalem attingente aut suffocante; brevi tamen temporis spatio liberari possunt partes, quæ tot & tantis premuntur angustiis; sequitur ergo, terribilia symptomata ex stimulo vagante, modò se proripiente, modò verò vires resumente oriri posse in aliis morbis; & aliquando plùs timoris, quàm periculi invenire.

CAPUT VII.

Ut per se ipsas dignosci possint febres remittentes sub aliâ specie latentes aut larvatae.

EN diversam febrium intermittentium faciem, & accuratam symptomatum, quibus larvari solent, historiam; reliquum est ut tradantur signa, quibus earum febrium natura detegi possit; ita urgent ut plurimum, ut nisi noverimus quid morbi tam insolentis prodat genium, ægri in summum adducantur discrimen.

Et

Et primò quidem ex earum febrium initiis, earum indolem nosse licet; si enim intermittentes, aut solummodo remittentes fuerint, & dein insolitis incedant stipatæ symptomatis, tunc profectò in suspicionem alicujus larvæ devenire licet; jam verò de eâ non suspicio, at certum poterit esse judicium, si insurgant exacerbationes præmisso frigore; si verò abfuerit quævis refrigeratio, ad alia recurrendum est signa, tunc enim continuæ tantummodo paroxysmis exacerbataæ præbet speciem hæc febris; ita enim decurrunt multæ, quæ nil ad remittentes pertinent.

In febribus ergo quæ nullo incipiunt prævio frigoris sensu, si subitus fuerit paroxysmorum exortus, si iis veluti ictu percutiantur ægri, cum se melius habere antea viderentur, si pandiculationes, & dolores capitis, loco frigoris præcesserint, tunc, inquam, intermittentium febrium indicatur sub alienâ specie ingenium.

Eadem febrium se prodit indoles ex remissione quæ nullam habeat cum paroxysmis rationem; tanta est aliquando eorum acerbitas, ut periculum summum ex iis impendeat, dum in remissione omnia videntur tuta esse, & intervallum omnino lucidum est; tunc autem nullus superest dubitandi locus, quin lateat febris remittens,

tens, sub veræ continuæ specie.

Non minùs se prodit febris ingenium; si post exacerbationem diffuat sudor, si paroxyfmi eâdem circiter horâ redeant; si accuratè sibi fingulis aut alternis diebus respondeant, si adsint symptomata vehementiora quæ per periodos exfurgant & definant, uti deliria, furores, lethargus, dolores capitis acerbiffimi, virium defectus, intestinorum tormina, &c.

Denique, ut modò diximus, ex urinarum colore potest de febre intermittenti latente non minùs certa institui diagnosi; in eâ enim febre aliquando lateritiæ sunt, quod non incertum signum est; sed ejusmodi non sunt nisi in remissione; unde semper ad eam summâ curâ attendendum.

Exemplis quibusdam patebit, quàm certa sint hæc signa, & quomodo inter tot diversa symptomata quibus involvitur febris, indagari ipsa & dignosci possit; & primò quidem mulierem vidi veluti attonitam, affectibus hystericis, doloribusque per universum corpus excruciatam, & in mortis limine versantem; cum in hac virium prostratione subitò insurgerent paroxyfmi, non dubitavi quin adesset febris ex intermittentium genere; ideo statim ad febrifuga confugi, iisque exhibitis citò convaluit ægra.

Aliam

Aliam vidi sanguinis sputo laborantem, dolore lateris punctorio excruciatam, exacerbationibus variis in summum discrimen adductam; cum verò audissem à frigore incoepisse morbum, & præcessisse aliquot paroxysmos in sudorem desinentes, statim de febrifugo cogitavi, eoque in usum vocato brevi omnia cum febre evanuerunt, quæ tantum metum incutiebant, symptomata.

Laborabat quidam pleuritide acerrimâ, in quâ insolitas & periodicas observavi exacerbationes; hæ non sensim, sed quasi ex improvviso aut subito veluti impetu insurgebant; præterea sanguis copiosè exspuebatur in paroxysmis, quod omnino insolens est; his ita se habentibus, omnia febrium intermittentium latenti causæ tribuenda censi, & febrifugo esse impugnanda; ejus autem operâ brevi temporis spatio restitutus est æger, qui in summo versabatur periculo.

Vir venationi assuetus in febrem summâ cum vi decurrentem incidit; successit brevi delirium atrox, calor urens, exagitatio incoercibilis; sed cum per periodos gravius insurgerent symptomata, & modò exacerbarentur, modò mitescerent, statim suspicio de larvatâ febre mihi injecta est; sine morâ igitur ad febrifuga confugi, iisque devictus est terribilis morbus, qui aliis omnibus videbatur exasperari.

Monialis virgo febre laborabat continuâ eâque remittenti; sed adeo brevis erat remissio, ut vix posset animadverti; interea summum instabat periculum; ea erat paroxysmorum vis, ut ægra animam agere videretur; tanto permotus discrimine, cum lucidius, licet omninò brevius, observassem intervallum, febrifugi non levem ingessi copiam, nec quidem id sine fructu, omnia enim mitiora evaserant, & brevi se proripuit quodcunque morbi vestigium.

Vir denique athletici habitûs & lumbagini obnoxius, in dolorem incidit acerrimum, scrobiculo cordis infixum; febris quidem statim fuit summa; sed dein depressus est omnino pulsus; excurrit interim per diem & per noctem morbi vis, magnoque esse in discrimine videbatur æger; matutinis tamen horis omnia meliùs se habuere; injecta statim suspicio de rheumatismo in partem jam affectam converso, incusatum deinde fuit hepar; cum verò componi non possint eæ lites, in tertianæ morem recrudit dolor, & febrifugis feliciter impugnatus evanuit.

Alia possem ejusmodi referre exempla, sed hæc proposito sufficiunt; non præmittendum tamen me solâ epidemiâ grassante ductum statim apud multos ægros in harum febrium suspicionem devenisse; at
ut

ut in summam præcipua quæ jam attuli reducantur, iis temporibus, quibus non vagantur ejusmodi morbi, exacerbationum periodici recursus, dein verò dies unus mitior & alter periculi plenus, remissio interim satis lucida, licet brevis, & symptomatum summa & è repente se exerens vis; hæc inquam ut plurimum, mihi febris ingenium prodiderunt; quod verò urinas spectat, eæ multis in casibus ejusmodi à colore naturali minimè discedunt.

Sed ut ad morbi detegendam naturam, ita ad ejus prævidendum eventum, conferret accurata symptomatum observatio; in genere autem quò plura simul exorientur, eò gravius erit discrimen, varium tamen, prout diversa erit eorum sedes vel origo; diarrhœa v. g. & vomitus, tum intestinorum dolores, licet acriùs urgeant & tantas excitent turbas, faciliùs se subducunt; difficiliùs verò summa pectoris oppressio & cerebri perturbatio; at summis in angustiis versantur ægri cùm omnino depressus evanescit pulsus, cùm alget totum corpus, cùm adest anæsthesia; è contra verò bene sperare licet cùm inest certum robur vitali spiritui; ejus sæpe vires demonstrant ipsæ urinæ; nam viget ut plurimum si colorem non exuerint aut si contentis saturatæ sint; sin minùs verò, ejus concidisse vim signum

est, idque imprimis si tenuiores aut pallidæ effluant.

CAPUT VIII.

Ut per propria aliis febribus symptomata innotescant certiùs quæ ad febres remittentes pertinent.

QUÆ febribus intermittentibus propria sunt symptomata non ita patent ubique, ut nullum de iis supersit dubium; similia occurrunt quandoque in continuis febribus; sicut autem in multis ægris incertum, an quæ verè remittentes sunt è genere continuarum vulgarium censendæ non sint, ita non rarò est dubitandi locus num inter veras remittentes reponendæ sint nonnullæ quæ continuæ tantummodo videntur; operæ igitur pretium est statim inquirere quid in istis remittentium ingenium æmulari, & fucum facere possit; atqui id in solâ remissione seu alterno exacerbationum insultu positum imprimis est.

Egimus jam de quibusdam morbis qui feбри intermittenti non videntur absimiles; tales sunt v. g. eæ febres, quæ in virginibus ob menstruorum exoriuntur defectum; ean-

eandem aut non valde diversam præ se ferunt in suo incessu speciem catarrhi hiemales; ferotinis enim horis insurgit paroxysmus, idque aliquando cum prævio frigore; idem, ut diximus, occurrit cùm abscessu tentantur partes, eos autem morbos nosse sufficit ut symptomatis febrem intermittentem referentibus diffidamus; at non æquè facile est judicare de continuarum febrium exacerbationibus; inquirendum ergo quomodo eas à febrium remittentium paroxysmis liceat secernere?

Paucæ sunt continuæ quæ *homotonæ* sint, & fortasse nullæ; suas quæque habent exacerbationes, ipsæ febres, quæ ex doloribus aut ex vulneribus ortum trahunt; insurgunt enim & concidunt certis temporibus; causa autem ob quam ita fervent & defervent non ita patet; imò, si verum fateri velimus, nobis penitus incognita est; reliquum ergo est ut earum tempora, naturam & incessum prosequamur; ita solummodo statuere licebit num quid in iis quod à remittentium paroxysmis diversum sit observari possit.

Quod tempus spectat, annotandum statim in quocunque morbo noctes esse graviores; nec profectò unde id pendeat dignosci potest; qui incusatur transpirationis defectus tantæ perturbationi exsuscitandæ

impar est; præterea in morbis acutis avertitur hic cutis effluxus, nec cadente die per æstatem magis impediri solet; imò in regionibus ad austrum vergentibus, in sano saltem corpore, nocturnis horis copiosior est; mihi verò ex variis liquet experimentis, esse in rerum naturâ principium quoddam incognitum versùs noctem se exerens; vidi machinam ita comparatam ut, non quâdam artificis industriâ, sed quodam naturæ motu cui excipiendo apta erat, vim arcanam decedente die reciperet; æquè autem in cavo minerarum profundissimo & in summis montibus excitari solebat vis hæc.

Sive autem per diem sive per noctem exfuscitentur exacerbationes, eæ in remittentibus & veris continuis quid habent dissimile & simile; dissimile quidem ut plurimum, nam in continuis temperatur matutino tempore nocturnus fervor; hæc verò defervescentia quâ concidunt symptomata plus minusve producitur; at iterum exurgit morbi vis, idque citiùs vel tardiùs; en igitur incessum quendam ut in remittentibus; sed eæ non matutinis constanter horis, ut continuæ veræ, solent remittere; quoties igitur per duos tresve dies incidit matutina remissio, toties veram adesse continuam, aut ut plurimum saltem, suspicari licet.

At

At plura occurrunt quæ in utrisque febribus similia sint ; & primò quidem in continuis ut plurimum unâ die levior est earum vis , alterâ verò magis sævit ; non semel etiam , sed pluries per horas viginti quatuor instant exacerbationes ; modò breviora modò longiora interjiciuntur intervalla ; quum res verò in pejus ruunt , sine lege & quasi per subsultus fertur morbus ; adsunt nimirum alterni tribus aut quatuor singulis horis exsurgentes paroxysmi , & cùm desierunt brevi solent reviviscere.

At cùm adsunt duæ vel tres exacerbationes , eæ æquales esse non solent ; una est eaque præcipua quæ dominatur ; grassabantur nuper malignæ febres , in quibus dominium hoc maximè erat conspicuum ; remissior scilicet earum erat vis matutinis horis ; sed circa horam decimam incipiebat exacerbatio , quæ intra quatuor aut quinque horas mitescebat ; non diuturna erat hæc remissio , nam versùs octavam horam gravissimè omnia exacerbari solebant , & per totam noctem summo ferebatur febris impetu.

Tempore igitur & numero exacerbationum duci non possumus in eis dignoscendis quæ ad remittentes solas pertinent ; sed aliter omnino procedunt febriles motus , cùm in continuis febribus exacerbantur ; &

primò quidem non statâ in genere horâ insurgunt; deinde verò cùm concidit morbi vis non bene omnino se habere videntur ægri, nec evanescunt quæ terrorem incutiebant symptomata; non est cutis humida, nec excretorum aut secretorum facilis via; urinæ enim sunt eædem, nec laxantur alvi colatoria; abest præterea frigus aut refrigeratio; talia saltem in genere sunt quæ in continuis febribus observantur, cùm alia occurrant imò contraria in remittentibus.

Sed modus præcipuè quo incipiunt in continuis exacerbationes diversus est; sensim enim ingravescent eæ, deprimitur statim pulsus, imò sedari videntur symptomata; interim est ubi exagitari internis motibus videntur ægri; calore dein paulatim increcente insurgit febrilis vis; paulatim inquam, nam ita ad ἀκμὴν ea ascendit, non subito & quasi factò impetu ut in remittentibus; quod denique præcipua est differentia, non tantopere exsuperant remissionem in continuis, exacerbata febris symptomata.

Aliud est exacerbationum genus quod negotium aliquando faceffit, licet ut jam diximus res se habuerint; postquam scilicet conciderunt febres continuæ, est ubi per diem ægri videantur iis defuncti, nihilque ferme supersit quod morbum referat; ver-

sùs

sus noctem nihilominus exoritur paroxysmus, aut levis ejus prodit species; tunc multi ad corticem peruvianum confugiunt, nec ullo modo remedium hoc nocuisse observatum fertur; sed vel febres post quas adhibetur è genere continuarum fuerunt, vel non; si veræ fuerint continuæ nil superesse potest quod intermittentium venenum redoleat; febrifuga ergo iis dicata immeritò usurpanda esse visum est: si innocua esse dicatur, primò ad curationem parum aut nihil conferre possunt; deinde verò non ita certum, an non aliquando noceant; & num, cùm apertè non nocuerint, profuisse videantur.

Altâ mente reponendum, *homotonum*, ut diximus, vix observari febrium incessum; cùm autem in plurimis, in quibuscunque v. g. imperfectâ crisi judicatis, remaneat aliquid ex febrili causâ, non mirum profectò si versùs noctem quidam exsurgat motus; certum est saltem febrifugis ad eum compescendum opus non esse; evanescunt omnes ejus reliquiæ spontaneis naturæ conatibus, vel remediis iisdem quæ febrilem vim jam sustulerunt, continuumque sedârunt fervorem.

CAPUT IX.

Ut tandem quæ intermittentibus seu remittentibus ob alias causas & ob certarum partium affectus intermiscantur, detegi possint.

VIDIMUS jam ut per se ipsas, & per continuarum febrium symptomata dignosci possint febres remittentes; sed præterea cum iis, aut cum intermittentibus, multa, quæ ab iisdem aliena sunt, & quæ ab aliis morbis tum ab aliarum partium pendent affectibus, conjungi possunt; eæ autem febres tunc variam dubiamque præ se ferunt faciem; quomodo ergo inter ejusmodi larvas detegi possint, inquirendum superest.

Et primò quidem incidere possunt intermittentes & remittentes febres in corpora quorum certæ partes graviter vel levissimo afficiantur motu; sunt v. g. ita comparati nonnulli ut facile commoveri possit cerebrum; impetitur mens in cujuscunque febris intermittentis insultu; vidi hominem qui secundo insaniret paroxysmo; balbus fiebat, vix cohærebant ejus verba, rerum politicarum gnarus de iis incondita effusiebat:

tiebat: alter sui compos non erat, & somno graviore immerfus, sensuum usu destitutus omnino videbatur; atqui tamen in iis ægris nil erat quod ad febrim mali moris attineret; brevi facilèque vulgari methodo ea cessit.

Si apoplexiam passi fuerunt ægri, aut in eam propendeant, multa inde in febrim possunt recidere; vidi legis peritum qui simplici laborans febre intermittenti in gravissima capitis incidit symptomata; statim quidem laboravit memoriâ, omnium scilicet priorum nominum immemor fuit, cum rerum ipsarum gnarus esset; depulsâ tandem febre, idque breviori tempore, solitisque & simplicibus remediis, in coma incidit, quod tandem lethale fuit.

Mente ob tristitiam mœroremque affectâ immutari similiter potest febris facies; vidi mulierem simplici laborantem tertianâ, quæ tandem in remittentem continuam commutata est; videbantur simul cum eâ prodire cerebri affecti signa, iisque dubii hærebant adstantes; cum verò ante rerum domesticarum curâ anxie sollicitus esset ægræ animus, non poterat certus subesse metus, ne quid mali moris in ejusmodi lateret febre; benignitatem morbi confirmavit experientia; nam is brevi penitus excessit, superstitè tamen mentis labore, qui etiam desinente

nente causâ defuit; idem autem in melancholicis occurrere potest sæpissime.

Cùm laborat pulmo possunt ejus cum febre conjungi varia symptomata; instat aliquando gravissima tussis, ideoque, ob irritationem scilicet inductam, non succedit vera apurexia, sed remanet inter paroxysmos febricula; hoc imprimis aliquando observatur in iis febribus quæ, in diuturnitatem abeuntes, ab ingenio suo aberrarunt; tres nuper vidi ægros, qui statim tertianâ laboraverant; hæc deinde, in duplicem tertianam immutata, continuam tandem cœpit æmulari, non validam tamen, sed serotinis horis, frigore, paroxysmo, calore & sudore insequente se exerere solitam; ad hæc accessit, sub hiemis adventum, tussis acerrima & catarrhus; atqui tunc, febris naturam assequi operæ pretium fuit; nec facile erat statuere quid ad primam febrim attineret. In iis qui asthmati obnoxii sunt fucum fecit aliquando spirandi difficultas, eâque ingravescente graviores fuere febriles paroxysmi, imò eorum ordo perturbari visus est; nec profecto id mirum, cùm catarrhi, ut diximus, paroxysmos habeant quotidianos. Denique in ipsâ phthisi observatur nonnunquam quædam febris intermittens species; & quod non expectandum videretur, est ubi ea cortice peru-

peruviano refrænari possit.

Si cordis adsint affectus, iis poterit longè alia induci febris facies; & primò quidem instat sæpe in iis affectibus quædam oppressio quæ in febrilem motum refundi posset, deinde verò quanta pulsûs mutatio & inæqualitas induci potest? sed hoc sanè mirum quod in senibus aliisque pulsûm intermittentem habentibus, febrili impetu restitui soleat cordis & arteriarum rhythmus sive æqualis incessus; videtur scilicet in iis organis cespitare pulsationes, quia identidem vires deficiunt; cùm verò per febrim resurgunt, procedunt æquo gressu contractionum & dilatationum alterni motus.

Hepatis turbata munia quantam febris mutationem inferre possint per se patet; statim quidem urinæ magis lateritiæ erunt, intumescet hypochondrium, instare hepatitis videbitur, alvus erit pigrior, paroxysmorum intervallum à febre liberum non videbitur, exorientur cardialgiæ graviores, bilis æruginosæ rejicietur major copia & aliquando cum levamine; nec quidem soli hepatitis ipsius affectus hæc omnia inducent; ipse biliaris calculus paroxysmorum speciem efficiet, aderit frigus summum ipsorum initio; imò succedet calor aliquando cum magnâ dolorum vi & acerbitate.

Pos-

Possunt cum febre intermittente quæ sit boni moris insurgere leipothymia, & malignæ febris præ se ferre speciem; exemplum jam, idque insigne, attulimus de anaesthesia & syncope terribili febrem simplicem concomitante; similem casum memorat *Riverius* in observationibus; matrona, inquit, tertianâ duplici laborans in synopem incidebat, ita ut vererentur adstantes, ne ipsa tandem deficeret; intra biduum tamen cardiacorum usu evanuit symptoma hoc terribile, & absque illius ullo vestigio transacti sunt deinde paroxysmi; intra paucos denique dies ægra perfectè restituta fuit.

Hysterici affectus feбри intermittenti non minùs aliquando larvam offundunt; verum quidem est eam diffilari ut plurimum insurgente febrili motu; at est ubi, seu ex proprio fomite, seu ex animi affectu, graviora omnino insurgant, mentem obnubilent, & in varia abeant symptomata terrorem ipsis Medicis incutientia; quod mihi, hæc observanti, mirum aliquando visum est, pulsus, qui febris vi magno ferebatur impetu, statim sub horum symptomatum adventum, lentiori incescit gressu; imò laxior videbatur arteriarum textus, & in statum naturalem videbatur restitutus earum motus.

Insigne prostat apud *Wedelium* de mutatione,

tionē, quam febribus inducunt hysterici affectus, exemplum; Nobilis femina, ex abortûs periculo vix emerſa, tertianâ corripiebatur intermittenti, ob varia quibus ſtipabatur ſymptomata, memorabili; incipiente paroxyſmo horror & dolor in dorſo ſe exerebant; aderat tuſſicula, quâ progrediente exoriebatur ruſtus continuus, ita ut horæ unius ſpatio trecentæ numerarentur ſtomachi veluti exploſiones; deinde verò incandefcente æſtu hæc omnia excipiebat delirium, cum motibus convulſivis, caput, pedes & brachia & maxillam infernam exagitantibus; diſtentum erat abdomen & urgebant leipothymia, concidente autem febrili impetu, qui ad horas 8, 9, vel 12 protrahi ſolebat, concidebant omninò tetra quæ jam memoravimus ſymptomata; interim purgantibus, levibuſque aliis remediis ceſſerunt omnia feliciter.

Scorbutus, ut eſt ipſe, ſi quibuſdam credatur, admodum protheiformis, ita febribus variam inducit ſpeciem; juxta quosdam nimirum ipſum aliquando æmulatur febris, & tunc paroxyſmi maculas per univerſum corpus deſcendunt, maculas inquam quæ in apurexiâ delentur & quæ vel purpureæ, vel nigricantes aut lividæ ſunt; at hæ maculæ ſcorbuti nomine donari nequeunt, cum ex febrili æſtu, & febrilis

veneni

veneni naturâ pendere videantur ; ægros vidi inde emergentes qui deinde scorbuticæ labis immunes fuerunt ; quod verò sæpius occurrit, scorbutus simul cum febre incedit, multaque secum advehit phænomena quæ nequaquam ex eâ pendent ; nil autem habet mali moris ejusmodi febris, saltem ut plurimum ; contumax solummodo esse solet ; interim variis stipatur symptomatis, pro variâ scorbuti naturâ aut vario ejusdem gradu.

Ex erratis in curatione, aut ex febribus ipsis suboriri possunt ab eis aliena symptomata ; quod ex erratis impendeat aliquando discrimen, cuique notum est ; quod verò spectat ea quæ sponte ex ipso febrili veneno sequuntur, aut sequi possunt, *Balloni* referemus observationem ; quartanariis, inquit, præsertim quibus sicca sunt viscera, multi eliciuntur sudores, & vix allevantur ; quibus autem non manant sudores, dolores *οστέονοι* oboriuntur in tibiis, brachiis, lateribus & sterno ; imò ad claviculas tantus insurgit cruciatus ut pleuritidem mentiatur ; quantum autem is sæviat aliquando incredibile est ; atqui ejusmodi ægris levissima medicamenta & præsidia profunt ; ex simili haud dubiè quorundam ægrorum casu orta nonnullorum opinio qui in pleuritidem abire quartanam tradiderunt.

Videbitur

Videbitur fortasse me in his omnibus propositum non attigisse scopum, iis necesse fuisset, inquit quidam, magis immorari, quibus secerni possunt aliena à febre intermittenti seu remittenti symptomata; at primò quidem per se patent multa quæ breviter exposuimus; deinde vero post paroxysmum primum statui ut plurimum potest quid ad ejusmodi febrim pertineat; denique certis observationibus moneri sufficit in eam transire posse quosdam affectus; multa profectò occurrunt in arte quæ suspicari tantummodo possumus; ex suspicionem autem ad pleniorē naturæ cognitionem assurgere licebit; incumbendum observationi ad obductam morbis caliginem depellendam; & sic ad ignota fiet sensim aditus.

CAPUT X.

De partium vitiis quæ in cadaveribus post febres intermittentes tum remittentes reperiuntur.

EJUSMODI sunt quæ vigente vitâ in corporibus observantur; reliquum est ut expendamus quænam in cadaveribus occurr-

currant febrium vestigia ; mirum est fanè eos qui de morbis scripserunt non majori studio investigasse quid morte ipsâ edoceamur ; solis enim partium detectis vitiis, quid earum perturbârit motus, functiones sustulerit, easve læsas sequatur, nosse possumus; est quidem ubi nulla observetur læsio quæ in toto corpore incusari possit; at id ipsum ignorare non licet; inde enim, id est ex nullâ mali sede repertâ, ad veras subtilioresque causas mens potest assurgere.

Cautione tamen opus est ne iis ipsis decipiamur, quibus morborum cognitionem assequi posse speramus; non causas ut plurimum, sed earum effectus, corporum sectione attingimus; deinde verò est nonnunquam dubitandi locus, num accuratè institutæ sint observationes; iis solummodo, quæ à quibusdam quorum spectata fides & industria, confidere possumus.

His rationibus inductus, summâ quâ potui diligentia quæ in cadaveribus post febres intermittentes occurrerent inquirendum existimavi; non equidem hîc agendum censui de iis omnibus quæ reperiuntur in corporibus febre remittenti compositâ defunctis; veneni febrilis vi obruitur vitalis spiritus, impetitur caput, labefactantur aliæ partes; spasmis & irritatione omnia perturbantur, & inde mors.

Observandum tamen, quod magni momenti est, post ejusmodi febres, aliquid ferme semper circa hepar occurrere; cum in eo stagnet sanguis, turgentia reperiuntur mesenterii vasa, & nigerrimo succo videntur repleta; glandulæ excipiendis vasis lacteis dicatæ inflammationis speciem præferunt; memorantur & circa eas observati abscessus; unde in has partes, & in jecoris imprimis ambages recidisse morbi vim licet conjicere; patebit idem ex eorum sectione qui ex febre intermittenti mortui sunt.

Intermittentes autem simplices, aut quæ in hecticas ipsive similes abierunt, varia in certis corporibus relinquunt sui vestigia; hæc tamen in quibusdam partibus potius quàm in aliis solent occurrere; caput v. g. insons reperitur, licet nonnunquam gravissimis torqueatur doloribus; fertur equidem turgentia occurrisse vasa circa cerebrum; at fatiscente vitâ in venas propellitur sanguis, in iisque stagnasse videtur.

Circuitûs verò & respirationis organa; multa, ut diximus, patiuntur; sanguine nigro turgent cordis atria & pulmonis vasa; fit illuvies inter minimos ejus lobulos, effusa se prodit aqua in thoracis cavo, eâ turget in quibusdam pericardium; id imprimis observatum in iis qui in maritimis

oris febre intermittenti confecti occubuerunt.

Ventriculus cùm vomitu toties subvertatur, non mirum si, ut diximus, flatibus omnino distentus reperiatur; eò procedit aliquando distensio & irritatio, ut dubitari nequeat, quin inde mors successerit; spasmus scilicet insurgente multi sublati sunt; vidi homines, qui cùm febre liberati viderentur, post cœnam turgente stomacho fato functi fuerint; in his mirè intumescebat pars hæc flatu distenta, vel aquâ turgens, aut aliis ingestis obruta.

At hepati imprimis inusta reperitur labe; albidum est ut plurimum, & veluti exsanguis & maceratum; nonnunquam mole auctum, induratum, glandulis flavis oblitum, aliàs verò sanguine turgens, eoque nigerrimo; fuere in quibus post duplicem tertianam abscessum reperi, in quibusdam verò venam portam in tubum amplissimum abiisse observavi; multa alia à nonnullis memorantur de hujus visceris vitiis; insigniter tumefactum se obtulit; obstructi omnino occurrerunt meatus per hujus substantiam reptantes; bile turgens & obstructa reperta est vesicula fellea.

Pancreas non minùs afficitur veneni febrilis vi; in nonnullis cadaveribus quædam tantum ejus partis puncta videntur obstructa;

ta; in aliis universa ejus moles scirrhusa aut insigniter aucta se obtulit; fuere qui abscessus observârint in ejus textu; in ipso autem eâ de causâ, quidam, ut diximus, febrium intermittentium fomitem latere crediderunt; sed mirum profectò non est in ejusmodi partem incidere obstructions, cùm sanguis per venas hepaticas cursum suum absolvere nequeat.

Eâdem de causâ incusatus fuit lien, excrescit nimirum in summam aliquando molem, imò brevi temporis spatio eam ita excrevisse vidi; quod verò magis mirum, in quibusdam ægris in naturalem rediit statum, nullis nisi antifebrilibus adhibitis medicamentis; sed aliud incurrit non rarò vitium pars hæc; repletur nimirum sanguine crassiori, picisque instar nigricanti; abit dein in putrilaginem, ita ut in quibusdam crepuerit. Erat mulier quartanâ laborans neglectâ; cùm verò solitis muniis vacaret ægra hæc, repente concidit mortua; in dissecto cadavere, lienis soluta compages reperta est, multaque sanguinis copia per abdomen effusa.

Inde patet quàm multa, ut diximus, recidant vitia in peritonæum & mesenterium; in iis memorantur reperti scirrhi & abscessus; ego verò lustratis his partibus læsas præsertim observavi mesenterii glandas;


dulas ; in pueris maximè eas obstructas & in molem assurgentes vidi ; non ejusmodi quidem sunt in adultis , at in iis sanguine stagnante , nigro , amurcæ simili , turgent vasa meseraïca ; in peritonæi verò duplicaturâ occurrerunt varii tumores qui illuviei ansam præbere solent , aut ejus sunt effectus ; concrescunt scilicet liquida stagnantia , & in steatomata sæpissime abire solent.

In intestinis nonnulla observantur , quæ feбри tribui possunt ; sæpe , ut diximus , valde tumida sunt ; ex eo autem quòd intumescant variis in locis , sequitur quod in aliis constricta sint ; varias angustias imprimis in intestino colo reperi , easque illo plerumque loco , ubi renem scandit sinistrum , & infra eum demergi videtur , antequam in intestinum rectum abeat ; ex ejusmodi autem angustiiis multa sequuntur quæ hîc prætermittenda sunt , & quæ facile prævideri possunt.

His ita se habentibus , expendendum videtur quid præcipuè eis doceamur ; nil profectò quod primariæ causæ lucem aliquam possit affundere ; eadem partium vitia possunt inducere alii morbi ; venena ipsa eodem prorsus modo eas poterunt afficere ; nec tamen quidquam in earum occurret læsionibus quod ad deleteriam eorum naturam & agendi rationem nos ducere

cere queat ; at patet evidenter causæ febrilis vim in abdominis viscera imprimis se exerere , ex eâ ortum ducere stagnationes , obstructions , tumores , liquidorum degenerem consistentiam , functionum hepatis & mesenterii læsionem , &c ; qui autem ejusmodi noverit effectus , eos diligentius præcavere poterit , remedia seligere ad curationem aptiora , ea temperare , vel immutare pro vario naturæ conatu ; videre erit imprimis quàm necesse sit secretionibus & excretionibus consulere.





LIBER TERTIUS
DE REMEDIIS GENERALIBUS
TUM PECULIARIBUS AUT SPECIFICIS
ET DE EORUM VIRIBUS.

C A P U T I.

*Quàm difficilis sit febrium intermittantium cura-
ratio.*

SUPEREST jam instituenda fe-
brium intermittantium cura ; eam
quidem tradere vix necessarium mul-
tis videbitur ; nullus est qui se curandis iis
febris imparem profiteatur ; inde autem
orta fiducia quod pauci aut ferè nulli ip-
sarum vi soleant occumbere ; eæ aliquan-
do sponte se subducunt , aut facilè in mul-
tis curantur ægris ; prostant denique arca-
na

na in omnium manibus, eaque nonnunquam Medicorum assensu comprobata venditantur; quæ ergo tradi possunt præcepta, eorumque apparatus nil aliud præ se ferre videntur, nisi inanem doctrinæ ostentationem.

Sed multa aliquando ex febrium intermittentium vi impendent pericula; de earum vario exitu sæpe sollicitus sit oportet quicumque assiduè eas observârit, aut qui ipsarum historiam à nobis traditam legerit; sit ut plurimum naturæ viribus aut remediorum operâ devictæ se subducant ejusmodi febres, quot sunt ægri qui eis vigentibus aut perversâ methodo curatis, immedicabiles incurrant viscerum obstructions? intermittentes verò, quæ in continuas aut larvatas toties abeunt, quis non reformidârit, cum tetra symptomata & inde improvisa mors sæpe possint impendere?

Ipsas intermittentes simplices in multis ægris expugnare difficile est; quot occurrere solent qui per annos integros eas miserè trahant; qui à Medicis ad circulatores confugiant; qui denique ab ipsâ naturâ, aut casu aliquo, quæ ars denegârit aut præstare nequeat exspectare cogantur? imò non sine magno ejus dedecore nil moliendo magis proficiunt non pauci, quàm ea tentando quæ cum apparatu præcipiuntur; non

non rarò autem , imò & sæpiſſime eò devenire curæ labores dolendum eſt ; quivis , quantumlibet ingenio & doctrinâ præſtans , febrium reluctans ingenium & medicinæ experitur inopiam.

Huc accedit quod ipſa curandi ratio in ægrorum perniciem verti poſſit ; eâ enim ſimplex febris in continuam sæpe commutatur ; remedia ipſi fugandæ idonea ejus venenum altiùs infigunt ; unde quæ ſponte fortasſe exceſſiſſet , in plures menſes , imò & in annum protrahitur ; quin etiam multa , dum curant aut curare videntur , non innoxia ſunt , acerrimum calorem concitant , partibus variis labem inurunt , earum vaſa obſtruunt , in eas periculofa dejiciunt morbi ſemina , paroxyſmos denique ſolummodo coërcent , iiſque deinde non rarò majori reſurgunt impetu ; inde aliquando hæctici affectus ex quibus difficilè emergunt ægri.

Quod autem vix credi poſſe videretur , non minùs opinio quàm doctrina in medendi arte invaluit , & inde difficilior evaſit curandi ratio ; notum quantæ exortæ ſint lites de remediis ipſis ; alii alia venditant , non diſſimilia ſolummodo , ſed adverſa ; quæ nullis aut incertis pollent viribus , magnis efferuntur encomiis ; quæ periculofa ſunt , ut tuta jactantur ; quæ quandoque
fo-

solummodo bene cessisse visa sunt, ut semper proficua commendantur; quæ denique risum potius quàm fidem merentur, summâ cum fiducia obtruduntur; ut nulla est ridicula opinio quæ authorem non habuerit Philosophum, ita nullum absonum noxiumve remedium quod cujusdam Medici arcanum non fuerit.

Sed quod magis mirum occurrit, est inter variarum gentium Medicos de ipsis remediis experienciâ comprobatis perpetuus dissensus; eò minus id condonandum quòd eam omnes sibi vindicent ut magistram & ducem; atqui tamen multi eâ innixi veris diffidunt febrifugis; si quam eis concedant vim, ea arctis concluditur limitibus; eisdem verò utentes vix de methodo consentiunt; ita incertis opinionibus miserorum hominum traditur vita.

Eorum remediorum delectui quæ detexit & adhibuit quorundam Medicorum accurata sedulitas, non minus adversatur natura; ipsa in morborum curatione nobis videtur illudere; calidis aliquando & frigidis æque curatur febris; profuerunt his acria, aliis demulcentia; quibusdam vinum & spiritus vini, non paucis aqua affatim hausta feliciter successit; venena ipsa variis curationibus fuere insignita; nil denique ferme est, aut noxium aut innoxium, quod
ter-

tertianas vel ipsas quartanas non curaverit ; imò cùm ratione duce eas incassum aggressi sunt Medici , evenit non rarò ut perversâ methodo fugatæ fuerint.

Via igitur quæ ad febrium curationem ducit non ita expedita , sed è contra valde lubrica est ; quò major prostat remediorum suppellex , eò magis in ancipiti hæret animus ; quomodo enim quæ tam diversa sunt , imo adversa , idem præstare possunt ? ne autem mero dubioque empirismo in eorum ducamur usu , videndum quam rationem cum febre & ejus curatione habere possint.

Nec profectò quærendus nodus in causæ febrilis naturâ ; ea nobis nondum innotuit ; nec minùs recondita est remediorum anti-febrilis vis ; quare intermittenti feбри potius quàm aliis medeatur omnino statui nequit ; multa equidem finxerunt multi ; at quò plura in medium allata sunt , eò magis liquet rem esse incertam ; reliquum est ergo ut iis quæ sensibus magis obvia sunt incumbamus ; perpendendum nimirum quid efficiat febrile venenum & quid natura ad illud expellendum moliri soleat ; ita fortasse elucescet quid præstent tot remedia quæ roties inexpectatos proficuosque edunt effectus.

CAPUT II.

Ut natura febres intermittentes curet.

VENENO febrili variè obfistit naturæ vis, in eoque amovendo variè laborat ; infurgit nimirum inter ipsum ipsamque pugna, cujus varius exitus pro utriusque inæquali impetu ; hîc profectò, si uspiam, veri speciem præ se fert *Sydenhami* opinio, qui febrim naturæ conamen ad assequendam curationem esse contendit ; ne tamen doctrina, quæ cum verâ philosophiâ parum consentit, nostro assensu comprobari videatur, quid de ejusmodi conamine statuere liceat paucis ostendemus.

Non fingendus profectò in œconomia animali præses quidam valetudini servandæ, aut morbosis causis impugnandis & amovendis præfectus ; sensu vivimus & movemur ; seu potius ex sentiendi vi & ex partium structurâ sequuntur vi & motûsque perennis leges ; præcipua autem ex iis est ut admoto febris stimulo statim in motum agantur nervi ; atqui hoc motu seu conamine excutitur sæpe quod vim infert ; sit v. g. spina cuidam parti infixæ, vel sit materia

ria acrior alicubi collecta, irritentur oportet fibrillæ nerveæ circumpositæ; necesse est nimirum ut veluti insurgant adversus urgentem stimulum; tale est autem febrile venenum; si enim acrius non urgeat aut deleterium non sit, naturæ excandescantis conatu superatur & expellitur.

Hunc conatum, seu hanc pugnae speciem videre est, cum in paroxysmos erumpit febrile venenum; in iis enim febris, per aliquot horas vicens, tandem restinguitur; seu venenum, quod eam accendit, corporis robore tum calore, tum arteriarum motu subigitur; multum ergo vitæ & internarum virium instrumenta in ipsum possunt; ita ejus infringunt vim, ut postquam exarsit universa partium compages, lenissimus sequatur somnus, eoque refecti vix ægrotasse videantur.

Nihilominus cum deferbuit corpus, remanet mali fomes; inde novus hostis & nova imminet pugna; postquam enim febris per certum tempus quievit, vel novo provenitu auctum, vel resumptis viribus, iterum excandescit venenum, ita ut alternis resurgat & concidat; at si nimia ejus non sit vis, effectum tandem, remittit & postea evanescit; febris enim ut plurimum temporis labentis beneficio desinit; quot sunt ruri alibique qui absque ullo medicinæ, resti-

fituuntur auxilio? en igitur iterum victrices naturæ vires; iis in subsidium venire, ipsas regere, exsuscitare & firmare Medici est; & quidquam aliud vix præstare potis est.

At quomodo natura ex hostili eo miasmate se expedit? non aliâ profectò ratione atque in cæteris morbis; in iis enim causam devincit morbificam; eam nimirum immutat, subigit, atque tandem prorsus devictam variè eliminat; aliquando verò per metastasim in quasdam partes eandem ejusve reliquias dejicit; hæ sunt perpetuæ quas solet servare leges; nec ab iis, nisi perturbata aut impotens, solet discedere.

Inde pendet universa motuum criticorum ratio; naturæ videtur scopus, in quem ipsa omnes intendit vires, ut causas morborum vel sensim & repetitis expellat conatibus, vel impetu facto eas quasi uno ictu excutiat, totumque corpus noxiis humoribus expurget; hæc autem expurgatio præcipuè judicium seu *crisis* vocatur; jam verò ea in febre intermittenti, non minùs quàm in continuis, solemnis est; &, si antiquioribus credatur, quolibet veluti hujus febris gressu præparari & prænuntiari solet.

Et primò quidem, juxta eorum observationes, tertius paroxysmus videtur gravior, sextus gravissimus, septimus denique,
qui

qui ultimus esse solet , mitius urget ; sed tunc vel lenis sudor , vel diarrhœa succedit , aut utrâque viâ se proripit morbi causa ; seriùs tamen id evenire posse certum est ; nam post septimum , aut etiam nonum , incidunt hi naturæ motus ; imò longius sæpe protrahitur febris solutio.

Fatendum interea quod , testantibus Viris clarissimis qui rem accuratè videntur explorasse , in multis ægris nulla aut incerta occurrant criseos vestigia ; sed tunc præcipuè cùm remediorum vi , intempestivo usu , aut farragine perturbata sunt naturæ conamina ; fortè etiam eâ quâ par est diligentia non observati sunt critici motus ; & cùm febrim tacitè aut absque magno impetu sustulissent , defuisse eos curationi immeritò visum est.

Varii autem sunt naturæ conatus , quibus ex febre ad valetudinem ducimur ; non mirum est ergo si multæ sint criseos species , aliæ magis aliæ minùs conspicuæ ; & primò quidem pustularum , de quibus jam egimus , circa labia eruptio febris solutæ prænuntia est ut plurimum , sicut cuius notum est ; ut plurimum inquam , nam aliquoties cum iis decurrissè pertinaciter observatus est morbus ; non nisi imperfectè scilicet ejecta est tunc veneni febrilis minera.

Scabiem similiter & exanthemata per totum

tum corpus erupisse observatum est, & febrilem abstulisse fomitem; imò iis repressis eundem iterum esse exfuscitatum memoratur; at mihi in tot ægris meæ curæ commissis id videre rarò contigit; non sæpius mihi occurrit phlegmon quo, in partem aliquam decumbente, sublata fertur febrilis causa; unde insolens oportet sit critica hæc eruptio.

Evanescit, juxta *Hippocratem*, febris intermittens se exerente ictero, idque in quâdam imprimis observavi epidemiâ; sed quod refertur à *Platero* mihi videre non licuit; cùm is scilicet morbum hunc bile per totum corpus diffusâ secedere fateatur, inde alvi cruciatus enormes successisse testatur; & postea resolutiones & convulsiones; peculiaris haud dubiè adfuit eorum affectuum causa, nec motui critico, ut mihi videtur, tribui potest; id saltem omnino insolens est.

In caput etiam dejecta febrilis causa vî suâ omnino spoliari visa est; nam, referente *Willisio*, surditate derepente obortâ concidisse certum est; ego verò quandoque obsurdescere ægros observavi, sed non ideo febre liberati sunt; febrifugis ad eam penitus amovendam opus fuit; non hîc autem de parotidibus, quæ aliquando in ejusmodi occurrunt morbo, multa dicam; ter

Q

aut

aut quater mihi occurrerunt solummodo ; nec quid inde successerit meminisse licet ; sed probatur iis evidenter materiem febrilem visceribus , si in ea recidat , summè noxiam esse posse.

Occurrit mihi casus materiæ febrilis motum apprimè demonstrans ; erat vir tertianâ laborans simplici ; ut autem ea intra breve tempus secederet , statim , præterpropter , magna corticis peruviani vis ægro est ingesta ; repressi quidem paroxysmi ; at eorum loco acerrimus dolor in crure altero exortus est ; hinc intumuit pars affecta & ad suppurationem vergere omnia visa sunt ; cùm verò nil moliendum videretur , nisi ut turgenti materiæ ferro aperiretur exitus , se unius noctis spatio proripuit ipsa evanuitque penitus tumor ; quæ autem eò conclusa erant liquida puris instar per urinarum vias dejecta sunt.

Casus , licet rarò occurrentes , hîc referre visum est , quia iis positis de naturæ crisis molientis labore dubium esse nequit ; si in quibusdam ita se prodatur , certum est eundem in iis ægris impendi , in quibus minus sit conspicuus ; testimoniis interim quæ huc adduxi vix opus videtur ; pedum tumores , ut cuique notum , criticos esse aliquando certum est , cùm iis apparentibus evanescere soleant paroxysmi ; idem sentien-

riendum non rarò de alvo intumefcente ; in eam quippe dejicitur febrilis materia è sedibus fuis depulfa , five undequaque in unum locum confluens ; judicari potuiffet perfectè febris , fi in inteftinorum colatoria , aliasve excretorias vias converfus effet conatus ejufmodi.

Sed minùs dubii funt alii motus quibus judicantur febres intermittentes ; sublatae funt eæ non rarò hæmorrhagiis , bilis atræ feu fanguinis nigri in mefenterio ftagnantis effluxu , bile ipsâ flavâ per vomitum rejectâ , diarrhœâ fpon te fubortâ , fudoribus aliquando profufis , aliàs verò lenioribus , diuque protractis ; in urinis denique , in earum fcilicet copiâ aliquando , & feditamento imprimis , ut aliàs dicemus , foluti aut fatifcentis morbi prodeunt figna , quæ fedulò infpicientem latere nequeunt.

Non equidem velut impetu factò , ita fe undique proripit febrile venenum ; modò hæc via , modò altera huic patere folet ; fæpius autem diarrhœâ expurgatur , aut urinâ copiofâ , læve albumque feditamentum dejiciente ; non rarò tamen leni madore aut transpiratione aliquatenus foetente fieri folet ejufmodi expurgatio ; quæcunque autem hæc fuerit , repreffis paroxyfmis illico exspectanda fempè non eft ; filent ii fæpiffime , remanente febrili causâ ; eaque non

nisi post aliquot aut multos dies diffatur ; unde observandum accuratè quid in convalescentibus contingat ; ratum fixumque sit , ut inquit *Albertinus* , nullum ferme curari perfectè , nisi quodam accedente critico motu ; inconcussa ergo remanent quæ de crisi febrilem fomitem exhaurienti jam dicta fuerunt.

CAPUT III.

Ut ad eos naturæ motus referri possint curationes singulares , quæ casu fieri , aut remediis , quæ nullam cum febre rationem habere videntur.

VENENI febrilis naturam nobis esse omnino ignotam inde imprimis liquet, quod vera remedia sæpe respuat, quod alienis à febre , ridiculis , aut etiam non innoxiiis expellatur, quod casu denique , potius quàm arte , toties diffari soleat ; ut autem hæc planiora fiant , quædam statim huc attinentia ex antiquorum præmittemus doctrinâ.

His in more erat ad curandas febres insignem aliquam mutationem aut motum inducere ; Medici cura , inquit *Celsus* , esse debet

debet ut morbum mutet ; ideo aquâ frigidâ corpus perfundi jubet , quia , juxta eum , sic evenit ut horror inde oriatur , & fiat initium quoddam novi motûs , ex eoque , cùm corpus incaluit , sequatur etiam remissio ; eundem etiam in scopum , si diu frigus sit & torpor & jactatio corporis , calidiora ægris exhibenda censet ; iis enim intenditur sæpe febris , & major ortus calor priora mala tollit & spem remissionis inque eâ curationis ostendit.

Ea quidem aut similia qui tentârunt temeritatis notam effugere non poterant ; sed ægri , qui sub cautioribus Medicis trahebantur , interdum ejusmodi remediis restituti sunt ; deinde verò minus culpandi antiquiores Medici hujus methodi ineundæ authores ; legem enim ab œconomia animali non omnino alienam sequuti videntur ; si quo autem in morbo non malè cesserint temerarii ejusmodi ausus , maximè in febre intermittenti ; in eâ imprimis nos docuit natura , remedio esse posse insignes subitasque mutationes.

Iis innituntur plurima quæ ad eas illustrandas curationes , in quibus casus sibi plus quàm ars vindicat , jam dicturi sumus ; plurima inquam , non verò omnia , inde pendere ostendemus in ejusmodi curationibus ; ad alia enim , eaque multa , re-

ſpiciendum, ut naturæ aſſequamur vires; quæ omnino variæ ſunt; ad eas dignoſcendas quædam iterum ex iis quæ jam diximus hîc memorare operæ pretium erit.

Statim autem, cùm, ut diximus, naturæ viribus ſubditum ſit febrile venenum & cujuſlibet paroxyſmi vi mutari & diſſilari poſſit, patet, quid multa in ipſum poſſint; quæcunque nimirum motum validiorem concitant & calorem inducunt, febrim fugare poterunt; ideo exercitatio, ſpirituofus potus, crapula & ingluvies, excalefacientium uſus, toties vera fuerunt remedia, incerta tamen ſemper & periculofa; ipſis enim irritatio nimia & caloris acrior vis exſuſcitari poteſt, & accendi gravior aut continua febris.

Cùm ea autem ſit veneni intermittentis natura, ut per vomitum, diarrhœam & ſudores elabi poſſit, patet iterum quanta eſſe poſſit variorum remediorum in febrile venenum vis; non mirum v. g. eſſe poteſt ſi emetiçis & purgantibus draſticis, ſi ſudoriferis calidioribus toties ſublatae ſint ejuſmodi febres; præterquam enim ejusmodi medicamenta naturæ ductum, ſeu viam in quam ipſa inclinât ſequuntur, totum corpus concutiunt aut commovent; ut interea evacuationibus ſpontaneis non ſemper exhauritur morbi fomes, ita nec iis quæ
arte

arte excitantur ; ad perfectam assequendam curationem oportet ut nil ex eo supersit ; patet id v. g. ex sudoribus qui paroxysmos excipiunt ; si eis quidam ponatur obex succedit gravitas & anxietas , & subsequenti- bus paroxysmis adduntur vires.

Non tamen tantum naturæ conatum in organis excretoriis semper postulat febrile venenum ut expelli possit ; sæpissime saltem non ita sensibus obviæ sunt evacuationes quibus diffatur ejus vis ; sic enim comparata est ut verno tempore & æstivæ tempestatis calido halitu subigatur ; atqui tunc nil aliud accidit nisi rarefactio universalis quâ pervia fiunt constricta ante colatoria , tum vascula in quibus stagnans hærebat sanguis ; his autem apertis viis in motum aguntur quæcunque fluida , & sensim expurgantur partes omnes ; quæ calorem ergo naturalem , & secretiones tum excretiones leniter promovebunt , febres curare apta erunt ; atqui innumera sunt quæ ejusmodi pollent viribus.

Hoc ita certum est , ut ad curandas febres nil aliud aliquando requiri videatur , nisi magis expedita circuitûs via ; hæmorrhagia v. g. profusa , hæmorrhoidum effluxus , sanguis è venâ emissus , non rarò febres radicitus sustulerunt ; atqui tunc tantummodo deplentur partes quæ antea tur-

gebant, faciliùs moventur quæ superfunt in vasis liquida; hinc patet quantum possint quæcunque his fluxilitatem conciliant, & impedimenta removent; atqui ea præstare possunt innumera quæ ubique prostant; aperientia v. g., saponacea, & amara imprimis, in quibus lenis viget stimulus, vascula minima sollicitans, eaque in motum agens. Iis nititur prima quam trademus methodus; ea nimirum quæ febres intermittentes, non peculiaribus remediis, sed generalibus, atque iis quæ in aliis morbis usurpantur, curare potest.

Ut verò expelli aut diffari potest febrile venenum laxatis secretionum organis, ita constrictis partibus potest in iis retineri, nec tamen incandescere aut in paroxysmos erumpere; probatur id hiemali frigore quo, constrictis corporibus, desinunt febres ut plurimum; at qui tamen remanet sæpissime intactus mali fomes, cùm deinde, vernâ nimirum tempestate, idem omnino toties prodire soleat; num autem statui potest quod frigus efficit idem præstare adstringentia quædam; iis tolluntur aliquando paroxysmi; at certa nequaquam est ejusmodi curatio; sublata enim reviviscere solet febris, & ni alia in subsidium veniant, oriuntur obstructions quæ mali causam altius visceribus solent infigere.

Mirum

Mirum profectò videbitur ita, velut in quodam recessu, retineri febrile venenum, ut febrim non concitet; sed, ut jam diximus, in abdomen aliquando detruditur, & tunc in paroxysmos non excandescit; nihilominus febre iterum exortâ, iis ex loculis, in quibus iners latebat, non rarò expellitur, imò omninò diffatur.

Inde autem aliud non parvi momenti sequi videtur; ut nimirum subitâ febris vi, motuque ab eâ concitato excutitur è variis partibus febrile venenum, ita potest idem aliâ de causâ, commovente & irritante, è suo depelli fomite, & ex universis corporis latibulis.

Est v. g., ut cuique notum, ubi caloris vi rarefaciente, unicâ aliquando venæ sectione, motu intensiori concitato, concussione emetici medicamenti, reſeratâ secretionum viâ, expelli possit febrile venenum; quidni autem nervorum motus idem præstare possit? iis exagitatis retroaguntur sæpe exanthemata, discutiuntur varii tumores, spiritus animalis in paralytica membra agitur, podagræ causa ex partibus eâ affectis evocatur; atqui febrilis fomes similiter tolli potest, & miasma in eo latens aliò amandari; ut id evanescat non aliud quidquam requiritur sæpissime, nisi ut è sede suâ dimoveatur, sanguinis aucto impetu;
nonne

nonne autem nervi eum concitant & augent variis in casibus ?

Multa ubique occurrunt exempla quibus id luculenter confirmari potest ; calore & exercitio , irâ & terrore , ut & dolore acuto , imò & crapulâ ipsâ aliquando , uti diximus , depulsa fuit febris ; remedia ipsa validissima , id est quæ validè corpus exagitant , antidota esse visum est ; plurimos vidi qui pulvere pyrio , sulphure , carbonibus in pulverem redactis , radice centaurii majoris ; plures , inquam , vidi qui iis omnibus commixtis & ingestis à febre pertinaci se vindicârunt.

Quod verò vix credi posset , corpora algore febrili rigentia , in aquam frigidam demersa , sæpissime omnium symptomatum febrilium immunia fuerunt ; hoc in more esse observavi quibusdam levis armaturæ militibus , ut se in flumen demitterent : sicut ergo prudenti medendi ratione , ita & temerario ausu aliquando tolluntur febres intermittentes : at recidit hoc in *Petronis* , qui non multò post *Hippocratem* degebat , & in *Cornelii Celsi* jam memoratam methodum.

Sed ut moventia & evacuantia remedia , ita & alia quæ liquida immutant , febrim curare possunt ; ex observatis patet , ut diximus , putridi quid veneno febrili inesse ;
idem

idem sequitur ex copioso bilis proventu; hæc enim ad putredinem inclinat, & ex sanguinis dissolutione ortum trahit; videntur ergo antiputrida ad febrium curationem indicari; sed id luculentiùs confirmatur variorum remediorum effectu; multa prostant, ut videbimus, ejus generis, licet contraria videantur; in varietate autem ejusmodi, solâ possumus doceri experienciâ, quænam aliquoties succedant, & quænam ut plurimum certò prodesse possint: hinc ex quâdam rationis luce in empirismum iterum devolvimur.

In quibusdam interim remediis latent vires omnino diversæ ab iis de quibus jam actum est; videntur scilicet eæ peculiare & specificæ; de iis ita sentiunt viri doctissimi, & experientiam in testimonium advocant; at quamvis gravioribus omnino argumentis in hanc sententiam adducti sint, fateor mihi de eâ sæpius injectum scrupulum; novi equidem tetra symptomata vitæque infesta, velut pulveris exigui jactu, conquiescere, & obrui febrile venenum; nihilominus sævit illud sæpissime quæcunque adhibeantur febrifuga; aliàs in certas partes amandatur, compressis tantummodo paroxysmis; num ergo impediri solummodo aut refrænari ejus vim & averti ipsius excandescientiam censendum est? atqui ita non
ex-

extinguitur aut deletur venenum hoc ; sed objicitur ei veluti repagulum.

Non tamen hæc ita accipi velim, quasi veram omnium febrifugorum agendi rationem me affecutum esse crediderim ; id mihi tantummodo fuit propositum ut ostenderem multos eorum effectus cum naturæ conatibus seu ipsis legibus consentire ; graviter profectò erraret, qui ex iis solis quæ diximus haberi posse remediorum delectum existimaret ; ad experientiam semper deveniendum ; ab eâ discendum quid valeant ? quodnam sit aliis præstantius ? quid curando efficiant ? nullum erit tutum certumque quod longo usu & accuratâ observatione comprobatum non fuerit ; ne autem in eorum æstimandis viribus sit errori locus, quædam hîc in genere præmittemus.

Et primò quidem, quæ sibi non constant, vel quæ plerumque non succedunt, ut remedia haberi nequeunt ; atqui talia sunt multa quæ circumferuntur, & quæ ut antidota venditantur ; longiùs autem ableganda, quæ periculi quid habent ; ejusmodi sunt acria & calidiora, quæ semper ferme, etiam dum curant, noxia sunt ; ejusdem denique sint censûs oportet, quæ viribus adeo adversis donantur ; ex duobus enim omnino contrariis alterum noceat oportet, si validior sit eorum in corpus actio.

Ex

Ex tot curationibus quæ his remediis tribuuntur, nil deduci posse patebit, si earum veram inspiciamus causam; ejusmodi enim est febrilis veneni ingenium, ut ad febris intermittentis curationem nil aliud requiri aliquando videatur, ut diximus, nisi quædam insignis subitaque mutatio; atqui omnia quæ eam possunt inducere certa non sunt remedia; si enim in uno succedant, in innumeris fallent; imò si scopum non attingant, & veluti uno ictu febrim non tollant, omnia in pejus ruent.

Cùm igitur, per tam intricatas viarum ambages natura incedere videatur, cùm adeò fallax esse possit experientia, cùm denique tot & tanta sint opinionum diffidia, magni profectò interest veram indagare febrifugorum vim; in duplici autem remediorum genere inquirenda est ea, in remediis scilicet quæ generalia dicuntur aut aliis morbis communia, deinde verò in iis quæ specifica sunt aut feberi dicata.

Remediis generalibus, evacuantibus nempe, diluentibus, & aperientibus summa inest vis; eorum usu corpus ad naturalem statum propiùs reducitur; circuitus enim fit facilior, partes meliùs suo funguntur officio, depravati alterantur aut ejiciuntur succi; aperiuntur denique viæ quibus elabi possunt,

possunt, quæ humores totumque corpus inficiunt; remedia ergo specifica, præmissis remediis generalibus, certius & tutius adhiberi poterunt; his ad curationem sternitur via, illis curatio perficitur.

CAPUT IV.

An diætâ, ut fundamento, niti debeat omnium febrium intermittentium curatio.

STATIM ergo inquiremus à quoniam remedio initium faciendum sit? diætâ equidem ut verum curationis fundamentum habenda videtur; de eâ tamen variæ fuerunt Medicorum sententiæ; à quibusdam ex antiquis enixè commendatur, non ut adjumentum præcisè, sed ut remedium ipsis repetitâ compertum experienciâ; à quibusdam verò neotericis ut noxia damnatur; utrique autem longiùs processerunt, & opinione, potius quàm ratione, ducti sunt.

Heraclides Tarentinus, referente *Celso*, ægros ad septimum diem abstinere jubebat; ipse verò *Celsus* primis ipsius quartanæ diebus aquam solam calidam assumendam censebat; id quidem dignum omnino videri posset consilium præstantissimo in arte

arte viro ; sed diebus deinde intercalari-
bus ad decimum quartum eandem iussit
abstinentiam, eâque cum cæteris quæ præ-
cipiebat proximum fore ut tolleretur fe-
bris existimavit.

E recentioribus verò cibandos ægros cre-
diderunt multi , & nescio quid metuunt
ipsis , si etiam levibus aut pauci nutrimen-
ti vescantur cibis ; diversas quidam obtru-
dunt observationes , quibus diætam variis
ægris fuisse exitialem contendunt ; eam
saltem infelicitè fuisse tentatam in quar-
tanâ testantur alii qui tantum non omi-
nantur periculum ; imò effatis Hippocrati-
cis in suam sententiam detortis hæc com-
probari existimant.

At ratione & experienciâ , non verò au-
thoritate , nos duci oportet ; & primò qui-
dem piaculum esset diætam ablegare in
duplici tertianâ ; in ipsâ verò quæ tertiâ
quâque die insurgit non minùs nocere pos-
sunt cibi , si vehemens sit aut gravioribus
stipata incedat symptomatis ; ea denique
in quâ nil ostentatur periculi nec quid-
quam nisi diuturnitatem minatur , faciliùs
remediis obsequitur , si abstinentiâ impu-
gnetur ; cùm eâ solâ multæ sublatae sint
febres , ut verum remedium habenda est.

Initio imprimis , cùm stent vires , com-
mendanda est , idque eò impensius si tur-
geat

geat sanguis, si multa adsit bilis copia, si putredine inficiantur primæ & secundæ viæ; in corpora ejusmodi sordibus inquinata acrius sævit febrile venenum; novasque ei addunt vires alimenta, quæ, ut vitæ subsidia, ita & morborum sunt irritamenta; ut ergo ingerantur, expectandum est saltem donec remediorum operâ ejecta sint quæ vel optimos succos in cacochyliam commutare apta sunt.

Non initio febrium tantummodo, sed quoties earum quæ etiam diutius excurreunt suscipitur curatio, commendanda est per certum tempus accurata & tenuis victûs ratio; centies mihi occurrerunt qui ideo restituti non sunt, quia strictioris diætæ legibus se subjici non sustinuerunt, & qui non nisi iis observatis sublevari potuerunt; hoc plurimis & repetitis experimentis fretus testari possum.

Statuendum ergo est quænam sit ea diætæ lex à quâ nefas discedere; initio scilicet febrium, primâ die imò & secundâ, quantum fieri licebit ab omni cibo temperent ægri, & nil nisi aquam aut levem ptisanam assumant; subsequentibus vero diebus, solis nutriantur jusculis; ita porrò pergant donec remediorum operâ decesserit febris; deinde verò ad panem elixum & alios successivè cibos, pro febris & ægrorum naturâ, fiat transitus.

Quod

Quod magis negotium faceffit, est februm contumacia, earumque diuturnitas; in iis nimirum impugnandis non fervandæ videntur ita strictæ diætæ leges; si remediis v. g. obſiſtat febrile venenum, ſi ſæpius idem infurgat cùm evanuerit, aut varios adduxerit relapſus, curationem fame proſequi abſonum eſſet; id tunc agendum, juxta *Celſi* ſententiam, ut quod diu ſuſtinendum eſt, corpus facilè ſubſtineat; cavendum ſolummodo, ne ingerantur edulia concoctu difficilia, & ne verſus illud tempus quo infurgunt paroxyſmi aſſumptorum onere laboret ventriculus; iis ingraveſcit morbus, aut ſi remiſerit, priſtinam recipit vim, vel ſi jam deſierit, iterum exſciſcitari poteſt.

Cùm hæc omnia tot rationum innitantur momentis, mirum fanè eſt, inter Medicos variarum regionum, tantum circa diætam intercedere diſſenſum; ne autem abſtinentiam adeo metuant, Empirici Melitenſis, aliorumque vetat exemplum; illi per triginta dies, aliquando vel amplius, omnem ægris ſubduxere cibum, ſolâ aquâ in remedium & alimentum relictâ; multi autem aliâ methodo immedicabiles morbi ita ſublati ſunt. Non equidem eò uſque diætam urgere auſit ſapiens Medicus; ſed eam longiùs protrahi poſſe quàm vulgò

creditur certum est; senectutis tamen habenda est ratio; effœta corpora diætam ut juniora ferre nequeunt; quædam sunt præterea quæ ita effinxit natura, ut abstinentiâ offendantur; at cavendum ne præjudicatâ opinione experientiæ rationisque leges transgrediamur, ut ægrorum vulgique querelis morem geramus.

Abstinentiam saltem à carnibus multa suadere videntur; pronæ sunt eæ omnino in putredinem, quæ non parum, ut jam innuimus, ad ipsas febres intermittentes progignendas confert, tum ad alias omnes; unde, si per morem liceret, solam antiquorum ptisanam, aliudve simile ægris acutè decumbentibus commendarem; consentit hoc cum iis quæ apud Ægyptios observavit doctissimus Medicus; si in levissimis, inquit, febribus ingerantur juscula carnea brevi mutantur eæ in putridas aut malignas.

Id haud dubiè ex eo repetendum quod in locis calidioribus magis in alkalescentiam & putredinem inclinent carnes; aliud præterea in iis non minùs spectandum occurrit, quod succo scilicet copiosiori turgent; cùm in militum usum copiarum Gallicarum insignis Dux carnis bubulæ extractum exoptaret, ex eo tabellas in Americâ, in Hispaniâ, in Galliâ & in Germaniâ conficiendas curavit; quantum autem inter eas esset

esset discriminis vix quisquam expectasset; quò plus ad austrum vergebant regiones eò plus nutrimenti ex carnibus extrahi poterat; quod ex libris duabus v. g. prodibat in Hispaniâ, non obtineri poterat ex libris quatuor in locis borealibus; inde summo huic viro deduci posse videbatur quare Germani Lutetiam advecti in gravissimas inciderent febres, si ingluviei aut voracitati solitæ indulgerent.

His autem omnibus, quæ ad febres intermittentes directè non spectant, intelligi velim quantum in iis præstet diæta; parcus omninò debet esse carniū esus, saltem initio, ut diximus, & dum imprimis curatio suscipitur; sic gravissima amoventur impedimenta, nec novo veluti admoto fomite accenditur febrile venenum; ut verò paucis absolvam, primum sit remedium diæta, seu victûs accurata ratio; habeatur abstinencia per certum tempus, ut summi momenti auxilium; temperetur tamen oportet pro morbi naturâ, pro ægrorum viribus, & prout tempus & remedia ferunt; meminerint Medici quod sapientissimè monuit *Fernelius*, de iis qui intempestivâ alimentorum operâ potius quàm remediis se refici posse credunt; *non se, inquit, sed propriam alunt intemperiem.*

CAPUT V.

De venæ sectione.

QUOD primò occurrit remedium, est venæ sectio; fatendum tamen est, eam febribus intermittentibus per se ipsam non mederi; ideo tam sæpe malè audit & quasi inutilis habita; imò, si quibusdam credendum, ut noxia habenda est; in eam fortè opinionem fuerunt adducti hæmorrhagiis copiosissimis, quæ aliquando vires febrili veneno addere visæ sunt; non inde tamen sequitur, ablegandam esse sanguinis missionem, veluti nil boni præstare possit.

Hâc de re multa nobis natura & experientia observanda suppeditant; vidi sæpissime febres duplices tertianas unicâ venæ sectione in tertianas simplices abiisse; dimidia ergo hujus febris pars tolli potest missio sanguine; sed quod non minoris est momenti, observatione certâ & repetitâ mihi constat paroxysmos omnino mitiores fieri, vel seriùs redire; postquam missus est sanguis, minùs urget calor, parcior est sudoris effluxus, dolor capitis est levior, functio-

functiones denique omnium partium melius procedunt.

Sit igitur ratum fixumque, si venæ sectio febriles non tollat insultus, eam aliis remediis viam sternere, impedimenta amovere, & ideo præcipuè esse necessariam; statuendum solummodo superest, num in quibusvis febribus omnino requiratur? an in multis prætermitti possit, aut potius prætermittenda sit? quinam denique ei sint præfigendi limites?

Equidem in quocunque febrili motu, absolum sanè esset ad venæ sectionem confugere; sunt febres in quibus ab eâ abstinere licet & oportet; tales sunt eæ quæ leviores sunt, aut quæ viribus exhaustis vel certis exantlatis morbis superveniunt; eò minùs tali indigent remedio, quod multæ eæque aliquando graviores absque sanguinis missione curatæ fuerint; non tamen his quibuscunque exemplis nos à rationis & experientiæ præceptis dimoveri licet; tutius est non necessariam tentare venæ sectionem, quàm ab eâ præter rationem temperare.

Noxium imprimis esset venæ sectionem prætermittere, si turgeat sanguis, si intensior sit febrilis motus, si calore urenti aut acutissimo capitis dolore vexentur ægri; metuendum sanè esset ne gravior fieret

morbus, & variarum partium læderentur functiones; non alii profectò causæ tribuenda sæpissime febrium pertinacia, quàm huic neglecto remedio; inde non rarò febrifugorum irrita, imò & noxià vis; his adversari sanguinis copiam, tum circuitûs impetum, & inde exortum calorem, certissimâ constat experientiâ.

Quousque autem urgenda sit sanguinis missio, nequaquam definire licet; pendet id ex corporum naturâ & ex symptomatum vi; cum ea nimirum varia esse possit, modò plus modò minùs, aliquando verò multum sanguinis detrahendum; at imprimis quò propiùs ad continuarum indolem accedunt febres, eò sæpius ad ejusmodi remedium est confugiendum; hoc verò experientiâ & ratione confirmatum præceptum quibusdam exemplis illustrabitur.

In constitutione quæ hîc loci vigeat, febres erant duplices tertianæ, imò multæ continuarum induebant speciem; atqui in iis ægri nullum percipiebant levamen, nisi post tres aut quatuor venæ sectiones; in multis ita durus erat pulsus, & ita acutus capitis dolor, ut quinquies vel sexies venæ sectionem repetere cogerentur Medici; si ei parcerent, ingens urensque urgebat calor, atroces erant capitis dolores, in verè continuas abire solebant febres; at postquam

quam satis laxata fuerat misso sanguine corporis compages, remittebant brevè omnia symptomata, induciasque concedebant ad alia exhibenda remedia.

In tertianâ febris eâque nothâ & vehementiori, idem se mihi sæpius obtulit; cùm parcius adhibita esset venæ sectio, graviora esse solebant symptomata; incassum in aliis quibuscunque remediis quærebatur levamen; cùm verò febris pertinaciâ coacti Medici ad sanguinis missionem, cui nimium pepercerant, redirent, statim omnia leviora fiebant, calor scilicet mitescebat, remissior erat paroxysmorum vehementia; quæ verò frustra adhibita fuerant alia remedia, succedere solebant.

Mihi quidem, quoties initio pertinax occurrit febris quæcunque intermittens, vel intenditur ejus vis, ad venæ sectionem, licet antea celebrata sit, confugere semper mos est; nec me usquam eam tentasse poenituit; imò ex eâ fructum certum ple-rosque percepisse ægros observavi; si quando, quod quidem insolens est, non ita prodesse contigerit, id regiminis aut aliorum remediorum vitio evenisse pro certo habui.

Interea in simplici febre intermittenti, imò in duplici tertianâ non continuâ, una aut altera sufficiet venæ sectio; nec ultra

imprimis progrediendum erit, si perfecta, aut quanta esse potest, fuerit inter paroxysmos apurexia, aut si talia sint febrilis motus incommoda, ut ferri posse videantur, absque eo quod graviora patiantur partium functiones.

Hæc cum ita sint, mirum sanè viros non incelebres venæ sectionem in febre intermittenti, ut noxiam, ablegasse; infaniunt quidem, qui eâ solâ & repetitâ morbum hunc curari posse contendunt; fatendum tamen quod si misso copiosius sanguine strictior observetur diæta, frænari possint sæpissime febriles insultus; fuit aliquando ubi eo exundante, sive hæmorrhagiis spontaneis, sive inflicto vulnere, nullum febris remanserit vestigium; idem ergo venæ sectione, cum cautione tamen adhibitâ, fieri poterit, si imprimis accurata simul victus instituat ratio.

Nec profectò cum ratione nec cum experientiâ consentit hæc *aimaphoborum* sententia; præmissa venæ sectione magis expeditæ patent secretionum & excretionum viæ; cum minori simul discrimine opus suum moliuntur emetica; tutius & facilius movetur alvus purgantibus, copiosius effluunt urinæ, minus denique obstructionibus loci est.

Præterea in febrili impetu turgēt hepar
san-

sanguine; in mesenterio stagnat fluidum hoc; eodem in molem attollitur sæpissime lien; dolet denique caput ob circuitûs vim; atqui cùm his omnibus occurrat venæ sectio, ut noxia haberi non debet; quâ igitur ratione inductus Sydenhamus asserere potuit, *quod nisi Chirurghi gladiolus eodem ictu, quo venam pertundit, febrim ipsam etiam confodiat, ea nonnisi longo temporis tractu expugnari se patiatur.*

Hoc quidem ex causæ naturâ, utpote ignotâ, deduci nequit; reliquum est ergo ut observationibus solis dignoscantur ita noxii venæ sectionis effectus; atqui ex millenis observationibus constat eam fuisse admodum proficuum; si quando nocuisse visa est, non fuit observata accurata mendendi ratio; Medici ergo aut ægri culpâ accidit quod sanguinis missioni tam audacter exprobratur.

Quod spectat debilitatem quam multi, si mittatur sanguis, impendere existimant, nonne præjudicatâ opinione nititur ejusmodi metus? securos omnino nos esse licet si innumeris credamus experimentis, de quibus modò egimus: non propter debilem partium textum reluctatur febris, sed propter ipsius vim nimiam, aut propter ejus venenum altius infixum & acrius stimulans; non potest autem temperari nimia
hæc.

hæc vis, aut tolli irritatio, nisi debilitentur motûs organa; fatendum profectò, uti apud nos nimium quandoque incusantur eorum vires, ita apud alias gentes ipsorum debilitati nimium tribuitur; nullum est plerisque in acutis morbis venæ sectione magis innocuum remedium; probatur id vel effrænata eorum audaciâ qui intra breve tempus quindecies aut amplius, & ad uncias decem vel duodecim, sanguinem mittunt; multos vidi qui post ita enormem vitalis liquidi jacturam optimè citòque restituti sunt.

At in iis febribus, quæ per certum tempus evanescentes, iterum resurgunt, quis venæ sectioni erit modus? an quoties se exerunt, ad eam recurrendum? absolum sanè esset sanguinem mittere, si sæpius missus fuerit, si postquam per aliquot dies evanuerit febris iterum revertatur, si pluries ægros dimiserit & corripuerit, si ejus diuturnitas cachexiam adduxerit, si jam ab æstate vel autumno per mediam hiemem excurrerit; denique, ut paucis verbis omnia hæc comprehendantur, ferant vires oportet venæ sectionem, nec nisi symptomatum vi ad eam adigi debemus.

Causæ non medetur, ut diximus, venæ sectio; motum tantummodo frænare potest; quid autem proderit frænum, cùm
lan-

languet vitalis vis; non potest quis, nisi infans, febres sanguinem profundendo prosequi; eo prætermodum detracto sublatus fertur Hispaniarum Princeps, idemque aliis contigisse certò scio; hæc tamen in genere non ita dicta esse velim, ut venæ sectionem à quibuscvis febribus inveteratis ablegandam esse censeam; si pulsus eam postulet aut permittat, & nimia sit febris incandescencia, ab ejusmodi remedio abstinere non licet.

CAPUT VI.

De Evacuatione primarum viarum.

UT ante venæ sectionem, ita post ipsam diluendum corpus, quò rite expurgari possit; non enim succedent evacuantia medicamenta, ni potius aquosi copiam laxatæ fuerint partes; requiritur imprimis prævia hæc laxitas in corporibus exercitatis, plethoricis, biliosis, sicco temperamento donatis; inducetur ea facilius, si clysmata simul injiciantur, iisque evocentur intestinorum fæces.

His peractis, de evacuatione primarum viarum, & totius tubi intestinalis cogitandum

dum est; non equidem in iis residet febris fomes; sed ad eam exasperandam multum possunt pravi succi, putridi, vel biliosi; iis inficitur sanguis, inducitur acrimonia, excitatur calor & irritatio; exoritur saltem impedimentum, quod remediorum antifebrilium viribus officit; constat id certissimæ experientiæ testimonio, quandoquidem collectâ in stomacho aut in intestinis caco-chyliâ, difficilius instituitur febrium intermittentium curatio; quæ facilè post evacuationem tollerentur, eâ omisâ aut neglectâ altiores agunt radices.

Huc accedit quod evacuantibus præmissis facilius restituantur partium functiones aut eæ servantur intactæ; facilius v. g. secer-nitur bilis, copiosius fluunt urinæ, cutis spiracula magis patent; imò iis possunt fieri evacuationes remediis quæ ad promovendas secretiones apta sunt; id eò facilius in febre intermittenti quod nonnisi diebus intercalaribus, id est eo tempore quo quiescit morbus, instituaturs curatio.

Sed unde incipiendum, an ab emeticis, an verò à purgantibus? videbitur fortasse ab emeticis temperari posse, quia vomitu repetito excruciantur ægri paroxysmorum initio; huc accedit, quod quæcunque hærent in stomachi latebris naturæ ipsius conatu aut beneficio expelli posse videantur; sed

sed nos docuit experientia inanem esse ejusmodi conatum; febris enim nihilominus validè urget, & statim refurgit temporibus; ideo autem non prodest, imò nocet vomitus febrilis, quia in febris invasione omnia constricta sunt, unde non potest rite expurgari ventriculus; instat solummodo irritatio, quâ sæpe incassum torqueri solet & subverti ejus motus.

Postulat igitur emesim arte concitatam morbi curatio; demonstratum est enim hepar imprimis laborare; colligitur in eo biliosum magma; sanguis in venæ portæ ductibus stagnat; & nisi huic stagnationi occurratur, erit ea cum biliosis succis veluti alius morbi fomes, qui facilè incandescet; non certius autem huic stagnationi & bilis congestionem occurrere possumus, quàm emetico medicamento; cum enim eo concitatur vomitus, hepar veluti in prælo est, & repetitis premitur succussionibus; pellitur ergo sanguis ex ejus vasculis, bilis in porum hepaticum & intestina adigitur, dein verò cum aliis succis in stomacho hærentibus per os rejicitur.

Hæc quidem succussio solius febris ratione tentari potest; sed eam prætermittere piaculum esset, si victus ægrorum lautior fuerit, si ingluviei aut crapulæ indulserint, si sordibus scateant primæ viæ, si hypochondria

chondria intumescant, si vexet nausea, si adsit oris amaror, si lingua spurcitie obducatur saburrosâ, si flatibus turgeat alvus aut ventriculus, si denique, quod nonnunquam occurrit, insurgant è putridâ colluvie vertigo tenebricosa, aliique capitis affectus.

Videtur imprimis necessaria emetici vis in certis febribus, aut earum certis constitutionibus epidemicis; ægri enim maximam bilis viridis, crassioris, & olei spississimi tenacisque instar, emittunt copiam; quod verò sanè mirum aut saltem magni momenti est, tantus occurrit hujus magnetis fomes aut proventus, ut unâ vice vomere multis fatis non sit; post parvum enim temporis spatium, ea prodit bilis copia, ut iterum concitato vomitu nil de eâ detractum videatur; quoties autem illius prostat ea redundantia, toties in limine adest febris; unde ali morbum eo recremento, alioquin ita necessario, variis probari potest argumentis.

Nec dubium profectò est, quin & in aliis partibus oriantur stagnationes; id ex frigoris febrilis vi, tum etiam ex inæquali & aucto dein circuitu sequitur; idem probant obstructions, toties intermittenti feбри succedentes; atqui ad promovendum liquidorum cursum, multum confert emetici medicamenti vis & actio; ejus scilicet stimulo solli-

sollicitantur nervi; iis autem vellicatis, & in motum actis, omnes vasorum fibrillæ per universum corpus motibus exagitantur reciprocis; urgentur ergo liquida, quæ in extremis vasis moram trahebant, aut quæ ad concretionem propendebant.

In memoriam præterea revocandum, validâ corporis commotione depelli aliquando febris fomitem; atqui concitato vomitu commovetur imprimis universum nervorum systema; induci ergo potest ea subitaque mutatio quæ toties profuit; hùc accedit, quòd multa sint quæ emetico educi possint, & quæ aliis non obsequantur remediis: virum vidi nobilissimum, qui post diuturnam febrem olidum densumque magma vomendo ejecit & paucos post dies restitui cœpit.

Confirmantur ea omnia aliis experimentis iisque innumeris, & primò quidem ita efficax est emeticum medicamentum in febribus intermittentibus, ut eo sæpe veluti uno ictu tollantur febres; si verò superstites sint, imminuitur earum vis; quod autem summi est momenti, aliis remediis tunc conceditur locus; remediis inquam, quæ incassum omnino adhiberentur, nisi præmissus esset vomitus, eoque universa corporis compages commota esset; in eo igitur imprimis posita est emetici vis, ut
febri-

febrifugis tutam certamque paret viam.

Hoc ita certum est, ut prætermisso emetico, rebelles omnino fiant febres & diurnæ; tunc verò, quod iterum validissimum est argumentum, non aliis remediis, quàm emesim moventibus eas aggredi licet; innumera me docuerunt experimenta non nisi exantlato vomitu, restitutionis spem aliquam elucescere; ita verò efficax mihi visum hoc remedium, ut in constitutionibus gravissimis eo præcaveri posse impendentes febres crediderim; nec quidem me fefellit opinio hæc; multos in eas inclinantes concitato, vel etiam repetito vomitu ab iis immunes servavi.

Quæcunque fuerit ægrorum ætas æquè proficuum observavi emesim; nec quidem in pueris ipsis formidandus tartari stibiati usus; docuit me experientia leniorem esse ejus energiam in teneriori, quàm in magis provectâ ætate; sæpissime tamen, ne terrorem incuteret hujus remedii usus, kermes minerale adhibui, idque feliciter. Cùm trium annorum puella febre tertianâ & certis temporibus quartanâ laboraret, me identidem remedium hoc exhibuisse memini; quoties autem vomitus fuit concitatus, toties per octo vel duodecim dies inducias obtinui; ita miseram hanc ægram febre excruciatam, & letho ferme proximam,
ab

ab autumno per hiemem ad æstatem usque deduxi ; tunc autem naturæ viribus temperatisque beneficio restituta est.

Sed emesis concitetur oportet hoc medicamento , aliisve similibus , quibus utilibuerit ; nam si in vias infernas , ut aliquando contigit , convertatur eorum vis , non æquè scopum attingent ; id observavi in multis ægris , sed imprimis in quâdam constitutione , in quâ per alvum ferri solebant medicamenta ; nam ex evacuatione intestinali , quantumvis copiosâ , non idem percipiebatur fructus , qui ex vomitu prodire solebat ; tali autem in casu ipecacuanham tartaro emetico anteferre mihi visum fuit ; eo certius subvertitur ventriculus & in ipso contenta expelluntur.

Si aliorum authoritate hæc confirmare necesse esset , peti possent argumenta ex variis Medicorum Scriptis ; necessarius est vomitus , inquit *Celsus* , omnibus qui ante febres horrore & tremore vexantur ; *Galenus ad Glauconem* plurimos solo vomitu perfectè curatos scribit ; *Paulus & Aëtius* similiter emesim laudant , & ei multum tribuerunt nonnulli posterioris ævi Scriptores ; inter eos *Riverius* eam magnis laudibus extollit ; juxta ipsum magis certam præstitit operam emeticorum vis quam quilibet aliorum medicamentorum usus ; pro-

fuit ,

Q

fuit, inquit, imprimis vomitus; si per tres dies quolibet mane cieri posset, at hoc non nisi in firmo viscerum robore, & cum summâ cautelâ tentare licet.

Sunt qui eâdem insistentes viâ ad asarum, ut ad sacram anchoram, in diuturnis febribus confugerint; nonnulli sale vitrioli eas fugârunt, ut apud *Jacotium* legere est; quidam aquam benedictam *Rulandi* cum successu non pœnitendo usurpârunt; alii denique validiora medicamenta, ut Mercurium vitæ & præcipitatum rubrum non reformidârunt.

Sed ita comparatum est humanum ingenium, ut nil ferme ratum fixumque haberi possit; opinionum incerto veluti fluctu actum, hâc & illâc in nova fertur commenta; inde repetendum hoc vitium, quòd Veterum vestigiis non insistant Medici, & quòd observationibus ex animali œconomiâ ductis eorum non nitantur tentamina.

Non imegissent in ejusmodi scopulos Medici, si ratione in remediorum usu ducti essent; necesse est ut concitetur vomitus, imò pluries aliquando tentandus; at à validioribus abstinendum emeticis; ex iis semper grave impendet discrimen, imò tertiana febris ex iis in prophylaxim assumptis exorta memoratur; at si leniora adhibeantur, nil usquam ex iis metuendum, nec,

nec, uti voluit *Sydenhamus*, opio quas ciedere solent turbas compescere necesse est; sedantur sponte omnia post emesim, unde narcotica inutilia sunt; sit præterea *canon* experientiâ comprobatus; bilis secretioni, quæ in febrium intermittantium curâ promoveri debet, adversa esse ejusmodi remedia; inde fortasse sit quod Turcæ iis abutentes in hydropem soleant incidere.

CAPUT VII.

De purgantium usu.

NON tamen hæc omnia ita dicta velim, ut sine emeticis nullam posse curari febrem credatur; absque iis tolluntur multæ vel desinunt; sunt quæ leviores sint, quàm ut tanto indigeant molimine; occurrunt præterea impedimenta, quæ huic remedio adversantur; ventriculus scilicet in multis ejus ferre nequit irritantem vim; nocet ea imprimis pulmone affecto; nocet & cachecticis, qui aliarum partium certis laborant vitiis; absconum denique esset, ægros toties emeticis vexare, quoties resurgit febris, cum in diuturnitatem abiit.

Cum verò incipiente morbo hoc invo-

care auxilium non licet, purgantia omit-
tenda non sunt; imò si emesi ventriculus
solummodo expurgatus fuerit, aut pauca,
ut sæpe fit, dejecerit alvus, sollicitetur ea
necesse est; ideo solent nonnulli catharti-
co - emetica in usum vocare; satius tamen
mihi videretur primò lene aliquod purgans
ingerere, postea verò, cùm incœpit demit-
ti alvus, emeticum exhibere; ita enim ob-
tinetur uterque desideratus effectus; expur-
gatio autem quæ per vias infernas institui-
tur, tam necessaria est, ut eâ non præmissâ
incassum sæpissime tententur alia remedia;
potest hic *canon* multis probari argumentis.

Statui primò potest in genere plethoram
quamcunque in febribus esse noxiam; ne-
cesse est ergo, ut quamprimum fieri po-
terit è tubo expellantur intestinali, qui in
ipso hærent, pravi putridique succi; eò
pluris facienda est hæc expurgatio, quòd
laxatâ alvo circumpositæ laxentur partes,
sanguis per vasa faciliùs circumeat, secre-
tionum & excretionum aperiantur viæ; bi-
lis ergo, quæ tantopere spectanda in febre
intermittenti, per colatoria sua faciliùs ela-
bitur; urinæ similiter, quarum proventus
tanti est momenti, per renes copiosius a-
mandantur.

Aliâ etiam, nec minùs proficuâ, donan-
tur vi, nonnulla quæ alvum expurgant;
non

non solum in intestina vim suam exerunt, sed verè aperientia sunt; hepar v. g. stimulant, & bilem ex eo educunt; ideo cum in hujus visceris textu hæret obstructio, præscribi solent laxantia, ut lapathi radix, tartarus vitriolatus, arcanum duplicatum; quin imò ut purganti quodam acriori acuatur eorum vis aliquando requiritur; hoc autem certis demonstratum est experimentis.

Ut propius autem ad febres intermittentes accedamus, certum est eas quibusdam purgantibus, non mitioribus quidem aut lubricantibus, sed iis quæ acrius stimulant, fuisse devictas; scammonium v. g. gratiola, pulvis Cornachini, pilulæ Quercetani de sagapeno, tartareæ Bontii, multis etiam quartanariis auxilio fuerunt; calomela Riverii cum jalappa, tum ejusdem authoris sennæ infusum cum sale tartari, idem præstitit; ego verò pulverem novi inconditum, qui innumeros restituit rusticos; componitur is ex scammonio, turbith, jalappâ, sennâ, cremore tartari, cum rheo, cinnamomo, & zinzibere.

At quæcunque sint eorum remediorum vires, ea præstat ut plurimum utpote aciora non experiri; noxia sint omnino oportet iis qui teneriori partium donantur textu; antequam innotesceret cortex peruvia-

nus purgantibus ejusmodi confidebat Medicorum vulgus ; at sapientiores unanimi consensu validiora , & sæpius imprimis repetita damnârunt , his contumaces evasisse febres & in hæcticas abiisse testantur ; nonnulli equidem , iique celebres , drastice usi sunt , sed correctis , levique manu exhibitis ; nil est quod certo præparatum modo non mitius fiat ; dosis præterea adeo levis esse potest , ut eâ infauti præcaveantur effectus.

Imò in certis casibus aliquid quod potenter naturam urgeat in usum vocari potest ; ita insolito motu peculiarem solidis partibus & liquidis induci posse mutationem certum est ; hunc in scopum haud dubiè *Riverius* , alias singularis prudentiæ vir , nonnulla feliciter adhibuit , quæ multis formidinem incuterent ; sed ipse aliique ejusmodi multùm abfuerunt ab insanâ methodo , aut potiùs *amethodo* , quâ continuis validisque evacuantibus exhauriuntur corpora ad impugnandam febrim ; si qui etiam non incelebres aliter senserint , eorum , licet aliquando felix , audacia in exemplum adduci non debet.

Eò potiori jure ableganda sunt purgantia validiora , quòd sufficiant quæ leniora sunt ad febrium intermittentium curationem ; non interea unâ tantùm vice , sed
sæpius

sæpius ad ea recurrendum in variis ejusmodi febribus, ut earum curationi certa sternatur via; id omnino necessarium v. g. cum turget bilis, cum putrida collecta est in intestinis cacochyliæ, cum denique intensior est febrilis motus.

Non minùs necessaria est alvi expurgatio aut laxitas in curationis decursu; certum est enim quòd si leniter, & quasi sponte succedat evacuatio, & si biliosa imprimis educantur, faciliùs tollatur morbi formes; confirmatur id multis quæ in variis observantur ægris; sunt v. g. quibus diu & absque ullo fructu exhibita sunt febrifuga; iis autem non succedentibus & fortasse non innoxiiis, si addantur laxantia, sæpe evanescunt febres: denique postquam eæ desiisse visæ sunt, si adstrictior fiat alvus, ut plurimum in limine prostare solent, nec alio averti possunt auxilio, quàm leniori adhibito purgante cum febrifugis conjuncto.

Adversatur id quidem receptæ apud multos opinioni; iis nimirum persuasum est piaculum esse alvum movere in curandâ febre; quin imò eam, cum desiit, statim resurgere asserunt, si exhibeatur purgans aliquod medicamentum; experientia in hujus rei testimonium à quibusvis fermè adducitur; sed quod ipsos in eam deduxit

opinionem , non eo nititur fundamento ; quod gravioribus rationum momentis nullâ ex parte disjici queat.

Certum est quòd siquando purgantia in febrium curatione eis vires addere visa sint , id errato cuidam tribui possit ; aut non præmissa sunt quæ præmitti necesse erat , aut ipsa bilis expurgatio neglecta est ; cùm verò turgere incœpit , evacuantia fortè calidiora , irritantia , aut imperfectè evacuantia adhibita sunt ; fieri etiam potuit ut cum iis febrifuga non conjungerentur , aut morbo impar esset eorum dosis ; non mirum ergo si febris increbrescere visa sit ; sed Medici , non verò purgantium , culpa incusanda est.

Quòd verò spectat eas febres quæ jam desierunt , & quæ curatæ videntur , potest , ut diximus , diu latere febrile venenum ; potest & idem colligi tacitè , & quasi vires recipere : tunc autem si intempestivo aliquo medicamento exagitetur corpus , non mirum si febris quæ siluerat , aut quasi in limine præsto erat , inexpectatò erumpere possit : non se exeruisse profectò venenum febrile , si rite esset impugnatum ; imò si purgantia cum cautione adhibita essent , veneni illius fomitem penitus expulissent ; potuissent ergo deinde absque ullo recidivæ metu in usum vocari.

Nec

Nec quidem ab his præceptis nos dimoveri oportet, licet aliter senserint viri clarissimi; mirum equidem sapientissimum *Sydenhamum* opinionem fovisse purgantibus adeo adversam; vel levissima, inquit, catharsis, imò enema è lacte saccharato in morbi discrimen, quin etiam in morbum ipsum denuo ægrum conjicient; at experientia, cum eâ opinione non consentiens, à tanti viri sententiâ me discedere coëgit; ei impugnandæ eò magis incumbere operæ pretium duxi, quòd apud Medicorum vulgus invaluisse videatur.

Eò minùs profectò huic sententiæ tribuendum est, quòd certum sit ipsum *Sydenhamum*, licet à catharsi ita abhorrentem, aliàs tamen, penitus depulsis febribus autumnalibus, eam enixè commendasse; tanti huic momenti videbatur alvi expurgatio, ut ex eâ omissâ periculosum quemdam impendere morbum prænunciare non dubitârit; id sibi curæ tantummodo inesse profitebatur, ne ante certum tempus exhiberentur purgantia; non nisi scilicet post elapsum mensem hæc tentanda esse existimabat, eaque semel quâlibet die octavâ.

His tamen, quæ per duos tresve menses præcipit, potuisset omnino parcere, si inter curandum laxata fuisset alvus; non
fuit

fuit ferme usquam mihi necesse, post febres jam devictas, purgationi incumbere; non observavi quod celeberrimus monet vir, eâ tunc temporis neglectâ urinam rubore suffundi, flavedine infici oculos, foribus scatere linguam, appetitum dejici; hæc non solent occurrere, nisi cum adhuc vigent febris semina aut obstructions inde exortæ; possunt profectò ea præcaveri, si alvi laxitate inductâ aperiantur secretionum & excretionum fontes.

Sed veluti quodam contagio menti instillatur error, & vires eundo acquirit; ita *Sydenhami* prima effata à purgantibus, post abactam febrim adhibendis, Medicos amoverunt, ut eam vel celeberrimi viri quasi in limine sibi fingant, si tentetur quælibet alvi expurgatio; imò id sibi experientiâ ratum fixumque esse asserunt; aliud tamen, ut jam diximus, suavit ea ipsi *Sydenhamo*, multisque ipsum instar oraculi habentibus; experientia ergo in quorundam ore nil aliud sæpe est quàm opinionis alio sub nomine à vero aberrantis judicium.

CAPUT VIII.

De aperientium usu.

LICET tamen tanti sint momenti purgantia, non inde sequitur, nullam esse febrem quæ absque iis curari nequeat; at quid ut plurimum eveniat semper spectandum, nec quibusdam exemplis ab iis quæ frequentius occurrunt averti licet; atqui, ut diximus, in universum necesse est ad purgantia confugere in febrium intermittentium curatione.

Sunt casus interea, in quibus minùs quàm in aliis prætermitti possit alvi expurgatio; si febres v. g. in diuturnitatem abierint, si alvus sit tumida, aut nimium adstricta, si bilis per cutim sparsa, si urinae sint crassiores aut rubrae, si adsit cachexia ex obstructionibus orta; si, inquam, hæc ita se habeant, febrifuga specifica dicta nullius sunt momenti; curationem iis assequi non licet, nisi prius pravorum succorum effluxu sublata fuerint impedimenta.

Ut tamen tollantur ii succi non sola sufficit alvi expurgatio; referanda sunt variarum partium claustra, aperiendæ nimirum
fe-

secretionum & excretionum viæ, restituentis motus stagnantibus liquidis, iis fluiditas concilianda, bilis denique in suos ductus, & in intestinorum cava revocanda; recurrendum est igitur ad diluentia, aperientia, refrigerantia, saponacea, iisque, ut alvum leniter laxent, addendum aliquod purgans.

Mirum profectò quantum possint succi herbarum depurati in obstructa abdominis viscera; patet id ex viribus herbarum viventium in animalium corpora; purgantur & macilenta fiunt verno tempore, in circuitum aguntur eorum humores, & per alvum mutati secernuntur; eadem autem præstare potest Medicus, si aperientibus & deobstruentibus addatur purgans stimulus, levis tamen, & qui tantummodo alvum movere queat.

Maximè autem proficua observavi juscula purgantia ad referendas hepatis vias; ea, ut plurimum, ex lapatho silvestri, cichorio, scolopendrio, aliisque id genus, confici curavi; at semper addidi sal quoddam alvum movens, ut sal Glauberi, arcanum duplicatum, vel crySTALLI mineralis certam dosim; nihil erit in eorum jusculorum usu quod desiderari possit, nisi insuperabilia adsint impedimenta; sed nunquam scopum attingent talia juscula, nisi alvum bis
terve

terve quâlibet die moveant.

Non solum necessaria sunt laxantia hæc & aperientia, in iis quæ in diuturnitatem abierunt, & quæ obstructionibus foveantur, febribus; aliæ sunt quæ incipiunt, aut non diu excurrerunt, in quibus in usum vocanda sunt eadem remedia; occurrunt scilicet nonnullæ quæ magnâ vi urgent, æstu summo in iis torrentur viscera, hepar imprimis impetitur; bilis intensè flava est aut viridis; omnino fœtida est alvi dejectio; urinæ rubræ sunt aut lateritiæ, hæc autem omnia obsistunt febrifugis, & nisi ad ea quæ leniter secretionum excretionumque vias aperiunt deflectatur curatio, vix frænari poterit febrile venenum.

Mihi autem in usu non infelici fuit ejusmodi ægros per hebdomadam, imò & diutius, aperientibus, laxantibusque addicere; aliis succos cichorii, borraginis, & buglossi cum sale Glauberi aut crystallo minerali præscripsi; aliis verò juscula ex iisdem herbis aliisve, cum tartaro vitriolato; fuerunt denique nonnulli in quibus feri lactis vires summè proficuas expertus sum; est in eo herbarum succus, in animali officinâ paratus, & veluti decoctus; est & in eodem salium vegetabilium vis, quæ aliquando alvum valde expurgat.

Nusquam ferme spem fefellit hæc metho-

thodus; ita certa mihi visa est, ut quoties mihi in pertinacem febrim incidere contigit, toties ad ejusmodi remedia, aut ipsis similia devenerim; quin imò tanti hæc facienda mihi videntur, ut sæpe, si per ægros moræ impatientes liceret, non dubitarem post generalia remedia in aperientium usu per aliquod tempus immorari; ita facilius febrifugis pararetur ingressus & effectus; imò & mihi dubium non est, quin sæpissime inutile foret ea in auxilium vocare.

Aliud est remedium cui non minùs confiderem, si non ita repugnarent ægri; expurgatâ nimirum alvo, eos aqueæ diætæ per tres quatuorve dies addicerem; at per id tempus ab omni alio potu ciboque his interdictum vellem; aqua sola tunc affatim ad libras sex vel octo aut amplius quâlibet die hausta omnem ferme tolleret febrem; calidam quidem anteferendam puto, frigida tamen per æstatem idem præstitit; rarò fallit methodus hæc; eâ febres contumaces quibusvis aliis remediis frustra impugnatas sustuli; siquando ex iis aliquid remanserit, levi operâ aut solius naturæ auxilio deleri potest.

Quid præstare possit euporiston illud remedium patebit ex duabus observationibus quas hîc referre operæ pretium duxi; erat
puella

puella decennis diuturniori laborans febre, quæ verè marasmodies intermittens dici poterat; cùm remedia viderentur huic vires addere, & omnia in pejus ruerent, aquam experiri visum est; eâ autem affatim assumptâ per tres dies continuos, omnique semoto alimento, evanuit omninò morbus, ex quo tantum impendebat discrimen.

Non minus intentabat periculi in quadragenario febris admodum contumax; hæc à veris initio ad mediam æstatem progressa graviùs in dies urgebat; cortice peruviano exasperari nec quidquam opis aliunde expecti posse videbatur; cùm autem jam penè confectus jaceret æger, aquæ vires tentare non dubitavi; nec profectò hujus me poenituit tentaminis; nam intra breve tempus sublatis sunt paroxysmi, & licet accedente autumno, eorum nullum prodiit deinde vestigium.

CAPUT IX.

Quonam tempore exhibenda sint modò dicta remedia.

RELIQUUM est ut expendamus, quonam tempore usurpari debeant remedia hæc ? & primò quidem tum in paroxysmo, tum in intermissione mitti potest sanguis ; in paroxysmo quidem ad febris, symptomatumque ipsius urgentem vim infringendam ; in intermissione verò ad prophylaxim, ut scilicet proximi insultus leviores sint, & ut via aliis sternatur remediis.

Hæc quidem vix præceptis indigent ; sed eò processit certorum hominum audacia, ut in frigore febrili venam secare ausi fuerint, quod sanè absonum & periculosum ; cum enim deprimitur pulsus aut ferme delitescit, cum vix circuit sanguis, cum spiritus vitalis obrui videtur, quid ex sanguinis missione sperandum ? an sine periculo in senioribus tentari poterit, cum aliquando in rigoris horrorisque vi animam agere videantur ?

Non tamen negari potest, quin nonnullis,

lis, imò & plurimis, profuisse visa sit methodus hæc à ratione ita aliena; sed in febrium intermittentium curatione quid memorari potest quod aliquando non successerit, & quod quidam ut certum auxilium non venditârint? repugnante tamen ratione & plerorumque experienciâ; insanum esset aliquod tentare remedium; præterea non sola venæ sectio in febrili frigore tentata opem tulisse ut plurimum dici potest; alia enim simul in auxilium vocari solent, ut emetica, purgantia vel febrifuga.

Non magis opportunum est frigoris tempus ad alia evacuantia remedia; ea imprimis quæ certâ vi agunt, non innoxia sunt; non potest ergo tunc tentari emesis, licet vomitu spontaneo & nausêâ videatur indicari; non perinde hîc se res habet ac in eo vomitu qui humorum concitatur affluxu, vel acrimoniâ; nam irritatione nervis inductâ, hepatisque affectu subvertitur in frigore febrili ventriculus; contrahitur hic ut cæteræ partes; non obsequitur ergo remediis ut in apurexiâ; anxietates tantùm & dolores acerrimos inferre possunt emetica & purgantia, nec quidquam ex viscerum colatoriis nimiùm constrictis possunt educere.

Fatendum tamen aliquando successisse emetica; vomitus, inquit *Riverius*, initio

R

paroz

paroxyfmi concitatus, hunc mitiorem breviorēque facit; fuit inter recentiores Medicus Anglus, qui per viginti annorum praxim emefim initio frigoris movit; fi vetarent tremores nimii, calore incipiente idem solebat moliri; non abfimile quid tentaverat olim *Asclepiades*; *Celfus* fapientior, tepidam folummodo aquam fubfalfam, ut vomere cogeret, exhibebat; nihilominus ventericuli fubverfio quæcunque, nifi per aquam calidam folam, formidanda eft.

Sydenhamus, qui remediorum vim & effectus tantâ obfervavit diligentia, vomitum quidem concitabat, fed ita ut, inquit, negotio fuo defungi poffet emeticum ante paroxyfmi adventum; tantum abeft ut incipiente febre tumultum in vifceribus proficere poffe crederet, ut leviozem narcotici cujufdam dofim, poft exactum vomitum & immediatè ante infultum commendaverit; utrumque tamen & fapienter quidem prætermitti poteft.

Purgantia non minùs temerè adhibuerunt quidam in febrili frigore, aut etiam, quod non innoxium, incipiente calore; non intellexere, aut intelligere noluerunt constrictis frigore partibus, aut calore motuque exagitatis, non poffe laxari alvum, & fummas irritantibus pharmacis excitari turbas; fapientius illi fe gesserunt, qui ante
paro-

paroxyfmi adventum talia exhibuerunt medicamenta ; fed non quatuor horas ante ipfum , ut quidam voluerunt , tentetur oportet alvi expurgatio ; ſex imò & octo horis antecedit oportet purgans medicamentum ; ita profectò proficere quandoque poterit , ut variis conſtat exemplis : notarunt v. g. quidam ab exhibito pulvere cornachini , certo ante acceſſionem tempore , ſublatam eſſe febrim.

Ita abſuerunt olim à purgantibus in frigore febrili ſapientiores Medici , ut calida potiùs uſurparent ; fuere qui piperis grana tria , aut ſex , imò duodecim exhibere non dubitârint ; alii ad theriacam confugerunt , eâque ſublatam febrim memorant ; hoc quidem quin aliquando ſucceſſerit negari non poteſt ; ut plurimum tamen miteſcit ſolummodo frigoris vis ; cùm in epidemiâ , ex locis paludofis ortâ , intenſiùs ſæviret , non alio id pòterat coërceri remedio ; hoc igitur omnes ferme ægri , cùm algere inciperent , in auxilium vocabant , inde profectò aliquod percipiebatur levamen , & nihilo minus contumax febris eodem procedebat grefſu.

Nonnulli etiamnum calida & frigida ſimul præſcribunt in eundem ſcopum : Medicum novi qui lilium Paracelfi cum cortice peruviano exhiberet , nec fuiſſe aſſe-

reret ubi ejusmodi tentaminis pœnitere posset; ego verò cùm in ægros incidissem qui ejusmodi remedia adhibuerant, si quando depulsas iis febres observavi, sæpius eas exasperari, urentem concitari calorem, partes principes affici, iisque inuri labem, mihi videre licuit.

Non equidem statim videntur hæc rationi æquè adversa, ac purgantium aut emeticorum in frigore febrili usus; cùm algent horrentque omnes partes, calida potius proficere posse verosimile est, sed non minùs ableganda sunt, si imprimis acriora sint, febrilis motus iis, ut diximus, intendi tantummodo solet; si vacillet tamen vitalis spiritus, & summa urgeat frigoris vis, ad cardiaca devenire licet.

Si quædam exhibere per febrile frigus licitum esset, maximè ea quæ nec acria nec calidiora sunt; erat quidam qui à quatuor aut quinque annis febre laborabat quartanâ; nocere potius quàm levamen afferre videbantur quæcunque febrifuga; cùm autem desperata videretur ægri restitutio, ecce arcanum quod à quodam Medicinæ prorsus ignaro obtruditur; argenti scilicet ægro exhibetur acetosæ succus ad uncias octo; atqui hoc remedio bis assumpto deleta sunt contumacis febris omnia
vesti-

vestigia; haud equidem in exemplum, quod sequi certò possimus, hanc medendi rationem tradi velim; id tantum probare mens est quædam esse mitiora tentamina adversus febrilem algorem, quæ purgantibus & calidioribus anteferenda sunt.

Non solum expurgandum non est corpus, aut calidioribus urgendum medicamentis in febrili frigore; sed è contra nil ferme moliendum; sola aqua calida ingerenda, aut exhibendum in eâ cardiacum aliquod temperatum; nec plus quidem movendum in calore insequenti; quæcunque enim calida & evacuantia noxia erunt; acida aut acescentia potius febrili ardori sunt accommodata; imò sola aqua sufficiet, & tunc imprimis, cum undequaque diffluere incipient sudores; ita per os restituetur liquidum, quod per cutem exhalat, & crassiores diluentur humores.

Quò tamen melius admisceatur sanguini aquosus potus, syrupum quendam, ut syrupum violarum, imò syrupum corticum citri, aut vini rhenani aliquid, ut reficiatur corpus, addendum censeo; non aliter profectò promovendi sunt sudores paroxysmum excipientes; si enim cogantur & copiosius diffluant, noxii erunt, ingravescet febris, & in continuam abire poterit.

Videtur quidem primo aspectu eos à na-

R 3

turæ

turæ ductu non ita esse alienos; ex iis enim insigne quandoque percipitur levamen; mitescit & diffatur tandem paroxysmorum vis; at nihilominus remanet mali fomes, nec certò liquet eum posse exhaustiri copioso per cutim effluxu; è contra autem dubitari nequit quin eo exundante exhaustantur corporis vires, quin stragulis congestis, vel potu calidiori aut acriori hausto, major excitetur incandescencia; quin denique cum aqueis liquidis simul avolent nutritiæ partes, & adigatur ipse in minora vascula; non succedit in genere sudoris effluvium, nisi cùm naturâ ducente expelluntur noxii succi & ad secretionum amandantur vias.

Talis erat haud dubiè naturæ conatus in febribus vernalibus, de quibus egit *Sydenhamus*; solvebantur eæ diaphoresi in paroxysmorum exitu diu promotâ; at in universum res ita non succedit; sapientissimè ergo monet idem author, non posse fieri idem tentamen in febre autumnali vel epidemicâ; altiùs infixâ est ejus causa, vel acrior, ideoque difficiliùs expugnatur; si ergo reluctante naturâ, aut eâdem non obsecundante eliciuntur sudores, in certum discrimen adducentur ægri; unde si leniter indulgendum huic évacuationi, eâ invitâ urgenda non est; non prodest quod ad eam
pro-

promovendam exhiberi poterit, nisi adfit crisi præfixum tempus; in illud observandum enixè studium conferebant veteres; ita facile quibusdam purgantibus vel sudoriferis febres curari posse, nec quidem immeritò, existimabant.

Inde autem patet quid de variis curationibus, quæ vulgi applausu celebrantur, censendum sit? fuit nonnunquam ubi ægri, mitescente paroxysmo, aut eo urgente, stragulis obruti, impensè diuque sudârint, atque febre pertinaci liberati sint, nonnulli similiter sudoriferis calidioribus memorantur restituti; præsto autem tunc aderat naturæ curationem molientis conamen, eâque obsecundante extorti sunt proficui sudores; potuit etiam fieri ut periculosâ de quâ egimus inductâ mutatione, se proripuerit morbus; unde hæc statim occurrit quæstio, num in discrimen, quod casu aliquando successit, conjici possint febre laborantes, ut eâ liberentur?

Quod aperientia spectat, ea vix præceptis indigent; possunt quidem quovis tempore exhiberi quæ lenia sunt; ptisana v. g. ex gramine & nitro, aqua succo limonum imbuta & saccharo edulcorata, multum conferent in ipsa febris vi; non minùs conducent borraginis aut buglossi leve infusum aliaque ejusmodi; at quæ

certâ donantur vi, & tollendis obstructi-
onibus dicata sunt, ea nonnisi exacto pa-
roxysmo in usum vocari debent; imo ex-
pectandum donec emesi aut laxantibus ex-
purgata fuerit alvus; id saltem febrium ini-
tio servandum præceptum; cum verò eæ
in diuturnitatem abierunt, aut in ipsas reci-
dunt ægri, ut immutatur morbi facies, ita
immutanda est remediorum exhibendorum
methodus; at de eâ alius erit agendi locus.

In genere autem ut omnia hæc paucis
verbis comprehendam, tanti sunt momenti
ejusmodi remedia, ut, si rite adhibeantur,
iis febris curari possit; certum ratumque
sit, ut jam diximus, arcanam crisim à na-
turâ semper parari; unde, si ei sapienter
opituletur medicina, expelletur febrile ve-
nenum; certis mihi constat argumentis id
per alvum, per sudoris spiracula, aut per
urinæ vias, veluti sponte, non rarò exces-
sisse; hinc sæpe quorundam remediorum,
quæ his favent excretionibus, adeò inexc-
pectatus effectus; inciderunt nimirum in id
tempus quo imminebant critici motus; me-
mini v. g. hominis qui febris tertianæ ali-
quot passus erat accessiones; is cum, post
accuratam diætam, levissimam assumpsisset
tartari stibiati dosim, non vomuit quidem,
sed quindecies placidèque alvum demisit,
& febris deinde omnino expers fuit; simi-
liter

liter eam in aliis judicatam observavi per sudores protractos qui paroxysmos excipiebant, talis est sæpe vernalium intermittentium exitus; autumnales verò difficiliùs tardiusque ita solvuntur &c.

CAPUT X.

De remediis peculiaribus seu febrifugis propriè dictis, quæ emetica, vel purgantia, vel sudorifera sunt.

REQUIRUNTUR tamen ut plurimum ad febres expugnandas alia remedia magis propria, ea scilicet quæ eas specificis aut peculiaribus viribus possint abigere; ab omni ævo conquisita sunt ejusmodi medicamenta, eaque inventa esse, cùm tamen deessent, multis persuasum fuit; nihil verò non tentârunt Medici in eâ inquisitione; egimus jam de emeticis & purgantibus; in iis certam posuerunt spem quidam, nec ii quidem incelebres, imò hæc ipsa aut quædam ex iis selecta pro arcanis venditata sunt.

Ea quidem, ut diximus, multùm ad februm intermittentium curationem conferre possunt, sed ei potiùs viam sternunt; equidem

dem cùm tale sit earum febrium ingenium, ut motu subito aut subitâ motuum naturalium mutatione tolli aliquando possint, fieri profectò potest, ut emeticorum & purgantium operâ eliminentur; præterea ita potest comparatum esse corpus, ut post ventriculi subversionem, aut demissâ alvo, perfectè restituantur partium functiones; tunc autem quâdam veluti crisi, & quasi uno ictu excerni potest febrile venenum; at casu hæc ita succedunt; feбри propria aut specificè dicata non sunt remedia hæc evacuantia, neque per se causæ febrili adversa.

Hæc tamen licet in genere vera sint, de omnibus dicta esse nolim; potest adversus febrem peculiaris inesse vis in quibusdam, quæ emesim movent alvumque expurgant; quod emetica spectat, negari non potest v. g. quin ea quæ ex antimonio parantur, plura quam quæcunque alia adversus febres intermittentes præstare possint; ideo aqua benedicta Rulandi, infusio croci metallorum, mercurius vitæ correctus, ut vera earum antidota à tot scriptoribus venditantur; non solummodo vomitum concitando, sed peculiarem vim febrifugam exerendo operam præstant.

Probat id diaphoreticum minerale, quod toties profuisse certum est: novi equidem quod quidam Chemici remedio ejusmodi
nil

nil aliud inesse dicant nisi inertem calcem & indigestibilem; sed num purgantium intendit vim? num in pulmonum infarctu multum potest? num certa ejus dosis alvum movet? num si in aquâ ebulliat cum cremore tartari inde exsurgit purgans certissimum?

At probatur imprimis antimonii vis febrifuga *Riverii* antiquatio, quod juxta ipsum & *Jacotium* tantopere commendandum; ambigitur quidem de hujus remedii naturâ, sed statim certum videtur aliquid duodecies sublimatum in eo præscribi; nam, juxta Authoris descriptionem „ componitur nobile hoc medicamentum ex triplici Hercule duodecim laboribus ad nobilitatem evecto; “ atqui iis verbis nihil aliud innui potest, præter mercurium dulcem sive aquilam albam: non minùs certum videtur cum eo mixtum fuisse antimoniale aliquod medicamentum, cum vomitum, monente *Riverio*, concitare nonnunquam soletet ipsius febrifugum; idem innuit viri ejusdem sapientissimi metus, ne innotescat arcanum ejusmodi; antimonium enim his temporibus, non solum malè audiebat, sed ut venenum habebatur: ideo ambiguè indicatur sub *athletæ novi* nomine; *athletæ*, inquam, qui mercurio in operis complementum additur,

Hoc

Hoc verò medicamentum nil esse nisi mercurium vitæ statui potest; alia enim quæ ex antimonio comparantur videtur respuere *Riverius*, & mercurii illius vim infringendi methodum accuratè tradit; si ad ignem, inquit, exhalet, donec fumum emittere desinat, mitescit omnino, & vomitum vix ciere solet.

Fuerat hoc *Petri Fabri* arcanum, licet alio modo adversus quartanas febres concinnatum; id ex ejus Authoris, Medici item Monspeliensis, *Myrothecio Spagyrico* mutuum accepisse *Riverium* crediderim; propiùs tamen accedit ad ejus antiquarium quod in *Hartmanni* scriptis traditur arcanum; is scilicet mercurium vitæ cum aquilâ albâ miscere non verebatur.

Mitior similiter juxta quosdam fit tartarus stibiatus, si una ejus pars & mercurii dulcis duæ partes supra porphyritem terantur, & calore solis exsiccentur; debet autem repeti triturationio & exsiccatio, donec ad perfectam albedinem devenerit pulvis; deinde verò digeratur oportet in spiritu vini ad eminentiam duorum digitorum superaffusi, & tandem igne arenæ exsiccet.

Quidquid autem de iis statui possit, certum est remediis antimoniatibus adversus febres egregiam esse vim; prostat *orvietani* cujusdam species, cui antimonii vitrum in polli-

pollinem redactum immiscetur; atqui eo innumeras febres tutò citòque curatas novi: & profectò quantum possit ejusmodi remedium ex ejus agendi ratione perspicitur; granis aliquot movetur perspiratio; majori dosi demittitur alvus, eâdem auctâ concitatur vomitus; idem præstat ejusdem profapiæ remedium, quod à Medico Parisiensi olim paratum Regiis impensis per varia mittitur loca.

Ut verò antimonium, ita & mercurium; ei in arcano jam memorato conjunctum; febrifugis donari viribus apud multos dubium non est: eas celebrarunt *Ettmullerus*, *Willisus*, & ipse *Hoffmannus*; hoc sæpe medicamento, variè præparato, & per os assumpto, pertinaces febres, & quartanæ imprimis, feruntur sublata; ego quidem experientiâ propriâ id confirmare aut impugnare nequeo: quendam tantummodo novi qui, pulveris cujusdam operâ, febres intermittentes, prope maris littora, in locis uliginosis, curabat; erat hic pulvis juxta nomen ipsi inditum, *calomelanos* species; seu potius *panacea* quædam ex mercurio dulci plusquàm quindecies sublimato.

Multò minùs verò de frictionibus, quibus sufflaminatum fuisse dicitur febrile venenum, decernere ausim; si quibusdam tamen, nec profectò indoctis, habenda sit fides,

fides, multi venereo morbo & simul febre intermittenti laborantes, ex utroque affectu, illiti mercurii operâ evaserunt; negari tamen nequit in mediâ salivatione febrim ejusmodi aliquando subortam esse, eamque cum ingenti omnium humorum, qui ex universo corpore evocabantur, effluxu ad ultimum usque excurrisse stadium; sed ad purgationem redeamus alvinam, & aliquando in febribus veluti specificam.

Ex vegetabilibus depromptum mihi innotuit purgans, apud nos per multos annos non incelebre, & non parvo emptum pretio; tithymali scilicet linariæ folio derafa cuticula leni igne exsiccat, & dein in pulverem redigitur; hic autem pulvis ad scrupulum unum exhibetur, eademque per aliquot insequentes dies ingeritur dosis; quidam in tabellas illum concinnârunt, & lacti infusum mitiorem evadere crediderunt. Observandum interim variam omnino fuisse hujus medicamenti fortunam; ex Italiâ advectum in Galliam statim variis inclaruit curationibus; deinde verò, cùm in oblivionem venisset, in usum iterum revocari cœpit; quidam, jussu Regio illud experti, nil animadverterunt quod pristinae ipsius famæ responderet; vim drastricticam insuper non satis fractam reformidârunt; alii tamen, iique non pauci, ejusmodi remedio subla-

sublatas esse in Nosocomiis febres testati sunt; unde aliquam adversus eas illi inesse vim negari nequit, ancipitem tamen, & ideo à cautiore Medico alienam.

Prostat ejusdem profapiæ remedium, quod arcani instar venditur; ipsius autem vires gummi guttæ imprimis debentur; nec id profectò rusticis, aut firmiori viscerum robore donatis exiguam præstat operam; innumeros contumaci febre laborantes perfectè restituit, nec quid detrimenti attulisse queruntur qui eo uti ausi sunt. Ut autem præcaveantur quæ ex ejus gummi usu impendere videntur viscerum perturbationes, infringenda est ejus vis; quod facile omnino assequi licet; sapone enim temperatur, uti & æthiope minerali; imò & formidandâ aliàs acrimoniâ exui potest solius mannæ beneficio; si enim hujus unciis duabus addantur gummi ejus grana quindecim aut viginti, non ita drastrictum inde exurgit medicamentum, sed optimè purgans & innocuum: hydropicis saltem id sæpe, nec sine fructu, audacter exhibui; in febre verò intermittenti grana aliquot cum succo glycyrrhizæ, cum sapone, & tartaro vitriolato trita, usurpare satis erit.

Est aliud purgans mitius, quod fuit quorundam arcanum, cremor scilicet tartari ad unciam unam per dies aliquot mane exhibitus;

bitus; hoc ei peculiare inest, quòd simul refrigeret, alvum moveat, & putredini adverteretur; unde non contemnendum medicamentum esse censuerim in febrium initio, si autem non ubique successerit, hoc habet commodi, quod illius vi solutâ alvo & refrigeratione inductâ per certum tempus, levi remediorum, quibus majores insunt vires, dosi & operâ, faciliùs se subducant febres & difficiliùs reviviscant.

Idem dici potest de arcano duplicato *Mynsichti*, qui eo plures fugavit febres, cùm alia incassum fuissent tentata; eodem ego remedio feliciter nonnunquam usus sum; refrigerat, purgat, aperit, bilem peculiari modo corrigit, & tandem referendis hepatis claustris aptissimum est; unde inter febrifuga non infimum tenere locum statui potest; febribus tamen verno tempore potius quàm autumno grassantibus aptius videtur; hisce omnino debellandis ut plurimum impar est, nisi fortè strictiori diætâ salis illius adjuvetur usus, isque diutius protrahatur; nihilominus tamen sæpe fallit; at quod magni momenti est, aliorum febrifugorum vires egregiè solet intendere.

Ejusdem censûs est Riverii febrifugum ex sale absinthii & spiritu sulphuris confectum; exsurgit inde sal præcedenti non multum

multum diffimile, ut ex Chemiâ patet, falsum genesis attendenti; sed longè alias vires tribuerim magnesiæ albæ, quæ nonnullorum febrifugum est; hoc tamen habet incommodi, ut ubique eadem non proftet; nihil est plerisque in locis, nisi terra iners, sive id ex præparatione, sive quod potius crediderim, ex diversâ eorum ex quibus nitrum extrahitur naturâ.

Quidquid sit, præstantior est magnesia Massiliensis; ad eam proximè accedit Leodiensis; utraque autem aquæ largiori quantitate diluta operari solet; nonnunquam tamen cum cremore tartari mixta commodè & feliciter præscribitur; novi Medicum qui eam vino albo ad supereminentiam quatuor aut quinque digitorum per noctem infundebat; manè autem decantatum vinum pro purgante exhibebat, eoque ipse utebatur.

At licet egregia præstent aliquando ejusmodi medicamenta, non tamen iis in plerisque febribus licet omnino confidere; fallunt hæc sæpissime aut non nisi ad tempus febrim tollunt; nosse tamen ea magni interest, ut cum melioris notæ febrifugis conjungantur, vel ut in eorum vicem aliquando substitui possint; sunt certa temperamenta & certæ febres abnormes, quibus ejusmodi remedia aptiora sint; suppellecti-

le ergo oportet instructus sit Medicus, quâ naturæ diversis in casibus possit opitulari.

Quæ de emeticis & purgantibus jam diximus, de sudoriferis dicenda sunt; quibusdam ex iis ad expellendum febrile venenum vires esse insignes multis persuasum est; neque profectò negari potest quin multa aliquando, eaque egregia præstiterint; at nulla ex iis vera febris antidota dici merentur; ne in theriacâ quidem est talis vis, licet ei tantum tribuerint Veteres; quousque autem tali remedio credi possit patet apud ipsum *Galenum*; observavit enim eo adhibito, simplicem quartanam in duplicem, imò & triplicem abire; idque *Eudemo* philosopho contigisse memorat.

Quod in encomiis talium remediorum apud Medicos periculosum est, laudata sunt ab iis multa non innocua; in bezoartico Joviali v. g. egregiam latere vim adversus febrem multi asseruerunt; at difficilis est omnino ejus medicamenti præparatio; si quid in eâ peccari contingat, noxium omnino esse potest; præterea non tam insignes, ac creditum est, sunt ejus vires, ut mihi propriâ constat experientiâ; mallem profectò *diaceltateffon Helmontii*, quod nobile remedium est; non tamen illud ut certum febrifugum haberi velim.

CAPUT XI.

De aliis remediis vi quâdam arcanâ vel specificâ agentibus.

AD alia, quorum dotes & vires omnino diversæ sunt, & quæ feбри intermittenti magis videntur propriæ, deventerunt Medici; subolfecerunt vel ipsi antiquiores in amaris latere vim febrifugam; ideo gentianam, chamædrys, marrubium, centaurium minus, trifolium fibrinum, imò & aloëm ipsam experti sunt multi, idque sæpissime non infeliciter; centaurium minus imprimis laudarunt, sed eo summum excitari æstus, ipsumque feбри vires addere non rarò observavi; negari tamen nequit, quin cortici peruviano additum multum aliquando profuerit; sustulit enim febres aliis non obsequentes remediis; quin imò, si decoctum ejus præmissis præmittendis cum laudano liquido Sydenhami vel cum camphorâ exhibeatur, multa fertur præstitisse; idem proditum est de infuso florum genistæ: At neque cum narcoticis solum, aut cum camphorâ adhibitum centaurium minus prodesse potest; liquet mi-

hi ipsum cum aliis conjunctum adversus multas febres in usum vocari posse; misceatur v. g. cum tartaro vitriolato, aut, quod omnium instar est, cum pulvere temperante Stahlii; superbibatur calidum borraginis & cichorii infusum, dubium non est quin ita non contemnendum comparetur febrifugum; tutior autem & magis certa erit ejus vis, si remediis generalibus ei strata fuerit via, si absit viscerum fervor nimius, si in iis nulla sit labes, si per quoddam tempus excurrerit febris &c; non interea tantæ viderentur adhibendæ cautiones, si certa spectarentur exempla; quamplurimi curantur rustici centaurii minoris decocto, vel cum absinthio, vel cum cichorio; primum acrius est, aliud verò magis temperatum ideoque anteferendum.

De aliis amaris nil est quod dicam; incerta quædam aut quandoque non innoxia sunt; hoc v. g. gentianæ non immeritò exprobrari potest, cùm ipsi acrior insit amarities, & calorem intendere soleat; quod verò aloëm spectat non minùs, in certis præcipuè temperamentis, formidanda est ejus acrimonia; observatum tamen hieræ picræ species cum cortice peruviano conjunctas, & cum syrupo absinthii in bolum redactas adversus certarum febrium pertinaciam magno fuisse adjumento, idque imprimis

primis in firmiori donatis viscerum robore.

Ut ejusmodi medicamentorum vires accuratius æstimari possint, observare est febrile venenum ita quandoque partibus infixum hære, ut vix de loco seu fomite dimoveri possit; si ergo ad febrifugorum quorundam vires accedat vis penetrans, stimulanſque, tum vasorum extremos ductus referans, poterit inde percipi multum opis; ideo cùm præstantioribus remediis non cessissent febres, amaris, de quibus jam egimus, expugnatae sunt; mulierem vidi in condito absinthii, centaurei minoris, chamæmeli salicariæ decocto, incassum diuque tentatis aliis omnibus, perfectè fuisse restitutam; at in ancipiti eorum remediorum usu summâ prudentiâ opus est.

Quod verò non magis à februm curatione alienum videtur, multi adstringentia ut febrifuga habent; alii alumen vel solum vel cum nuce myristicâ, alii verò plantaginem & pentaphyllum exhibuerunt.

In alumine profectò adversus febres quædam latet vis; hoc enim aquâ solutum non infeliciter usurpârunt quidam; eâdem vi pollere plantaginem asseruere multi, ejusque succum immediatè vel duas ante accessionem horas exhibuerunt; ego quidem jusculum quo erant incocta ejus herbæ folia, febres contumaces abegisse no-

vi; pentaphyllum interea feliciùs succedit, ut & derafa ex radice pruni silvestris pellicula; non tamen hæc usurpanda censuerim remedia; cùm enim partes veneno febrili infectas constringant, id in iis altiùs infixum remanere potest.

Potiori jure laudata sunt quædam penetranti vi prædita, aperientia scilicet, & saponacea; inter illa autem eminet bardana, quæ & simul sudorifera est; ejus viribus dicitur quartanâ liberatus *Henricus tertius* Galliaæ Rex; multaque alia similia referuntur exempla; at non minùs eâdem vi pollet veronica, teste *Casalpino* earum rerum æstimate æquissimo; ejusdem denique censûs est raparum succus, quem *Crato* plurimis extollit encomiis; nihilominus iis remediis fidendum non esse, ut veris febrifugis, experientia docet quotidiana; si quosdam curârunt, plerisque inutilia fuerunt.

Plus spei ponendum censerem in salibus aperientibus, de quibus jam egimus, ut v. g. in sale febrifugo quod *Sylvii* nomine circumfertur, & cui nimium tribuerunt Medici, ipseque Author; purgantia quidem salia vim simul febrifugam habent, non tamen certam ut diximus; ideo sal ammoniacum ipsis longè in variis casibus anteferendum; insignes ei insunt vires, etiam

tiam adversus febres maximè contumaces, unde aliquando irritis aliis remediis, ad sal illud confugere cogimur.

Ad vim denique aperientem & penetrantem referre licet salium Tachenianorum toties laudatos effectus; vires quidem plantarum ex quibus extrahuntur in iis superstites esse nequeunt; igne enim immutantur earum principia; partim autem alkaliescentia sunt, & partim aut ferme omnino concreta ejusmodi salia; olei tamen crassioris & usti aliquid simul in iis superest; unde tollendis obstructionibus ut quodammodo saponacea aptissima sunt; homogenea interim ipsa esse non est existimandum; sal absinthii v. g. ita paratum tartari vitriolati multum continet, imò ex illo salis communis certam collegisse copiam memini; si verò aut aquâ solutum, aut in ptisanâ laxante exhibeatur, non parum ad febrem abigendam conducere poterit; imò eam servatis servandis tollere aliquando aptum erit; aliquando inquam, idque obstructa vasa referando & fluxilitatem sanguini conciliando, potius quàm vim specificam exerendo; ita sublatis impedimentis febrile venenum naturæ solius viribus abigi crediderim.

Nec solum ipsis salibus calcinatis, sed etiam terris inest aliquid febri fugandæ ido-

neum ; nam testæ ovorum calcinatæ feliciter adversus eam adhibitæ sunt ; probant id multa experimenta in Nosocomiis instituta ; additum est eis aliquando sal absinthii, iisque mixtis usum novi Medicum idque cum successu non pœnitendo ; at cùm in desuetudinem abierit ejus remedii usus, aut deficient medicatrices in eo vires oportet, aut in quibusdam tantummodo febribus profuerint.

Accedit aliquatenus ad eas terras ignem calcinationemve expertas sal tartari, quo in variis ægris usus est *Riverius* ; id nimirum aquâ simplici solvere solebat, ægrisque ita solutum exhibebat ; ego quidem illud in usum vocavi in quartanâ contumaci, eamque nonnunquam feliciter sustuli ; non tamen ejusmodi salis genus, utpote acriori vi præditum ubique commendârim : si quando verò adhibeatur, id potius in aliorum febrifugorum subsidium veniat oportet, quàm ut feбри tollendæ per se ipsum non impar medicamentum.

Quod verò mirum omnino videbitur ; ut alkalina, ita & acida febrim aliquando imò & sæpius sustulerunt ; vidi qui hausto integri mali citrei succo, eoque in aquæ aut infusionis theæ cyathum instillato, paroxysmos cohibuerunt ; imò in certis regionibus, ad austrum sitis, non præsentius remedium experiuntur ægri. Idem

Idem præstitit nonnunquam Elixir vitrioli, *Mynsichto* auctori, aliisque celebratum; vidi qui illud cortici peruviano instillarent;isque ita irroratus præstantioribus pollere viribus credebatur; in usu erat imprimis adversus eas febres, quæ in locis uliginosis marique proximis grassabantur; nec profectò ab earum naturâ id alienum esse remedium dici potest, cum ex putrido imprimis miasmate ortum trahant.

Aceti denique vires non minùs proficuas experti sunt multi; hoc saltem testari possum in quâdam intermittentium constitutione epidemicâ hoc optimum fuisse prophylacticum; nimis profectò eviluit apud nos summum remedium, paratu & inventu facile; oblivisci non licet quantum ex eo perceperint fructum Romani exercitus.

Inde non mirum videri debet si spiritui sulphuris tantùm tribuerit *Riverius*; sed quod minùs expectandum esse credi posset, est ejus medicamenti vis in cutis spiracula; eo, inquit ille Author, moventur copiosi sudores, si cum aquâ hauriatur, idque multis constat experimentis; plures tertianas febres hoc remedio curatas vidimus, cum in summo æstu & siti urgenti exhiberetur; inde copiosi profluebant sudores, quibus, non solum paroxysmus, sed etiam totus morbus integrè solvebatur.

Ea est profectò eorum remediorum, acidorum scilicet, vis, ut, si iis omnino confidere non liceat, multùm tamen ad februm curationem conferre possint; magis conducere fortasse, si accuratè institueretur diæta, si præmitteretur vomitus; putredini enim omnino adversantur, heterogenea sanguinem inficientia immutare apta sunt, unde febrilis veneni vires infringere possunt: hinc saltem concludere non absolum est, quod aliis febrifugis viam sterant, eorumque vim adjuvent; acidi ergo potùs copiâ, in iis imprimis febribus quæ magnâ vi decurrunt, diluendus est sanguis.

Remediis aliis sibique similiter aliquando adversis usi sunt Medici; aromatica scilicet antiseptica partium textum stimulantia, & narcotica motum inhibentia, usurpârunt; quod verò stimulantia sive calidiora spectat, de duobus tantummodo agam, quorum vis non contemnenda visa est; absinthium laudârunt ipsi Veteres, eoque feliciter usus videtur Medicus Italus ex recentioribus; chamæmelum non minùs efficax *Zacuto Lusitano* & *Manardo* visum est, atque ejusdem flores commendavit deinde *Mortonus*; si tamen lateat in iis febrifuga vis, ut negari nequit, fatendum sæpius eam fallere, eâque mordacem accendi calorem, qui februm curationi maximè adversus est. Quod

Quod spectat narcotica, fatendum in iis, ut inquit *Riverius*, aliquam inesse vim ad cohibendos febrium paroxysmos; opio usus est *Trallianus*, qui cum castoreo aliisque illud exhibebat, ut certum remedium, duas ante insultum horas; idem commendat *Heurnius*, sed cum aliis mixtum, nec minùs, juxta eum, efficax; novi denique Medicum, qui camphoram solam ipsi addere solitus erat, felicemque effectum de-prædicabat; non dubium profectò quin si cum croco usurparetur opium, febris causam perinde posset attingere; in utroque scilicet est vis febrifuga & somnum concilians, in croco præterea est vis movens leniter & aperiens; hæc tamen remedia non nisi summâ cum cautelâ usurpanda sunt, non succedunt enim nisi præmissis evacuantibus & refrigerantibus; profunt potius in eâ febre quæ per aliquod tempus excurrit, quam in eâ quæ modò incoëpit; nihilominus temulentiam inducunt non rarò, & ut plurimum fallunt.

Multò minùs videntur commendanda quædam ex Medicinæ penu non desumpta; credi vix posset quæsitum esse antifebrile remedium in humani corporis excrementis; atqui tamen testari possum febres admodum contumaces urinâ epotâ esse devictas; ne autem medicamenti hoc genus, licet

licet spurcum, ita absonum videatur, in memoriam revocare oportet, salis ammoniaci vires urinosis inesse salibus; non alieni præterea sunt ab ipsis sales alkalini volatiles, qui ut verè febrifugi habiti sunt; non adeo ergo culpandi essent Empirici si alia magis à ratione aliena non usurparent.

Ejusmodi medicamentorum arcanam agendi rationem definire non licet; hoc solummodo certum est, latere in quâdam animalium substantiâ quid feбри intermit-tenti adversum; imò in quibusdam magis eminet hæc vis; nam millepedes v. g. & caro ipsa viperina cum aliis febrifugis valde, ut modò dicemus, profuerunt; quin etiam sola araneorum tela in pilulas convoluta febres ipsas quartanas, me teste, sustulit, aut per certum tempus earum avertit paroxysmos; parva tamen omnino dosis erat exhibita.

Inde non ita mirum videbitur quòd, in quibusdam regionibus ad boream sitis, vulgi opinione celebratur; habentur scilicet in iis haleces ut verè antifebriles; imò fertur hâc de re propositum diligentiae præmium, iis qui hoc pisciculorum genus muriâ conditum in certa loca primi advehendum curarent; narratur insuper, statim atque hujus edulii usus invaluit, evanescere febres, aut saltem earum mitescere paulatim insultus. Ut

Ut nihil relinqueretur intentatum , quidam ad venena ipsa confugere ausi sunt ; arsenicum ab iis adhibitum , eoque plurimæ febres memorantur devictæ ; sed ægri in phthisim tandem delapsi mortui sunt : non tantum inesse periculi in sublimati corrosivi levissimâ dosi , & jure quidem , crediderunt nonnulli , sed prudenti Medico tale remedium experiri non facilè in mentem veniet ; narravit mihi *Dodartius* se id , licet variis experimentis confirmatum , publici juris facere Religioni habuisse : deinde verò mihi infausta non defuerunt exempla , quæ me ab ejusmodi exhibendo febrifugo deterruerunt.

Non æquè deleteria est alia veneni species ex vegetalibus desumta , faba scilicet Sancti Ignatii ; novi hominem qui eam rusticis summo cum emolumento exhiberet ; est & remedium quo in urbe celeberrimâ utuntur innumeri non infeliciter ; ejus autem vires ex eâ fabâ pendent , quam plerique tamen reformidant , aut tanquam venenosam damnant Medici.

Externa medicamenta , ut inunctiones & epicarpia apud vulgus potius quàm apud Medicos invaluerunt ; inunctiones quidem in spinâ dorsi imprimis institutæ sunt , ut frigus , quod in eâ parte sævire solet , averteretur ; dubium profectò non est , quin vis
me

medicamentorum, quibus illiniuntur ægri, possit aliquando proficere; non minor percipietur fructus ex frictionibus, nimium profectò ætate nostrâ neglectis; nequaquam tamen hisce solis remediis confidendum, uti nec obfistendum, si quis iis uti voluerit.

Quod verò spectat epicarpia, si quod ex iis percipiatur levamen, id non ex quâdam vi propriè febrifugâ pendere existimandum; motui potius in toto corpore aut aliquâ parte, uti per admotum stimulum concitato, tribui debent quædam curationes quæ mirabiles visæ sunt; circumferuntur v. g. unguenta quibus parti cuidam illitis erumpunt per diversas partes exanthemata, & varii cientur motus in intimo viscerum textu; atqui idem aut simile quid in epicarpiorum usu sæpe contingit; Ranunculus v. g. pratensis, si manibus carpsive admoveatur, iisque per certum tempus inhæreat, sequitur calor, dolor, erosio cutis; hujus ergo stimuli vi, effluviisque in partes internas delatis quandoque curari potest febris, nec deindè reviviscere; at inde graviores prodixisse morbos in quibusdam ægris observavi.

Non ita tamen abigi febrile venenum existimari velim certis epithematis, quibus non inest hæc vis stimulans; licet non ignobilium Scriptorum encomiis talium remedio-

mediorum celebrentur effectus, ii admodum dubii sunt; & si quid in ipsis verum sit, pendet id similiter ex subtili & incognitâ effluviolorum vi in corporis intima per cæcas vias penetranti; sed confidant talium remediorum viribus, qui earum certa habuerint argumenta.

Ejusmodi sunt febrifuga quædam interna sive externa, quæ partim ab antiquis, partim à recentioribus in usum vocata sunt, & etiamnum à quibusdam vocantur: at de eorum usu & famâ multum detraxit cortex peruvianus; majores nostros latuit divinum hoc inventum, nec nostra id lubens recepit ætas; pauci id statim probârunt Medici; multi verò in eo deleteriam vim suspicati sunt; sed vicit tandem eorum pervicaciam aut metum constans felixque experientia.

Non ita tamen hoc dictum velim, ut omnino compositæ credantur lites & querelæ; sunt gentes apud quas etiamnum malè audiat corticis peruviani ipsum nomen; apud Belgas v. g. Batavos & Germanos abhorret ab eo Medicorum vulgus; atqui omnia, quæ tam salubri medicamento exprobrantur, perversæ in ejus usu methodo omnino tribuenda sunt; hoc Hispani, Galli & Angli ab omni suspicione vindicârunt, nec quidquam earum gentium consensui objici potest.

Ita

Ita fidum & innocuum est remedium hoc, ut ex tot ægris quibus id præscripsi, nullum viderim qui meritò de hoc queri posset; non tantum inducias dare solet, aut ut dicitur febrim ad certum tempus refrænare; sed eam radicitus, præmissis tamen præmittendis, tollere potest; quin imò, si rite adhibeatur, stomacho est amicissimum, transpirationi fovendæ & promovendæ idoneum, sanguinis fluori & colori intendendo aptissimum, in nervorum morbis proficuum, & adversus primarum viarum sordes antisepticum præstantissimum.

Alia, eaque mira omnino, de hujus remedii viribus deprædicant viri non incelebres; sed ut iis observata referentibus fidem denegare nefas est, ita æquum videtur, ut nonnisi experienciâ propriâ in eorum adducamur sententiam; non illico equidem abjicienda quæ vel ab ipsâ ratione abhorreere videntur; suæ ipsa imbecillitatis conscia sibi diffidat oportet, & naturæ expectet judicium; sed non minùs certis diffidendum experimentis, nisi doctiorum consensu comprobata sint; videre cuivis & experiri licet, judicare autem paucorum est.



LIBER QUARTUS

DE

METHODO IN REMEDIORUM

ANTIFEBRILIUM USU ADHIBENDA.

CAPUT I.

Præmittuntur quedam ad instituendam curationem spectantia.

REMEDIIS jam memoratis subigi possunt febres intermittentes, sed ea nosse non satis est: utcumque proficua sint, non ejusmodi sunt ut quovis modo exhibeantur febri impugnandæ apta sint: suum tempus est his dicatum; alia aliis tutius in usum vocantur & præstantiora sunt; ea igitur seligere & utendi modum tradere operæ pretium est; sed ut curandi

randi ratio clariùs pateat, quædam præmit-
tenda censuimus, & primò quidem num
præcaveri possint febres inquiremus? deinde
verò num, si naturæ committantur, ipsius
operâ curari possint? denique num omnes
eisdem subjiciantur remediis; & num, an-
tequam ipsarum suscipiatur curatio, sibi per
aliquod tempus relinquendæ sint?

Quod prophylaxim spectat, eam com-
mendare maximè interest, cùm grassantur
febres intermittentes; nam, si epidemicè
insurgunt aut endemiæ sunt, undique im-
pendet periculum; incumbit circumfusum
corporibus febrile venenum, eique patent
eorum partes; atqui ab eo immunis esse
poterit qui viscerum prospiciet functioni-
bus; id sæpissime præstat insitum à naturâ
robur; multi enim epidemicæ grassantis vim
effugiunt; at præcavetur imprimis ejus la-
bes, si alimentorum habeatur delectus, si
secretionibus & excretionibus non obsit in-
gluvies, si bilis nec acrior nec nimius fue-
rit proventus, si expurgetur remediis ipsi
dicatis, si vel levissimè affecti corporis pro-
deuntibus signis statim medela inquiratur,
si vomitus imprimis concitetur & si feбри-
fuga in usum vocentur; &c.

At ejusmodi est humanum ingenium, ut
vix de impendentibus malis sollicitum vi-
deatur; ad curandi ergo rationem devenire
præstat;

præstat ; statim autem hîc incidit magni momenti quæstio ; num scilicet, si committantur sibi febres intermittentes, per se ipsas seu sponte curari possint ; nec profectò id dubium si quibusdam credatur ; existimant enim ii febribus his certum præfixum esse tempus, ipsasque septimo circuitu judicari contendunt, ita equidem à naturâ comparatum esse videtur, ut si accurato regimini subjiciantur ægri, regimini inquam, quale in morbis acutis fervari solet, brevi concidat febrilis vis ; an verò non ultra septimum paroxysmum progrediatur, idque perpetuum sit non ita liquet ; certis tantummodo constat exemplis sæpissime his limitibus circumscriptam esse febrem ; sed ut certò innotescat an his excedere soleat, alia requiruntur experimenta accuratè instituenda ; de his verò ne ullum relinquatur dubium, ut regimini addicatur oportet certus ægrorum numerus.

Quod tamen in dubium revocari nequit, si cum jam dicto regimine adhibeantur levia remedia, generalia nempe & non alia, facili negotio curari poterunt sæpissime febres intermittentes ; id v. g. ita se habebit, si febrili motui non insit summa vis, & si non grassetur epidemia gravior ; sunt autem necessaria quæ modò diximus remedia, quia adest non rarò nimia sanguinis copia, quia

pravis succis scatent primæ viæ, quia denique summus aliquando bilis proventus; removenda ergo sunt statim omnia hæc impedimenta, ut sponte & propriis viribus opus suum absolvat natura.

Cùm verò ab eâ curationem, seu propter ægros moræ & regiminis impatientes, seu aliis de causis, expectare non liceat, alia instituenda est medendi ratio; sed ut quænam esse debeat statui possit, videndum statim num omnes febres intermittentes eisdem subjaceant remediis? non esse inter eas quæ peculiaria sibi vindicent auxilia certum est, si diversæ non sint indolis; atqui, ut diximus, nullatenus discrepant tum vernaes, tum autumnales, atque aliis temporibus exortæ; in vernalibus solummodo mitius est febrile venenum, aut potius præsto adsunt causæ, quibus diffuari possit; unde sponte se subducunt, postquam per breve excurrerunt tempus.

Hoc interea perpetuum esse credendum non est; duplices enim tertianæ tunc temporis exoriri possunt, quæ vel ipsis remediis non facile cedunt; ipsæ tertianæ graviores nonnunquam esse solent; atqui tunc cortice peruviano opus est; quod iterum demonstrat tum vernalium tum autumnalium eandem esse originem & naturam; idem liquet ex pertinaci earum ingenio, quæ

quæ ex autumno in vernum tempus transfiliunt; mitiores autem tunc fiunt, & ut vernaes veræ facili negotio curantur; atqui dubium non est, quin iis idem dicatum sit febrifugum, quo primo egebant exortu; probat id experientia cui refragari non licet.

Idem sit iudicium de iis febribus quæ in alia incidunt tempora; nec profectò, si eæ graviores sint, ut in certis epidemiis, nec ipsi cortici peruviano obsequi videantur, peculiare idcirco in ipsis genus suspicari licet; causa tantummodo gravior est; continuo circumfusa corporibus incumbens, altiùsque infixa, remedio quibuscumque intermittentibus proprio sæpe obsistit, idque videtur respuere; videtur inquam, nam si initio adhibitum esset, rite præmissis præmittendis, causæ febrilis pertinaciam id sustulisset; imò ut plurimum, licet ingravescens symptomatis, eam tollere aptum est.

Sed prodit alia non minoris momenti quæstio, de iis febribus, in quibus tum ad generalia, tum ad propria deveniendum remedia; quæritur scilicet, num statim atque exortæ sunt earum curam moliri necesse sit; an verò sibi per certum tempus relinquendæ? invaluit apud multos opinio quæ facilius, imò & tutiùs, eas curari statuit, post aliquot exantlatos paroxys-

mos; quid autem de eâ opinione censendum est?

Non agitur hîc de iis ægris quibus salubres esse existimantur febres; si earum ope tolli possit alius affectus, tunc quidem per aliquod tempus licet eas naturæ committere; at si in corpora non malè habentia incidant, num melius esset, si ea nusquam attigissent? num proinde satius est ægros citò in pristinam restitui valetudinem, quàm eos veneno per omnes partes sæviente excruciaci, quàm secretionum perturbationi esse obnoxios, quàm obstructionum periculum incurrere, quàm denique præternaturalem circuitûs & caloris vim per certum tempus experiri, &c?

Ego quidem, & febrium genus earumque vim animo reputans, eis aliquando, si benigniores sint, laxare habenas non vereor; at cùm liquidò constat ipsas naturæ viribus nonnisi ægrè superari posse, ad remedia generalia, & dein ad specifica quamprimum licet deveniendum existimo; nec profectò per multorum annorum seriem quidquam mali inde ortum vidi; imò febres gravissimas absque ullo sui relicto vestigio evanuisse observavi.

In eo solum versatur rei cardo, ut rite exhibeantur febrifuga, & iis per varia remedia & per diætam imprimis diluentem,
ape-

aperientem & refrigerantem sternatur via; fateor equidem, quod si statim, aut citius quàm par est, ad antifebrilia, eaque calidiora, confugiant Medici, fore ut multis noceant, imò & ipsis quos curasse videntur; sed inde non sequitur sibi per longius temporis spatium relinquendas esse febres; solent eæ ita sibi permissæ altiores agere radices, difficiliusque curari; unde quamprimum fieri licet morbo utcumque infonti occurrendum.

His præmissis triplicem eamque fidam medendi methodum instituemus; prima erit ea quæ venæ sectione, remediis vi aperienti, secretionem promoventi, vias primas expurganti præditis solummodo utitur; hanc si accuratius novissent Veteres, certis destituti febrifugis, ea multis in febribus non desiderassent; ipsas enim corporibus nusquam noxia plerumque ferme expugnare potest; imò ita necessaria est, ut alias non ferat quandoque ipsa ægrorum & morbi ipsius natura.

Secunda methodus ab eâ non erit multum aliena; tota enim in sudoriferis temperatis, certo quodam modo adhibendis, posita est; hoc tamen ipsi proprium est, quod imminenti frigori occurrat, & ita qui insequeretur paroxysmum sufflaminet; tanti autem facienda est ut eâ solâ summum ali-

quando vitæ discrimen averti possit.

Tertia denique methodus ea erit quæ in febrium curatione rem totam specifico peruviano conficit; eo præcipuè commendanda est, quod, incassum adhibitis aliis remediis, in certum veniat subsidium; quod in mali moris paroxysmis veluti sacra sit anchora; sed cautelam, ut videbimus, postulat, ne, dum prodesse studemus, imprudenti tentamine noceamus.

C A P U T II.

De methodo quæ remediis generalibus aut soli feбри intermittenti non dicatis eam curat.

DE hâc methodo quædam jam innuimus, cùm aperientium remediorum expenderemus vires; egimus namque de abſtinentiâ, de aqueo potu, de feri lactis usu, &c; sed, ut diximus, pauci omnino sunt qui ejusmodi medendi rationi se patiantur subjici: & quæ ab usu aut opinione aliena sunt, proficua licet, respuuntur; atqui tamen simplicissima hæc naturæ placuerat esse remedia paratu, ut inquit *Plinius*, & inventu facilia; præstantiora vi-
dentur.

dentur quæ prodeunt ex iis officinis in quibus sua cuique venalis proponitur vita, & opinioni morem gerere cogimur.

Non magis arridet alius curandi modus, à modò dicto non multùm abludens; diximus nempe, servato regimine eoque accurato sibi relinqui posse febres intermittentes; at regiminis non minùs quàm expectationis ægros tædet; citò curari volunt & se deferri existimant, nisi obtrudantur remedia; impugnanda est ergo febris, idque aliquando invitâ naturâ: ecce autem methodum ipsius ductu institutam, ideoque, licet neglecta sit, pluris faciendam; multùm tamen abest ut eam, sicuti securam ita & ubicumque certam esse ausim asserere; mederi tantùm posse plerisque febribus existimo.

Sit v. g. febris vernalis quæ curanda occurrat; cùm ea ut plurimum benigna sit, potest statim sibi relinqui, brevi enim judicari solet: fervetur tamen oportet accurata victûs ratio; eâ enim neglectâ diutius excurrat oportet febrilis vis; si quando adjuvanda videatur medicatrix natura, diluentia sola & aperientia huic scopo sufficient; sit interim alvus laxior oportet, ejusque expurgatio desinente morbo molienda, idque purgantibus lenissimis; cavendum enim ne per intestinorum anfractus hæreant & stagnent

gnent succi degeneres ; eorum semper in quâcunque febris , etiam benigniori , metuendus proventus.

At si simplices non sint vernaes febres , si validiori ferantur impetu , si septimum præterlapsæ fuerint paroxysmum , artis præsentius subsidium postulant ; & primò imperanda est tenuis diæta , qualem libro tertio innuimus ; interea pro ratione febris mittendus est sanguis , idque initio imprimis , aut si neglecta sit vel deinde incandescat ; nec profectò quorundam *aimophoborum* præceptis standum est ; nolunt nempe adhiberi venæ sectionem , nisi admodum rubeat vultus , nisi adsint capitis aut aliarum partium dolores , nisi plethora urgeat pulsusque validior sit ; at satis est si vigeat febris ut à sanguinis detractiõne incipiendum sit.

Eâ autem præmissâ ad primas vias respiciendum ; statim atque per intermissionem licet , ano evocandæ sunt ventriculi fordes ; ad eum quidem expurgandum , prægressâ ingluvie , præcordiorum gravitate , oris amaro , linguæ spurcitie induci debemus ; ipsius tamen febris causa , hepatis imprimis adversa , emetici requirit vim ; tartaro igitur stibiato aut ipecacuanhâ uti licet ; in pueris verò syrupo Glauberi concitari potest vomitus.

Hoc

Hoc solo remedio innumeræ expugnatae sunt febres vernales; si verò ita res succederit, in prophylaxim instituenda est salubris victûs ratio; præcavendum imprimis frigus, alvi laxitas servanda, exercitatio commendanda; his tamen, utcumque repressâ febrili vi, omnino standum non est; alvus leniter expurgetur oportet, ne quidam, ut diximus, supersit fomes; ad eum delendum tamarindi imprimis cum aliis purgantibus admiscendi, cùm putredini adversi sint.

At si primis illis tentaminibus non cesserit febris, ad alia devenire oportet; curationem imprimis à jusculis ex lapatho, ex cichorio, soncho & endiviâ sperare licet; exhibenda ergo sunt ea quolibet mane ad uncias duodecim; at his addendum sal quoddam aperiens & purgans, ut tartarus vitriolatus, arcanum duplicatum, sal polychrestum, aut febrifugum Sylvii; necesse est interim ut ipsorum operâ leniter demittatur alvus, aliàs parum omnino aut nil proficient.

Si hæc per certum tempus adhibeantur, spes est fore ut brevi curentur ægri, vigentibus enim secretionibus & excretionibus, bile imprimis expurgatâ, & eâ expurgatione restitutis hepatis functionibus, facile se proripiet febrile venenum; ad illud enim

expellendum præsto semper intenta adest natura; sed faciliùs profectò expelletur, si post assumpta juscula adhibeatur potus in eundem scopum; atqui nil occurrit præstantius apozemate ex radice graminis, ex cicchorio, borragine & buglossò, unde tres aut quatuor hujus alteriusve similis potionis cyathi, debitis interjectis intervallis, exhibendi sunt.

His similibusve remediis insunt vires aperientes, diluentes & verè antifebriles; unde non solum quo jam diximus modo, sed aliâ ratione exhiberi possunt; solo cicchorii decocto febres à me fugatas memini, sæpiùs verò ipsarum reliquias; non minùs opis attulerunt sales modò præscripti; sive aquâ solâ, sive decoctis herbarum solvantur, mira sanè aliquando præstant; ut plurimum verò si ingeratur eorum drachma una ter quaterque matutinis horis, alterâ scilicet quâque horâ, & si in ipsorum usu pergant ægri per octo dies, aut quandiu necesse erit, fieri profectò non potest, nisi peculiaris adfint impedimenta, quin concilietur bili effluxus, quin tollantur obstructions, & cuncta denique in statum naturalem restituantur.

Nec profectò jam memorata esse quæcunque adhiberi possint remedia existimari velim; ad methodum quam tradimus pertinent

continent cremor tartari, magnesia Massiliensis, spiritus sulphuris cum sale absinthii, succus citri eidem instillatus aut ex aquâ haustus, testæ ovorum calcinatæ, &c; si autem hæc aliave, de quibus egimus, non successerint, ad potentiora seu specifica deveniendum, quæ tunc facilius & tutius vim suam exerent, unde non est quod nos pœniteat, si ea prius non adhibuerimus.

At febres autumnales difficilius omnino expugnantur; methodo tamen modò dictâ eas feliciter, ipsarum imprimis initio, aggredi possumus; imò est ubi aliam sequi viam non liceat; sint eæ v.g. vel duplices tertianæ vel continuæ, in utrisque generalibus remediis tantummodo statim locus est; sanguis videlicet mitti debet, prout feret febrilis vis; interim cùm bilis autumno turgeat, minùs licet emesim prætermittere; deinde verò purgationi incumbendum, & aperientibus denique & refrigerantibus curationem prosequi necesse est.

Ita autem fit ut, si continuæ sint febres & remittentes, tandem intermittant; si verò duplices sint tertianæ, vel longiora paroxysmis interjicientur intervalla, aut hi in tertium quemque diem recident, imo tandem evanescent absque ullo alio auxilio: atqui si in febres gravissimas tantum possint modò dicta remedia, num ipsis eadem

dem inerit vis in tertianas simplices five quartanas? faciliùs profectò hæ se subducent, si methodum jam traditam sequi sustineant ægri, & si accurata imprimis observetur victûs ratio; ut verò curationem magis certò assequi liceat, quædam in genere impensius quàm in vernalibus observanda commendabimus.

Primum præceptum erit ut, post venæ sectionem & emesim, refrigerantibus imprimis curationi sternatur via; placuerunt hæc, & jure quidem, antecessoribus nostris; in julapiorum quorundam usu immorari ipsis mos erat; certum est autem quod tempestate autumnali, cùm adusta acriorve turget bilis, necesse sit ejus vim refringere, & universum corpus ad temperiem naturalem reducere; ita sæpe concidunt febres veluti per se ipsas, vel propriis brevi obsequuntur remediis; inde iterum patet quantum in eas possit diæta, aqueus potus, feri lactis usus, citri succus aquæ instillatus.

Versabitur secundum præceptum circa ea quibus promoveri potest bilis secretio & alvi induci laxitas; ita enim, ut plurimum saltem, brevi succedit curatio; subolfecerat hoc *Riverius*, qui non aliâ viâ se subducere febrilem causam asserit; dum retinentur nempe acriores succi in hepate nec expurgantur fordibus alvi recessus, fovetur & accen-

accenditur morbi fomes; quæ autem hunc tollere & delere possunt, deobstruentia imprimis sunt & hepatis dicata, ut saponacea, tum amarescentia de quibus jam egimus; iis imbuendum est universum corpus, & si salibus acuantur laxantibus & digestivis, aperientur claustra omnia, atque excernentur excernenda; majori tantummodo studio in horum remediorum usum adversus autumnales febres incumbere necesse est.

Tertium erit præceptum ut, cum restitui videbuntur partium functiones, iterum moveatur emesis; cum enim tunc natura ad curationem parata sit, & ad crifim se accingere soleat, ejus conatum & vires obsecundabit emetici succussio; innuimus jam ut per se ipsam versùs septimum circuitum judicetur febris; quantò autem faciliùs excedet si remediis naturæ ductum sequentibus oppugnetur; confirmantur hæc felici experientiâ, quæ sæpius nos docuit invocatis ejusmodi auxiliis reprimi, nec iterum resurgere paroxysmos.

Si autem nihilominus reluctans ejusmodi remediis non obsequatur febris, ad specifica confugiendum erit; ea autem potius tentare decet quàm certa remedia quæ variis Medicis in usu sunt; theriacam videlicet serotinis horis assumere & pilulas aloëticas cœnæ præmittere soliti sunt; ea equidem

dem quin quandoque profuerint inficiari non licet ; at nisi febrilem causam certò attigerint, ingravescit ea, difficiliusque deinde expugnari solet.

Adversùs quartanam imprimis hæc usurpata sunt remedia ; hæc quidem autumnò gravior præ aliis excedere renuit ; mihi tamen certâ liquet experientiâ in ejusmodi febrim multum posse quæ jam præscripsimus ; mitescit nimirum venæ sectione, emeticis quandoque tollitur, purgantibus similiter obsequi solet ; in jusculem usu, si dominetur nasturtium & trifolium fibrinum, intercidit paroxysmorum vis, & non rarò penitus sufflaminatur ; coërcentur iidem salibus digestivis aperientibus & laxantibus, & sale imprimis ammoniaco ; ipsâ denique victûs ratione multum de febrili impetu & pertinaciâ detractum vidi.

En methodum rationi & experientiæ consentaneam ; adversùs eam tamen quædam objici possunt quibus obviam ire interest ; incerta, inquit quidam, est hæc medendi ratio ; huic obsistunt sæpiissime febres, quæ certis remediis tutò citòque tolli possent, quare igitur iis neglectis tædiosa instituitur curatio ?

Multa profectò eam statim præ aliis quibuscunque tentare sapientem cogent Medicum ; & primò quidem securè & nulla
partium

partium relictâ labe febres curat modò dicta methodus, quod de aliis non ita dici potest: Deinde verò ipsa, saltem initio, necessaria est ut specificis remediis sternatur via; & si ea desint, vel si exoptatam non præstent operam, in subsidium venit.

Quod verò maximi momenti est, obstructions præcavet, easdemque tollit; imò leucophlegmatiam aut impendentem avertit hydropem, vel etiam curare potest.

Si quid tandem recidivæ occurrere possit maximè aperientium & laxantium usus, in quo tota hæc versatur methodus.

Num ergo medendi rationem, in multis febribus certam, in omnibus salubrem, in multis necessariam, aliorum remediorum vires intendentem, eorum noxis occurrentem, gravissima mala præcaventem, solam denique aliquando quæ supersit, prætermittere nefas esset?

C A P U T III.

De methodo quâ per sudores curantur febres intermittentes.

EJUSMODI est febrile venenum; ut per cutaneos poros expelli possit;
V
pro-

probatur id certis curationibus, tum spontaneis, tum arte institutis: fuit ubi post paroxysmos, impensè sudantes ægri febre omnino liberati sint; imò quendam vidi qui stragulis obrutus sudorem elicere conatus est; excepit hoc tentamen exundatio universalis per quinque aut sex horas, ipsaque febrile venenum expulit illiusque fomitem penitus exhaustit.

Notandum tamen, spontaneos sudores febrim judicantes rarò admodum occurrere; ii verò qui variis remediis concitantur, vix succedere posse videntur, nisi à naturâ paratæ sint viæ; tunc quidem non mirum est si ars in subsidium veniat; sed eam inutilem fore statuere licet, nisi internis obsecundetur motibus; atqui omnino incertum, an natura ad sudorem vergat, & utrum febrilis causa veluti in limine sit & è fomite suo dimoveri possit.

Non minùs arduum fortasse videbitur definire quonam febris tempore sudoriferis incumbendum sit; in frigore febrili constrictis partibus incassum urgeretur sudor; hunc similiter in æstu febrili renuit irritatio & morbi vis; in declinatione verò nihil prodest, naturalis licet copiosusque, per cutim effluxus; reliquum ergo est ut in apûrexiâ solâ concitari possit; at iterum huic recidit eadem quæstio, quid nimirum
pro-

profit ejusmodi moliri evacuationem? quomodo & quando hanc tentare necesse sit? observatione equidem in his omnibus inquirendis nos duci decet; quodam modo tamen ex rei ipsius naturâ prævidere licet quid ex hoc tentamine expectandum sit.

Antequam frigore corripiantur ægri, semi horâ v. g. ante insultum, omnia aliquando absque ullâ functionum perturbatione procedunt; nullatenus videtur ægrum esse corpus veneno febrili infectum, nec quidquam sensu percipit quo de instanti moneatur febris; incandescat ergo oportet venenum hoc, veluti admoto igne, ut paroxysmum concitet; nonne autem averti potest hæc excandescencia? aut quod eodem recidit, cum tunc iners sit tale venenum, nonne impediri potest, ne in frigus aut febrim erumpat?

Non videtur profectò id rationi adversum; imò verosimile est, quod si concitet sudor ante frigoris invasionem, id omnino possit averti; si autem ei occurratur, non fiet congestio sive stagnatio in hepate, in auriculis cordis, aut in pulmone; præterea partim saltem diffilari posse videtur febrile venenum; sit v. g. constricta cutis, colligantur in ejus vasculis & colatoriis liquida crassiora; si his ita se habentibus, copiosissimus erumpat sudor, tolletur ob-

structio ex poris cutaneis; atqui idem fieri poterit in viscerum textu, cum imminet paroxysmus febrilis; poterit ergo tolli aut saltem multum imminui febrilis causa.

At in Medicinâ incerta omnino est ratio, nisi innixa sit experientiæ testimonio; imò & ipsa multa nos docet, quæ cum jam dictis non consentire videntur; & primò quidem certum est, ut diximus, eos sudores qui paroxysmos excipiunt, nequaquam febriles motus coercere; sæviunt nihilominus diutiusque excurrunt febres & aliquando intensius urgent; qui verò sub craticulâ, ut paroxysmum averterent, sudores extorquere tentârunt, aut eundem in scopum remediis calidioribus eos movere non reformidârunt; ii, inquam, febres ex inde exurgere graviores experti sunt.

Hinc tamen certa peti nequeunt argumenta adversus quoscunque sudores; nam qui paroxysmos excipiunt v. g. morbosî sunt, aut vera morbi pars; quandoquidem superstitæ adhuc in visceribus febrili æstu concitantur; perinde ergo se res habet in intermittenti febre ac in febribus exanthematicis; sudoribus sæpe diffluunt ægri, nec iis levantur; in utroque scilicet casu expurgantur aut effluunt liquidiora quæ in corporis peripheriam per febris motum rejiciun-

jiciuntur ; interea remanet in internis partibus morbi fomes.

Quod verò spectat sudores nimio calore, aut remediorum calidiorum vi concitados, ii febrium curationi omnino adversi sunt ; acrior est v. g. in guaiaco stimulus, æstus summum & veluti ignem in visceribus accendit ; ita noxia aliquando est ejus ligni vis, ut ex eâ nonnunquam icterum videam exortum ; quod autem ita perturbat viscerum functiones, etiamsi copiosè sudores elicere possit, remedium antifebrile esse nequit ; sit ergo *canon*, in febrium curatione non esse urgendum calorem ad certum gradum ; nam intenditur necessariò earum vis, si intendatur æstus in visceribus.

Magis ergo proficui esse possunt ii sudores, qui non adversâ moventur naturâ ; sed opportunè placidèque diffuant oportet ; ut autem ita cieantur, quædam observanda sunt ; primò, ne nimium intendatur calor ; secundò, ut cum aperientibus miscantur semper sudorifera ; tertio, ut in certis hepatis aut aliorum viscerum læsionibus, sicuti in summâ cachexiâ aut virium imbecillitate, non exhibeantur ; quartò denique, ne turgente sanguine, aut stomacho pravis succis scatente, per ejusmodi remedia tentetur curatio.

His observatis, & præmissis quantum

fieri poterit, remediis generalibus, saluberrima erit & tutissima methodus, quâ ad febrium intermittentium curationem præcipientur sudorifera; ea tamen in ipsarum initiis, potiùs quàm post longum earum decursum, proficua erunt.

Eò pluris facienda methodus ejusmodi quòd Veterum autoritate confirmetur :
» sub exspectatione proximæ accessionis ,
» inquit *Celsus*, deducendus in balneum ,
» est æger dandaque opera est ut per tem-
» pus horroris in folio sit si nec bal-
» neum quidem profuit, ante accessionem
» allium edat, aut bibat calidam aquam
» cum pipere; si quidem ea quoque assum-
» pta calorem movent, qui horrorem non
» admittit: deinde, antequam inhorresce-
» re possit, operiatur; fomentisque proti-
» nus calidioribus totum corpus circumda-
» re convenit; « Eundem haud dubiè in scopum, quidem ex antiquioribus Medicis, *Cleophantus*, in hoc genere morborum, multò ante accessionem, caput ægri multâ calidâ aquâ perfundebat.

Cùm temporis lapsu & injuriâ exoleta immeritò videretur methodus hæc, aliam quæ vices ejus gereret adduxit *Sydenhamus*; non scilicet externarum partium, sed internarum solummodo balneum in usum vocavit; liquidi nempe sudoriferi multâ copiâ

piâ perfundenda & diluenda existimavit viscera; nec dubitavit sapientissimus vir quin ita elicitō sudore instanti febrī occurreret; fatendum tamen eum hanc medendi rationem indicasse potius quàm absolutam tradidisse; aliis opus erat experimentis & præceptis, ut firmiori nixa fundamento ægris prodesset; patet id ex ejus enarratione quam hîc referre non pigebit.

Nôrat summus ille vir theriacam à multis ante paroxysmum fuisse exhibitam, & quosdam decocta chamæmeli, tum salviæ, similiter usurpasse; his exemplis ipse peremptus » ægro, inquit, in lectulo compositō & stragulis undequaque cooperto, sudores provoco fero lactis cerevisiato, cui salviæ folia incocta fuere, quatuor circiter horis ante paroxysmi adventum; quibus jam obortis mox præcipio ut devoret scrupulos duos pilularum cochiarum majorum solutarum in unciâ unâ sequentis misturæ; Recipe Aquæ vitæ, libram unam; Theriacæ Andromachi, uncias tres; croci anglici, drachmam unam; misce, stent simul pro usu; hæc ubi consumpserit, in sudoribus continuò eliciendis persistat, donec elapsæ fuerint aliquot horæ ab illo tempore quo paroxysmus ingruere debuerat. «

En profectò singularem methodum quam,

licet tanto magistro duce , nemo sapiens experiri tentaret ; quis drasticum purgans sudanti exhibere aufit ; quis illud cum aquâ vitæ & cum theriacâ conjunxerit ? quem denique in scopum tam aliena à seipfis & secum pugnantia miscuerit ? hæc autem documento esse debent in cujusquam verba jurare nefas esse ; non licet id imprimis in medicinâ quæ ingenii humani vires exsuperat : at condonandum summis in arte viris , si in primis tentaminibus quid humani passi fuerint.

CAPUT IV.

Quomodò exhibenda sint sudorifera adversus febres.

HIS præfixis in genere legibus , peculiariora tradere præcepta vix opus videretur ; sed ne uspiam errori relinquatur locus , tempus his remediis aptum definie-
mus , dein verò quæ seligenda sint indicabimus , methodum denique in iis exhibendis servandam trademus ; postquam autem his perfuncti erimus , quousque hæc curandi ratione inniti liceat ostendemus.

Quod tempus spectat , id quidem ab hæc
me-

medendi methodo alienum est, in quod accessio incidit; ea sibi permittenda est, imò cum desierit, concedenda est ægro quies, ut febrili motu exagitatum & sudore profuso debilitatum reficiatur corpus; sed quamprimum fieri poterit, ad sudoriferum devenire præstat; experienciâ autem sæpius edoctus sum satis esse ad præcavendum frigus, si tres quatuorve horas ante paroxysmi adventum exhiberetur ejusmodi medicamentum; seriùs autem ingestum planè inutile aut parum efficax esset; non possent scilicet eo satis imbui humores, & iis ad cutaneos poros non sterneretur via.

Quæ tutiùs aut certiùs scopum hunc attingere mihi visa fuere, sunt quædam penetranti lenique vi prædita medicamenta; inter ea primum locum tenent farsaparilla, bardana, dulcamara, veronica, quinque radices aperientes; dubium profectò non est quin alia idem præstarent; sed hîc tantummodo quæ expertus sum tradere mens est; non equidem eas omnes herbas simul præscribendas existimo; unam aut alteram aliquando ex iis adhibui summo cum emolumento, idque in multis ægris; unicum tantum & memorabile referam exemplum.

Octogenarius senex duos expertus erat quartanæ paroxysmos; tanta fuerat frigoris vis, ut certa impenderet mors, si tertio
prio-

prioribus simili insultu esset laceffit; in tanto igitur discrimine, aliis omnibus sudoriferum medicamentum anteposui; exhibui scilicet farsæparillæ & bardanæ decoctum cum sale ammoniaco; his autem frigus cum paroxysmo sublatus est, nec remansit ullum febris vestigium; posset fortasse soli ammoniaco tribui hæc curatio, sed absque eo res mihi aliàs æquè successit.

At ut certò proficiat hæc curandi ratio, quædam occurrunt observanda; & primò quidem non parcè, sed affatim, hauriendum decoctum sudoriferum, exhiberi scilicet debent quinque aut sex libræ, vel saltem quatuor, ante paroxysmum; eâ tamen lege, ut versùs ipsi præfixum tempus lectò se componat æger; his ita præmissis faciliùs elicietur sudor; cùm autem madore perfundi incipit corpus, ab incepto non est desistendum, sed urgendus potus diapnoicus & leniter ejus promovendus effectus, donec plures horæ præterlapsæ sint.

Licet tamen tuta videatur hæc sudoriferorum administratio, ne nimius eâ excitaretur calor aliquando veritus sum; ad eum ergo avertendum statim post febris remissionem infusum calidum borraginis & buglossi præscribere non inutile mihi videtur; temperatior adhuc fiet ejus potûs vis, si levis addatur nitri dosis.

Hoc

Hoc quidem adhibito potu, qui & ipse diapnoicus est, calidiora, quæ primò præscripsimus, minùs erunt metuenda; eorum tamen & quorundam imprimis parca sit dosis oportet; in sarsaparillâ v. g. est stimulus qui noxius esse posset; noceret autem maximè in iis febribus in quibus sanguis validiori fertur per vasa sua impetu, & intensior est viscerum æstus; in eâ motuum animalium perturbatione lenioribus tantùm sudoriferis datur locus; sufficient ea, ut sæpius observavi, si rite fuerint administrata.

Quod mihi eam sudoris concitandi rationem comprobavit, est vulgare ideoque pluris faciendum medicamentum, ad quod experiundo deveni; cùm de lenioribus cogitarem sudoriferis, calidæ aquæ vires tentare volui; ejus nempe magnam copiam aliquot ante paroxysmum horis hauriendam præscripsi; quod verò statim non expectassem, veluti incantamento sufflaminatum est frigus; hoc quidem non unâ vice, sed sæpius expertus sum, nec ullum mihi dubium reliquerunt repetita multoties experimenta.

Quidquid autem de iis statui possit, dubium non est, quin ea methodus, quæ sudoriferis febrem abigit, sit in variis ægris omnino necessaria; ad eam devenire imprimis

primis oportet, si intensè urgeat frigus; ex eoque periculum immineat; non aliâ ratione huic certò licet occurrere; an verò febrim perfectè curet hæc methodus, ita ut aliis ad perficiendam curationem eamve firmandam opus non sit, id profectò non aſſim aſſerere; plures equidem vidi qui ſudoriferis reſtituti ſunt; ſed ejuſmodi remediis poteſt aliquando impediri veneni febrilis effectus, dum id interea in corporis latebris hæret, tacitèque per omnes circumfertur partes; non poſſunt ergo in tuto videri qui febre intermittenti liberati ſunt, niſi ſpecificis penitus ſublato fuerit ejus venenum; id ſaltem in genere verum eſt.

Ne interea abſque ratione hæc videantur dicta, exemplum referam quo apprime confirmari poteſt cujuſdam recidivæ metus: Vir militiæ fractus laboribus in febrem incidit intermittentem, quæ variis incuſſum fuit impugnata remediis; eorum tandem pertæſus æger ſudoriferam methodum experiri voluit; cùm autem calidam aquam affatim in lecto hauſiſſet ante paroxyſmi adventum, eum quidem effugit, ſed ſucceſſit corporis gravitas & laſſitudo; in genua & brachia videbatur dejectum febrile venenum; quod verò mirum, reviviſcente poſt dies quindecim febre, priſtina rediit ala-

alacritas, & post aliquot paroxysmos sponte evanuerunt omnia morbi vestigia.

CAPUT V.

De methodo curandi febres per corticem peruvianum.

QUAMVIS ergo multum valeat ea methodus, quâ per sudoris spiracula difflatur febrile venenum; nil decedere debet de eâ quæ cortice peruviano idem præstat; hoc inest in utrâque commodi quod altera alteri in subsidium veniat; sudores critici viam aperiunt, & quod iis incœptum aut peractum perficit aut firmat cortex; sed in eo administrando cautione opus est; ut verò ejus usus variis temperamentis variisque febribus magis esset accommodatus, variæ excogitatæ sunt præparaciones, quas nosse apprime convenit.

Et primò quidem, cùm in pulverem redigitur, varia prostant observanda; dum triturationi enim subjicitur, primò excutit solet externum integumentum, quod est epidermidis instar, & cui nil ferme nisi terreum inerisque inesse potest; deinde verò decidit intima pellicula cujus fragilis

te-

tenuisque substantia ; superest denique medius cortex durior & ponderosior, qui ultimò fatiscit in pulverem, & cui summa inest vis ; quæ ergo tritu statim secedunt abjicienda sunt ; & retinenda quæ supersunt post primum attritum, utpote sola quæ viribus pollent febrifugis.

Juxta quosdam cavendum ne in tenuissimum alcool reducatur pulvis ; tritu enim, inquiunt, fit vegetabilium diacrisis & virium jactura : hoc quidem quin in multis ita se habeat negari nequit, in iisque imprimis quæ volatili donantur substantiâ ; at summo pollet amarore corticis peruviani tenuissimus pulvis, nec de ejus efficacîâ quidquam per attritum decessisse videtur.

Pulvis hic multum materiæ lignosæ & terreæ continet ; necesse est ergo ut substantia hæc indigesta & indigestibilis, stomacho, si tenerior fuerit ejus textus & acutiori sensu præditus, sæpe adversa sit ; imò gravior saltem cuicunque assumenti semper erit, si copiosius ingeratur ; hujus autem incommodi avertendi causâ adhibitum est decoctum ; non dubium profectò est, quin aquâ bullienti extrahatur, quod gummosæ & salinæ naturæ est ; sed præterea resina simul aut saltem magna ejus pars secedit, magna inquam, non omnis ; nam si sæpius decoquatur materia super-

stes,

stes, elicietur aliquid febrifugam vim retinens.

Hujus medicamenti extractio quibusdam juvari potest, salibus v. g. alkalinis aut vegetabilibus; his decocto turbido & ingrâtè flavescenti color inducitur coccineus, isque saturatus; sed cum multum decocti hujus cujuscunque assumendum sit ad curandam febrim, renuunt ægri remediorum impatientes, ipseque repugnat sæpe ventriculus; ideo cortices citri, cinnamomum, syrupi varii aliquando addi solent; hoc habet tamen commodi decoctum hoc, ut nusquam aliquid in os regurgitet & medicamenti saporem referat.

Ne tantam interea liquidi ingrati copiam ingerere cogerentur ægri, extractum corticis concinnârunt Medici; & primò quidem quod ex decocto elicitur usurpârunt; sed longè præstantius est quod ex aquâ simplici eâque frigidâ longo paratur attritu; hoc tantum præcavendum ne empyreuma post evaporationem redoleat, quod sanè incommodum effugiet qui eam balneo maris committet; continet autem extractum id & sal & gummi atque ipsam resinam; si quid habet incommodi, hoc maximè, quod in magma viscosum, si aquâ diluitur, abeat, & in globulos aliquando in stomacho compingatur; omnes insuper corticis vires pos-

possidet, febres enim perfectè curat; hoc unum ei exprobrari potest, quòd calorem nimium aliquando concitet, non tantum tamen atque extractum igne confectum.

Quò verò meliùs elici posset vis febrifuga, ad aliud menstruum magisque proprium confugerunt Medici; vino scilicet generoso infunditur cortex peruvianus per horas viginti quatuor, vel pulvis ejus in menstrui illius cyatho dilutus exhibetur, ut in ipso stomacho fiat extrahendorum extractio; postquam autem peracta est, sive in primarum viarum receptaculis, sive præmissâ extra eas infusione, penetrantissimum, & quasi saponaceum habetur remedium; imò de vini aut spiritûs ejus vi multum decedit, admixtis febrifugi hujus amari gummosis resinosisque principiis.

Quod autem illius remedii ita præparati vires spectat, inficiari nequit quin multis profuerit; imò experientiâ edoctus testari possum in eo summam esse energiam; sed plura præstat aliquando infusum vinosum cui additus fuerit vini spiritus; unde non immeritò statui posse videtur, latere imprimis in resinâ kinækinæ vires, ea enim meliùs educitur spirituosiori menstruo; quidquid autem eorum sit, tale remedium, quod calidius acriusque est, non innoxium aliquando esse potest.

Cum

Cùm interea variis his quibuscunque modis exhibitus cortex non satis adversùs certas febres valere videretur, multa quæ suppetias ferrent excogitârunt Medici; alii aromata, uti serpentariam virginianam, cum eo miscuerunt, ut debiliorem ejus vim tanquam fermento vel admoto stimulo excitarent; alii alia, amara imprimis huic addiderunt, ut conjunctas vires simul in febrim exererent; multi aperientia simul usurpârunt, ut in intimos partium recessus pateret via: non pauci denique eundem aliumve in scopum sales penetranti vi præditos in auxilium vocârunt; quidam scilicet sal absinthii, nonnulli sal ammoniacum, quod ipsum, ut diximus, adversùs febrium intermittentium contumaciam plurimùm præstat.

De his omnibus aliisque multis agere mens non est; duo tamen ex iis aut tria commemorabo, quæ multùm prodesse posse certum est: & primò quidem centaurium minus, ut diximus, si in certarum febrium contumaciâ cortici peruviano addatur, efficacissimum esse potest medicamentum; sed non minùs profuisse constat pulverem viperinum cum eo cortice similiter exhibitum; iis enim commixtis febre liberati sunt innumeri ægri, alia omnia incassum experti.

Laudatur, nec quidem absque ratione,

medicamentum magno emptum pretio, & quod eorum, quæ jam memoravimus, vires continet; recipit hoc corticis peruviani drachmas duas, millepedum pulveratorum, centaurii minoris etiam pulverati, ana, drachmam unam; infundi solent hæc in vini generosi unciiis octo, & ægro in lectum composito exhiberi; aliàs verò pulveres cum melle in electuarii formam miscentur.

At turgent, ut plurimum, primæ viæ pravis humoribus, qui febrem alere possunt; ideo purgantia imprimis cortici addita sunt, purgat is quidem multos, sed quod ipsi peculiare est, aliorum purgantium vires intendit; unde levis eorum dosis huic febrifugo miscenda; alii autem cum eo pulverato similiter in pulverem redactum rhabbarum, alii iridem Florentinam, nonnulli denique cum eâ simul agaricum usurpant: erat hoc arcanum in quodam Nosocomio, idque satis certum; ipse verò innumeris rusticis cum fructu id exhibitum novi; cavendum interim à calore qui hoc remedio concitatur, inest enim agarico vis irritans, unde abstineant ab eo oportet quibus tenerior est viscerum textus.

Usurpantur interea à nonnullis & miscentur cum cortice peruviano purgantia alia acriora, ut pulvis cornachini aut jalappa; nec ipsâ quidem experientiâ comprobari ali-

aliquando hanc missionem negari potest; aptius tamen cum hoc febrifugo adhibetur arcanum duplicatum aut tartarus vitriolatus, eâ scilicet dosi quæ ad alvi laxitatem inducendam necessaria est; ego verò, quod eodem recidit, pulverem Stahlii temperantem cum extracto aquoso vel cum ipso corticis pulvere miscere soleo.

Ut plurimum tamen familiare est mihi decoctum febrifugum & purgans ita concinnatum: recipitur corticis crassè triti uncia una, vel uncia una cum semisse, coquitur quantum satis in aquâ ad libras duas; adduntur sub finem folliculorum sennæ drachma dimidia aut integra, foliorum borraginis & buglossi, ana, manipulus semi; colatura edulcoratur syrupi violarum unciis duabus; sæpius interim non sennam, sed sal aliquod aperiens & purgans adhibere mihi mos est, sal ebsamense v. g. vel sal polychrestum rupellense ad drachmas quatuor; ita autem habetur remedium quod certò febrem tollit; refrigerantibus nimirum & aperientibus constat, & omnibus respondet indicationibus.

Id interea non ita propositum velim censeri, ut perpetuò ita præscribendum sit; apozematis tantummodo febrifugi & purgantis exemplum adducere mens est; alia sunt, præter sennam, quæ in usum vocari

possint, purgantia; cum ipsis varii sales coniungi, alterius generis herbæ usurpari, diversæ denique eorum omnium doses adhiberi possunt; quilibet ferme æger peculiare aliquid sibi vindicat, nec nisi Empiricis eodem semper licet uti remedio.

CAPUT VI.

De corticis peruviani non innoxiiis effectibus.

SED his omnibus cortici peruviano admixtis, infringi potius quam augeri ejus vires quibusdam visæ sunt; eo, inquiunt, & sine ullo aliorum remediorum auxilio, curati fuerunt & curantur innumeri; sunt loca in quibus endemiæ sint febres, plerique tamen iis correpti, vix aliud quidpiam tentare solent nisi simplicem hujus corticis usum; nec profectò, si famæ fides sit, alio opus fuit auxilio primis hujus febrifugi defecti temporibus; tunc scilicet melioris notæ erat, nec aliis per fraudem admixtum; imò & hodie juxta nonnullos, si accuratè selectum sit, operam certam & levi quidem dosi præstare solet, idque nullis aliis præmissis aut adjunctis.

Sed iis non ita licet confidere exemplis,
ut

ut perpetua esse credantur ; noxius sæpe esse potest cortex peruvianus si ita adhibeatur ; ut autem clariùs perspici possit, quænam cautelæ in ejus usu adhibendæ sint, ea omnia quæ huic febrifugo exprobantur & exprobari possunt recensebimus : sunt in eo, ut in omnibus aliis quibus vivimus & movemur, mixta bonis mala, aut malorum irritamenta ; hæc præcavere & illis uti sapientis est Medici.

Amaram est, adstringens, tonicum, & aromaticum medicamentum cortex peruvianus ; certis ideo in casibus aut temperamentis, si exhibeatur, calorem accendit, siccitatem in universâ cute efficit, stomachum lædit, dolores in eo excitat, pulmonem simul attingit, & inde non rarò sanguinis sputum.

Sed & alias partes non minùs afficere potest remedium hoc ; est ubi cùm febrem sustulit remaneant dolores in hypochondriis superstites ; imò ipsum lienem non rarò aggreditur ; diximus jam ut in molem assurgat & in pùtrilaginem inclinet pars hæc, cujus adeo est incertus usus ; hoc autem ut feбри, ita & cortici peruviano sæpe tribuendum, ut certâ mihi constat experientiâ.

Id insuper vitii habere creditur febrifugum hoc, quod nequaquam ubique certum

& infallibile fit remedium; febres etenim multæ eo non curantur, licet revera intermittentes sint; cùm verò succedere visum est, non rarò contigit, ut paroxysmos tantùm per aliquod tempus coërceret: imò non pauci sunt ægri qui, ob protractum ejus usum, febre vagâ confecti vitam miseram per autumnum & per hiemem trahunt; ideo tantopere laudatus cortex, ut palliativum tantummodo auxilium habitus est, & etiamnum apud quosdam habetur.

Sed quod gravius est, sæpissime eo exhibito remanent quæ de veneno latenti diximus; multos videre est qui post abactam febrim facie luridâ, tumidâ, flavescente, alvo in molem elatâ, tibiis, aliisque partibus leucophlegmatiâ turgentibus lægueant; morbum tantummodo commutasse videntur, & adscititium longè esse periculosiorem; non pauci enim sunt qui ex eo vix emergant, aut saltem non nisi longo temporis tractu.

Occurrunt alii qui subactâ feбри anxietates patiantur iis temporibus quibus insurgere solebat paroxysmus; aliquando verò ipsi in somnum gravem aut stuporem eodem tempore incidunt; nonnulli conversâ alias in partes morbi causâ, diarrhœâ aut dysenteriâ tentantur; exfuscitantur quandoque paroxysmorum loco spasmi hæc & illæc
vagan-

vagantes; insurgunt simul dolores, membra, alvum, pectus & caput ipsum variè excruciantes.

Prodit ex ipsâ febrium curâ aliud argumentum adversùs incautum corticis peruviani usum; cùm nimirum paroxysmorum febrilium vicem veluti gerant hæc symptomata, febris redintegratio, ut diximus, tunc ad ea fuganda necessaria aliquando est; observatum fuit enim eâ iterum incandescente hæc omnia sufflaminari, iisque subactis eam desinere; id cùm animadvertissent nonnulli, quoddam remedium non antifebrile sed *febrificum*, si ita loqui liceat, quæsierunt; illudque in spiritu salis ammoniaci se reperisse asserunt.

Inde autem patet tolli aliquando à cortice, quod veneni febrilis remedium sit, ideoque tunc noxium esse hoc febrifugum; meliùs fortè se habuissent ægri, si vires feбри additæ essent, nec dubium saltem quin feliciùs sæpe res successisset, si nil præter diluentia aut ipsam aquam esset exhibitum.

Ex illis autem id saltem juxta quosdam deduci posse videtur, veneni febrilis potius effectum cohiberi à cortice peruviano, quàm ipsum deleri venenum; hoc etenim veluti integrum & intactum evanescentibus paroxysmis remanere potest; idem probant

ſymptomata, quæ eo exhibito sæpe evaneſcunt; eo v.g. infringitur frigoris vis, tollitur horror & rigor, imò tremores inſolitos eodem proſtigatos eſſe, remanente tamen febrili motu, obſervatum eſt.

Non mirum ergo ſi etiamnum à quibusdam ut verum febris antidotum non habeatur remedium hoc; nam refrænari paroxyſmos, quod & aliis remediis adſtringentibus & amaris fieri poteſt, non ſatis eſt; neceſſe videtur inſuper ut mutetur & expellatur febrile venenum; hoc autem fit vel motu naturæ vel paroxyſmorum vi, vel aliis auxiliis quibus non ineſt vera vis febrifuga; cùm tamen, ut diximus, alias obtineat vires cortex peruvianus, præter eas quæ paroxyſmos abigunt, poterit is, ſi ipſas exerrat, partium ſimul functiones reſtituere, & quæ heterogenea ſunt aut noxia ſanguini immixta expellere; hæc neceſſario ex obſervationibus practicis ſequi negari nequit.

Sed ſi cortice peruviano poſſint averti paroxyſmi, poſſunt ejus imprudenti uſu in continuas aut duplices tertianas, vel quartanas mutari febres intermittentes; ſi verò non talis fiat commutatio, incandescit sæpe febrilis calor, graviora fiunt alia omnia ſymptomata, eorumque cauſa altiores agit radices, ideoque difficiliùs remediis obſequitur;

quitur; quod verò majoris est momenti, summum inde atque urgens præter expectationem impendet aliquando discrimen.

Memoratur apud *Sydenhamum*, Senatorem quendam tum Militiæ Præfectum & Pharmacopolam, assumpto cortice peruviano, fato brevi functos esse; exhibitus scilicet fuerat ante paroxysmum, unde vel intensior fuerat febris, vel quod verosimilius, oppressâ feбри, venenum febrile in partes vitales dejectum earum functiones deleteriâ vi sustulit; inde cita mors, quam forte non intulissent paroxysmi etiam intensiores.

Ex tot denique & tantis quæ de kinækinæ viribus observata sunt, sequitur non mirum esse, si curatis hoc remedio febribus, ex eodem prognatas obstructions memoraverint tot Medici; potest quidem per se ut calidum & adstringens liquidis per partium anfractus moram injicere; hoc eò facilius erit, si nimio æstu incanduerint viscera, aut si pravis turgeant succis, qui febrim augeant, vel stimulum ei addant.

Sed ut ad obstructions cortici peruviano toties exprobratas revertamur, cum toties morbi fomitem in internis partibus relinquat, non mirum profectò si in eas detrusum venenum vasa obturare possit, variisque in recessibus congestos, aut crescentes

crescentes retinere succos; ita possunt singulis partibus vim inferre ejus veneni reliquæ, ut non dubitarim quin mania illa, quam observavit *Sydenhamus* post febrem quartanam, ex reliquiis illis in caput adactis pendeat; si autem maniam & tanta alia possint eæ inferre, facilis videbitur, imò aliquando inevitabilis, vasculorum minimorum glandularumque obstructio.

Nimia imprimis corticis peruviani pulverati copia nocere admodum poterit; hominem vidi qui cum febrifugi hujus drachmas decem assumpsisset malè omnino habuit; febris quidem se proripuit, sed summi iique pertinaces in hypochondriis dolores exorti sunt: alium qui simili methodo curatus fuerat pejora expertum esse novi; incidit is in lienis tumorem, eoque in putrilaginem abeunte, è medio sublatus est: tertius denique, statim atque paroxysmi repressi sunt, acerrimo renum dolore correptus est; inde sanguinis mictus, urinæ purulentæ, calculi & mors tandem, cum juvenilis ætas longiorem sponderet vitam: multa alia memorare possem quæ cortici peruviano imprudenter adhibito tribui possunt; non post longiorem aut graviorem febrem, sed statim post ejusmodi remedii usum hæc contigisse tunc observavi.

Confirmantur hæc omnia iis quæ summâ
cum

cum diligentia annotavit *Albertinus*; observatum ab eo fuerat omnes symptomaticas evacuationes præter diarrhoeam à cortice peruviano suppressi; inde autem non leve instare discrimen existimabat, nisi brevi aut intra aliquot dies sibi per solita colatoria viam facerent quæ repressa essent effluvia; aut quod eodem recidit, nisi quam tantopere necessariam duximus, natura moliretur crîsim; tanti hæc sunt momenti, ut sapientissimi viri, qui *Malpighii* doctrinâ instructus eam unicè ad praxim illustrandam contulit & convertit, observationes hîc referre operæ pretium crediderim.

In opinionis suæ argumentum duos refert casus, qui sibi experiienti occurrerunt; quidam febre intermittenti simplici laborabat, alter verò duplici tertianâ; in illo urinae copiosius profluebant, in hoc sudor colliquativus humores exhauriebat liquidiores; exhibito autem cortice peruviano paroxysmi quidem repressi sunt, at in altero ex his ægris dolor acutus brachium, in alio autem hepatis regionem invasit; non ante evanuit is dolor, quàm evacuationibus criticis expurgatum est corpus.

Idem impendet periculum ex corticis usu, si evacuationes aut excretiones ante febrim aut ejus vi cohibitæ fuerint; juvenis scabie laborabat, & simul salivæ profluvio;

fluvio; at accedente febris evanuit scabies, & deinde se proripuit salivatio; nil profectò impedire videbatur quin vocaretur in auxilium febrifugum peruvianum, imò & eventu comprobari visum est, nam paroxysmi filuerunt; sed tunc prodiit parotis cum inflammatione, dolore & febre acutâ; ægro interim opem tulit natura, quæ per sudoris & urinarum vias, tum crassioribus sputis mali exhaustit fomitem; omnia in statum naturalem post dies quinque restituta erant.

Sacerdos sexagenarius fistulâ ani ichorem fundentis laborabat, eique pedes dudum tumentes erant; is tandem in tertianam duplicem sub æstivum solstitium incidit, tunc autem exaruit fistula & pedum œdema evanuit; ut febris igitur, tanquam præcipuo malo, afferretur medela, ad kinam-kinam deventum est; protinus quidem desierunt accessiones; sed pulsus à naturali statu aberrat; æger somnolentus, ingenio tardior, imò & hebes visus est, tandem capitis affectus graviores evasere, febris nova adorta est, & paralysis in limine videbatur, ideo intermissus febrifugi usus, & aliis remediis res transacta est.

Vir annos tres & sexaginta natus quotannis insueto cutis rubori, prurigini & bullulis inde se efferentibus obnoxius erat; is
cùm

cùm instaret tempus ejus excretionis jamque ipsius indicia apparerent, febre tertianâ correptus est; tunc in auxilium vocatus est cortex peruvianus, & eo quinta accessio sublata est; at cùm omnia in melius verti viderentur, ipsâ horâ quâ paroxysmus sextus expectari potuisset, apoplexiâ oppressus æger, vitâ functus est.

Cùm podagram petrolei inunctione abegisset quidam, in febrem duplicem tertianam incidit; accessiones certorum remedium operâ obscuratæ sunt, inquit *Albertinus*, & ne quid pejus accideret cortex peruvianus adhiberi cœpit; febris remisit quidem, sed postea intumuit abdomen, sævierunt dolores vagi, intercessit gravedo, & tandem febrilis vis gravior fieri cœpit atque atrocior; tunc febrifugi modò dicti dimissus usus, & purgantibus solis liberatus æger.

Mulier scabiem abegit inunctione sulphuræâ, & dein in febrem duplicem tertianam incidit; adhibitum est febrifugum peruvianum, ejusque beneficio per aliquot dies restitui visa est ægra, & tamen sine crisi, ut inquit *Albertinus*; febris ergo gravior exorta est cum oculorum tantâ inflammatione ut alterum amiserit, alius verò immedicabili vitio laborarit.

Ex his autem quod enixè practicorum
ulte-

ulteriori committendum observationi & commendandum; ex his, inquam, sequitur summam rationem esse habendam excretionum quæ suppressæ fuerint; noxios humores in partes internas à cortice peruviano detrudi posse; eis in ejus usu aperiendam esse viam quâ excernantur; nulla magis ejusmodi remedio accommodata esse colatoria quàm ea quæ in intestinorum cavum se exonerant; ideoque iis esse deducendum quod noxium esse potest reliquo corpori; sed de his aliàs erit dicendi locus.

CAPUT VII.

Quanam cautelæ adversùs noxios cortices peruviani effectus adhibendæ sint.

EX his sequitur non ejusmodi esse remedium hoc, ut statim in quâcunque febre exhiberi possit: immota & certa manent interea, quæ de ejus diximus viribus; & primò quidem rarò omnino occurrunt, qui ipsi exprobrantur lethales eventus; deinde verò eorum qui id usurpârunt imprudentiæ tribuenda sunt omnia infausta, quæ per vulgi aut quorundam Medicorum ora adversùs hoc remedium circumferuntur;

tur; nam si servatis servandis id assumant ægri, hæc nusquam timenda sunt; ideo tantum de iis egimus, ne tam eximiæ panacæ usus in abusum verteretur; eidem autem proposito insistentes, cautelas in hoc usu adhibendas trademus.

Et primò quidem naturam sequi ducem in febrium intermittentium curatione operæ pretium est; atqui eæ autumno accedente aut incipiente insurgunt, eoque procedente veluti fixiores evadunt, fixissimæ verò per hiemem; sed cùm calore æstivo exfusetur vaforum & sanguinis vis, evanescit sponte febrile venenum; tunc scilicet rarefiunt partes & laxantur cutis spiracula; ut autem curentur febres, eadem præstare debent remedia, aut quod eòdem recidit, æstiva temperies est corpori concilianda; calor ergo internus molliter fovendus, & transpiratio promovenda; ita conducit cutaneæ hæc evacuatio, ut si exhibito cortice leni longoque madore perfundatur corpus, curatio certa sit; è contra verò eam sperare non licet, si adfuerit cutis siccitas.

Sed quod rei caput est, & omnia complectitur necessaria in corticis peruviani usu, non possunt eo curari febres, nisi vi-geant aut restituantur partium internarum functiones; quoties inerit visceribus labes, toties ferme incassum adhibebitur remedium
hoc;

hoc; si fortè eo devicta per aliquod tempus deliteſcat febrilis vis, brevi ſe iterum prodit, qualis antea fuerat; è contra verò internis organis officio ſuo fungentibus, eadem facilè ſe proripiet; nec verò tunc cortici quidquam ferme addere neceſſe erit; ſatis eſt ut eo ſolo ſanguis imbuatur; ita vigent haud dubiè omnium partium munia, cùm nullis aliis præmiſſis medicamentis, illius remedii ſolis viribus curantur ægri.

Impenſè igitur enitendum ne in viſceribus ſtagnet ſanguis; ideòque imprimis, quam commendavimus venæ ſectio, adeo neceſſaria eſt; at non minùs in promovendâ bilis ſecretione inſiſtendum; eâ enim vigente faciliùs mali cauſam attingent remedia; mitiora enim erunt omnia ſymptomata, non tanta erit frigoris febrilis vis, non tantus in paroxyſmis æſtus, non adeo profuſi ſudores ægros exhaurient, non ita denique acres ſient cæteri humores; eò autem minùs hæc erunt metuenda, ſi abſit cutis ſiccitas & ideo tranſpirationis habeatur ratio.

At ſtomachi imprimis functionibus proſpiciendum; ſi enim malè ſe habeat, aut ſolummodo cibos averſetur, non licet tunc à cortice peruviano, quamvis huic parti dicato, febris ſperare curationem; imò
ejuſmodi

ejusmodi adhibito remedio vires novas acquireret morbus hic ; tunc enim ut plurimum inuritur ventriculo doloris & ardoris sensus, qui pulmonem ipsum, uti diximus, attingere solet ; si autem è contra appetitus vigeat, signum adest certissimum, fore ut brevi restituatur æger ; pauci saltem admodum occurrunt, aut ferè nulli qui cibos acriter appetentes, à febre non liberentur.

Tertia pars ad cujus functiones respiciendum, est intestinalis tubus ; si enim non satis lubrica sit hæc via, erit omnino difficilior, ut diximus, febrium curatio ; imò eas radicitus tollere frustrà ut plurimum tentabimus, nisi alvi fervetur laxitas ; cortici ergo peruviano semper addendum aliquod lene purgans, quo ea promoveri possit ; lene, inquam, & peristalticam vim solummodo exsuscitans ; nam si intestinorum tunicis admoveretur acrior stimulus, possent concitari turbæ, quæ febrilem æstum accenderent ; si verò nimia esset evacuatio, diffuere posset cum fæcibus alvinis febrifugi vis.

Nec minùs profectò renum functionibus, quamvis febrili causæ non ita patere videantur, consulendum est ; perturbantur eæ ut ex urinis conjicere licet ; cùm parcius effluere soleant & crassiores sint, fieri potest ut obstruantur earum colatoria ; id eò

magis metuendum quòd variè & facilè in morbis afficiantur; cæcæ reperiuntur v. g. sæpissime in corticali substantiâ cavernulæ, cæque lotio turgentes; quindecim & aliquando plures mihi in eodem rene occurriffe memini, atque hoc non animadvertisse observatores sanè mirum est; ut autem id, tum aliud quodcunque præcaveatur vitium, diluentibus & diureticis refrigerantibus incumbendum; nullum mihi dubium est quin, iis prætermiſſis, pueri & alii calculis obnoxii fuerint.

Occurrit interea, siue ob earum partium affectus, siue aliis de causis, vitium, quod febrium intermittentium curationi maximè adversatur; est scilicet ubi in his acriori æstu ferveant ægri; atqui si tunc exhibeatur cortex peruvianus, nusquam succedet; imò si urgeatur ejus usus, noxius omnino esse poterit; ex eo major orietur incandescencia, acerrimi fient humores, exacerbabitur paroxysmorum vis, imò febris in continuam abire poterit; aut si fortè sufflaminetur, metuendum sanè ne impendeant multa alia, de quibus jam egimus; nec profectò quidquam aliud in interno partium ardore ex remedio adstringenti & amaro expectare fas est; stimulus enim stimulo, & veluti ignis igni additur.

Ita frequenter febrium curationi adversatur

fatur hic ignis, ut quoties in earum præcipuè initiis ipfas cortice peruviano non attingi observavi, toties ferme ardorem in visceribus suspicatus sim; hâc autem suspitione longâque experientiâ ductus hujus corticis usum intermittendum putavi; apozemata sola ex herbis refrigerantibus & aperientibus addito crystallo minerali præscripsi: his nempe brevi mitescunt omnia, & febris deinde febrifugi viribus patens facilè oppugnatur; est hoc adversus hujus morbi contumaciam arcanum, quod rarò admodum me fefellit.

Nota.

Hinc videre est quàm perversâ methodo febres curare aggrediantur, qui nullo discrimine kinamkinam statim ingerunt, aut qui magnam ejus copiam brevi temporis spatio exhibent; potest quidem aliquando esse innoxius, imò & scopum attingere; eo enim ad unciam unam intra sex aut octo horas præscripto, sublatae sunt febres; sed in universum tuta non est præcepta hæc medendi ratio; inducitur statim gravitatis & constrictionis sensus in ventriculo, sitis intensior urget, dolores insurgunt in hypochondriis, excitatur calor urens; hæc denique omnia alium in morbum abeunt, in icterum v. g., in lienis intumescientiam, nec rarò in febrem continuam, quæ his omnibus aliquando minùs est periculosa.

Ex ante dictis non minùs patet quàm in-consultò exhibeatur idem remedium in febrilis frigoris invasione; equidem cum ipso etiam vino aut spiritu vini mixtum febres aliquando abegit; idem, ut diximus, additis jalappâ vel agarico præstitit; sed ne quis malè suadâ experienciâ in errorem deduci possit, in memoriam revocandum periculosissimis medicamentis non rarò curatam esse febrim; sicut autem summæ dementiæ esset his infidis experimentis confidere, ita insanum prorsus esset similibus induci argumentis ad corticem peruvianum in frigore febrili exhibendum.

Quid scilicet expectari tunc potest ab ejusmodi remedio, dum, ut diximus, constricta rigidaque sunt omnia, dum ventriculus ipsam aquam calidam vix ferre potest, dum stagnat sanguis in venâ portâ, in auriculis cordis, & in ipso pulmone; anxietates profectò exsurgent inexplicabiles, intendetur frigoris vis, paroxysmis addentur vires, pejora autem experti sunt ii qui olea stillatitia vel alia calidiora, dum rigerent & horrerent partes omnes, adhibere ausi sunt; nam inde gangræna & mors brevi aliquando successit.

Inconsultâ hâc medendi ratione, suffocatur necessariò salubris naturæ conatus; crisi quâdam expelli febrile venenum jam innui-

innuimus; eam observaverat *Galenus*, ipsamque primis diebus sui præbere indicia asseruit; ea autem in urinis se produnt, non equidem in lateritio crassoque sedimento, quod semper febris vigentis signum est, sed in albâ eâque crassiore hypostasi; non minùs tamen aliarum secretionum excretionumque operâ judicatur febris intermittens; secedit ejus causa tum per alvum, tum per cutis spiracula; atqui his omnibus adversa est turbulenta methodus; non recluduntur eâ succis eliminandis dicatæ viæ, & acris excitatur calor, &c.

Abſque crifi equidem tolli febres corticis peruviani operâ plerisque perſuaſum eſt; nam veluti uno ictu eas aliquando eliminat, nec tamen evacuationes per alvum, aut per urinæ, ſudorisque ductus molitur; eas ſaltem ſibi non occuſſiſſe multi tradunt; ſed dubium omnino eſt an naturæ motus accuratè obſervaverint; cùm hoc remedio curatur febris, non ſemper adeo conſpicua eſt crifiſ; ſi quandoque ſubitò & quaſi cum impetu fiat, ut plurimum leniter & ſenſim per vias quaſdam certo temporis ſpatio ſe ſubducit febrile venenum.

Hoc ſaltem certum eſt, quòd niſi evacuationes naturales, quæ jam erant compreſſæ aut turbatæ, reſtituantur, nuſquam perfecta obtinebitur curatio; atqui reſtitu-

tio hæc species criseos est ; imò propria ejus indicia , si attentè explorentur , nusquam ut plurimum latere poterunt post certum tempus ; mirum est profectò observationes , quibus tota inniti debet medicina , & quas semper in ore habent tot Medici theoriæ adversi , adeo negligenter esse institutas.

Tot & tantis argumentis nititur doctrina hæc , ut de ipsâ nullatenus dubitari posse videatur : ego qui tantum kinækinæ tribuendum , & jure quidem , censeo , ad cohibendos paroxysmos multum posse crediderim ; sed ad perfectam curationem præterea requiri pro certo habeo ut circuitu vigente excernatur vel subigatur febrile venenum ; dubium non est v. g. quin remaneat ejus fomes primâ die quâ febriles insultus sublati sunt ; nam in eos brevi erumpet , si tunc intermittatur febrifugi usus ; atqui diebus subsequenter eodem modo rem se habere statui potest ; ideo purgantia incautè adhibita toties sopitam febris incandescientiam exsuscitasse feruntur ; protrahendus est ergo corticis usus , donec natura opus suum absolvat ; necessaria est nimirum quædam crisis species , quæ fortasse , repressâ febris vi , veluti sponte fieri potest , sed quæ ut plurimum aliis juvanda remediis , & nonnisi temporis lapsu adduci potest.

Ob-

Objiciet fortasse quispiam vi corticis specificâ deleri sensim febrile venenum; id profectò, si omnino negare non liceat, non tamen certo niti argumento statui potest; experienciâ liquet tantummodo hoc remedio vires addi circumeuntibus liquidis, iis fluorem conciliari, promoveri secretiones, ut diximus, & restitui partium functiones; atqui ita ad crîsim multum quidem conferre potest; eâ interim eliminetur oportet febrile venenum, aut ejus immutetur natura & infringatur vis.

CAPUT VIII.

De methodo observandâ in cortici peruviani usu.

NON aliis quidem præceptis opus esse videtur, ut kinækinæ instituaturs usus, sed in eo veluti manu duci oportet; nec in re tanti momenti, licet cuivis obviâ, ullum est quod leve videri possit præceptum; methodum itaque longâ experienciâ nixam, & ex iis, quæ jam diximus, deductam trademus.

Statim autem decernendum quandonam exhibendus sit cortex? inutilis quidem vi-

detur quæstio hæc, cum, uti diximus, nil in paroxysmo moliri oporteat; sed ut emeticis & purgantibus, ita huic febrifugo aliena à naturæ motibus tempora præfixit nonnullorum impatiens sedulitas, cum primum scilicet in Europam advectum est, binæ ejus drachmæ sub paroxysmi ingerebantur adventum; atqui plurimis pessimè cessit intempestiva hæc medendi methodus; hinc tetra symptomata mortesque subitæ quibus infamatum est salubre medicamentum; hoc verò infausto eventu respicientes Medici per solum apyrexiaë tempus feбри fugandæ incumbere didicerunt; sit igitur *canon* perpetuò observandus, in remissione tantum aut perfectâ quiete cortici peruviano esse locum.

Et primò quidem, præmissis præmittendis, venæ sectione scilicet, ventriculi & alvi expurgatione, atque aperientium usu, potest exhiberi ille cortex solus à drachmâ unâ ad drachmam unam cum semisse; ita autem sunt distribuendæ ejus medicamenti doses, ut per intermissionis tempus drachmæ quatuor aut quinque assumantur, seu plus seu minus pro circumstantiis quæ variæ omnino esse possunt; sic curatæ sunt & curantur innumeræ febres, debito tamen servato regimine; ab eo quidem recesserunt qui primis temporibus in usum vocârunt

cârunt remedium hoc ; illo scilicet assumpto cibum itatim ingerendum putabant , at à ratione & experienciâ id æquè alienum est ; jusculis tantum , ut jam præcepimus , nutriendus æger , donec febris recesserit ; tunc ad pleniorum victum , prout res feret , devenire licebit.

Interea observandum an innocuè à stomacho recipiatur remedium hoc ? an ciborum exsuscitetur appetentia ? an levis oriatur mador quo perfundatur totum corpus ? an alvi adsit laxitas ? an denique urinae nativus restituatur color ? his autem deficientibus , aut non ritè se habentibus , purgantia lenia , tum aperientia , & refrigerantia in auxilium vocanda ; addere scilicet oportet cortici pulverato arcani duplicati aut tartari vitriolati vel pulveris temperantis Stahlii sufficientem dosim , ut laxetur alvus ; seu potius ne ad ea aut similia in curationis tandem decursu devenire cogamur , hæc ipso initio omittenda non sunt.

Sed quoniam gravior sæpe est stomacho , ut jam dictum est , pulveratus cortex , & quia biliosum , acerrimumque magma in primas vias potest per certum tempus affluere , alio modo remedium illud præscribendum putavi ; post exhibitum namque emeticum , statim atque per febrim licet ,
apo-

apozema jam memoratum usurpare soleo ; illius autem assumant ægri oportet cyathum unum sive uncias quinque aut circiter secundâ quâque horâ ; post tertiam tamen dosim trium horarum spatium interjiciendum est ; ita porrò pergendum donec apozematis libræ duæ ingestæ fuerint ; non aptius profectò feбри impugnandæ & alvo simul laxandæ adhiberi potest remedium ; id tamen parciori dosi pro variis casibus exhiberi potest.

Non solum alvum laxat , sed non leviter aliquando intestina expurgat decoctum hoc ; nam ea , ut diximus , cortici peruviano inest vis , ut si levissimus ei addatur stimulus , veram purgantium energiam adipiscatur ; id quidem minùs mirum videri debet , cum ipse , nullis aliis admixtis , non rarò alvum moveat ; primâ tamen aut secundâ vice id frequentius est , quàm in protracto illius usu ; tunc enim pristinam vim purgantem amittit ut plurimum , imò adstringens fit ; excipienda sunt solummodo quædam corpora , quæ eo semper purgari solent.

Quod verò nemo , nisi experientiâ edoctus , expectare posset , est ubi cortex instar drastici medicamenti , sine dolore tamen acriori , intestinalem moliatur evacuationem ; in certis constitutionibus vidi ægros vige-

lies alvum deponentes ; nil tamen assumpserant ii, nisi apozema jam memoratum cum salis Glauberi drachmis duabus aut tribus ; aliquando hæc alvi dejectio indefinens videbatur ; primâ tamen die aut secundâ solummodo copiosa esse solebat ; ita mihi placuit olim hæc purgandi ratio, ut in sanis corporibus eam experiri voluerim ; sed me fefellit eventus ; in iis enim non eandem vim exerit cortex, unde ea febribus solis circumscribitur.

Cùm autem tantâ vi intestina sollicitat cortex peruvianus, ab omni cathartico abstinendum ; inde enim fieret, ut in sanguinem non deferretur febrifuga vis, & per vias delaberetur infernas ; præterea in visceribus concitari possent turbæ ; his autem fortasse acrior induceretur febris ; non oportet interea deterreri, si quinquies aut sexies moveatur alvus, idque primâ aut secundâ die ; hoc curationi nusquam obfuisse observavi, imò ad eam multùm conferre potest, ejiciuntur enim pravorum humorum reliquiæ ; sed dein aut post aliquot dies subsistat oportet, aut arte compescenda est hæc diarrhœæ species, salvâ tamen quâdam alvi laxitate ; decoctum ergo solum cum leviori nitri dosi exhibendum est, vel addenda quædam quibus stimuli purgantis temperetur vis.

Si

Si ergo purganti decocto leniter tantummodo laxetur alvus, eo nil vetat febris curationem profequi; succedet ea melius quam aliâ quâcunque ratione; facilius sibi in sanguinem aditum faciet dilutum hoc remedium; ei nihil inest nisi quod febrili veneno potest occurrere; hoc habet solummodo incommodi, quòd magna liquidi ingrati copia haurienda sit; unde repugnantibus ægris ad alia deveniendum, quæ idem præstare possint; exhiberi nimirum poterit pulveratus cortex; expurgatâ enim jam alvo stomachus hunc facilius feret, addendi tamen digestivi, & aperientes sales, &c.

Aliis variisq; modis potest exhiberi pulveratus cortex, ut jam diximus; multi huic rhabarbarum solent addere; » longâ, inquit *Meadius*, me docuit experientia necesse planè esse exiguam portionem rhabarbari remedio huic admiscere; eâ scilicet ratione ut alvus bis saltem quotidie deiciat..... at cautio tamen erat ne ultra modum purgare pergerem; idcirco cum jam drachmâ una aut altera assumpta fuerit, ab exinanitione desistere soleo, & celebris hujus antidoti usui per se infistere. «

Nec profectò quin feliciter cesserit rheum in multis inficiari potest; leniter alvum movet

vet & stomacho amicissimum est ; si quid ei exprobrari possit , maximè calor , quem concitat , & qui febre laborantibus tantopere noxius esse potest ; unde temperetur oportet remedii hujus excalesciens vis ; metuenda est ea in certis corporibus , tene-riori textu donatis , & quorum viscera faciliè incandescunt ; certæ etiam febres eam non ferunt , ipsâque exacerbantur ; verum fortè est quod dixit *Duretus* , rheum nimirum vitam hepatis dictum esse , cum ejus mors potius dici possit : quodcunque autem feligatur purgans , satis erit si id primæ tantum corticis dosi quolibet mane admisceatur ; ita per reliquum diei tempus purum putumque febrifugum exhibere licebit , nisi fortè necesse fuerit ejus etiam refrænari vim ex quâ æstus major potest insurgere ; hinc temperantibus præcaveatur oportet , & ita certissimè delebitur febrile venenum.

Non equidem eorum remediorum operâ statim desinet febris in genere ; imò aliquando sequens sive primus post assumptum apozema paroxysmus gravior esse poterit ; idque fortasse ob turbas à purgante medicamento excitatas ; ut plurimum tamen remittet ejus paroxysmi vis , & nonnunquam penitus se proripiet ; tertius saltem ferme semper evanescet ; tutò ergo & citò curari poterunt ejusmodi methodo inter-

termittentes febres ; unde graviter errasse censendum est eos qui cortici peruviano adversam esse purgantium vim asserere non dubitârunt.

At in universâ rerum naturâ nil perpetuum est ; sunt febres quæ plus minùsve obfistunt ; imò occurrunt quæ nequaquam primis obsequantur remediis ; in genere autem statui potest quod si secundo aut tertio paroxysmo non imminuatur saltem febrilis vis , vix speranda sit curatio à cortice peruviano ; videndum tunc superest num sufficiens sit adhibita ejus dosis ? num præmissa sint quæ præmitti debuerunt ? num laxior sit alvus aut nimium adstricta ? si in iis omnibus nil reprehendi aut desiderari possit , immutetur oportet curandi methodus , & à modò dicto febrifugo abstinendum.

Si verò ejus operâ desinat febris ; non statim ab eo desistendum ; firmanda est enim cura , & febrilis fomes penitus restinguendus ; id eò magis est necessarium quòd per curationis initia sæpe statis horis experiuntur ægri leves capitis affectus , oscitationes , caloris imminutionem , somnolentiam , aut quendam denique corporis non bene se omnino habentis sensum ; hæc quidem sunt veluti quædam tantummodo præteriti mali monita , sed in veram febrim
priori

priori similem possunt erumpere; exhiberi ergo oportet corticem peruvianum, donec devicta sit penitus morbi causa; quandiu autem protrahi debeat ejus remedii usus, nequaquam definire licet; pendet id ex multis quæ apud ægros singulos variè occurrunt.

Interea tradi possunt quædam leges ad quas omnia reduci possint præcepta; oportet nimirum ut per sex vel octo dies post febris discessum certa adhibeatur corticis peruviani dosis, ut deinde ea sensim imminuatur per idem aut circiter temporis spatium, ut citius vel ferius remedii illius intermittatur usus, prout partium functiones melius aut deterius se habebunt, ut denique nusquam securus sit Medicus, quoties aliquid deerit in bilis secretionem, in alvi laxitate, in urinarum colore & copiâ, in ciborum appetentiâ.

En methodum quæ aliis anteferenda mihi visa est; sed sunt aliæ corticis exhibendi rationes, de quibus nil detractum velim; quædam sunt certis corporibus magis accommodatæ; hæ teneriori partium textu donatis, illæ robustioribus; aliæ citius febrem tollunt, aliæ longiori indigent temporis spatio; sunt autem innumeri casus in quibus à viâ solitâ recedere cogimur; unde noscendum, imò experiendum sæpissimè,

me, quod à variis Medicis est excogitatum; adhibuerunt illi idem & specificum remedium; methodus autem variè esse potest pro ægrorum febrisque naturâ; propriisque experimentis quemque duci æquum omnino est.

Non alia tamen eâ quam præscripsimus potior est curationis ratio; eadem autem esse debet, tum in simplici intermittente tum in compositâ, in eo tantum à simplici intermittente differunt febres duplicatæ v. g., quòd major sit earum vis, & quod breviora sint paroxysmorum intervalla; ex his ergo duobus peti necesse est quod curationi addatur, aut quod à simplicium intermittentium curatione recedat.

Et primò quidem vis febris intensior, cum pejora minetur, majorem postulat cautelam sive apparatus in primis adhibendis remediis; strictior scilicet imperanda diæta, magis diluendus sanguis, temperandus calor, aperientium usus commendandus; sed imprimis evacuantibus ano & cato impensius incumbendum, ut subtrahatur quodcunque febrili veneno vires potest addere; deinde verò, ferius tamen, ad febrifugum deveniendum, nisi fortè res maximè urgeat.

Si quâ autem in febre cortex pulveratus statim exhibendus non sit, maximè in tertianâ

tertiā duplici; apozema jam præscriptum in usum vocare satius & tutius erit; nam copiosior tunc humorum acrim & putridorum proventus; unde patet remedii simul evacuantis & febris fugandæ idonei necessitas; cum verò paroxysmi non ita multum distant alii ab aliis, cyathum unum alterā quaque horâ exhibere oportet: hîc tamen nil statueri licet quod semper sit observandum; sufficiet *canon* iste certissimus, breviori tempore esse præstandum, quod in tertianâ simplici longiori solet præstari intervallo.

Ita tollitur ferme semper tertiana duplex; & primò quidem solis adhibitis præparantibus remediis omnia mitescunt, & aliquando in simplicem tertianam facessit febris: si verò id non sic successerit, eodem modo se proripere incipiet adhibito febrifugo; seorsim nimirum sæpe curantur hæ febres, ita ut una statim ex duabus tertianis evanescat, remanente, uti diximus, alterâ; utraque tamen simul sæpius & quasi uno ictu sufflaminatur; cum autem sic vel aliter evanuerit febrilis motus, tunc decoctum simplex aut pulvis exhiberi poterunt, cum certâ salis cujusdam digestivi dosi, vel sine eâ, prout res feret.

CAPUT IX.

An quartana febris peculiarem sibi vindicet curationem.

SPECTANT hæc quamlibet intermittentem febrem ; videndum tamen num quid peculiare sibi quartana vindicet ; fuit autem hæc habita veluti Medicorum & ægrorum crux , ante inventum corticem peruvianum ; imò ei vix obsequi etiamnum à multis creditur ; si eo , inquiunt , curata sæpe videatur , sæpe non nisi per certum tempus se proripit ; ea non rarò hiemem transilit ad ver aut æstatem usque , & temporis beneficio potiùs quàm febrifugis devicta abscedit.

Fatendum equidem inesse huic feбри aliquid peculiare ; in eo scilicet præsertim ab aliis abludit , quod altiores videatur agere radices , nisi statim ei occurratur ; at si recens sit , nullum est dubium , quin methodo jam traditæ obsequatur , imò ausim asserere , eam æque facilè ac aliam quamcunque curari posse ; cùm tamen in febrem magis contumacem degener abire possit , cautelæ quædam adhibendæ sunt , quæ recidi-

cidivam toties cortici peruviano & Medicis exprobratam præcaveant.

Statim quidem, nisi leviora sint febris symptomata, strictior est imperanda diæta, licet eam duorum dierum induciæ postulare non videantur; ita nec immeritò sensisse videntur quidam ex vetustioribus, qui primis diebus aquam solam assumendam censuerunt; cùm verò ut plurimum ita sibi temperare nequeant ægri, solis jussulis statim, & deinde levioribus omnino cibis, nutriendi sunt, idque per octiduum, sive saltem donec per tres quatuorve dies tentatum fuerit febrifugum peruvianum.

Certò proficiet hæc victus ratio, si recentes fuerint febres; sin autem per certum tempus excurrerint, minùs quidem efficax erit diæta; at non ideo est abjicienda, imò impensius, saltem per certum tempus, initio imprimis susceptæ curationis, est commendanda; metum fortasse incutient nonnullæ observationes his præceptis adversæ; quin tamen præjudicatâ opinione institutæ sint nullus dubito; sanctè affirmare possum hanc medendi rationem ipsis senioribus magno fuisse adjumento; si viribus consulendum esse negari nequit, prout eæ steterint vel defecerint, plus minusve diætæ incumbendum.

Interim non succedet ut plurimum sine

venæ sectione ; unde si per vires liceat ; semper tentanda est ; mirum sane ab ejusmodi subsidio tantopere abhorrere quosdam inter recentiores ; defluxit ab *Sydenhamo* prima erroris labes , & deinde alios opinione ductos infecit ; si quandoque deplenda vasa censeant , non id ratione febris , sed plethoræ causâ , necesse dicunt ; tum ut emeticum absque minori periculo adhiberi possit ; sapientior *Riverius* edixit , ne iis crederetur , qui *sanguinis missionem non admittunt* , nisi illius redundantia per venarum turgentiam aliaque signa apparuerit.

Tanta inducitur mutatio ejusmodi evacuatione , ut eâ peractâ aliquando se propriat febrile venenum ; si verò remanserit , statim infringitur ut plurimum ejus vis , quin etiam testari possum me absque tali auxilio multas non potuisse curare quartanas ; unde , si non audiendus *Botallus* , dum asserit sanguinis missione eas perfectè curari , eandem multum ad ipsas abigendas prodesse negari nequit.

De vomitu nulla ferme incidit controversia ; is tanti est momenti ut , si prætermittatur , remaneat ut plurimum febrilis fomes ; nec profectò ab eorum sententiâ abfuerim , qui non unâ vice , sed nonnumquam pluries , subvertendum crediderunt ventriculum ; ita debellatæ sunt plurimæ
quar-

quartanæ, in quas nulla omnino erat aliorum remediorum vis; purgantia interea non tantopere urgenda sunt, pravorum enim humorum proventus non tantus esse solet in ejusmodi febribus; expedit nihilominus, ut alvi fervetur laxitas.

His peractis dubium non est, quin ut plurimum abscedat febris, si eâ methodo, quam præscripsimus, impugnetur; cùm tamen maximè contumax esse soleat, est exhibenda major febrifugi copia; quin etiam eundem in scopum, alia quæ vim habent penetrantem ei remedio immiscere sæpissime præstat; aromatica quædam lenia cum sale cichorii aut absinthii, methodo Tachenianâ paratis, adhibenda sunt; cascarrilla imprimis, cui summa adversus quartanam vis, in auxilium vocanda est; at præstantiores insunt dotes serpentariæ Virginianæ, unde, licet calidior, audacter est exhibenda; consentiunt hæc cum experientiâ quotidianâ & cum Antiquorum ipsâ methodo; calidiora nimirum solebant præscribere, non ubique equidem, sed certis temporibus: eandem mihi ineunti viam subiit aliquando ipsius castorei tentare vires; cùm autem ejus grana duo cum quâlibet corticis dosi mixta exhibuissem, ejus mixtionis summam miratus sum efficaciam.

At in hoc febris genere, si uspiam, est

certis remediis, de quibus jam egimus; locus, idque imprimis, si stent viscerum vires; cortex peruvianus v. g. cum pulvere viperino, cum millepedibus, aut cum centauro minori, vel cum agarico exhiberi potest; ego verò in tenuioris fortis hominibus, in robustioribus imprimis, & in illis in quibus nulla prodiit partium internarum læsio, sequenti remedio frequenter usus sum; pulveris scilicet cornachini grana viginti quinque, agarici grana quindecim, salis ammoniaci drachmam unam, corticis peruviani drachmas quatuor in electuarii formam cum syrupo quodam redigi curavi, & illius dein quartam partem tertiâ quâque horâ exhibui.

Innumeras febres hoc remedio sustuli, & nullis aliis præmissis, sublatas novi, licet jam à duobus aut tribus vigerent mensibus; sed per aliquot dies in ejus usu persistendum, imminutâ solummodo, si necesse fuerit, purgantium dosi; interea ptisana aperiens & leniter cardiaca præscribatur; leviorque non prætermittatur nitri dosi; conferet ea tum ad urinas ciendas, tum ad compescendum calorem internum, qui fortè remediis supradictis concitari posset.

Post devictam eorum operâ quartanam febrim, à corticis usu nequaquam desistendum;

dum ; imò ob impendentis recidivæ metum , diutissime exhibendum febrifugum hoc ; ego verò in certioris prophylaxeos scopum , illud cum tartaro martiali solubili exhibere consuevi ; certum est hoc facile restitui partium tonum , sed quod rei caput est , obstructiones tollit , hepatis colatoria referat , & bilis promovet effluxum ; alia , quæ non minorem habent vim , in similem usum vocari possunt , uti sales digestivi v. g. , plantarum fucci saponacei , & amari , vel foli vel in jusculis adhibiti.

Acriora interim vel calidiora , de quibus modò egimus , licet aliquando in quartanâ febre proficua , cuicunque eâ laboranti exhiberi nequeunt ; eorum non ferunt vim illi ægri , quos debiliores , & si ita loqui liceat , nimium irritabiles finxit natura : in his ergo statim præparantia majori quàm in aliis curâ administranda sunt ; dein verò cortex peruvianus , ut in febre tertianâ simplici , est ingerendus , id est cum lenioribus mixtis purgantibus & aperientibus ; ipsius denique febrifugi excalefaciens vis temperanda est ; decoctum scilicet febrifugum cum borragine & buglossò , additâ terrâ foliatâ , aut nitro vel arcano duplicato , in usum vocari debet.

In senioribus alia non minoris momenti requiritur cautela ; periculosiores nimi-

rum sunt in provectâ ætate febres quartanæ, nam frigore ipso obruitur aliquando vitalis spiritus; si intensior ergo fuerit horroris & rigoris vis, statim ei occurrendum; & primò quidem infringi certò posset emeticis, & dein præcipiti corticis usu; sed in certiolem prophylaxim adhibeatur ea methodus, quæ frigori febrili per sudores avertendo dicata est; sufficiens deinde præscribatur corticis dosis, ut sufflaminentur omnino paroxysmorum reliquiæ; cùm verò in senectute minùs permeabiles fiant partes, viresque earum effictæ sint, acendum imprimis illud remedium stimulo quodam aromatico & sale penetrabili; hæc quidem magis erunt necessaria, si adsit hiemale tempus.

Sed quæcunque adhibeatur methodus, occurrunt aliquando quæ vix aut nullo modo expugnari possint febres; tunc verò eas naturæ committendas ratus, à febrifugis omnino abstinui; solis sub veris adventum aperientibus, bilis secretionem promoventibus, alvum leniter laxantibus curationi spontaneæ viam sternere satius visum est; fuit tamen, ubi, abjectis aliis remediis, ammoniaci salis vires tentare voluerim; in jusculis scilicet ex lapatho & amaris saponaceis, ut ex cichorio & foncho, salis hujus drachmas quatuor mane per aliquot dies

dies exhibui ; ita profectò sæpissime profligatus est morbus, in quo multa incassum expertus eram.

His omnibus de corticis in febre quartanâ usu, addendum quod mihi certò innotuit remedium adversùs ejus febris contumaciam ; aquæ scilicet thermales vi purganti donatæ curationem omnino absolvent, cùm incassum alia omnia tentata sunt remedia ; insigne hoc beneficium retulerunt multi ex aquis Borvoniensibus (A) ; sed & alias idem præstitisse certum est ; cùm nonnulli post ultimum bellum Belgicum febrium contumacium quartanarum tum & etiam tertianarum traherent reliquias,

(A) Sunt ex viribus insignes in Campaniâ, nec olim apud Romanos fuere incelebres, ut patet ex inscriptione quæ ita se habet :

BORVONI. TOMONAE. C. IATINIVS. ROMANVS;
IN. G. PRO. SALVTE. COCILIAE. EX. VOTO.

Est autem *Borvoni*, sive *orvoni*, seu *Verbona* ut apud *Ammonium* videre est, nomen Celticum ex duplici verbo, ex *Berw* scilicet, quod calidum significat, & *von* quod fontem innuit ; unde *Divonia* apud *Ausonius* est fons Deorum ; Prostant ejusmodi nominibus insignita quædam loca, quæ ob thermarum vim frequentantur, & quæ *Bourbon* aut *Boulbon* dicta sunt ; quod verò *tomonam* spectat, erat haud dubiè Nympha hîc loci colli solita ; apud *Cambdenum*, simile quid extat : insculpta cuidam lapidi verba hæc ;

DEO MOVNO CADENORUM,

ab eo referuntur Authore.

quias, non alio auxilio iis liberari & restitui potuerunt, imò teneriora infantium corpuscula inde valetudinem retulerunt.

Dum autem tentantur varia remedia, observandi sunt diligenter naturæ varii motus; inclinatur quartana in lienis imprimis tumorem; colligitur sanguis in vasis mesentericis, in iisque niger & veluti adustus hæerere solet, unde aliquando effluxus periculosus atræ bilis, quæ nihil aliud est quàm sanguis ille antea stagnans, & qui picis instar ex suis erumpit receptaculis; sunt ergo exploranda sæpius hypochondria, ut si fieri possit præcaveantur congestiones, & ne exhibeantur quæ ad illas conferre possent medicamenta.

Non minùs interea nos intentos esse oportet aliis naturæ conatibus qui ad curationem conducunt; dysenteriam, hæmorrhoidali evacuatione, ipsis menstruis erumpentibus, imò graviditate & partu, soluta fertur quartana; dysenteria quidem, si levior sit, & si eâ depleantur vasa mesenterica, in bonis numerari potest; at ex hæmorrhoidibus stillans sanguis plus proficere poterit, eo effluente magis expedita erit circuitûs via per venæ portæ ambages; unde juvandus ejusmodi effluxus, & quandoque proritandus: non tantum spei reponendum in menstruis, nisi fortè priùs cohibita

bita affatim prodeant ; cum iis enim incedere nihilominus febrim sæpius observavi.

Quod graviditatem spectat , casum referam quem celebris admodum Chemicus narrare solebat ; laboravit quartanâ febre ipsius soror per quinquennium integrum , nec prægnatione & partu multiplici levari potuit ; incassum ab illustrissimo *Stahlio* multa præscripta sunt remedia ; nil decessit de febrili typo aut de symptomatum vi ; sed cùm inflicto vulnere effractum esset ægræ brachium , desiit statim morbus adeo contumax ; nec profectò mirum si ita se subduxit ; irâ enim & terrore , tum & valido motu nonnunquam , ut diximus , solvitur.

C A P U T X.

De impedimentis quæ in antecedentibus certarum partium affectibus , aut in variis temperamentis occurrunt.

AT hæc præcepta sequi ubique non licet ; ea est sæpe corporum natura , partium constitutio , ipsius febris ratio , symptomatum varietas , ut undique occurrant obices ; ad eos igitur removendos aliâ
ince-

incedendum viâ, aut potius ea, quam jam ostendimus, inflectenda est, ut ad curationem devenire liceat; accommodandus est scilicet corticis usus variis quæ obijciuntur impedimentis, sive in quâdam parte, seu per totum corporis tractum.

Ventriculus ipse cortici peruviano sæpe reluctatur; ejus nimirum saporem, licet non ita ingratum, ferre nequit; ne verò ejusmodi offenderetur remedio, huncce haustum concinnavit *Fullerus*; adhibuit ille corticis pulverati drachmam unam, aquæ cardui benedicti uncias tres, aquæ epidemicæ drachmas duas, & fyrupi caryophyllorum tantumdem; in his profectò simul mixtis nil adeo gustui adversum occurrit; metuendum solummodo ne calorem concitent; ad hunc ergo avertendum, nitrum admiscendum est, & ptisana refrigerans & aperiens est adhibenda.

Eodem vitio laborat corticis in vino generoso infusio; ut autem minùs ingrata sit, quidam vino utuntur Hispanico, sed postquam peracta fuit, bulliat jubent aliquantisper; ita scilicet vinum hoc vim ipsi insitam credunt exuere, tutòque posse præscribi; si tamen cuidam vino sit locus, maximè vino Rhenano, utpote magis aperiendi & magis temperato; nihilominus, ut sæpius dixi, calidiora sunt semper ejusmodi

modi remedia ; plus possunt in febres quæ jam sunt effcætæ , quàm in febres validiores. & recentes : extractum aqueum cum pulvere Stahlî mihi longè videtur antefendum ; potest ex iis concinnari bolus cum syrupo quodam grato & cardiaco.

At non in repugantiâ solummodo , sed in ipsius ventriculi læsis functionibus occurrit sæpe impedimentum ; ne ingeratur scilicet cortex peruvianus , vetat aliquando vomitus pertinax ; *Sydenhamo* , ut obicem hunc tolleret , mos erat , juxta *Riverrî* methodum , succum citri cum absinthii sale exhibere , & dein laudano liquido irritationis fomitem aggredi ; alii audaciùs curationem febris simul moliri tentantes , febrifugum ipsum cum opio vel theriacâ præscribere solent ; ego verò , si febrilis vis non multùm urgeat , eamque ægri tutò ferre possint , ventriculo statim mederi satius existimârim ; eo restituto , curatur faciliùs alius morbus.

Uti ventriculus , ita intestinalis tubus sæpe curationi repagulum objicit ; utroque autem in casu eâdem ratione ægris licet succurrere ; exhiberi nempe potest cortex peruvianus in enematribus ; ita tamen usurpatum pueris magis quàm adultis profuisse observatum est ; sed nihil aut parum omnino proficeret nisi diu in intestino re-

cto

Et o & colo retineatur ; atqui facilè elabitur, idque præsertim si diarrhœa urgeat ; recurrendum ergo ad narcotica, quæ simul cum corticis decocto infundantur oportet ; statuendum solummodo superest, quænam eorum dosis exhibenda sit.

Ego quidem theriacæ drachmam dimidiam, aut sæpius syrapi diacodii unciam dimidiam, cum decocto in quo ebullierat corticis uncia una, adultis præscribere consuevi ; horum beneficio duo ut plurimum affectus sum ; moram primò diutinam fecerunt enemata in tubo intestinali ; paulatim deinde aut aliquando brevi temporis spatio abscessit febris, veluti si ore assumptum fuisset febrifugum ; observari tamen velim quòd si eâdem die hoc repeti necesse sit, imminuenda est narcoticorum dosis ; cavendum nimirum ne nimius inducatur stupor, quod inexpertis sive imprudentibus contigisse memini.

Ut in stomacho, ita in pulmone occurrunt sæpe impedimenta ; nam cum tenerior est ejus textus, & sanguinis sputo aut tussi acriori obnoxii sunt ægri, nequaquam corticem peruvianum ii ferre posse videntur ; sed observandum huic affectui magis adversam esse febrem, quàm illius remedium vim ; unde ab eo abstinere non semper tutum ; cum eâ interim cautelâ exhiberi

beri debet, ut lenientia simul præscribantur ; in hunc ergo scopum radicem althææ aut flores papaveris rhœados corticis decocto addere soleo. Cùm quædam fœmina in tussim incidisset acerrimam, eamque indefinentem, ad ejusmodi lenientia devenire coactus sum, & summo quidem ægræ emolumento ; simul enim & tussis & febris discesserunt.

In certis temperamentis, in cachecticis v. g. & in hypochondriacis, cautelam similiter postulat cortex, pro vario eorum affectuum ingenio ; in iis quædam imprimis pars ægra est, in aliis plura afficiuntur viscera, & nervi inordinatos cient motus ; si ergo calida usurpentur, si cortex peruvianus absque præviâ præparatione aut solus ingeratur, acrior insurget calor, & constringentur ægræ partes ; unde emollientia, leniter laxantia, aperientia, & refrigerantia tum præmitti, tum simul usurpari cum febrifugo necesse est ; si alia ineatur curationis ratio, febris contumacior erit & ingravescet.

Non minora occurrunt impedimenta in virginis chloroticis, seu menstruorum vitio laborantibus ; difficile omnino curantur in iis febres, quoniam tunc adest duplex morbus ; sed acrius urgenti est occurrendum, non neglectâ interim quæ inter-

misit

misit sanguinis expurgatione; eam quidem restituere incassum tunc temporis tentaret Medicus; at ipsi cavendum ne jam obstructis colatoriis nova objiciat repagula, & inordinatos febrisque curationi adversos cieat motus; eniti contra oportet ut magis expedita sit tam salubris effluxûs via, & ne quid inde in alias redundet partes, quarum functiones, jam labefactatæ, magis possent perturbari; maximè autem in ejusmodi ægris præstat, ut statim concitetur vomitus; non minùs enim præcedenti affectui impugnando, quàm feбри fugandæ aptus est; succussionem postulat stomachus, cùm suppressis menstruis malè semper afficiatur huc accedit quod vomitu concitato præcaveatur spontaneus vomitus, in ejusmodi morbo familiaris; rejiciuntur sæpissime omnia fermè ingesta; at præmisso emetico his sternitur via, aut retinentur saltem faciliùs quæ res-pui solebant.

Non minùs interea incumbendum in alvi expurgationem, & in bilis promovendam excretionem; non deficit enim in chlorosi recrementum hoc, ut quibusdam visum est, sed in suis stagnat receptaculis, ibique acerrimum fit, & intensiori flavedine tinctum observatur; inde iterum patet quanti intersit hoc magma in solitas naturæ vias reducere.

Cùm

Cùm his quantum licebit consultum fuerit ad corticem peruvianum devenire oportet; compingendo sanguini & revocandis menstruis aptum omnino est remedium hoc; videndum est tantummodo quâ ratione usurpari possit? & quibuscum remediis conjungi debeat?

Statim autem prospiciendum ne quid stomacho faceffat negotii; unde, si in pulverem redactus cortex adhiberi facile nequeat; in usum vocandum est extractum aqueum; immiscenda huic interim cardiaca & antispasmodica quæ multum opis afferre possunt; cùm verò ad curationem tantum conducere possit alvi laxitas, ejus habenda est ratio; parcior sit tamen oportet purgantium dosis; metuendum enim esset ne in corporibus, uteri morbo vexatis, novæ cicerentur perturbationes, quæ febris curationi obesse possent; hinc cortici cum cardiacis temperatis aliquid quod leviter tantum intestinorum colatoria sollicitet addendum est.

Quod spectat eas febres quæ diutius excurrerunt & in chlorosi non ita rarò sunt pertinaces, eas alio prorsus modo oportet aggredi; præmissis scilicet remediis universalibus, juscula ex lapatho silvestri, & ex cichoraceis imprimis, cum succis antiscorbuticis exhibenda sunt, tum ut pervium fiat hepar, tum ut in collicias uteri simul

adigatur sanguis ; his insuper jusculis addendum est arcanum duplicatum ; in eo enim est vis purgans, & ipsum uterum leniter stimulans ; unde & menstruis & cortici peruviano sternitur via.

Non quidem hanc medendi rationem perpetuam esse velim ; varia enim incidunt in quibus eadem semper esse non possit curatio ; exemplum tantummodo adduxi quo pateat quid postulet febris cum chlorosi conjuncta : sed de his satis superque ; ad alia jam deveniendum.

Pueris febre laborantibus mederi non minùs arduum est ; omnia respuit medicamenta ætas hæc ; hoc tamen in eâ est peculiare , quod minùs periculosè ægrotare soleat ; videre est tenerrima corpora febris intermittenti diu veluti confecta , quæ tamen inde evadant feliciter , idque sæpissime solius naturæ beneficio ; sed faciliùs evaderent , si ipso initio lenis concitaretur vomitus ; vel ipsis à biennio natis ego tartarum ipsum stibiatum præscribere non reformido ; mitiùs enim in eis stomachum subvertit , quàm in adultis , ut certissimâ dedici experienciâ.

Cùm tamen terrorem incutiat vel ejus remedii nomen , kermes minerale in usum vocare satius erit ; eo non ita commoventur aut irritantur nervi , nec ab ejus vi ,
vel

vel in tenerrimâ ætate, quidquam metuentum; non minùs tutum medicamentum est ipecacuanha, sed parcè usurpetur oportet; mihi tot circiter grana exhibere mos est, quot annis nati sunt pueri; vel levissima ejus dosis vomitum concitare potest; nec satis profectò mirari licet quare à quibusdam à drachmâ dimidiâ ad drachmam unam adultis ingeratur; si nocere non observatum sit, inde id pendet quod primo vomendi conatu rejici soleat magna ejusmodi dosis.

Magis proficuum esset hoc remedium, si febrifuga deinde exhiberi possent; syrupus solus ex cortice peruviano sufficeret, si imprimis cum rob sambuci conjungeretur; in eo enim est vis leniter purgans, ita ut variis pueris non aliud catharticum exhibuerim; at si in usum vocari nequeat remedium hoc, ad absorbentia cum rheo, & cum cremore tartari deveniendum; sunt hæc in teneriori ætate vera febrifuga; imò ad alia medicamenta confugere vix in multis opus est; unde, quantum fieri potest, urgenda; licet enim sponte tot evadant pueri, multis intumescit alvus, obstruuntur viscera, hepar in molem assurgit maximam; graviora hæc fient, si perperam adhibeatur cortex; imò si nondum contigerint, ea ipse inducere poterit.

CAPUT XI.

De impedimentis ex ipsa febre, ex vitiis quæ in varias partes inferre solet, & ex perversâ medendi methodo ortum trahentibus.

ALIA occurrunt impedimenta, quæ ex ipsâ feбри originem trahunt, aut ex perversâ medendi methodo; hæc autem vel in genere spectari possunt, vel in se ipsis sigillatim; in genere quidem reduci possunt ad febrium contumaciam & ad abdominis affectus ex iis ortos; quod febrim spectat est ubi ipsa corticem peruvianum respuere videatur; eo enim nullatenus aliquando attingitur, licet præmissa sint quæ curationi viam sternunt; quin imò ipsius corticis vires pro variis temporibus variæ esse videntur; certis enim annis feliciter succedere, aliis verò nocere potius quàm prodesse solet; non magis proficius est nonnunquam in quibusdam locis, in regionibus v. g. uliginosis & mari adjacentibus; varia haud dubiè est veneni febrilis vis; acrius nimirum partibus solidis vel humoribus altius infixum, iis arctiori nexu inheret.

In eâ febrium contumaciâ insanum profectò esset inutile urgere remedium, cum non innoxium esse possit; frustra ad majorem dosim recurrunt nonnulli, ut febrilem veluti obruant fomitem; vel enim sufflamantur tantummodo paroxyismi, remanetque in visceribus morbi causa; vel, ut diximus, ignis igni additur, & magis contumax urget febris; à corticis igitur usu desistendum, & ad diluentia & aperientia redeundum; sed quod rei caput est, emesis imprimis cienda; in eo peccant multi in locis paludosis v. g. quod emeticis, minùs quàm par sit, incumbant; tanta est in febres eorum medicamentorum vis, ut multos, sicut jam dictum est, qui in prophylaxim iis usi sunt, immunes servatos viderim.

Quanti autem momenti sit in hâc febrium contumaciâ cortice peruviano non abuti, ex multis nosse licet; oriuntur ex perversâ medendi methodo varia partium vitia, quæ in reliquam protrahuntur vitam; vidi homines robustissimos qui post febres intermittentes varias experirentur functionum principum læsiones, & in miserandos inciderent affectus; alii melancholici & cachectici fuere, alii obstructionibus fuerunt obnoxii, non pauci varia malorum syndrome confecti vitâ tandem functi sunt;

quibusdam denique gravior & ante constitutum à naturâ terminum incubuit senectus.

In contumaci febrium illarum decursu multa occurrunt, eaque peculiaria, quæ cortice peruviano curationem vetant prosequi; cum in usum vocatur remedium hoc, gravitatis sensum, ardorem, & constrictionem experiuntur multi, ut jam diximus; sunt autem hæc certa curationis impedimenta; vel enim latet affectus quidam in ipso stomachi textu, ut jam innuimus, & tunc ipsi medendum pro causæ naturâ; vel quod ut plurimum occurrit, insunt degeneres praviq; succi, iique mordaces, caloremque inducentes; atque hinc iterum emeticorum patet necessitas.

Non minus occurrunt ejusmodi impedimenta in duodeno aut reliquo intestinali tubo; alvus fit sæpe pigrior in corticis peruviani usu; quæ dejiciuntur veluti urentia sunt, biliosa, flavo-rubra, aut nigrescentia, ita ut his aliquando veluti corrodi videantur lintea; si autem hoc in casu febri-fugi hujus operâ curationem prosequi volumus, malè omnino consuletur ægris; statim quidem præcaveri potuissent hæc omnia lenioribus emeticis usurpatis aut repetitis; purgantia levia, refrigerantia & aperientia, eorumque usus protractus universam hanc sustulissent saburram; nec verò aliud quidquam;

quam, cùm ea per corticis peruviani usum se prodiit, tentandum superest, & ab eo omnino temperandum, donec res se melius habuerint.

Aliquando profectò miratus sum tantum posse levissima remedia, cùm efficacissima incassum adhibita essent: Vir nobilissimus per dies sexaginta febrem quotidie recurrentem passus erat; frustrà omnia adversus eam tentata erant à celeberrimo Medico; eorum tandem & morbi pertinacis pertæsus æger, drachmas duas pulveris temperantis Stahlii quâlibet die per hebdomadam assumpsit, ita tandem restitutus nullum omnino expertus est febris vestigium.

Idem sæpe observavi in aliorum remediorum usu; cùm quidam v.g. in febrem incidisset, ea cortice peruviano exasperata est; tunc autem aliò conversâ curatione, salis ammoniaci flores pluries quâlibet die præscripsit Medicus; leves quidem erant hujus salis doses; pedetentim tamen se subduxit morbus; alia & similia possem referre exempla, quibus constat magnum remediorum apparatus non præstare aliquando, quæ levissimis simplicibusque obtinemus auxiliis.

Sed ut plurimum altiùs omnino respiciendum, ad eorum omnium fontem scilicet, in quo vera sunt impedimenta; pen-

dent ferme semper hæc omnia ex hepate; si autem ab initio laboret pars hæc ob nimiam febris vim, piaculum fanè esset corticem peruvianum exhibere; at si in ejus usu bilis secretio aut excretio lædatur, non minùs ab eo temperandum; si enim urgeatur remedium illud, colligetur biliosum magma, idque crassissimum & acerrimum, veluti retorridum fiet hepar, fæces erunt nigriores, urinæ intensè rubro inficientur colore, omnino lateritium copiosumque erit earum sedimentum; sed ne iis quidem opus est, ut dignoscatur hærere aliquid in hepaticis functionibus, quod curationem impediat; si solummodo lividus sit vultus aut pallidus, vel subluteum referat colorem, etiam cùm febris evanuisse videtur, eam in limine præstò esse pro certo haberi debet.

Ad tollenda autem illa omnia, intermittendus statim corticis peruviani usus, & hepatis tubulos referantibus per aliquot tempus insistendum; in hunc autem scopum adhibenda apozemata ex plantis saponaceis, amarescentibus, ex cichorio v. g., ex soncho & taraxaco; non rarò eorum succum depuratum cum succis borraginis & buglossi in usum vocavi, addito tamen sale purganti, ut arcano duplicato; tanta est vis purgantium in hepatis affectibus, ut
solis

folis jusculis ex lapatho & crystallo minerali eos sæpe sustulerim; deinde verò feliciter, aliàs citius, aliàs tardius, ad corticis peruviani usum redii.

Gravius est impedimentum, si alvus durior evaserit, seu febris vi in eam se exerente, seu remediis perperam adhibitis; duritiei ejus causa est in visceribus modò dictis, ingurgitantur nempe & obstruuntur, ideoque eorum textum non facilè permeat sanguis, in iisque stagnant alii humores; inde, ut innuimus, irritatio quæ fibris rigiditatem conciliat, alvum adstringit, vasorum plethoram in mesenterio inducit; quoties autem hæc occurrunt, nusquam nisi iis sublati febrem curari posse ratum, certumque sit.

Et primò quidem cortex peruvianus tunc saluberrimas suas vires non potest exerere; solâ evacuatione eâque repetitâ potest sua visceribus restitui mollities; non tamen hoc ipse cortex peruvianus, licet purgans sit, imò & quinquies aut sexies alvum moveat, præstare potest, ut sæpissime observavi; inest haud dubiè huic remedio quidam acrior & æstus inducens stimulus, dum intestina ad sæcum excretionem sollicitat; ideo non laxantur eorum fibræ nec aliorum viscerum textus.

Quæ maximè conducunt in hac alvi duritie,

ritie, sunt lenia purgantia; quoties ea mihi occurrit, cassiæ aliorumque similium operâ intestinorum rigiditatem emolliendam curavi; nec quidem mirum si ex iis percipiatur levamen; educuntur acriora excrementa, tollitur putredinis fomes in tubo intestinali latens, infringitur stimuli in nervos agentis vis; ita facilius procedit secretionum & excretionum opus; at in partium textu hæret mali labes; pendet ea ex obstructionibus, stagnationibus & irritatione inde ortâ; atqui his mederi nequeunt levia purgantia; veniunt ea tantummodo in subsidium, quod multum juvare potest.

Hinc ergo patet diluentia, sanguinis circuitum promoventia, alterantia, obstructiones tollentia, ægris posse opitulari; ideo semper cichoracea simul aliaque id genus cum leviori salium stimulo præscripsi; his autem per certum tempus assiduè adhibitis, semper reducem obtinui alvi mollitiem; hoc imprimis in iis febribus, quibus non ita longè ab earum initio mihi mederi contigit, assequutus sum.

Cùm verò diutius excurrerunt febres, non ita successit lenior hæc methodus; cachexia & alvi renitentia gravior valentioribus remediis oppugnanda est; ideo sæpe purgans ex fennâ exhibui, intermixtis tamen semper mollioribus ut cassiâ,

tama-

tamarindis, aut mannâ ipsâ; juscula quidem deinde laxantia & emollientia usurpavi, sed ex lapatho simul, quod tollendis obstructionibus aptissimum est, conficienda curavi; terram interim foliatam, quæ & ipsa penetrantissimum est remedium, per certum tempus addidi, & tandem tartarum martialem solubilem in usum vocavi; ita autem voti compos factus sum, imò & sæpissime ipsas febres fugatas observavi; sed curatio hæc fida certaue non est; postquam ergo subsedit abdomen, certiori febrifugo, id est, cortice peruviano absolvenda & firmanda est.

Hæc autem omnia huc redeunt, ut tollantur obstructiones, ut pro earum ratione varia adhibeantur remedia, ut leviora in leviori partium affectu, valentiora in graviore, in usum vocentur; ut mutetur medendi methodus, prout mutatur morbi facies, ut tandem causæ febrili propriis adjumentis seu specificis res transfigatur.

Hæc medendi ratio quæ variè circa obstructionum causam versatur, multò magis necessaria est, si valde intumuerit venter; non rara quidem est intumescencia hæc absque aquæ collectione; in variis nimirum occurrit febribus & præcipuè in certis epidemiis, imò ipso initio aut saltem non multò post; sæpius tamen post certum decursum

cursum prodire solet vera colluvies ; non modò alvus , sed vultus & ipsa brachia , partesque infernæ intumescunt atqui in hoc rerum statu exulet oportet cortex peruvianus ; purgantia & aperientia , quæ toties hîc commendavimus , sola exhibenda ; diureticis etiam incumbendum ; solo vino , cui baccæ juniperi infusæ additusque sal martis Riverii cum sale prunellæ sæpe usus sum ; eo febres ipsas curavi , totamque sæpius intumescentiam sustuli ; ad febrifugum tamen specificum vel ipsis se subducentibus redire ut plurimum mihi mos fuit , quò certior & firmior esset curatio.

CAPUT XII.

De curatione febrium , quæ cum desierunt , iterùm exsurgunt ; tum quorundam symptomatum quibus stipari solent.

SI tollantur impedimenta jam memorata , facilè tollentur febres , nec quidquam remanebit ex veneno febrili ; sed ea non est ægrorum omnium conditio , ut eo , dum impugnatur , penitus liberentur ; in multis per certum solummodo tempus avertuntur paroxysmi ; eos vel levissima reducit

occafio, vel fponde revivifcunt; ita alternâ vice evanefcentes & redeuntes, per longum fæpe temporis fpatium protrahuntur febres.

His ut occurrerent Medici, varia tentârunt; modò largiorem corticis exhibuerunt dofim, modò verò, ut ipfi vires adderent, varia cum eo mifcuerunt; fatendum profectò quod in plurimis ægris non rarò fuccedat remedium hoc variè exhibitum; cum millepedibus mixtum v. g. aut cum pulvere viperino, vel cum centauro minori febres fufcult pertinales; cum ipsis purgantibus non minùs efficax fuit; vidi multos quibus diu & incaffum magna ejus copia ingefta fuerat, & tamen apozemate aliàs defcripto perfectè curati funt; non ergo in corticis peruviani ufu negligenda funt purgantia, aliaque modò memorata, cum diluentibus tamen & aperientibus exhibenda.

Ego verò his irritis certiore, cum per ægros licuit, amplexus fum medendi methodum; ftatim fcilicet eos lecto addixi, veluti graviore laborarent morbo; hæc curandi ratio à *Sydenhami* præceptis aliena eft; is quidem decubitum in lecto remediis febrifugis adverfum effe cenfebatur, idque etiam in intermittentibus quæ ad continuas vergerent; ego verò, licet aliàs à
fummo

summo viro ægrè dissentiens, situm corporis horizontalem, atque omnium partium quietem multum profuisse observavi; id innumeris experimentis confirmatum, ut certissimum curationis *canonem* proferre non vereor.

Nota

Novi equidem id cum quibusdam non consentire experimentis; refertur in Academia Regiæ Commentariis, ægrum quendam febre contumaci laborantem, non aliâ ratione potuisse sublevari, quam si è lecto exsiliens sedili se contineret; tunc defervescere solebant paroxysmi; at quid eo alterove exemplo, eoque insolenti, probari potest, refragante imprimis quotidianâ experientiâ? nimio quidem æstu urgeri possunt decumbentes, iique melius quandoque se habuerunt, si consurgerent; an autem inde perpetua lex quoscunque è lectulo eximat?

Sed ut ad eos redeam, quibus aliter consultum volui, ipsis tenuissimam simul præscripsi diætam, & aliquando per aliquot dies solius aquæ potum; deinde verò ad aperientium & leniter purgantium usum confugi, eumque per certum tempus protrahendum curavi; ita sæpissime iis solis se proripuit febris; aut si eam superesse contingerit, multum de suâ vi & pertinaciâ semper remisisse observavi; tunc autem cortici

peru-

peruviano facilè obsequitur, & si rite exhibitum fuerit remedium hoc, nullus esse debet recidiyæ metus.

Necessaria omnino est hæc methodus in certis febribus, quæ non rarò occurrunt; est v. g. ubi evanescant paroxyfmi & remaneat pulsus frequens; insurgit imprimis ejus vis, vel post motum quemlibet, vel post pastum, licet sibi nimium non indulserit æger; non malè interea se habere videtur, quia febrifugis utitur, vel jam usus est; sed si à strictioris diætæ legibus recesserit, si consueta repetantur munia, si ad hæc accedant certæ æris mutationes, tunc, inquam, instat febris, quæ amota videbatur; nequicquam autem proficiet licet ingesti affatim corticis peruviani vis, fallaces tantummodo, fugacesque dabit inducias, unde alia, quæ jam indicavimus, auxilia in usum vocanda sunt.

Nec tamen hæc ita dicta velim, ut quoties recrudescunt febres, eas his remediis continuò impugnandas crediderim; est ubi nimium pertinaces sibi relinquendæ sint; si v. g. hieme recurrant, nec facile frænari possit febrile venenum, expectandum donec ver advenerit; imò & aliis temporibus, & in certis temperamentis ab inutili remediorum usu omninò abstinendum; vidi equidem, licet raro, febres ipsâ æstate ita

contu-

contumaces, ut remediis quibuscunque obfisterent; eas vero naturæ commisi, diætæ solummodo rationem habendam curavi, levique remedia viscerum functiones juvenia præscripsi; fuit ubi plus sic profecerim, quàm aliâ quâcunque methodo.

Uti in iis febribus, quæ per certum tempus reluctantes vix abigi possunt, præcipua est methodus hæc; ita in iis quæ recens exortæ & fugatæ relapsum minantur, alia ineunda medendi ratio; cùm enim stent vires, nec febris adeo altas egerit radices, ad præparantia remedia revertere tutius erit; unde, si fieri possit, nec evacuanti-
Nota bus nec diluentibus parcendum; ita sublatiis quæ supersunt impedimentis, febrifugis absque fructu adhibitis dabitur locus; variè tamen pro variis febribus aut pro diversâ symptomatum naturâ usurpanda sunt hæc remedia.

Sint v. g. ægri qui jam à febre aut paroxysmis liberi, vigiliis pertinacibus, aut acerrimis conflentur capitis doloribus; non intermittenda tunc remedia, sed potius urgenda sunt, prout urgent hæc symptomata; & quidem in universum iis vigentibus sublatam esse febrim credendum non est, sed potius in caput conversam esse veneni febrilis vim; postquam enim sedem ita commutavit, iterum in solitam
paroxif

paroxysmorum erumpit incandescentiam.

His ita se habentibus è capite evocandus est stimulus ille febrilis; nil autem id melius præstare posse quàm sanguinis è saphenâ missionem, apud plerosque observavi ægros; eâ tamen solâ non absolvi poterit curatio; unde ut tuta certaue sit, ad emesim iterum confugiendum credidi; deinde verò ad juscula laxantia & aperientia deveni, & tandem addito iis tartaro martiali solubili, rem omnem, ut plurimum, posse confici mihi innotuit; si quando ad kinamkinam confugere opus fuerit, rite adhibitum hoc remedium brevi omnino tempore curationem absolvit.

Nota

Non minùs aliquando faceffunt negotiũ sudores, quibus diffuunt ægri, curatis febribus aut sublatis paroxysmis; si autem ex imperfectâ, ut solet, oriatur curatione hæc illuvies, feбри malè curatæ propria remedia adhibenda sunt; in hunc scopum aliquando, si non inveterata esset, si vigerent ægrorum vires, aut quæ præmittenda sunt neglecta fuissent, ad venæ sectionem recurrere non dubitavi, nec quidem absque fructu; tunc haud dubiè hærebat in visceribus stimulus, & sedatâ irritatione, melius se habuere omnia.

Sed alia insuper sunt adhibenda remedia, quæ refrænandis sudoribus statim ap-

tiora videntur ; evacuantia nempe succos exundantes à corporis ambitu revocantia ; non multum tamen hæc proficient , nisi obstructionibus viscerum prospiciatur , & bilis tum urinæ secretioni & excretioni consulatur ; non interim prætermittenda quæ æstum internum temperare possunt ; est enim , ut plurimum , in sudorum profluvio ardor interna deurens , & acrimonia partium textum stimulans.

Alia est in febrium exitu causa quæ sudores movere potest , natura scilicet sanguinis , aut partium debilitas ; diversâ ergo methodo his occurrere necesse est ; statim quidem libera sit alvus oportet , ut & urinarum via ; sed corroborantia , aut quæ deperditum fibrarum tonum restituunt , præcipua sunt curationis instrumenta ; hinc cortex peruvianus , aut tinctura ejus vino extracta plerumque sufficiunt ; aut denique sola juscula amara cum tartaro martiali solubili rem omnem penitus conficient ; magis hæc proficua erunt , si addatur exercitium , quod solum , non neglecto interim regimine , circulationis & vasorum vim posset restituere.

Difficilius sanè est certis mederi affectibus , qui impendentem continuo minantur febrim ; eâ nimirum repressâ remanent aliquando anxietates perpetuæ , ciborum fastidium ,

dium, marcor & virium dejectio; morbi denique malè curati signa undique se produnt, idque in vultu præcipuè; lividus enim est subluteusque ejus color; hæc omnia mihi in quâdam potissimum occurrerunt epidemiâ, quæ hîc loci magnam edebat stragem; recrudescabant ut plurimum quæ curatæ videbantur febres; difficilè omnino inde emergebant ægri; non pauci verò tandem confecti in diarrhœam putridam, aut in dysenteriam incidebant; quin imò erat ubi lethalis copiosusque erumperet sanguinis effluxus.

His autem & feбри obviam ire non licebat, nisi exularet cortex peruvianus; eo exasperari solebant omnia; marcori, virium dejectioni, stomachi hepatisque affectibus sola aperientia & deobstruentia occurrere poterant; diarrhœam putridam non nisi leniter evacuantibus refrigerantibus & antisepticis refrænare fas erat; symptomata dysenterica similiter peculiarem ipsisque propriam sibi vindicabant medendi methodum, id est lenientem & leviter evacuantem; non alia conducere poterat adversus acriorem bilem aut sanguinem in vasis meseraïcis antea stagnantem, & per intestinorum ductus sibi vias aperientem.

Cùm tandem ejusmodi adhibitâ curandi ratione mitiora fierent aut evanescerent

adeo tetra symptomata, non audebant quidam corticem peruvianum iterum exhibere; exspectabant nimirum donec natura, aut tempestatis mutatio morbi absolverent curationem; sed nimium illi remedii hujus vim reformidabant; tutò aliis præmissis usurpari potuit, nec profectò ipse, sive perseveraret febris, sive ea abscessisset, ad illud veluti ad certum auxilium confugere dubitavi.

Fatendum interea, alia remedia quandoque esse usurpanda; erat v.g. æger qui febre intermittenti in hecticam abeunte laborabat; depascebat totum corpus degener febrile venenum, marcore ferè absumpta exaruerant membra, sicca & veluti squamosa rigeat cutis, serotinis horis incandescebant omnia, pulsus erat admodum frequens; tunc autem, cùm nil prodesset nec naturæ res committi posset, antimonialis remedii vires tentare non absolum visum est.

Nota Propositum scilicet erat perspirationem in exsiccata cute restituere, & obstructa viscerum referare colatoria; in hunc autem scopum refracta vini stibiati dosi, pluries per diem repetita, ita ut vomitum non moveret, peropportuna visa est; ecce autem post aliquot dies omnia in melius mutari incipiunt; decidunt ex totâ corporis

pōris superficie squammæ furfuraceæ; ma-
dore perfunditur universa cutis, interanea
similiter in officium redeunt; absque ullo
denique alio remedio, absque vomitu &
quâvis dejectione, evanuit febris.

Summa est in ejusmodi remedio ener-
gia; non quidem quia vomitum ciet aut
alvum dejicit, sed quia si minimis atque
repetitis ingeratur dosibus, in minima vas-
cula & in nervos peculiarem exerit vim, *Nota.*
secretionum fontes aperit, liquidorum vitia
emendat: patent eæ antimonii vires in
ipsis animalibus; summè proficuum est sui-
bus, ut observavit *Basilius Valentinus*, &
docet experientia; non minùs efficax ob-
servatur in variis equorum morbis, nam
per eorum cutem nōxios humores expur-
gat; idem autem in corpore humano præ-
stabit, si rite in usum vocetur.

Paratur optimum vinum stibiatum ex vi-
tro antimonii & vino hispanico; hujus au-
tem si assumatur drachma perspirationem
movebit, si drachmæ duæ exhibeantur de-
mittitur leniter alvus, si verò drachmæ tres
ingerantur vomitum unâ vice & absque
anxietate concitabit; id saltem ita se ha-
bebit ut plurimum; sed de eâ dosi hîc non
agitur, verùm de multò minori: certum
est quod si guttæ aliquot identidem usur-
pentur, multa possint præstare quæ ab aliis

frustra expectarentur; jam autem ad varios effectus febris redeamus.

Egimus jam de aquosis aut flatuosis tumoribus, qui per febris decursum, eâque vigente se produnt; sed, uti aliàs dictum est, eâ curatâ turgent sæpissime infernæ partes; ex ejusmodi autem tumore, si rite adhibita sint remedia, & veneni febrilis vis perfectè devicta sit, nihil omnino metuendum; se proripit enim sponte, redintegratis viribus, aqua in textu cellulari collecta; si tamen ejus multa fuerit copia, aut diutius ob fibrarum laxitatem in hujus textûs hæserit receptaculis, diuretica & quæ partium tonum restituunt adhibenda sunt.

In hunc autem scopum juscula ex amaris aperientibus cum tartaro martiali solubili in usum statim vocanda sunt; iis scilicet eximiæ insunt vires ad tollendam aut præcavendam colluviem; vinum etiam juniperinum cum sale martis Riverii idem præstare poterit, ut mihi multis constitit experimentis; non sola sunt tamen hæc remedia quæ usurpari possint; fuere qui & alia feliciter adhibuerint, ut cinerum genistæ lixivium; non multum autem interest inter remedium hoc & aquam Riverii febrifugam, quæ sale tartari in aquâ soluto constat.

Hæc quidem expugnandis febrium pertinacium

nacium reliquiis egregiè inferviunt; at omnium instar visum est vulgare remedium, nullo apparatu commendatum, nec ideo minoris pretii; cùm arcani nomine venditaretur, hoc experiri jussi sunt Medici fide dignissimi; non solum in febribus recens exortis, sed in inveteratis, viscerum obstructions minantibus, leucophlegmatia stipatis universali, instituta sunt experimenta; quod verò non expectari posse videbatur, ex omnibus ægris, qui ejusmodi remedio uti sustinuerunt, nullus fuit qui perfectè non restitutus sit; quid autem tam proficuas exercuit vires? cortex peruvianus cum nitro, cum sale ebsamenfi, cum sale centaurei minoris & tamarisci in opiatam operisyrupi de absinthio concinnatus: cavendum interim ne alcalicis salibus inducatur calor noxius, & ne iisdem acrior stimulus, stomacho & intestinis admotus, turbas cieat; unde sal ammoniacum cæteris admiscendum censuerim; ita temperatur ipsorum vis & Sylvii sal febrifugum exoritur.

Aliquando autem non leucophlegmatia, aut tumor infernarum partium, sed verus hydrops ascites feбри succedit intermittenti; at faciliè omnino, ut plurimum, curari solet, atque id quibuscunque ferme remediis; subductam aquam ex abdomine, ipso mercurio dulci memini; aliàs verò purgantibus

vel hydragogis, vel diureticorum vulgarium usu sublata est colluvies; in genere tamen modò memoratis laxantibus, diureticis & deobstruentibus feliciùs tollitur; si quandoque difficilior sit curatio, id morbi diurnitati, vel obstructionibus viscerum tribui debet.

Sed occurrit hîc non parvi momenti quæstio; num scilicet adversùs ejusmodi tumores cortici peruviano quædam insint vires? & primò quidem memini me olim illius decocto additis purgantibus illuviem cutaneam & asciticam sæpius feliciter sustulisse; non tamen in quâcunque ejusmodi exundatione purgantium invocare auxilium necesse fuit; in pulverem redactum febri-fugum hoc quendam hydrope laborantem brevi restituit; ita ut in eodem ægro vim purgantem & diureticam exeruerit; alteri similiter tumentis, & febris obscuras reliquias ab aliquot mensibus trahenti, optimè cessit idem remedium, cum antimonio diaphoretico conjunctum.

Inde ergo patet hydropem ex febre intermittenti ortum, eidem atque ipsam febrem subjacere remedio; non solum autem, laxitatem vi tonica emendando, operam præstat, sed ipsum febrile venenum subigendo; venenum inquam, quod, per varias partes diffusum, aqueam invexit colluviem; reli-

reliquum est solummodo, ut quâ ratione exhibendum sit ejusmodi remedium statuamus; atqui cum aperientibus & laxantibus ingestum facilius stagnantem in textu cellulari aquam in circuitûs vias revocabit, è cavis eâ turgentibus educet, obstructa reserabit vasa, febriles motus compescet, eosve præcavebit.

Nihil impedit tamen quin diuretica simul usurpentur; imò ab iis initium fieri potest; vidi hominem jamdiu quartanâ, eâque neglectâ laborantem; intumuerat autem totum corpus; ut verò urgentiori malo occurreret Medicus, ad remedia quæ urinas educerent statim se convertit, nec quidem infelicitè; similem aliàs effectum, mihi non rarò observare licuit.

Talia sunt quæ adversùs febriles reliquias, aut certos affectus cum eisdem incedentes mihi usu comperta sunt remedia; si in iis præscribendis de cortice peruviano aliquando siluerim, non idcirco illius usum penitus ablegare mihi mens fuit; si enim febris non ritè curata fuerit, si metus sit ne lateat in visceribus ejus fomes, si denique præmissa fuerint quæ ad hunc extinguendum præmittere necesse est, nequaquam à præstantissimo hoc febrifugo abstinere licet; cum evanuerint enim impedimenta, aut mitiora evaserint quæ impugnantur,

394 LIB. IV. CAP. XIII.
gnantur symptomata, hoc remedio perficienda aut firmanda erit curatio.

C A P U T XIII.

De curatione febrium intermittentium malignarum.

MULTO minùs à cortice peruviano abstinere licet in febrium intermittentium decursu, si eæ mali moris fuerint; sed in iis duplex ineunda medendi ratio; alia scilicet instituenda est in paroxysmorum ferociâ, alia verò in eorum declinatione, seu in eorundem intermissâ vi; cùm enim à febris naturâ aliena sint quibus stipatur symptomata, illis & febrili causæ peculiariora conducunt remedia.

Sensit hoc, ut jam diximus, *Ludovicus Mercatus*, qui de his symptomatis primus fusè egit; propiùs dein ad curationem accesserunt *Mortonus* & *Terti*, qui omnem absolverunt curandi methodum; nos verò hîc quæ experienciâ propriâ docti sumus breviter exponemus.

Non singula quidem quæ occurrunt symptomata prosequemur, sed præcipua tantummodo, & quæ adversùs eorum vim usurpari

pari possunt remedia attingemus ; & primò quidem , cùm impetitur caput , cùm instat delirium , aut urget apoplexiæ , lethargi , vel comatis species , peculiaris adhibenda medendi methodus ; observatum autem est sæpissime , quod venæ sectio , veluti uno ictu , hoc symptoma sustulerit ; non minùs hæc conducit in doloribus acerrimis , in rheumaticis v. g. cruciatibus , in ventriculi aut intestinorum torminibus , in pectoris oppressione ; observandum tamen ut in iis adhibeatur ægris in quibus stant vires , vel non collabatur vitalis spiritus.

Emeticis & purgantibus similiter suus potest esse locus ; in quâdam epidemiâ , ipso febris initio , memini post venæ sectionem vomitum concitasse , idque non infeliciter , ut mali moris ingruentia averterem symptomata ; si verò jam prodiissent , ea iisdem impugnabam remediis ; in aliâ verò ejusmodi constitutione , quæ caput imprimis impetebat , postquam tentata erat emesis & simul laxata alvus , statim evanescebat lethargi aut apoplexiæ species , quæ summum incutiebat terrorem ; imò minùs profuisse venæ sectionem quàm cathartica constanter observavi ; non equidem me latet *Sydenhamo* secus visum ; sed ut ipse , ita & ego magistræ experientiæ plus quàm authoritati tribuendum existimo.

Nec

Nec quidem solummodo in hoc casu multum opis attulisse ejusmodi remedia testari possum; sed cum syncope aliquando velut exanimes conciderent ægri, ipso paroxysmi initio, cum alii convulsione tentarentur, cum quidam aphoni essent, vomitum audacter concitari posse credidi; tunc interea vinum stibiatum, cum addito lilio Paracelsi, aliis emeticis anteferendum videtur; non minus hoc remedio in anæsthesiâ exsuscitari potest vitalis spiritus, si per cætera liceat.

Eum scilicet scopum sibi proponat oportet Medicus, ut insignem quandam mutationem machinæ animalis motibus inducat; unde vigentibus per artus doloribus, ægrosque excruciantibus, succussione partium internarum occurri posse crediderim; quin imò in certis abdominis affectibus, ut in tubi intestinalis cruciatu, nisi fortè acrior fuerit, eodem remedio utentes improbare non sustinerem; prodest id in acutissimis dysenteriis; quare obesse credi posset in febrili symptomate, quod desinente paroxysmo desinit; & ideo multum ab inflammatione abesse censendum est; at hoc prudentiæ opus & labor est.

Alia remedia multum absimilia, ut vesicatoria v. g., prætermitti nullatenus possunt in variis affectibus, veluti in hac apoplexiæ

plexiæ specie de quâ egimus, in lethargo, & comate febrili; non minùs hæc conferunt in iis paroxyfmis, in quibus sine motu & sensu jacent prostrati ægri; quod verò minùs fortè videbitur conducere, in certis doloribus acutissimis idem tentare remedium non veritus sum; cùm enim ut plurimum spasmodici sint, fieri potest motuum revulsio aut derivatio ex unâ in aliam partem; quin imò idem succedere aliquando in pectoris oppressione mihi experiëntiâ notum est.

Narcoticorum usus non minùs commendatur, tum ipforum naturâ, tum experimentis, tum variorum symptomatum sævitiâ; dolores quidem rheumatici atrociter sævientes illa statim postulant remedia; at in doloribus viscerum, ut stomachi & intestinorum, ea prætermittere piaculum sæpe esset; his compesci possunt diarrhœa & vomitus, quibus aliquando in summum discrimen conjiciuntur ægri; hoc interim observandum, ne solum exhibeatur opium; aromaticis misceri & iis veluti acui debet, ut in theriacâ & laudano liquido Sydenhami; potest etiam exhiberi cum spiritu minerali anodyno, qui solus anxietati & ventriculi subversioni mederi potest.

Ut autem multùm conferre possunt remedia hæc ad variorum symptomatum curationem,

Nota.

rationem, ita adversus aliorum vim eadem exhibere nefas esset; cum v. g. apoplectici vel lethargici videntur ægri, cum impetitur in iis vitalis spiritus, obtunditur sensuum vis, frigent partes, deprimitur pulsus, vel se omnino tactui subripit, tunc, inquam, exitialis esset narcoticorum usus; exsuscitandæ sunt potius vires ut expellendo aut subigendo febrili veneno natura impar non sit.

Non agam hîc de diluentibus aut lenientibus, quæ ad tollendam irritationem conferunt, & cuique intuenti patent; non magis motum exsuscitantibus & excalefacientibus immorari necesse est; liquet enim quàm necessaria sint in spiritûs vitalis prostratione, in pulsûs summâ depressione, in algore quo veluti marmoreum fit corpus; ut autem cum majori fructu exhibeantur remedia, non minus quidem ad symptomata, quàm ad eorum causam respiciendum; est ea ut toxicum quo inficiuntur liquida, & quo perturbantur variæ partium functiones; videndum ergo quid deleteriæ huic causæ possit obistere, donec sponte remiserit ejus vis, & inducias concedat.

Postquam autem deserbuit paroxysmus & mitiora evaserunt symptomata, adest tempus febrili dicatum antidoto, cortici nimirum peruviano; illius quidem decoctum exhiberi posset, sed metuendum ne sat larga ejus copia ingeri possit, aut ne renuant ægri; in tam
præci-

præcipiti ergo morbo ad pulverem confugiendum, vel potius ad extractum aqueum, de quo toties egimus; nec quidem reformidanda certa ejus dosis; si enim levior sit, scopum non attinget; enitendum ergo, quandoquidem summum instat discrimen, ut obruatur febrile venenum; unde ad drachmam unam extracti hujus assumat æger oportet, eademque dosis bis aut ter, prout res feret, ante paroxysmi adventum repetenda.

At occurrit hîc quæstio expendenda, num scilicet misceri possint aut miscenda sint cum cortice peruviano purgantia? hæc profectò non aliena erunt in capitis affectibus, imò cum in pectus recidit morbi vis adhiberi poterunt, ut & in doloribus rheumaticis per artus dispersis; nec quidquam profectò tunc impedit, quin & ipsa apozemata laxantia & febrifuga in usum vocentur, si satis supersit temporis; laxetur tamen potius quàm expurgetur alvus oportet, ne hâc viâ diffluet cortex ejusque vis; intendendæ sunt præsertim medicaminum vires in febrile venenum, cujus retundendus impetus.

Non ita licet in variis alterius generis affectibus alvum movere; cum v. g. ventriculus aut intestina omnem excipiunt feruntque morbi vim, à purgantibus desistendum; imò si adsit diarrhœa, refrænanda est alvi laxitas; non minùs absolum esset purgantibus febrim

infe-

Nota.

insequi, vacillante spiritu vitali, aut cùm frigore omnis calor veluti ad interna retractus ab extremis recessit partibus; tunc potiùs aromatica, ut serpentaria virginiana, in usum vocanda, & cortici addenda, ut acuatur ejus vis, & per omnium partium recessus faciliùs deferri possit; in hunc scopum cum vino remedium hoc sæpius exhibere mihi contigit.

Secunda occurrit quæstio eaque non minoris momenti, utpote ad morbi discrimen propiùs spectans; quæritur nimirum num ad exhibendum corticem semper expectanda sit paroxysmi remissio; & quidem si motus febrilis intensior non sit, sed contra adsit virium prostratio & pulsus debilitas, si non magna urgeat in ventriculo aut intestinis irritatio, si denique per symptomatum vim liceat, non liquet profectò quare in re tam ancipiti, non exhiberi possit cortex, aut solus, aut cum quibusdam conjunctus remediis; licet intermittere soleant symptomata, incertum est an futurum sit, ut brevi discedant aut mitiora fiant; interim instat periculum, & per consequens antidoti exhibendi certa necessitas; oportet tamen ut febris acriùs non urgeat.

Ne autem incertus dubiusque inter impedimenta hæreat animus, hæc omnia ad quædam reducemus præcepta: 1^o præ oculis semper habendum ægrorum discrimen, quod aliquando impensè urget; 2^o non de abigendis certis

certis symptomatis per remedia ipsis aliàs propria cogitandum solummodo, sed præcipuè de retundendâ febrilis veneni vi, & de obtinendis induciis; 3^o majus est in morâ periculum quàm in cortice peruviano adhibendo; unde non ita spectandum num calorem concitet, aut quid aliud sequatur ex eo quod aliquatenus noxium esse possit; 4^o tentanda quidem quæcunque in subsidium cum eo febrifugo vocari possunt, sed abigenda quæ ejus vires possunt infringere; 5^o cavendum imprimis ne parcior ejus exhibeatur dos, brevi enim scopum attingat necesse est.

CAPUT XIV.

De curatione febrium remittentium vulgarium.

EA est medendi ratio quæ in febribus intermittentibus servanda est: jam verò ad remittentium curationem transeundum; sunt autem eæ varii generis, ut diximus, seu potius varia est earum vis variusque decursus; si multæ sint quæ graviori non ferantur impetu, nec naturæ vires superare videantur, aliæ sunt, eæque etiam multæ, quibus universa perturbatur animalis œconomia; in iis sæpe exsurgunt

symptomata inexpectata & periculosa , de quibus jam egimus.

Licet ergo eundem atque intermittentes habeant fomitem , eandemque causam quæ remittunt febres , videndum num eandem , an potius diversam , postulent curandi methodum ; eam profectò instituere non rarò arduum est , multisque è causis oritur hæc difficultas ; unde iis expendendis immorari necesse est , ut firmiora curæ jaciantur fundamenta.

Quod statim negotium facessit , est remedium adhibendorum natura eorumque usus ; continuæ enim sunt ejusmodi febres , quandoquidem in iis nulla intermissio ; non alia ergo in iis statim occurrit medendi ratio , quàm quæ continuis dicata est ; atqui respuuntur ab iis omnia febrifuga peculiariora , eaque imprimis quæ tonica sunt , amara , adstringentia , calorem inducentia ; alienus ergo videtur à febre remittenti cortex peruvianus ; si enim febres ipsas verè intermittentes exacerbare soleat , cùm earum protrahuntur paroxysmi , & magna est ipsarum vis , an proficere poterit in febris continuo vigentis decursu , licet aliquando remissior sit ejus impetus ?

Cùm tamen è genere intermittentium sint ejusmodi febres , an fieri potest , ut remedia omninò diversa postulent ? an poterit

terit esse omnino adversum, quod earum subigendæ causæ, ipsique eliminandæ est aptissimum? ut ergo hæc omnia, quæ sibi adeo videntur adversa, componantur, altius respiciendum; videndum scilicet an adeo diversa sint remittentium symptomata, ut iis curandis diversâ omnino viâ incedendum sit.

Non tantopere dissident ea nisi primâ fronte; imò consentit in plerisque intermittentium & remittentium curatio; ut enim in intermittentibus, si dum vigent paroxysmi, ingeratur cortex, noxius omnino est; ita similiter in remittentibus, si in paroxysmorum impetu exhibeatur, res in pejus ruere solent; expectanda nimirum remissio, ut ægris succurrat remedium hoc; & ante expurgatæ sint oportet primæ & secundæ viæ; his enim turgentibus, vel adstrictâ alvo exacerbabitur febris.

Hoc tantummodo inest discrimen in earum febrium curatione, quod in remittentibus deferbeat tantummodo febris; non tantum scilicet conceditur temporis ad eam impugnandam; calor intensius urget; non ita expedita est secretionum via; difficilius ergo tolletur morbosus fomes, sed detrahi potest aliquid ex eo, infringet ejus vim cortex, si non penitus eam sustulerit; demonstratur id & ratione simul & experienciâ; cer-

tæ ergo sunt, licet debiliores, in eum fomitem ejusque effectûs illius febrifugi vires; occurrendum solummodo impedimentis, eaque quantum licet amovenda sunt.

Eò magis conducit cortex, quòd præcipuè in prævertendos paroxysmos, aut in infringendum eorum impetum soleat impendi ejus vis; inde ergo patet, quòd licet ii acerbiores sint, possit adversus eos in auxilium vocari remedium hoc; imò eorum ferocia id tantò magis postulare videtur; calorem equidem augere poterit, nec tollet statim ut in intermittentibus febrilem fomitem; sed urgentiori malo succurrendum; magis noceret febris impetus quàm medendi ratio; perinde se res habet ac in pleuritide v. g. cum febre intermittenti conjunctâ; dubium profectò non est quin pulmone ita affecto noxius sit cortex peruvianus; quia tamen febris intermittens retundit vim, periculùmque ex paroxysmis impendens avertere potest, in usum vocari debet.

At sunt certæ leges quibus subjici debet febrifugum hoc; & primò quidem ne exhibeatur oportet, nisi certum sit adesse febrim, quæ è genere sit intermittentium; patet ex quotidianis Medicorum apud ægros jurgiis, quàm sæpe difficile sit earum morem aut ingenium dignoscere; gnari sciunt

sciunt scilicet non sperandum in ejusmodi febribus à cortice peruviano levamen, si aliâ ex causâ processerint; sunt equidem minùs providi, qui quoties graviùs exacerbata, idque certis temporibus, observaverint febrem, toties per corticem peruvianum ei occurri posse existiment; atqui tamen ut noxius esset in morbis inflammatoriis, licet aliquando statis horis graves insurgant exacerbationes, an magis conducet in variis febribus, quæ non minùs ab intermittentium naturâ abludunt.

Non tamen quoties ex intermittenti fomite ortum ducit febris, toties adversùs paroxysmos proficius est cortex peruvianus; si in verè continuam v. g. mutata est febris intermittens, aut ejus ab initio speciem præ se ferat, hæc continuarum simplicium remedia postulat; ita fit in universum, ut tandem remittat vel in intermittentem veram redire aut abire cogatur; aliquando verò perfectè curatur ejusmodi remediis; imò, quod alicujus est momenti, non rarò observavi intermittentis febris fomitem & causam feбри continuâ superveniente omnino deleri.

Non absimili admodum ratione feбри duplici tertianæ continuæ suis periodis distinctæ, nec ab ingenio suo ita aberranti aliquando occurrendum; est ubi hæc ad

undecimūm, decimūm quartūm, imò ad vigesimūm diē excurrat, magnaque, licet remittat, sit ejus vis ante paroxysmos; atqui eā sic vigente non potest exhiberi cortex peruvianus; summūm enim æstūm inducit, & vim febrilem intendit; exspectandum igitur donec remissior sit febrilis impetus; videndum est solummodo num gravius impendeat periculum, & num morbo ferendo impares sint ægrorum vires.

Sunt equidem qui voluerint hoc tentari remedium, eā tamen lege, ut si non successerit, statim prætermittatur ejus usus; nonnulli verò versùs duodecimūm tantummodo diē exhibendum censent, sed errant utrique; incerta tentari non debent, nec præfigendum remediis tempus quod non certò præfixit natura; satius est ejus ductūm sequi, eique laboranti opem ferre, prout ipsa postulat.

At multæ occurrunt febres remittentes, in quibus paroxysmi seu exacerbationes magno insurgunt impetu, ægrosque in summas adducunt angustias; tunc autem alia omnino ineunda est via, & gravioris tantummodo periculi habenda ratio; febrifugum scilicet audacter exhibendum; nec profectò formidandus ipsius usus, quia fortè levior erit remissio; satis erit si aliqualis sit; videndum tantummodo num quid huic

huic remedio fit admiscendum ; & quid aliorum remediorum operâ simul molendum fit.

Quod successisse ut plurimum observavi ; est emeticum mitesciente paroxysmo exhibitum , deinde verò apozema febrifugum cum laxantibus & aperientibus concinnatum ; ita tamen , ut brevi tempore effectum suum edere possit ; sic in genere mitiora fieri solent omnia ; mitiora inquam , nec enim in ejusmodi febribus expectandum , ut tollantur penitus paroxysmi veluti in febre intermittenti ; sensim tantummodo , ut plurimum , se proripiunt , eorumque vis concidit ; sæpe tamen in intermittentium classẽ brevĩ redeunt , non quidem tertianarum aut quartanarum in genere , sed duplicium tertianarum more incedunt statim hæ febriles reliquiæ.

Exemplis quibusdam hæc omnia in clariori reponentur luce ; erat Sacerdos qui febre statim abnormi correptus fuerat ; ea dein ita incessit , ut verè continua esset ; unâ quidem die , licet gravis , mitior esse solebat ; at alterâ tanto insurgebat impetu , ut ejus vim superari posse non videretur ; tunc autem copiosus è saphenâ missus est sanguis , & , cùm illuxit quædam remissionis species , apozema laxans & febrifugum adhibitum est ; eo statim ferme fracta est

morbi vis, & quotidie multum de eâ decessit; sic brevi omnia in naturalem statum restituta sunt.

Similis ferme fuit fœminæ casus, quæ statim intermittente laborabat feбри; cùm ea neglecta in continuam gravissimam abiisset, per unam diem minus graviter procedebat, alterâ verò summum in exacerbatione instabat vitæ discrimen; tunc autem in venæ sectione & cortice peruviano unica spes reposita videbatur; non facilè quidem remisit morbi acerbitas, de eâ tamen non ita multò post aliquid detractum esse visum est; at paulatim demissâ alvo concidit paroxysmorum vis, & in melius abierunt omnia.

Sæpius autem occurrunt ejusmodi febres, in quibus ita protrahuntur paroxysmi, ut alius alium ferme attingat, & brevissima intercedat remissio; non possunt ergo adhiberi apozemata, cùm longius temporis spatium postulent; ideo ad corticis pulverem recurrendum, seu potius ad extractum ejus aqueum; ipsius drachma pulveris circiter unciam unam æquat, unde repeti possunt faciliùs ejusdem doses necessariae, & ita in tuto collocari ægri; tunc autem, si uspiam, extractum illud cum pulvere temperanti aut arcano duplicato admisceri præstat; nam restinguatur deurens calor,

&

& si fieri possit, laxetur alvus oportet, ideoque largiori copiâ exhiberi debent.

CAPUT XV.

De febrium continuarum remittentium quæ mali moris sunt curandi methodo.

UT intermittentes malignæ, ita & continuæ remittentes cortice peruviano expugnandæ sunt; pendet autem ejus remediî administrandi ratio ex febris naturâ, ex symptomatum vi, ex breviori aut longiori remissione, ex alvi laxitate aut adstrictione; sed in tantâ rerum varietate, quid singuli casus sibi vindicent definire non licet; statuemus solummodo in genere duplicium tertianarum quæ continuæ sunt, & remittentium malignarum non adeo diversam esse curationem; magis solummodo in istis urgenda sunt remedia; cùm enim tantum impendeat discriminis, statim, si fieri possit, veneno febrili occurrendum.

Ideo in certis præcipuè epidemiis, in quibus graviora esse solent omnia, exitio esse potest vel minima temporis jactura; morbum ergo, si liceat, præcavere aut avertere prima artis lex est, ut ejus non
ex-

expectetur insultus; cum mihi in quibusdam impendentem febrim prævidere contigisset, eos sæpius ab ipsâ immunes præstiti; alios verò, cum jam decubuissent, brevi providâ curâ restitutos observavi; vel levissimâ symptomatum mali moris prodeunte specie omnes quantum licuit remediis valentioribus addixi; ita autem plerique imminenti periculo exempti, non ita multò post convaluerunt; mirum sanè quàm facilè solis emeticis aut purgantibus, initio post venæ sectionem adhibitis, mitescant paroxysmi, qui deinde specificis vix possent refrænari.

Sin autem maximè urgeant symptomata, eò impenius in iis debellandis allaborandum; & primò quidem, generalia, quæ dicuntur remedia aut quæ curationi viam sternunt, in auxilium statim vocare oportet; deinde verò specificis febrem aggredi necesse est; in constitutione quâdam à gravissimis symptomatis fieri solebat initium febribus; si autem illis brevi occurrere non tentarent Medici, nullus deinde arti locus erat; tertiâ aut quartâ exacerbatione de medio tollebantur ægri; hoc casu frequentius occurrente deterritus, ad venæ sectionem & emesim, breviori interjecto temporis spatio, deveniendum judicavi; deinde verò, ut primum licuit, ad specificum confugi medicamentum.

Illud quidem nullis aliis cum eo usurpatis sæpiissime sufficit, idque imprimis si stomachi & alvi expurgationi consultum sit; sin minus verò, atque interim gravius urgeat morbi vis, quæ alvum laxent simul, si liceat, exhibenda sunt; cùm in epidemiâ modò memoratâ summum esset in morâ periculum, statim sæpe post venæ sectionem solo apozemate febrifugo & laxante usus sum, idque dum penitus conciderent symptomata.

In plerisque tamen pulveratum corticem cum arcano duplicato magis proficuum duxi; mens scilicet erat, sanguinem intra breve temporis spatium sufficienti ejus remedii copiâ imbuere, tum aperienti & purganti salis stimulo vias omnes aperire.

Sed cùm ejusmodi tradimus præcepta, supponimus per morbum quantumvis gravem licere, ut de subsidiis purgantibus cogitemus; tam atrocia interim exsurgunt symptomata, ut de veneno febrili obruendo tantummodo nos oporteat esse sollicitos; nisi statim retundatur ejus deleteria vis, de ægris non rarò actum est; unde febrifugum solum, quantum fieri potest, aliquando ingerendum, nullo alio ipsi admixto medicamento; resederit oportet tam periculosi morbi furor ut laxandis excretionum organis incumbamus.

At

At iterum, ut jam diximus & per se patet, purgantibus alias ob causas non est semper locus; non solum in variis viscerum affectibus, cum sæviunt v. g. dolores ex febre orti, ableganda sunt quæcunque stimulant; at ipsa irritatio quamprimum compescenda est; equidem cortice peruviano tollitur febrilis veneni stimulus, licet tantopere stomachum & intestina aliquando urgeat, insuper tamen narcoticis seu anodynis opus est; conducunt ea imprimis in vomitu pertinaci & stomachi doloribus; è contra verò variis in ægris spiritui animali sunt restituendæ vires.

Non autem hîc de noxiâ aliquando corticis vi cogitandum est; præ oculis habendum solummodo ferme quod instat discrimen; malo graviori, ut diximus, occurrendum; cum verò mitescere incipiet, multorum, quæ prætermittere opus fuit, poterit haberi ratio; nec quidem ejusmodi medicamenti usum solummodo urgere oportet, ejusdem aliquando acuenda est vis, tum aromaticis tum volatilibus; in anæsthesiâ v. g., in pulsûs depressione, in algore qui totum invasit corpus, hæc, quæ aliàs nocere possent, quia calorem concitant, nequaquam metuenda sunt, imò ut omnino necessaria habeantur oportet.

Certam ut plurimum hanc medendi ratio-

tio-

tionem experientia , tuta verò fidamque ipsæ corticis vires demonstrant ; est nimirum in eo ejusmodi energia ut , cùm febrile venenum per varias partes more insolito aberravit , id salubri hoc medicamento mutetur aut expellatur & veluti in fomitem suum revocetur : certum est saltem ita infringi ejus miasmatis impetum , ut ægrorum jam ferme animam agentium non molliatur perniciem , iique aliquando veluti exfuscitati reviviscant : at tanto nequeunt defungi periculo , nisi affatim exhibeatur cortex peruvianus , aut saltem multum augeatur dosis ; imò si ea scopum non attigerit , major protinus imperanda.

Quod tempus ei exhibendo opportunum attinet , exspectare quidem præstat , donec remiserint exacerbationes ; est tamen ubi diutius eæ protrahantur , nec de ipsarum vi quidquam ferme videatur decedere ; tunc verò præmissis præmittendis ad corticem audacter deveniendum ; eò minùs reformidanda ejus vis , quòd pulsus deprimi soleat , nec quidem , si ejus non ita essent depressæ vires , idcirco à febrifugo esset temperandum ; est id in tam ancipiti morbo , ut diximus , veluti sacra anchora , quâ solâ retineri & firmari potest vitalis spiritus.

Ut autem levior aut gravior est morbus , ita in ipsum corticis vis , modò major , modò

modò minor est, & citiùs aut tardiùs succedit; siquando statim ferme febrim tollat, est ubi sensim tantummodo de ejus ferociâ aliquid detrahat; multùm profuisse censerì debet si res ne in pejus ruant impediatur; non ergo, cùm optatum statim non attingit scopum remedium hoc, intermittendus est ejus usus, imò impensius sæpe urgendus est; videndum solummodo, num quod adsit quod averti possit impedimentum? num præmissa sint præmittenda? num sat missum sit sanguinis? num stomachus sufficienter expurgatus? num alvus demittatur? num denique specifico addenda addita fuerint?

Interea symptomatum, in quibus posita videtur omnis morbi vis, ratio imprimis habenda est; cortex equidem tanquam præcipuum adversus ea arcanum haberi debet; sed alia in iis non rarò adhibere oportet; quæ autem ad instituendam curam ducere possunt, ea ex iis quæ de febris intermittentis malignæ symptomatis diximus, repetenda sunt; referri hæc possunt ad quoscunque casus, qui in remittentibus mali moris solent occurrere; non aliud profectò inter utrasque prostat discrimen, nisi quod inter paroxysmos febrium intermittentium malignarum longius insit interval- lum, in eoque ægri mitiores experiantur febris reliquias.

At

At quò in iis oppugnandis symptomatis remedium prævideatur effectus, aut promoveri possint naturæ conatus, motuum criticorum imprimis habenda ratio; ii quidem magis conspicui sunt, cùm levioribus auxiliis sive remediis generalibus tentatur symptomatum curatio; at ii tardiores sunt, & interea in certamine adversus febrile venenum vires possunt deficere; per sudorum autem vias ut plurimum solet expelli, & ita certius se proripit; non enim sic judicata reviviscit febris: aphthas quidem *Mortono* sæpius memoratas me non observasse fateor; pertinebant forte ad regionem aut ad epidemiam peculiarem; per sedes verò & sæpius per urinas secessisse morbi causam edoctus sum.

Cùm usurpatur cortex peruvianus, minus quidem conspicua est crisis; occurrit tamen sæpissime, imò, si propiùs res inspicatur, etiam cùm abesse videtur ejus quædam vestigia reperire est; eâ autem manifestò prodeunte celerrimè judicatur morbus; videndum interim ne quibusdam decipiamur evacuationibus symptomaticis: hæmorrhagiam, vomitum, alvi fluxum adducit aliquando febrilium symptomatum vis, eâque morbum exasperari potius quàm solvi experientia docet.

Nota.

Quod verò tempus spectat quo cortice
pe-

peruviano tolluntur febres, cum tetrīs de quibus jam egimus symptomatis, id omnino varium esse potest; primâ die aliquando summum adest levamen, & evanescere videtur periculum; sæpissime intra biduum triduumque res confici solet, in certis saltem epidemiis; aliàs verò longiùs protrahitur febris, remanentve per certum tempus ejus vestigia; at de eâ semper aliquid detrahitur; si verò vel ipsis initiis nullatenus febrifugo attingatur morbi vis, metuedum sanè ne æger eâ tandem oppressus facto fungatur.

Ut meliùs pateret curandi methodus, plura congefferam exempla; sed his supersedere visum est; nulli sunt casus, qui iidem omnino sint, unde nullus est in quo eadem præcisè conducere possint remedia; fatius ergo videtur omnia quæ ex naturæ latebris protulit experientia ad certas leges revocare, ex iisque curandi rationem in singulis ægris deducere; hoc inest sæpe observatoribus vitium, ut dum omnia sensibus obvia colligunt, de doctrinâ his superstruendâ parum videantur solliciti; est ea tamen veluti fastigium, quod observationibus, ut proficuæ sint, superest imponendum.

F I N I S.

ERRATA.

- PAG. 40 l. 9 non urgeat; si *lege* non urgeat, A
 41 l. 17 primogenia *lege* primigenia
 43 l. 27 æqui *lege* æquè
 44 l. 14 leves *lege* leve
 56 l. 7 caloris *lege* coloris
 57 l. 13 crassiora sanguine *lege* crassiora a
 sanguine
 90 l. 15 excretionem *lege* ad excretionem
 123 l. 3 posita; tacitam *lege* posita, tacitam
 l. 6 est *lege* erat
 127 l. 26 prodeuntes; cum *lege* prodeuntes,
 cum
 130 l. 3 inducunt *lege* induunt
 162 l. 6 triplicium *lege* duplicium
 163 l. 9 piæ *lege* præ
 167 l. 6 variis *lege* varii
 172 l. 2 illa *lege* ulla
 194 l. 20 industria, confidere *lege* industria
 observata sunt, confidere
 201 l. 12 fit *lege* si
 216 l. 20 at qui *lege* atqui
 218 l. 23 petronis *lege* patronis
 227 l. 14 esus *lege* usus
 245 l. 19 calomela *lege* calomelas
 257 l. 7 experientia; insanum *lege* experientia,
 insanum
 l. 13 non magis *lege* atqui non magis
 l. 14 alia evacuantia *lege* ejusmodi
 262 l. 29 eâ invitâ *lege* ea invita
 306 l. 30 huic *lege* huc
 343 l. 13 cortici *lege* corticis
 367 l. 26 virginis *lege* virginibus
 379 l. 19 vocentur; ut *lege* vocentur, ut
 382 l. 19 lex quoscumque *lege* lex quæ quos-
 cumque
 413 l. 1 tuta *lege* tutam

111133

111133

111133

111133

111133

111133

111133

111133

111133

111133

111133

111133

111133

111133

111133

111133

B.th





